

Inches

4 3 2 1 0

centimeters

10 11 12 13 14 15 16 17 18 19 20



	1	2	3	4	5	6	7	8	9	10	11(A)	12	13	14	15
L*	39.12	65.43	49.87	44.26	55.56	70.82	63.51	39.92	52.24	97.06	92.02	87.34	82.14	72.06	62.16
a*	13.24	18.11	-4.34	-13.80	9.82	-33.43	34.26	11.81	48.55	-0.40	-0.60	-0.75	-1.06	-1.19	-1.07
b*	15.07	18.72	-22.29	22.85	-24.49	-0.35	59.60	-46.07	18.51	1.13	0.23	0.21	0.43	0.28	0.19

16(M)	17	18(B)	19	20	21	22	23	24	25	26	27	28	29	30	
49.25	38.62	28.86	16.19	8.29	3.44	31.41	72.46	72.95	29.37	54.91	43.96	82.74	52.79	50.87	L*
-0.16	-0.18	0.54	-0.05	-0.81	-0.23	20.98	-24.45	16.83	13.06	-38.91	52.00	3.45	50.88	-27.17	a*
0.01	-0.04	0.60	0.73	0.19	0.49	-19.43	55.93	68.80	-49.49	30.77	30.01	81.29	-12.72	-29.46	b*

D50 Illuminant, 2 degree observer

Density 0.04 0.09 0.15 0.22 0.36 0.51

0.75 0.98 1.24 1.67 2.04 2.42

Colors by Munsell Color Services Lab

Golden Thread

Don Williams





End

Ware & Estine: 4th 15th (1806)

ed or

Rep.

2.

4261820
01/2002
20

DISCOVRS AD- MIRABLES, DE LA NA- TVRE DES EAVX ET FON- TEINES, TANT NATVRELLES QV'AR- tificielles, des metaux, des sels & salines, des pierres, des terres, du feu & des emaux.

AVEC PLUSIEURS AVTRES EXCEL-
lens secrets des choses naturelles.

PLVS VNTRAITE' DE LA MARNE, FORT
utile & necessaire, pour ceux qui le mellent de
l'agriculture.

LE TOVT DRESSE PAR DIALOGVES, ES-
quels sont introduits la theorique & la practi-
que.

Par M. BERNARD PALISSY, *inventeur des rustiques
figulines du Roy, & de la Roynie sa mere.*

A TRESHAVT, ET TRESPVISSANT
sieur le sire Anthoine de Ponts, Cheualier des ordres
du Roy, Capitaine des cents gentils-hommes, & con-
seiller tresfidele de sa maiesté.

A PARIS,

Chez Martin le Icune, à l'enseigne du Serpent,
deuant le college de Cambray.

1 5 8 0.

AVEC PRIVILEGE DV ROY.

Axa 18


EXTRAIT DV PRIVILEGE.

PAR GRACE & priuilege du Roy est permis à Martin le Ieune, libraire & imprimeur en l'vniuersité de Paris, de pouuoir imprimer ou faire imprimer vn liure intitulé, *Discours admirables, de la nature des eaux & fontaines, tant naturelles qu'artificielles, des metaux, des sels & salines, des pierres, des terres, du feu & des emaux, &c.* Defendât a tous libraires, imprimeurs ou autres, de quelque estat qualité ou condition qu'ils soyent, de n'imprimer ou faire imprimer, vendre ne distribuer autres que ceux que ledit le Ieune aura imprimé ou fait imprimer, sur peine de confiscation des liures qui se trouueroyent autrement imprimez & d'amende arbitraire. Et ce iusques au temps & terme de huit ans finis & accomplis, sur ce donné à Paris, le huitiesme de Iuillet 1580.

Signé par le conseil,

Del'Estuille.





A TRESHAVT ET TRES-
puissant sieur le sire Antoine de Ponts,
Cheualier des ordres du Roy, Capitai-
ne des cents gentils-hommes, & conseil-
lér tresfidele de sa maiesté.

LE nombre de mes ans m'à
incité de prendre la har-
dieffe de vous dire qu'un
de ces iours ie considerois
la couleur de ma barbe, qui me causa
penser au peu de iours qui me restēt,
pour finir ma course : & cela m'à fait
admirer les lis & bleds des cāpagnes,
& plusieurs especes de plantes, les-
quelles changent leurs couleurs ver-
des en blāches, lors qu'elles sōt pres-

tes de rendre leurs fruits. Aussi plusieurs arbres se hastent de fleurir quand ils sentent cesser leur vertu vegetatiue & naturelle, vne telle consideration m'à fait souuenir qu'il est escrit: que l'on se donne garde d'abuser des dons de Dieu, & de cacher le talent en terre: aussi est escrit que le fol celant sa folie vaut mieux que le sage celant son sçauoir. C'est dōques chose iuste & raisonnable que chacun s'efforce de multiplier le talent qu'il à receu de Dieu, s'uyuant son cōmandement. Parquoy ie me suis efforcé de mettre en lumiere les choses qu'il à pleu a Dieu me faire entendre, selon la mesure qu'il luy à pleu me départir, afin de proufiter à la posterité. Et par ce que plusieurs souz vn beau Latin, ou autre langage bien poli, ont laissé

laissé plusieurs talēts pernicieux pour
abuser & faire perdre le temps à la
ieunesse : qu'ainsi ne soit, vn Geber,
vn Roman de la roze, & vn Raimōd
Lule, & aucuns disciples de Paracelse,
& plusieurs autres Alchimistes ont
laissé des liures en l'estude desquels
plusieurs ont perdu & leur temps &
leurs biens. Tels liures pernicieux
m'ont causé gratter la terre, l'espace
de quarāte ans, & fouiller les entrail-
les d'icelle, à fin de cōnoistre les cho-
ses qu'elle produit dens soy, & par tel
moyen i'ay trouué grace deuāt Dieu,
qui m'à fait connoistre des secrets qui
ont esté iusques à present inconnuz
aux hommes, voire aux plus doctes,
comme l'on pourra connoistre par
mes escritz contenuz en ce liure. Je
sçay bien qu'aucuns se moqueront, en


* 3 disant

disant qu'il est impossible qu'un homme destitué de la langue Latine puisse auoir intelligence des choses naturelles; & diront que c'est à moy vne grande temerité d'escire contre l'opiniõ de tant de philosophes fameux & anciens, lesquels ont escrit des effects naturels, & rempli toute la terre de sagesse. Je sçay aussi qu'autres iugeront selon l'exterieur, disans que ie ne suis qu'un pauvre artisan: & par tels propos voudront faire trouuer mauuais mes escrits. A la verité il y à des choses en mon liure qui serõt difficiles à croire aux ignorans. Nonobstant toutes ces considerations, ie n'ay laissé de poursuivre mon entreprise, & pour couper broche à toutes calomnies & embusches, i'ay dressé vn cabinet auquel i'ay mis plusieurs choses

choses admirables & mōstrueuses, q̄
i'ay tirees de la matrice de la terre, les-
quelles rendent tesmoignage certain
de ce que ie dis, & ne se trouuera hō-
me qui ne soit contraint confesser i-
ceux veritables, apres qu'il aura veu
les choses que i'ay preparees en mon
cabinet, pour rendre certains tous
ceux qui ne voudroyent autrement
adiouster foy à mes escrits. S'il ve-
noit d'aventure quelque grosse teste,
qui voulut ignorer les preuues mises
en mō cabinet, ie ne demãderois au-
tre iugement que le vostre, lequel est
fuffisant pour conuaincre & renuer-
ser toutes les opinions de ceux qui y
voudroyent contredire. Je le dis en
verité, & sans aucune flatterie: car cō-
bien que i'eusse bon tesmoignage de
l'excellence de vostre esprit, des le

temps que retournastes de Ferrare, en
vostre chasteau de Ponts, si est-ce que
en ces derniers iours auxquels il vous
pleut me parler de sciences diuerſes,
aſçauoir de la Philosophie, Astrolo-
gie, & autres arts tirez des Mathema-
tiques. Cela di-ie m'a cauſé doubler
l'aſſeurâce, & ſuffiſance de vostre mer-
ueilleux eſprit, & combien que le nô-
bre des iours de pluſieurs diminue
leur memoire, si est-ce que i'ay trouué
la vostre plus augmentée que dimi-
nuée. Ce que i'ay connu par les pro-
pos qu'il vous à pleu me tenir. Et pour
ces cauſes i'ay penſe qu'il n'y à ſei-
gneur en ce mōde auquel mon euure
puiſſe mieux eſtre dedié qu'à vous,
ſçachant bien qu'au lieu qu'il pouroit
eſtre eſtimé d'aucuns comme vne
fable pleine de menſonges, qu'en
vostre

vostre endroit il sera prisé & estimé
chose rare. Et s'il y à quelque chose
mal polie, ou mal ordonnée, vous sçau
res treshbien tirer la substance de la
matiere, & excuser le trop rude lāga
ge de l'aucteur, & souz telle esperan
ce, ie vous supplieray treshumblemēt
de me faire cest honneur de le rece
voir comme de la main de l'vn de
voz treshumbles seruiteurs.





ADVERTISSEMENT

aux Lecteurs.

AMY lecteur le desir que i'ay
que tu prouffites a la lecture
de ce liure, m'à incite de r'ad-
uertir que tu te dōnes garde de
enyurer ton esprit de sciences escriptes aux
cabinets par vne theorique imaginatiue
ou crochetée de quelque liure escrit par i-
magination de ceux qui n'ont rien practi-
quē, & te donnes garde de croire les opi-
nions de ceux qui disent & soustiennent que
theorique à engendré la pratique. Ceux
qui enseignent telle doctrine prennent ar-
gument mal fondé, disans qu'il faut ima-
giner & figurer la chose que l'on veut fai-
re en son esprit, deuant que mettre la main
a sa besongne. Si l'homme pouuoit execu-
ter ses

ter ses imaginations, ie tiendrois leur par-
ty & opinion : mais tant s'en faut , si les
choses conceïes aux esprits se pouuoient
executer, les souffleurs d'alchimie feroient
de belles choses & ne s'amuseroyent a
chercher l'espace de cinquante ans , com-
me plusieurs ont fait. si la theorique figu-
rée aux esprits des chefs de guerre se pou-
uoit executer , ils ne perdroyent iamais
bataille. l'ose dire à la confusion de
ceux qui tiennent telle opinion , qu'ils
ne scauroient faire vn soulier, non pas
mesmes vn tallon de chausse, quand ils
auroient toutes les theoriques du monde.
Je demanderois a ceux qui tiennent telle
opinion, quand ils auroient estudié cin-
quante ans aux liures de Cosmographie
& nauigation de la mer, & qu'ils auroy-
ent les cartes de toutes regions & le ca-
dran de la mer, le compas & les instru-
ments

mèts astronomiques, voudroyent ils pour-
tant entreprendre de conduire un nauire
par tout pays: comme fera un homme bien
expert & practicien, ils n'ont garde de se
mettre en ce danger, quelque theorique
qu'ils ayent aprise: & quand ils auront
bien disputé, il faudra qu'ils confessent que
la pratique à engendre la theorique. l'ay
mis ce propos en auant, pour clorre la bou-
che à ceux qui disent, comment est il possi-
ble qu'un homme puisse sçauoir quelque
chose & parler des effects naturels, sans
auoir veu les liures Latins des philosophes?
un tel propos peut auoir lieu en mon en-
droit, puis que par pratique ie prouue en
plusieurs endroits la theorique de plusieurs
philosophes faulse, mesmes des plus renom-
mez & plus anciens, cōme chascun pourra
voir & entendre en moins de deux heu-
res, moyennāt qu'il vueille prendre la pei-
ne de

ne de venir voir mon cabinet, auquel l'on
verra des choses merueilleuses qui sont mi-
ses pour tesmoignage & preuue de mes es-
crits, attachez par ordre ou par estages,
auec certains escriteaux au dessous: afin
qu'un chacū se puisse instruire soy-mesme:
te pouuant assseurer (lecteur) qu'en bien
peu d'heure, voire dens la premiere iour-
nee, tu apprendras plus de philosophie na-
turelle sur les faits des choses conuenues en
ce liure, que tu ne scaurois apprendre en
cinqante ans, en lisant les theoriques &
opinions des philosophes anciens. Au-
cuns ennemis de science se mocqueront des
astrologues: en disant, ou est l'eschelle par
où ils sont montez au ciel, pour connoistre
l'assiette des astres? Mais en c'est endroit
ie suis exempt de telle moquerie; par ce
qu'en prouuant mes raisons escrites, ie
contente la veüe, l'ouye & l'atouchement:
à rai-

à raison dequoy , les calomniateurs n'au-
ront point de lieu en mon endroit: comme
tu verras lors que tu me viendras voir en
ma petite Academie.

Bien te soit.





DEPUIS que le liure à esté
cōmencé de mette suz la presse,
plusieurs personnages m'ont
requis d'en faire lecture, afin


d'auoir plus certaine cōnoissance des cho-
ses difficiles, qui m'à incité d'escire ce qui
sensuit: A sçauoir que si apres l'impression
dudit liure, il se presente quelqu'un qui ne
se contente d'auoir veu les choses par escrit
en son priuè, & qu'il desire auoir une am-
ple interpretatiō, qu'il se retiré par deuers
l'imprimerie, & il luy dira le lieu de ma
demeurance, auquel on me trouuera tous-
iours prest à faire lecture & demonstra-
tion des choses contenues en iceluy.

Aussi si quelqu'un vouloit edifier
une fontaine, selon le dessein y contenu, &
qu'il ne puisse entendre clerement l'inten-
tion de l'aucteur, ie luy feray un modelle,
par lequel il pourra facilement entendre ce
que dessus.



LES PRINCIPAVX POINTS, traitez en ce liure.

1. **D**E S eaux des fleuves, fontaines, puits, cisternes, estangs, mares & autres eaux douces: de leur origine, bonté, mauuaise, & autres qualitez: avec le moyen de faire des fontaines en tous lieux. page. 1.
2. De l'Alchimie: des metanx, de leur generation & nature. 84.
3. De l'or potable. 138.
4. Du mitridat. 148.
5. Des glaces. 156.
6. Des diuerſes ſortes des ſels vegetatifs ou generatifs, & ſouſtenans les formes, en la generation de ces corps terreſtres, de leur nature & merueilleux eſſets. 163.
7. Du ſel commun, la maniere de le faire avec la deſcription des marez ſalans. 179.
8. Des pierres tant communes que precieufes: des cauſes de leur generatió: des diuerſes formes, couleur, peſanteur, durezza, tranſparence, & autres qualitez d'icelles. 193.
9. Des diuerſes terres d'argille, natures & eſſets d'icelles. 254.
10. De l'art de terre, de ſon vtilité: des eſmaux & du feu. 266.
11. De la marne, de ſon vtilité, avec le moyen de la connoiſtre & en trouuer en toutes prouinces. 295.



DES EAVX ET FONTAINES. *Theorique commence.*

ME me trouuay ces iours passez (alant par les champs) fort alteré, & passant par quelque village ie demanday ou ie pourrois trouuer quelque bonne fontaine, afin de me rafraichir & desalterer, a quoy me fut respodu qu'il n'y en auoit point audit lieu, & que leurs puits estoient tous taris, à cause de la secheresse, & qu'il, n'y auoit qu'un peu d'eau bourbeuse au fond desdits puits. Ce qui me causa grande facherie, & futs fort estonné de la peine ou estoient les habitants de ce village, à cause de l'indigence d'eau. Et lors me souuint d'une promesse que tu mas faite long temps y a de me monstrier à faire des fontaines aux lieux les plus steriles d'eaux. Or puis que nous sommes de loysir, ie te pryé (suyuant ta promesse) de m'apprendre ceste science qui me sera fort utile: Car i'ay un heritage ou il n'y a point de fontaines, & n'y a qu'un puits qui est suiet à tarir aussi bien que les autres.

A

Pract.

Prattique.

Je le feray volontiers : Mais auant que parler
 des fontaines de mon inuention , ie suis d'auis de
 te faire vn petit discours de la cause des bonnes ou
 mauuaises eaux, & de l'imprudence d'aucuns fon-
 teiniers modernes: Aussi des naissances des sour-
 ces naturelles. Et pour cest effect il faut regarder à
 l'inuention moderne , pour connoistre son vtilité
 & l'ogue duree. Plusieurs desdits modernes, n'ay-
 ants nul moyen de trouuer sources ne fontaines
 viues, ont creulé les terres pour faire des puits, &
 pour obuier au grand labeur de tirer l'eau ils ont
Des pompes. contemplé les pompes des nauires , & combien
 qu'elles soyēt inuentees par noz antiques, aucuns
 artisans (desirans de gagner , & se mettre en cre-
 dit, aussi pour croistre leurs renommées) ont con-
 seillé à plusieurs seigneurs & autres de faire des
 pompes à leurs puits, non cōme inuention vieil-
 le, mais comme premiers inuenteurs , & s'en sont
 beaucoup fait valoir, & plusieurs ont fait de gran-
 des despèces esdites pōpes, lesquelles ont encores
 à present grāt regne: Toutes fois ie sçay a la verité,
 tant par Practique que Theorique, que lesdit-
 tes pompes auront bien peu de duree , à cause de
 la violence des mouuements desdites pompes,
 qu'ils endurent , tant par la subtilité des eaux, que
 par les vents qui s'entonnent dedans les tuyaux:
 Et faut conclure que toutes choses violentes ne
 peuuent durer.

Theo-

Theorique.

Comment est ce que tu oses mespriser vne inuentiō si ingenieuse, & tant vtile, veu que toy mesmes confessē qu'elle est inuentee par les anciens, & de tous temps l'on en à vsé pour la cōseruatiō des nauires: car sans lescdites pōpes ils periroyent bien souuēt: aussi l'on sçait biē qu'en plusieurs minieres de metaux l'on se sert desdites pompes: car autrement les eaux les submergeroyent à tous les coups.

Practique.

Ie ne mesprise point l'inuention des pompes: mais au contraire ie l'estime beaucoup: & quiconques la inuentee à eu vne grande consideration, & n'a pas esté sans auoir consideré l'anatomie de nature humaine. Car ie say bien que l'eau qui est montée le long des canaulx, n'est montée sinon par vne atraction d'halene causee par la souspape, laquelle ayāt donné lieu à l'aspiration, ou sucemēt du vent qui est amené par le baston de la pompe, & que par l'atraction & haussemēt tant de la souspape que du baston, estāt entre vne quātité d'eau au dedans du tuyau, ladite souspape estant remise en son lieu enferme l'eau & le vent, qui sont enclos dedans la pompe, estant demeurée & poussée par le mouuemēt dudit baston, lequel contrainct l'eau de mōter en haut, & cela ne se peut faire sans grāde violēce: Cōme tu vois qu'un hōme ne peut cracher sans premieremēt atirer à soy du vent ou de lair, & cela ne se peult faire q̄ la souspape de la

gorge de l'homme (que les chirurgiens appellent la luerette) ne iouë cōme celles des pompes. Et combien que i'estime l'inuention desdites pōpes merueilleusement grande, & que ie sçay qu'elles seront tousiours de requeste, & vtils tant aux nauires que minieres; si est ce que pour les puits domestiques elles feront bien peu de requeste: parce qu'il faut tousiours des ouuriers après, à cause des fractiōs engendrees par les violences: & qu'il se trouue bien peu d'hommes qui les sachent reparer. Voila pourquoy ie parle hardiment, comme estant bien asséuré que plusieurs dedans Paris & aillieurs ont fait faire desdites pompes avec grands fraiz, qui à la fin les ont delaissees à cause des reparations qu'il y failloit souuent faire. Aussi ie sçay qu'il y à eu de nostre temps vn architecte François, qui se faisoit quasi appeller le dieu des maçons ou architectes: & d'autant qu'il possedoit vint mil en benefices, & qu'il se sçauoit bien accommoder à la court, il aduint quelque fois qu'il se venta de faire monter l'eau tant hault qu'il voudroit, par le moyen des pompes ou machines, & par telle iactance incita vn grād seigneur à vouloir faire monter l'eau d'une riuierē en vn haut iardin qu'il auoit pres ladite riuierē. Il commanda que deniers fussent deliurez pour faire les frais: ce qu'estant acordé, ledit architecte feit faire grande quantité de tuyaux de plomb, & certaines rouës dedens la riuierē, pour causer les mouuemēts des mail-

maillets, qui font iouer les souspapes: mais quant ce vint à faire monter l'eau, il n'y auoit tuyau qui ne creuast; à cause de la violéce de l'air enclos avec l'eau: dont ayant veu que le plomb estoit trop foible, ledit architecte commanda en diligence de fondre des tuyaux d'airain, pour lesquels fut employé vn grand nombre de fondeurs, tellement que la despence de ces choses fust si grande, que l'on a trouué par les papiers des controleurs, qu'elle montoit à quarante mil francs, combien que la chose ne valust iamais rien: Et à ce propos i'ay veu plusieurs pompes, qui ont amené par le mouuement de la souspape vne si grande quantité de sable qu'en fin il faillloit rompre les tuyaux, pour oster le sable qui estoit dedens.

Theorique.

Je ne sçay comment cela que tu dis se peult faire: car i'ay veu vn millier de modelles de pôpes, qui iettoient l'eau aussi naturellemét, que si c'eust esté vne source.

Practique.

Tu t'abuses en m'allegant les modelles: car ils ont trompé vn million d'hommes, tant és bastiments que platteformes, batteries, pontages & desuoyeméts de riuieres, chaussées, leuees ou paisfieres: & singulierement aux eleuations des eaux. Car plusieurs ayâts approuué l'esleuatiō & vuidâges des eaux par modelles de pompes, ont fait de grandes entreprises, pour fonder des piliers dedâs les riuieres, cuidans qu'apres que l'eau seroit rem-

parce alentour du lieu destiné pour le fondement des piliers il seroit bien aisé de la vuidier par les pompes, ont fait faire de grandes pompes suivant les modelles qu'ils auoyent trouué veritables, en quoy ils ont estez deceus, & se sont ruinez: d'autant qu'ils n'ont sçeu faire en grand volume ce qu'ils faisoient en petit. Autant en est il aduenu à plusieurs sur les desuoymens des cours des riuieres. Si inquisition estoit faite de ces choses l'on en trouueroit quelque tesmoignage à Toulouse, en l'edification d'un pont assis sur la Garonne; parquoy faut conclure que les pompes sont vtilles & nécessaires es nauires & en quelques minieres: mais pour en faire estat pour les puits, l'on en est bien tost las; pour les causes que i'ay dites cy dessus: parquoy ie ne t'en parleray d'auantage.

Theorique.

Et quant à l'eau des puits, que t'en semble? la trouues tu bonne ou mauuaise?

Practique.

*Des Eaux
des puits.*

Je ne puis autre chose dire des eaux des puits sinon qu'elles sont toutes froides & croupies, les vnes plus les autres moins, & ne faut pas que tu penles que les eaux des puits procedent de quelque source: car si e'estoit de quelque source continuelle, les puits s'empliroient soudain: parquoy est à noter qu'elles ne viennent de gueres loing: & n'est seulement que les esgoults des pluyes qui tombent alentour des puits: & ceux qui sont de-

dens

dans les villes sont suiets à receuoir plusieurs vrin-
nes, & s'il y a des priuez circonuoisins il ne faut
douter que l'eau desdits puits ne s'en resente: & ne
peut on autrement conclure, sinon que les eaux
des puits sont esgouts continuels des pluyes, qui
se rendēt petit à petit en bas au trauers des terres.
(Et ce qui fait qu'aucuns puits sont meilleurs les
vns que les autres, & n'est autre chose sinon que
les terres circonuoisines sont nettes de tous mi-
neraux, salpestres & autre substance que les eaux
pouroyent prendre en passant par les terres. Tou-
tesfois depuis que les eaux sont entrées dedans les
puits elles croupissent, & sont aisees à empoisonner
par ce qu'elles n'ont point de cours. Si tu auois
leu l'histoire de Iehan Sleidan, tu connoistrois que
les eaux des puits & cisternes sont suiettes aux
poisons. Il raconte que durāt la guerre que l'Em-
pereur Charles cinquesme fit contre les protestās,
il fut empoisonné plusieurs puits & eaux dormā-
tes, & qu'il fut pris vn homme qui confessa estre
venu de lointain pays, expres pour faire ce mau-
uais effect, & ce par le cōmandemēt de deux grāds
personnages que ie ne veux nommer. Au grand
marché de Meaux en Brie en la maison des Gillets
l'on voulut curer vn puits, & pour ce faire le pre-
mier, q̄ y descendit mourut soudain au fonds du-
dit puits, & fut enuoyé vn autre pour sçauoir la
cause, pourquoy iceluy ne disoit aucune chose, &
mourut cōme l'autre: il en fut renuoyé encore vn,

qui descendit iusques au milieu : mais là estant se print à crier pour se faire tirer diligemment, ce que fut fait, & estant dehors se trouua si malade, qu'il trauailla beaucoup à sauuer sa vie.

Item vn autre hystoire racompte qu'il y eut iadis vn Medecin qui se voyant destitué d'argent & de pratiques s'auisa de ietter quelques drogues dans les puits de la ville de son habitation, qui fut cause que tous ceux qui beuoyent de l'eau estoient pris d'un flux de ventre, qui les tormentoit à merueilles, & les faisoit courir apres le Medecin, lequel estant ioyeux de l'operation de ladite medecine, consoloit hardiment les malades, & feindant leur bailler des medecines bien cheres, il leur bailloit de bon vin à boire, leur defendant de boire, de l'eau, & par tel moyen la malice de l'eau s'en alloit, & la nourriture du vin demouroit, & le Medecin gaignoit beaucoup. Il y a aussi quelques puits voisins des riuieres, desquels l'eau qui y est ne vint que de la riuere circonuoisine : & cela est conneu d'autant que quand les riuieres sont grosses il y a beaucoup d'eau dedans lesdits puits, & quant les riuieres sont basses aussi sont les eaux desdits puits : & cela nous donne à connoistre qu'il y a certaines veines qui vont des puits iusques aux riuieres, par lesquelles les eaux se viennent rendre audits puits. Aucuns de ceux qui ont besongné à la congelation du sel qui se fait en Lorraine, ont attesté que l'eau de la-
quel-

quelle ils font ledit sel, se prend dedans des puits: & quant les riuieres sont grandes il entre de l'eau douce dedans lesdits puits, qui cause qu'ils sont arrestez iusques à ce que les riuieres soyent remises dedans leurs limites. partant ie conclus qu'aucuns puits sont entretenus des eaux des flues circonuoisins.

Theorique.

Puis que nous sommes sur le propos des eaux, que te semble de l'eau des mares? desquelles, en plusieurs pays, ils sont cōtraints se seruir, tāt pour leur vsage, que pour l'vsage de leurs bestes.

Practique.

Il y a plusieurs especes de mares: plusieurs les appellent claunes: en quelque lieux ce n'est qu'une fosse gueres profonde, mise en quelque place inclinée d'un costé, afin que les eaux des pluies se rendent dans laditte fosse ou mare, & que les beufs, vaches & autre bestail puissent aisement entrer & sortir pour y boire, & icelles ne sont creuées que deuers la partie pendante. A la verité telles eaux ne peuuent estre bonnes n'y pour les hommes n'y pour les bestes. Car elles sont eschauffées par l'air & par le soleil, & par ce moyen engendrent & produisent plusieurs especes d'animaux. & d'autant qu'il y a tousiours grande quantité de grenouilles, les serpens, aspics & viperes se tiennent pres desdites claunes: affin de se repaistre desdites grenouilles. Il y a aussi communement des sangsues

sues, que si les beufs ou vaches demeurent quelque temps dedans lesdites mares, ils ne faudront d'estre piquez par les sangsues. Iay veu plusieurs fois des aspics & serpens, couchez & entortillez au fond des eaux desdites mares: parquoy ie dis que lesdites eaux ainsi aërees & eschauffees ne peuuent estre bonnes; & bien souuent il meurt des beufs, vaches & autre bestail, qui peuuent auoir prins leurs maladies és abreuuoirs ainsi infectez. Si les hommes qui verront les enseignemens que ie donneray cy apres, me vouloyent croire, ils auroyent tousiours des eaux pures & nettes, tant pour eux que pour leurs bestes.

Theorique.

Que veux tu dire des mares qui sont plus basses, desquelles on se sert en plusieurs endroits de la Normandie & aultre pays, pour le seruice de la maison?

Practique.

Que veux tu que ie te die, sinõ que c'est vne eau croupie? mais d'autant qu'elle est plus froide, elle ne peut produire aucun animal, d'autant qu'il ne se fait iamais de generatiõ, tant des choses animees, que des vegetatiues, sans qu'il y ait vne humeur eschauffee. Mais si au dessus desdites eaux & mares il y a seulement du limõ verd, c'est vn signe de putrefaction & commencement de generation de quelque chose: & plus y apparoit & s'y engendre de putrefaction, & l'vsage en est pernicieux.

Theorique

Theorique.

Di moy qu'il te semble des cisternes que noz predecesseurs ont eu en vsage, comme nous voyons tant par leur vestiges que par tesmoignage des escritures.

Practique.

Les eaux des cisternes prouiennent des pluyes, comme celles des claunes : mais d'autant qu'elles sont closes, fermees, bien maçonnes, & au dessous paaees, il ne peut estre qu'elles ne soyēt sans comparaison meilleures que celles des mares : à cause quelles ne peuuent rien produire, pour leur froidure & le peu d'aër qu'elles ont : toutesfois toutes ces eaux ne sont point naturellement bonnes, comme celles que i'ay entrepris te monstrecy apres. Je me tairay donc à present de parler des eaux croupies, & parleray de celles des fontaines naturelles, qui sont à present en nostre vsage.

*Des Cisternes.**Theorique.*

Et que sçauois tu dire des fontaines naturelles ? puis qu'elles sont naturelles tu n'y sçauois tronuer à redire, comme tu as fait sur les mares & pompes & puits : que si tu entreprend de parler contre les fontaines naturelles tu entreprends contre Dieu, qui les a faites.

Practique.

Tu me reprens deuant que i'aye parlé, ie sçay bien que les sources des fontaines naturelles sont faites

Fontaines

faites de la main de Dieu: parquoy ie n'y sçauois rien reprendre des fautes qui se cōmettent pour cōduire les eaux des sources naturelles: mais d'autant que les fontenieres qui amènent les sources par tuyaux, canaux & aqueducs, depuis la source iusques aux maisons, villes & chasteaux peuuent commettre de grandes fautes. Voila de quoy i'entens parler: d'autant que la vie de l'homme est si brefue qu'il est impossible qu'en l'espace de si peu d'annees vn homme puisse connoistre les effects des eaux, & ne les connoissant point il est impossible de les conduire & amener vn long chemin, qu'il n'y ait quelque faute, & si on l'amene de deux ou trois lieües loin, enclose & enfermee par tuyaux elle sera de bien peu de duree, & y faudra souuent mettre la main. voila pourquoy ie te veux bien dire que l'eau & le feu ioints avec l'aër ont vn effect si tresubtil & vehement, que iamais homme ne l'a directement conneu; comme tu pouras entendre, lors que ie parleray des tremblemens de terre: & si tu veux vn peu contempler les vestiges & antiquitez de noz predecesseurs, tu trouueras grand nombre de pyramides antiques, construites tant par les Empereurs Romains, que par les Rois d'Egypte, tu trouueras aussi grand nombre d'arcs triomphans construits du temps des Cæsars, comme tu as veu en la ville de Xaintes deux arcs triomphans, que combien qu'ils soyent fondez dedans leau, si est ce qu'ils sont encores debout

bout, & ne peut on nier qu'ils ne soyent du tēps des Cēfars, l'écriture qui y est inscrite en fait foy. Le r'ay mis ce propos en auant pour te monſtrer que combien quē noz predeceſſeurs ayent auſſi fait de grands deſpēs pour les aqueducs, tuyaux & beauté de fontaines, ſi eſt ce que tu ne me ſçau- rois monſtrer vne ſeule fontaine antique, comme les baſtimens des arcs triōphans, palais & amphi- theatres : & ne faut pourtant penſer que noz pre- deceſſeurs antiques ne ſe ſoyent eſtudiez & em- ployez à grands deſpens auſſi bien és fontaines que és autres baſtimens, & qu'ainſi ne ſoit, quel- cun m'à aſſeuré auoir veu en Italie des aqueducs contenans cinquante lieūes de long (choſe in- croyable toutesfois) leſquels ont eſtez faits pour amener les eaux d'un lieu à l'autre. Nos antiques montrent par là qu'ils auoyēt bien conneu que les eaux amenees par les aqueducs venoyent plus à leur aiſe que non pas celles qui viennent encloſes dedans des tuyaus. Il eſt certain qu'à Xaintes (qui eſt ville antique, en laquelle ſe trouue encores des veſtiges d'un amphitheatre, & pluſieurs antiqui- tés, pareillement grande quantité de monnoye des Empereurs) il y auoit vn aqueduc duquel les veſtiges y ſont encores, par lequel ils faiſoyent venir l'eau de deux grandes lieūes diſtant de ladi- te ville, & toutesfois la ruine s'en eſt enſuyue en telle ſorte qu'à preſent, il y à bien peu d'hommes qui ayent connoiſſance des veſtiges de laqueduc ſuſdit.

fusdit. Voyla pourquoy i'ay dit que combien que les antiques ayent besongné de meilleures esto-fes que les modernes, & qu'ils ayent moins regardé aux frais, si est ce que l'on ne treuve aucunes fontaines antiques. Je ne di pas pourtant que les sources soyent perdues: car l'on sçait bien que la source antique de la ville de Xaintes est encores au lieu d'ou elle procedoit: pour laquelle voir, le Chancelier de l'hospital se destourna de son chemin (reuenant du voyage de Bayonne) pour voir l'exellence de ladicte source. Il y a encores en certaines valles entre la ville & la source, quelques arcades sur lesquelles l'on faisoit passer les eaux de ladicte source: toutes fois la cause desdites arcades est inconnue au vulgaire. Et si tu veux sçauoir pourquoy ie te mets deuant les yeux ces arcades aux vallées, c'est pour te monstrier l'ignorance des modernes. Car si les antiques eussent amené les tuyaux de leurs cours de fontaines par dessouz la terre il eust faillu mōter & puis descēdre, & encores monter autant de fois qu'il y eust eu de mōtagnes & valecs, & eust faillu accōmoder les tuyaux à toutes ces passions; & comme ie t'ay dit en plusieurs endroits l'eau qui est ainsi contrainte, ioints les vents subtils entremellez avec elle, font des efforts tels que nul homme n'a iamais eu la parfaite connoissance de la violence desdites eaux. C'est vne chose merueilleuse des effects des eaux en-ferrées; il y à bien peu d'hommes qui voulussent croire

croire que l'eau qui remplist & occupe vn tuyau de deux poulces de diametre, estant violemment pousse par les vents ou autres eaux elle se ressera en telle sorte qu'elle passera par vn canal d'un poulce de diametre : & par ce que les vents, qui sont enclos dedans lesdits tuyaux, ou canaux occupent autât de place q̃ les eaux, les fonteiniers sont bien souuent trompez en leurs entreprises: mesmement aux tuyaux enclos souz terre: car quelquefois lesdits tuyaux sont occupez par des racines qui s'engendrēt & veictēt dedans, ayants quelque bout racinal entre les ioinctures: autres sont occupez & engorgez par les eaux congelatiues, qui se lapifient au dedans desdits tuyaux. Cest pourquoy les antiques faisoient les aqueducs agrez avec grande despence, afin d'amener les eaux sans violence, & euitier tous ces accidens susdits. Toutesfois ie suis certain que quand les eaux se viennent à congeler soit en cristal ou autrement, elles sont contrainres de se reserrer en leur congelation, & ne se fait nulle congelation sans compression. Le semblable se trouue en la violence du feu, qui se trouuant enclos dedans les montaignes engendre vne vapeur aqueuse & vn vent si impetueux qu'il fait trembler la terre & renuerser les montaignes, & bien souuent les villes & villages, c'est la cause pourquoy les antiques faisoient venir leurs sources d'eaux par aqueducs, & pour donner pente legitime à leurs eaux ils faisoient
des

des arcades aux valees, pour s'accommoder aux montaignes. Je ne demande point de meilleur tesmoignage que le pont du Gua, qui est en Languedoc, lequel à esté fait expressement pour porter l'aqueduc qui trauersoit la vallee entre deux montaignes : afin d'amener l'eau de dix lieües distant de la ville de Nimes : & ce pour obuier aux compressiōs & violences que les eaux eussent engendrees si on les eut voulu faire suyure les montaignes & valees. Ledit pont est vne euvre admirable: car pour venir depuis le bas des montaignes iusques a la sōmité d'icelles, il à fallu edifier trois rangs d'arcades l'vne sur l'autre, & sont lesdites arcades d'vne hauteur extraordinaire, & cōstruites de pierres de merueilleuse grandeur. De la nous pouuons tirer que Nimes (ville antique, en laquelle se trouue tesmoignage tant par l'amphitheatre que par autres vestiges) estoit vne ville en laquelle les anciens Empereurs Romains & leurs proconsuls auoyent faict de grandes & superbes despenses, pour l'embellir & enrichir, & y auoyēt employé des gens de sçauoir, des plus grands qui fussent en l'Empire Rommain, comme l'ouurage en fait encores foy. Si tu auois esté à Rome tu pourrais aisément iuger combien les modernes sont esloingnez des inuentions de noz predecesseurs sur le fait des fontaines, car il y à bien peu de bonnes maisons dedans Rome ausquelles il n'y ait des fontaines prouenātes des aqueducs construits
en

en laër & qu'ainsi ne soit regarde vn peu vn pour-
trait de laditte ville de R^ome qui à esté nouuelle-
ment imprimé, tu verras en iceluy vn receptacle
d'eau hault esleué d'une grâdeur assez superbe, leq^l
receptacle cōtiēt si grâde quâtite d'eau, qu'il four-
nit la plus grand part de laditte ville de R^ome, car
il y a audit receptacle plusieurs acqueducs diuisez
par brâches amenez & cōduits de rue en rue, pour
fournir les palais & grandes maisons de la ville, &
sont lesdits acqueducs amenez & cōduits sur cer-
taines arcades assez pres l'vne de l'autre & toutes-
fois autât esleuées en l'aër q^l les maisons de laditte
ville. Et te fault noter qu'il y a vn grâd acqueduc
principal venât de bien loin qui fournit le grâd re-
ceptacle, duquel procedent tous les autres acq-
ueducs. Or si les fontaines des fonteniers antiques
faites avec si grande despenſe n'ont peu durer ius-
ques à present, combien moins de durée peut on
esperer de celles que les fonteniers modernes font
passer par monts & vaux avec des tuyaux de plôb
foudez & cachez trois ou quatre pieds dens terre:
Si mōſieur l'architecte de la Royne, qui auoit hâ-
té l'Italie, & qui auoit gagné vne auct^rité & cō-
mandement sur tous les artisans de ladire Dame,
euſt eu tant soit peu de philosophie seulement na-
turelle, sans aucunes lettres il euſt fait faire quel-
que muraille ou arcade à la valee de saint Cloud,
& de la faire venir son eau tout doucemēt, depuis
le pont de saint Cloud iusques aux murailles du

parc, & puis renfforcer ladite muraille de la closture dudit parc pour faire passer l'eau par dessus, & au bout de l'angle & coing dudit parc faire certaines arcades, en diminuant petit à petit iusques au dedans, & lors la fontaine eust peu durer & n'y eust faillu faire tant de regards.

Theorique.

Puis que tu trouues tant d'imperfections és eaux des mares, puits & és côduits ou tuyaux des fontaines, ie te veux à present faire vne demande. asçauoir qui est la cause que les sources des fontaines naturelles sont meilleures les vnes que les autres.

Practique.

La cause que les eaux des sources sont meilleures les vnes que les autres.

Vn homme qui à hanté les minieres, fossez & tranches, & qui à considéré les diuerfes especes des terres argileuses, & qui à voulu connoistre les diuerfes especes de sels & autres choses fossiles, il peut aysemēt iuger de la cause de la bôté ou mauuaistie des eaux prouenans des sources naturelles. Et pour en donner iugement certain, il faut premierement considerer qu'il n'y à aucune partie en la terre qui ne soit remplie de quelque espece de sel, qui cause la generation de plusieurs choses, soit pierre, ardoyse, ou quelque espece de metal ou mineral, & est chose certaine que les parties interieures de la terre ne sont non plus oyſiues que les exterieures, qui produisent iournellement arbres, buissôs, ronces, espines & toutes especes de vegetatif. Il faut donc cōclure qu'il est impossible que

le cours des fontaines puisse passer par les veines de la terre sans mener avec soy quelque espece de sel, lequel estant dissout dedans l'eau est incõneu & hors du iugement des hommes : & selon que le sel sera veneneux il rendra l'eau veneneuse ; cõme celles qui passent par les minieres d'airain , elles amènēt avec soy vn sel de vitriol ou coperoze fort pernicious : Celles qui passent par des veines alumineuses ou salpestreuses, ne peuuent amener sinon la substãce salitue par ou elles passe : & si aucunes sources passent par des bois ou trõcs pourriz dedãs terre, telles eaux ne peuuent estre mauuaises, par ce que le sel des bois pourriz n'est veneneux comme celuy de la coperoze. Je ne dy pas qu'il n'y aye quelque arbre , & consequẽment des plantes, desquelles le sel peut estre veneneux ; & ne faut penser que toutes eaux bonnes à boire soyẽt exemptes de venin : mais vn peu de venin en vne grande quantité d'eau n'a pas pñissance d'actiõner sa nature mauuaise : cõme les eaux qui passent par des veines ou il y à du sel commun , ne peuuent estre mauuaises. Celles qui passent dedans les canaux des rochers ne peuuent amener autre chose que du gepre de sel qui à causé la congelation desdits Rochers ; & ledit sel est conneu en la calcinatiõ extraite des pierres desdits Rochers ; & lors q̃ telles pierres sont calcinees l'on trouue au goust de la langue la mordication & acuité dudit sel , lequel estant dedans l'eau peult aussi bien congeler

des pierres au corps de l'homme comme il fait en la terre, n'estoit la raison que i'ay alleguée cy dessus; que la grande quantité d'eau efface le pouuoir d'un peu de venin. C'est chose certaine qu'il y a des fôteinés qui donnēt les fieures à ceux qui en boient. Je n'ay iamais veu venir estranger au pays de Bigorre pour y habiter, que bien tost apres n'ayt pris les fieures. l'on voit audit pays grand nombre d'hommes & femmes qui ont la gorge grosse cōme les deux poings; & est chose toute certaine que les eaux leur causent ce mal, soit par la froidure des eaux ou par les minéraux, par ou elles ont passé. Plin raconte au trentiesme liure de son histoire naturelle, chap. 16. qu'il y a vne fontaine en Arcadie, de laquelle l'eau est d'une nature si pernicieuse qu'elle dissipe tous les vaisseaux ausquels elle est mise: Et ne peut on trouuer aucun vaisseau qui la puisse contenir. Sur ce propos ie diray ce qu'e escrit Plutarque en la vie d'Alexandre le grād, c'est qu'aucuns ont pensē qu'Aristote enseigna à Antipater le moyen de pouuoir receuillir de ceste eau, asçauoir dans l'ongle d'un asne, & qu'Alexandre fut ainsi empoisonné. C'est vne chose toute certaine que tout ainsi qu'il y a diuerses especes de sels en la terre, qu'il y a aussi diuerses huiles, tescmoin l'huile de petrole, qui sort des rochers: & faut croire q le bitumē n'est autre chose qu'huile auparauant qu'il soit congelé. Et tout ainsi comme les eaux souzternees apportent avec elles quelques

ques especes de sels par ou elles passent, semblablement si elles treuuent des huiles elle les ameneront avec elles, & en beuuant telles eaux nous beuons souuēt & de l'huile & du sel. N'as tu pas l'eu quelques historiens, qui disent qu'il y à vn fleue & quelques fontaines d'ou il sort grande quantité de bitumen, lequel est recueilli par les habitans du pays, lesquels en font grand traficq, le faisant transporter en pays estranges? Et pour l'assurance & tesmoignage de ce que i'ay dit, que les huiles & sels peuuent rendre les eaux mauuaises & pernicieuses: ceux qui ont escrit des fontaines & fluues, rendēt tesmoignage que telles eaux sont pernicieuses, & que mesme les oyseaux meurent de la senteur d'icelles. Les sources qui passent au trauers des mines des terres argileuses, ne peuuent qu'elles n'amenēt quelque salitude mauuaise: d'autāt qu'il se treuue bien peu de terres argileuse ou il n'y ait quelques marcasites sulphurees & commencement de metaux: aussi qu'il y à bien peu de terres argileuses, qui ne soyent de diuerses, couleurs, comme de blanc, rouge, iaune, noir ou gris, entremellees des couleurs susdites, lesquelles couleurs sont causees par les mineraux sulphurez, qui sont dedans icelle: comme nous sçauōs à la verité, que le fer, le plomb, l'argent, l'anthimoine & plusieurs autres mineraux ont en eux vne teinture iaune, dont les terres iaunes ont pris leur couleur. Voyla donc vn tesmoignage inexpugnable

que les eaux qui passent par les terres argileuses amènent avec elles du sel semblable à celui qui est esdites terres : lesquelles terres ne pourroyent iamais s'endurcir, cuyre, colliger n'y se fixer si ce n'estoit la vertu du sel, qui est esdites terres, & par le moyen dudit sel elles sont bonnes à faire briques, tuilles & toutes especes de vaisseaux pour le seruice de l'homme, cōme ie donneray plus clairement à entendre parlant des terres argileuses & des pierres : & feray fin au propos de la bonté ou malice des eaux, si ce que i'en ay dit t'a suffisamment contenté.

Theorique.

Ie me contente plus que suffisamment de ce que tu m'en as discouru: toutes fois iusques icy ie n'ay rien entendu de toy de la cause des eaux chaudes, qui sont en plusieurs pays, & mesmes en France, au lieu de Cauterets, Bauieres, & en plusieurs autres lieux.

Practique.

La cause des *eaux chaudes.* Je ne te puis asseurer d'autre chose, qui puisse causer la chaleur des eaux, que les quatre matieres cy dessus nommees, sçauoir le souphre, le charbon de terre, les mottes de terre, & le bitumen : mais nulle de ces choses ne peut eschauffer les eaux si premierement le feu n'est ietté ou esprins au dedans de l'une de ces quatre matieres. Tu me diras qui est ce qui auroit mis le feu sous terre pour brusler ces choses? A ce ie respon, qu'il ne faut

faut qu'une pierre de rocher tomber ou s'encliner contre vn autre, pour engendrer certaines estincelles, lesquelles seront suffisantes pour alumer quelque veine sulphurée: & de là le feu pourra suyure l'une des quatre matieres sudirs en telle sorte que le feu ne s'esteindra iamais, tant qu'il trouuera matiere pour se nourrir; & quant l'une de ces quatre est allumée, les eaux, qui sont encloses dedans les Rochers, descendantes continuellement de degré en degré, iusques à ce qu'elles soyent au lieu ou lesdites matieres sont alumées, ne peuuent passer qu'elles ne s'eschaufent, & cela ne se pent faire qu'il n'y ait vn merueilleux tourment engendré du feu & de l'eau: & quelque chose que les philosophes ayent dit des tremblemens de terre, ie ne confesseray iamais qu'aucun tremblement de terre se puisse faire sans feu: bien leur confesseray-je que les eaux seules avec les vents enclos dedans icelles, peuuent abyssmer chasteaux, villes & montaignes, tant par l'effect du vent, enclos dedans les cauernes, que par la compression des eaux desbordees, qui par leur subtilité & vehemence peuuent poulsier, demolir & ruyner, ce que dessus: & ce par le moyen d'auoir chassé les terres sur lesquelles ces choses seront assises, & ayant concaué par dessous les fondemens, icelles choses peuuent tomber dedans c'est abyssme, sans aucune, ayde ny action ignee. Mais les tremblemens de terre ne peuuent estre engendrez que

*Des tremble-
ments de ter-
re.*

premierement il n'y ait le feu, l'eau & l'aër ioindz ensemble. Quelques historiens racontent qu'en certains pays il y a des tremblemens de terre, qui ont duré l'espace de deux années (chose fort aisée à croire) & cela ne se peut faire par autre moyen que par celui que j'ay mis cy dessus. Il faut qu'au parauant que la terre tremble il y ait grande quantité de l'une de ces quatre matieres (que j'ay nommées cy deuant) allumée & étant allumée qu'elle aye trouué en sa voye quelques receptacles d'eaux dedans les rochers, & que le feu soit si grand qu'il aye puissance de faire boullir les eaux encloses dedans les rochers, & alors par le feu les eaux & l'aër enclos, s'engendrera vne vapeur qui viendra souleuer par sa puissance les rochers, terres & maisons, qui seront au dessus. Et d'autant que la violence du feu, de l'eau & de l'aër, ne pourra ietter d'un costé n'y d'autre vne si grande masse, elle le fera trembler, & en tremblant il se fera quelque subtiles ouuertures qui donneront quelque peu d'aër au feu, à l'eau & au vent, & par tel moyen la violence qui autrement eut tout renuersé est pacifiée, que si les trois matieres qui font trembler, ne prenoient quelque peu d'aër en faisant leur action, il n'y à si puissante montaigne qui ne fut soudain renuersée, comme il est aduenü en plusieurs lieux, que plusieurs montaignes ont esté conuerties en valees, par tremblemens de terre, & plusieurs vallees en montaignes, par vne mes-

me action. Et lors que lesdits tremblements ont ierté bas villes, chasteaux & montaignes, ç'a esté lors que les trois matieres susdites estant en leur grand cōbat ne pouuoient auoir aucune haleine. Or il failloit necessairemēt, ou que les choses qui estoient dessus ces trois elements vainquissent, & qu'elles estoufassent lesdits elements, ou bien que les elements ioints ensemble en leur superbe grandeur vainquissent, se donnāt ouuerture pour viure. Veux tu que ie te die le liure des Philosophes, ou l'ay appris ces beaux secretz ? ce n'a esté qu'un chauderon à demy plein d'eau, lequel en boullant quant l'eau estoit vn peu aspremēt poussée par la chaleur du cul du chauderō, elle se souleuoit iusques par dessus ledit chauderō: & cela ne se pouuoit faire qu'il n'y eust quelque vent engendré dedans l'eau par la vertu du feu. d'autant que le chauderon n'estoit qu'à demy plein d'eau quand elle estoit froide, & estoit plein quand elle estoit chaude. Les fourneaux ausquels ie cuis ma besongne, m'ont donné beaucoup à connoistre la violence du feu: mais entre les autre choses qui m'ōt fait connoistre la force des elements, qui engendrent les tremblements de terre, i'ay consideré vne pōme d'airain qu'il n'y aura qu'un petit d'eau dedans, & estant eschaufée sur les charbons, elle poussera vn vent tresuehemēt qu'elle fera brusler le bois au feu, orcs qu'il ne fut coupé que du iour mesme.

Theo-

Theorique.

Tu es pris à ce coup par tes mesmes paroles: car tu as dit cy dessus que les eaux & l'aër poussez & courroucez par la violence du feu, qui est leur contraire, ne pouuoient subsister ensemble, qui caufoit les tremblements de terre, & renuersements des villes & chasteaux, comme feroient plusieurs caques de poudre à canon enflambez. Et à present ie prouue le contraire, par le recueil de tes paroles. Car tu dis que les eaux chaudes (desquelles on fait les bains, tant à Aignes-caudes, Cauterets, Bauieres, qu'à Aix en Alemagne, Sauoye & Prouence, & autre lieux) sont eschaufees par le feu qui est continuel souz la terre, ou par le souphre, le charbon & mottes de terre, ou par le bitumen. Et ce neantmoins ie sçay bien qu'il y à long tēps que lesdites fontaines chaudes ont duré, & durent encores en mesme estat, voire si long temps, que la memoire en est perdue. Et si ainsi estoit que tu dis, le feu, l'aër & l'eau, n'eussent il pas long temps y à ruyné & despecé & fait sauter à dextre & à senestre les canaux & voutes, par lesquelles lesdites eaux passent? ou pour le moins elles engendroyēt (selon que tu dis) vn continuel tremblement de terre.

Practique.

Tu as fort mal entendu mes propos: car quand ie t'ay parlé des tremblements de terre, ie t'ay dit qu'en tremblant par la force des trois elements
enclos

enclos deffouz, qu'il se faisoit quelques subtiles ouuertures, par lesquelles sortoit vne partie de la force & haleine de la vapeur desdits elements, & qu'autrement, lesdits elements tourneroyent cul sur pointe, toutes les voutes de deffuz les canaux, ou se fait le mouuement, & d'autant que tu m'as dit que cela ce deuroit faire dedans les voutes, par lesquelles les eaux des bains sont eschaufees, par le mesme effect que celles qui causent le tremblement de terre, à ce ie respon que la cause, pourquoy la terre ne peut estre esbranlee, n'y agitee par lesdits feux, est par ce qu'il y à vn canal par lequel les eaux passent & sortent hors, qui appaise la violence desdits elements. Car iceux prennent haleine, & aspirent par le canal par ou l'eau sort. Et tout ainsi comme l'homme ne pourroit viure ayât le col serré & l'aër enclos dedás le corps, aussi le feu ne sçauroit viure sans aër. Et tout ainsi que l'homme & la beste à qui l'on estouperoit les conduits de l'haleine feroient de grands efforts pour eschaper, ainsi le feu se trouuant occupé de trop grande abondance d'aër, que luy mesme à cause, esmouuant l'humide, se trouuant dy-ie ainsi opprimé, & ne voulant point mourir, alors il renuerse les montaignes, pour auoir haleine, tendât afin de viure. & c'est vne conclusiõ si asseurée, qu'il n'y à Philosophe qui la sçeut impugner par raisons legitimes, ie laisseray à dire le surplus iusques à ce que nous parlions de l'alquimie.

Theo-

Theorique.

Puis que nous sommes sur le propos des eaux chaudes di moy la cause pourquoy tant de personnes se vont baigner esdites eaux, tant en France qu'en Allemagne. As tu quelque iugement qu'elles puissent seruir à guerir toutes maladies? Si tu en as quelque connoissance, ie te prie me le dire.

Practique.

*La cause
pourquoy lon
se baigne es
chaudes, &
de leurs ef-
faits.*

Tout ce que ie puis connoistre de ces choses, c'est que comme le poisson, le lard & autres chairs sont fortifiées & endurcies par l'action du sel, il peut estre que les sels qui sont meslez parmy les eaux chaudes pouroyent endurcir quelques laches humeurs putrifiées au corps de ceux qui se baignent : mais pour t'assurer n'y croire quelles puissent seruir à toutes maladies, ie suis logé bien loing d'une telle opiniō. Je me suis tenu quelques années à Tarbe principale ville de Bigorre, & ay veu plusieurs malades aller ausdits bains qui sont reue-nuz autant malades qu'ils estoient au parauant, D'autrepart si le feu est ceste année en vn endroit ou il y aura quelque espece de mineral, & que ice-luy aye vertu de guerir quelque maladie, peut estre que l'année qui vient le feu trouuera vn autre mineral, duquel le sel ne pourra faire la mesme action que la premiere. Voila pourquoy ie dy que les choses sont incertaines, d'autant que les eaux viennent de lieux inconnuz.

Theo-

Theorique.

Et des eau de Spa au pays de Liege, veux tu aussi dire que la garison d'icelles soit incertaine? N'y à il pas iournellemēt des personnes malades de diuerses maladies, qui vont demeurer quelque tēps andit lieu, pour boire de ladite eau, & s'en trouuent bien? il n'est pas iusques aux femmes steriles qu'elles n'y allent, a fin de conceuoir.

Prattique.

Ta demande n'est pas à propos: par ce que les eaux de Spa ne sont pas chaudes: toutesfois afin *Des eaux de* de respondre à ta demande ie te di que si les eaux spa. de Spa pouroyent causer vne conception aux fēmes, elles feroyēt de beaux miracles. Je sçay bien que plusieurs y sont allees boire de ladite eau, qui eussent eu plus de proufit de boire du vin. Je ne dis pas que ladite eau ne soit vtile contre la grauelle: par ce que plusieurs s'en sont bien trouuez: & la cause de ce est d'autant qu'elle prouoque à vriner: & ne demourant guēres à passer par les parties ordinaires, les matieres qui causent la pierre n'ōt pas le loisir de s'assembler pour s'endurcir & lapifier. Aucuns medecins & autres personnes tiennēt pour certain que leśdites eaux passent par des minieres de fer, & prennent cet argument de ce que la geule de la source est tainte en iaune. l'argument est fort bien fondé comme tu l'entēdras par les preuues que ie te diray cy apres. Il se trouue en plusieurs villages du pays de Liege des fontaines qui

qui ont la mesme vertu : Mais les habitans de Spa ont publié la leur des premiers, dont il leur reuiét vn grand proufit. Si ainsi est que la mine de fer ait telle vertu, il se trouuera au pays des Ardennes grand nombre de fontaines autant bonnes que les susdites: par ce que les terres du pays sont pleines de mine de fer, les terres argileuses iaunes qui y sont, en rendent tesmoignage.

Theorique.

Tu m'as cy deuant fait entendre que si les eaux des bains de Bauieres, Cauterets, Argelais & Aix, auoyent quelque vertu de guarir les maladies, que cela se faisoit par la vertu des sels, & à present tu dis que la mine de fer cause la vertu de l'eau de Spa.

Practique.

Quand tu auras bien entendu tout mon discours, tu connoistras que le fer n'est engédré d'autre chose que de sel. Mais par ce que ce propos se trouuera mieux à point en prouuant qu'il y a du sel en toutes choses ie l'y reserueray.

Theorique.

Si ainsi est nous ne mangerions point de beure frais. Ie ne vis iamais vn plus arresté, sur ces sels. Mais me penserois tu faire croire qu'il y eust du sel souz la terre, & que les eaux le puissent amener pour causer les effects de la medecine?

Practique.

Tu n'es gueres sage de faire vne telle demande; as tu point ouy dire à ceux qui sont venus de Polongne

longne que la miniere de sel est merueilleusement
basse dedans terre? n'as tu pas aussi ouy dire que il
y à des puits salez en Lorraine? Il me semble l'a-
uoir dit cy dessus. Ne sçait on pas qu'en Bearn il
y à des fontaines sales, desquelles l'on fait le sel
qui fournit la pluspart dudit pays, & de Bigorre?
Ce n'est pas encores assez: car quant il n'y auroit
point de sel commun és terres & canaux ou le feu
est allumé, par ou les eaux chaudes passent, il y en
aura de plusieurs autres especes: par ce que si le
feu qui est embrasé dedans les parties souler-
nées trouue du marbre, ou autre espeece de pierre,
de laquelle l'humeur ne soit fixe, le feu les calci-
nera & estant reduites en chaux, les eaux qui pas-
sent par laditte chaux dissoudront le sel qui estoit
au marbre, & autres pierres imparfaites. l'appelle
pierres imparfaites celles qui sont suiettes à se cal-
ciner. Les parfaites ne se calcinent iamais: ains se
vitrifient. Itē si le feu qui est allumé, & qui à cau-
se la chaleur des eaux s'est attaché és mottes de
terre, qui sont plaines de petites racines, ce qui les
fait brusler, les mottes & racines estant bruslees,
laisseront le sel qui est en elles, & l'ayant laissé de-
dans les cendres, & les eaux passant au trauers
d'icelles ne faudront iamais d'emporter le sel dis-
sout en icelles: autant s'en pourra faire des cen-
dres du souphre & du charbon de terre. Et enco-
res que les eaux ne peussent estre salées par les
moyens que ie di (ce qui ne peut estre autrement)

encores

encores seroyēt elles salées du sel qui degoutte continuellemēt avec les eaux qui passēt au trauers des terres pour se rēdre iusq̄s au lieu là ou lesdits feux sont allumez. Il faut donc cōclure que dedās lesdites eaux chaudes, il y peut auoir plusieurs & diuerses especes de sels tout en vn mesme temps: ie di & sel commun, sel de vitriol, sel d'alū, & de coperoze, & de toutes especes de mineraux. Et outre ce q̄ ie di il y peut auoir plusieurs especes de sels, qui serōt entremeslez avec du sable ou caillous, en telle sorte q̄ la violence du feu les aura cōtrains se vitrifier comme ainsi soit que cela soit aduenū par accidēt à ceux qui premieremēt ont inuenté le verre. Aucuns disent que les enfans d'Israel ayant mis le feu en quelq̄ boys, le feu fut si grand qu'il eschauffa le nitre avec le sable iusques à le faire couler & distiller le long des mōraignes, & q̄ deslors on chercha l'inuentiō de faire artificiellemēt ce qui auoit esté fait par accident, pour faire les verres. Autres disent que l'exemple fut pris sur le riuage de la mer, la ou quelque pirates estoient descenduz à bord, & voulant faire boullir leur marmitte, & n'ayans aucuns chenets ou lādiers, prindrēt des pierres de nitre, sur lesquelles ils mirēt des grosses buches, & grāde quātité de bois, qui causa vn si grand feu, q̄ lesdites pierres se vindrēt à liquifier, & estant liquifiées, descoulerēt sur le sablō, qui fut cause que ledit sablō estant entremeslé avec le nitre fut vitrifié cōme le nitre, & le tout fit vne matiere diaphane &

ne & vitreuse. Aussi ie te di qui pourroit voir le lieu ou les feux sont allumez, deffouz les terres & montaignes, que l'on trouueroit plusieurs matieres vitrifies de diuerses couleurs. Aussi trouueroit on or & argent fondu, & autres metaux & mineraux; car tout ainsi que i'ay dit vne autrefois, que l'exterieur de la terre est tout plain de plantes diuerses, aussi l'interieur, se traueille iournellemēt à produyre choses diuerses. & par ce que i'ay dit cy dessus, que les feux qui sont enclos soubs la terre ne peuent engendrer tremblement, sinon quant ils ne peuent aspirer, & que l'halene est reserree. Pour tesmoignage de mon dire i'ay esté aduerti par plusieurs dignes de foy, que aux lieux ou il y a des terres sulphurees l'on voit de nuit vn grand nombre de petis trous au trauers de la terre, par lesquels sortent des flambes de feu procedantes du souphre qui est allumé par deffouz la terre, & disent que les trouz ne sont pas plus grās q̄ trouz de vers, & au tour de l'etree desdis trouz l'on trouue du souphre, que les flambes du feu ont esleué de deffouz la terre, & cesdits feus n'aparoissent que de nuit. Tu peux connoistre par là que le feu prenant aspiration par lesdits trouz. brusle sans faire aucune violence n'y tremblement en la terre. Autant en est il de celuy qui eschaufe les eaux des bains: par ce qu'il prend haleine par le canal desdites eaux. Iusques à présent i'ay pris peine de te faire entendre la cause des bontez

ou malices des eaux, tant de celles des sources naturelles, que des puits, mares & autres receptacles, & tout cela tendant afin que tu connoisses mieux la bonté de l'eau des fontaines, que ie te veux apprendre à faire és lieux les plus steriles de eaux. Je lesseray d'oc tous autres propos pour venir à la cause des sources naturelles: Et ce d'autant qu'il est impossible d'imiter nature en quelque chose que ce soit, que premierement l'on ne contéple les effects d'icelle, la prenant pour patron & exemplaire. car il n'y à chose en ce monde ou il y ait perfection, que és euures du souverain. En prenant donc exemple à ces beaux formulaires, qu'il nous à laissez, nous viendrons à l'imitation d'iceux.

D'ou procedent les sources naturelles.

Quand i'ay eu bien long temps & de pres considéré la cause des sources des fontaines naturelles, & le lieu de la ou elles pouuoient sortir, en fin i'ay conneu directement qu'elles ne procedoyent & n'estoyent engendrees sinon des pluyes. Voila qui m'a meü d'entreprendre de faire des recueils des pluyes, à l'imitation & le plus pres aprochans de la nature, qu'il me sera possible. & en ensuyuant le formulaire du souverain fontenier, ie me tiens tout assureé que ie pourray faire des fontaines desquelles l'eau sera autant bonne, pure & nette, que de celles qui sont naturelles.

Theorique.

Après que i'ay entendu ton propos ie suis contraint

traint de dire que tu és vn grand fol. Me cuides tu si ignorât que ie veuille adiouster plus de foy à ce que tu dis, qu'à vn si grand nombre de philosophes, qui disent que toutes les eaux viennent de la mer & qu'elles y retournēt? Il n'y à pas iusques aux vieilles, qui ne tiennent vn tel langage; & de tout temps nous l'auons tous creu. C'est à toy vne grande outrecuidance de nous vouloir faire croire vne doctrine toute nouuelle, comme si tu estois le plus habile philosophe.

Practique.

Si ie n'estois bien asseuré en mon opinion tu me ferois grand honte: mais ie ne m'estône pas pour tes iniures n'y pour ton beau langage: car ie suis tout certain que ie le gagneray contre toy & contre tous ceux qui sont de ton opinion, fut ce Aristote & tous les plus excellents philosophes qui furent iamais: car ie suis tout asseuré que mon opinion est veritable.

Theorique.

Venons donques à la preuue: baille moy quelque raisons par lesquelles ie puisse connoître qu'il y à quelque apparence de verité en ton opinion.

Practique.

Ma raison est telle, c'est que Dieu à constitué les limites de la mer, lesqelles elle ne passera point: ainsi qu'il est escrit és prophetes. Nous voyons par les effects cela estre veritable, car combiē que

la mer en plusieurs lieux soit plus haute que la terre, toutesfois elle tient quelque hauteur au milieu: mais aux extremittez elle tient vne mesure, par le cōmandement de Dieu. afin qu'elle ne vienne submerger la terre. Nous auons de fort bons tesmoins de ces choses, & entre les euures de Dieu, ceste la est grandement merueilleuse, car si tu auois pris garde aux terribles effects de la mer: tu dirois qu'il semble qu'elle vienne de vintquatre heures en vint quatre heures, deux fois combattre la terre, pour la vouloir perdre & submerger. Et samble sa venue à vne grande armee qui viendroit contre la terre, pour la combattre: & la pointe, comme la pointe d'une bataille, vient horter impetueusement contre les rochers & limites de la terre, menant vn bruit si furieux qu'il semble qu'elle veuille tout destruire. Et pource qu'il y a certains canaux sur les limites de la mer es terres circonuoisines, aucuns ont edifié des moulins sur lesdits canaux, ausquels l'on a fait plusieurs portes pour laisser entrer l'eau dedans le canal, à la venue de la mer: afin qu'en venant elle face moudre lesdits moulins & quāt elle vient pour entrer dedans le canal, elle trouue la porte fermée & ne trouuāt seruiteur plus propre qu'elle mesme, elle ouure la porte & fait moudre le moulin pour sa bien venue. Et quand elle s'en veut retourner, cōme vne bonne seruāte elle mesme ferme la porte du canal, afin de le laisser plein deau, laquelle eau l'on

l'on fait passer apres par vn destroit : afin qu'elle face tousiours moudre le moulin. Et s'il estoit ainsi que tu dis, suyuant l'opiniõ des philosophes que les sources des fontaines vinssent de la mer, il faudroit necessairement que les eaux fussent salees, comme celles de la mer, & qui plus est, il faudroit que la mer fust plus haute que non pas les plus hautes montaignes, ce qui n'est pas.

Item tout ainsi que l'eau qui est entrée au dedās des canaux, & fait moudre les moulins, & qui amene les bateaux en plusieurs & diuers canaux, pour charger le sel, bois & autre choses limitrofes de la mer, est suiette à suyure la grande armée de mer, qui est venue escarmoucher la terre. En cas pareil ie di qu'il faudroit que les fontaines, fleuves & ruisseaux, s'en retournassent avec elle : & faudroit aussi qu'ils fussent taris pendant l'absence de la mer, tout ainsi que les canaux sont emplis par la venue de la mer, & tarissent en son absence. Regarde à present si tes beaux philosophes ont quelque raison suffisante pour couaincre la mienne. C'est chose bien certaine que quand la mer s'en est allée elle descouure en plusieurs lieux plus de deux grands lieues de sable, ou l'on peut marcher à sec. & faut croire que quand elle s'en retourne, les poissons s'enfuyent avec elle. Il y à quelque genre de poissons portant coquilles, comme les moules, fourdons, petoucles, auailons, huitres & plusieurs especes de burgans, lesquels

sont faits en forme de limace, qui ne daignēt s'uy-
ure la mer. mais se fiant en leurs armures, ceux
qui n'ont qu'une coquille s'attachēt contre les ro-
chers, & les autres qui en ont deux demeurent
sur le sable. Aucuns genres d'iceux, lesquels sont
formez comme vn manche de couteau ayant en-
viron demy pied de long, se tiennent cachez de-
dans le sable bien auant, & alors les pescheurs les
vont querir. C'est vne chose admirable que les
huitres estant apportees à dix ou douze lieues de
la mer, elles sentēt l'heure qu'elle reuiēt & appro-
che des lieux ou elles faisoient leurs demeuran-
ces, & d'elles mesmes s'ouurent, pour receuoir
aliment de la mer, comme si elles y estoient en-
cores. Et à cause qu'elles ont ce naturel, le cancre
sachant bien qu'elles se viendront presenter portes
ouuertes quād la mer retournera en ses limites, se
tient pres de leurs habitations, & ainsi que l'hui-
tre aura ses deux coquilles ouuertes, ledit cancre
pour tromper l'huitre prend vne petite pierre, la-
quelle il met entre les deux coquilles; afin qu'elles
ne se puissent clore, & ce fait, il à moyen de se re-
paistre de ladicte huitres. Mais les souris n'ont pas
conneu la cause pourquoy les huitres auoyent
deux coquilles; car il est aduenü en plusieurs lieux
bien distant de la mer, lors que les huitres sen-
toient l'heure de la marée, & qu'elles se venoyent
à ouurir, comme i'ay dit cy dessus, les souris les
trouuans ouuertes, les vouloyent manger, &
l'huitre

L'huitre sentant la douleur de la morsure venoit à clorre & resserrer les deux coquilles : & par ce moyen plusieurs souris ont esté prises : car elles n'auoyent pas mis de pierre entre deux , comme le cancre. Quand est des gros poissōs, les pescheurs des isles de Xatonge ont inuenté vne belle chose pour les tromper; car ils ont planté en certains lieux dedans la mer, plusieurs grandes & grosses perches, & en icelles ont mis des poulies, auxquelles ils attachent des cordes de leurs rets ou filets, & quād la mer s'en est alée, ils laissent couler leur filets dessus le sable, laissant toutes fois la corde ou ils sont atachez, tenant des deux bouts audittes poulies. Et quand la mer s'en reuiet, les poissons viennent euec elle, & cherchent pasture d'un chosté & d'autre, ne se donnant point de difficulté des filets qui sont sur le sable, par ce qu'ils nagent au dessus : & quand les pescheurs voyent que la mer est prestte de s'en retourner, ils leuent leurs filets iusques à la hauteur de l'eau, & les ayāt atachez audites perches, le bas desdits filets est compressé de plusieurs pierres, de plomb, qui les tient roides par le bas. Les mariniers ayants tendu leurs rets & esleuez en telle sorte, attendent que la mer s'en soit allée, & comme la mer s'en veut aller, les poissons la veulent suyure, comme ils ont accoustumé: mais ils se trouuent deceus d'autant que les filets les arrestēt, & par ce moyen sont pris par les pescheurs, quand la mer s'en est allée.

Et afin de ne sortir hors de nostre propos ie te donneray vn autre exemple. Il faut tenir pour chose certaine que la mer est aussi haute en esté comme en hyuer, & quand ie diroys plus, ie ne mentirois point: par ce que les marées les plus hautes sont en la pleine l'vne du mois de mars, & à celle du mois de Iullet: auquel temps elle couvre plus de terre és parties maritimes des insulaires Xaintoniques, que non pas en nulle autre saison. Si ainsi estoit que les sources des fontaines vinssent de la mer, comment pouroyent elles tarir en esté? veu que la mer n'est en rien moindre qu'en hyuer, prens garde à ce propos, & tu connoistras que si la mer alaietoit de ses tetines les fontaines de l'vniuers, elles ne pouroyent iamais tarir és mois de Iullet, Aoust & Septembre, auquel temps, vn nombre infini de puits se tarissent. Il faut que ie dispute encores contre toy & tes philosophes Latins: par ce que tu ne trouues rien de bon s'il ne vient des Latins. Ie te di pour vne regle generale & certaine, que les eaux ne montent iamais plus haut que les sources d'ou elles procedent. ne sçais-tu pas bien qu'il y a plus de fontaines és montaignes que non pas aux valées: & quant ainsi seroit que la mer fust aussi haute que la plus haute mōtaine, encores seroit il impossible que les fontaines des montaignes vinssent de la mer: & la raison est, par ce que pour amener l'eau d'un lieu haut pour la faire monter en vn autre

tre lieu aussi haut, il faut necessairement que le canal par ou l'eau passe soit si bien clos qu'il ne puisse rien passer au trauers: autrement l'eau estât deffendue en la valée elle ne remonteroit iamais és lieux hauts: mais sortiroit au prochain trou qu'elle trouueroit. A present donc ie veux conclure que quand la mer seroit aussi haute que les montaignes, les eaux d'icelle ne pouroyent aller iusques aux parties hautes des montaignes, d'ou les sources procedent. Car la terre est pleine en plusieurs lieux de trouz fentes & abymes, par lesquels l'eau qui viendrait de la mer sortiroit en la plaine, par les premiers trouz, sources ou abismes qu'elle trouueroit, & au parauant qu'elle mōtast iusques au sommets des montaignes, toutes les plaines seroyent abismées & couuertes d'eau: & qu'ainsi ne soit que la terre soit percée, les feux continuels, qui sortent des abismes amènent avec soy des vapeurs sulphurees, qui en rendent tesmoignage, & ne faudroit qu'un seul trou, ou vne seule fente, pour submerger toutes les plines. Or va querir à present tes philosophes Latins pour me donner argument contraire, lequel soit aussi aisé à connoistre, comme ce que ie mets en auant.

Theorique

Tu dis que si les sources des fontaines venoyent de la mer, que les eaux en seroyent salées, comme celles de la mer, & touresfois l'opinion generale & commune est que les eaux se dessalent en passant

passant par les veines de la terre.

Practique.

Ceux qui soustiennent vne telle opinion n'y entendent rien: parce qu'il est plustost à croire que le sel de la mer vient de la terre, y estant porté tant par les eaux des riuieres qui se rendent en icelle, que par les flots impetueux, qui frappent violemment contre les rochers & terres salées. Car il te faut noter qu'en plusieurs pays il y a des rochers de sel. Il y a quelq' auteur qui a mis en ses euures qu'il y a vn pays ou les maisons sont faites de pierres de sel; quoy consideré il te faut chercher arguments plus legitimes, pour me faire croire que les eaux des fontaines & riuieres procedét de la mer.

Theorique.

Et ic te prie fay moy donc bien entendre ton opinion, & d'ou tu cuides qu'elles peuuent venir, si elles ne viennent de la mer.

Practique.

Il faut que tu croyes fermement que toutes les eaux qui sont, seront & ont esté, sont créées des le commencement du monde. Et Dieu ne voulât rien laisser en oysseté, leur commande aller & venir & produire. Ce quelles font sans cesse, comme i'ay dit que la mer ne cesse d'aller & venir. Pareillemēt les eaux des pluyes qui tōbent en hyuer remontent en esté, pour retourner encores en hyuer, & les eaux & la reuerberation du soleil & la siccité, des vents frappans contre terre fait esleuer gran-

ner grande quantité d'eau: laquelle estant rassemblée en l'aër & formée en nuées, sont parties d'un costé & d'autre comme heraux enuoyez de Dieu. Et les vents poussant lesdittes vapeurs, les eaux retombent par toutes les parties de la terre, & quand il plait à Dieu que ces nuées (qui ne sont autre chose qu'un amas d'eau) se viennent à dissoudre, lesdittes vapeurs sont conuerties en pluies qui tombent sur la terre.

Theorique.

Veritablement ie connois à ce coup que tu es un grand menteur, & si ainsi estoit que les eaux de la mer fussent esleuees en l'aër, & tombassent apres sur la terre, ce seroit des eaux salées, te voyla donc pris par tes paroles mesme.

Practique.

C'est fort mal theoriqué à toy: me cuides tu surprendre par ce point? tu es bien loing de ton compte. Si tu auois considéré la maniere comme se fait le sel commun, tu n'vsses mis un tel argument en auant, & s'il estoit ainsi que tu dis, l'on ne pouuroit iamais faire de sel. Mais il te faut entendre que quand les sauniers ont mis l'eau de la mer dedans leur parquetages, pour la faire congeler à la chaleur du soleil & du vent, elle ne se congeleroit iamais n'estoit la chaleur & le vent, qui esleue en haut leau douce, qui est entremeslée parmy la salée. Et quant leau douce est exalée, la salée se viét à craindre & congeler. voyla comment ie preuue
que

que les nuées esleuées de l'eau de la mer ne sont point salées. Car si le soleil & le vent exaloyent l'eau salée de la mer, ils pouroyent aussi exaler celle dequoy l'on fait le fel, & par ce moyen il seroit impossible de faire du fel. Voila tes argumēs vaincuz.

Theorique.

Et que deuindra donc l'opinion de tant de philosophes qui disent, que les fontaines, fleuves ou riuieres, sont engendrees d'un aër espois, qui sort du dessouz des montaignes, de certaines cauernes, qui sont dans lescdittes montaignes, & disent qu'iceluy aër vient à s'espoissir, & quelque temps apres se dissout & conuertit en eau, qui cause la source des fontaines & riuieres.

Practique.

Entens tu bien ce que tu dis, que c'est vn aër qui s'espoissit contre les voutes des cauernes, rochers, & que cela se vient à dissoudre en eau? pose le cas que cela soyt: toutesfois il me semble que la maniere de parler est mal propre. Tu dis que c'est vn aër espoissy, & puis qu'il se dissout en eau: c'estoit donc de l'eau conforme à celle que ie dy qui est esleuée, que l'on appelle nuées, lesquelles s'approchant pres de la terre obscurcissent l'aër par vne compression qu'elles apportent, & font que ledit aër est tellement esmeu par compression des eaux assemblées en forme de nuées. Et qu'ainsi ne soit, prens garde quand lescdit-

lesdites nuées sont dissoutes & reduites en pluyes, tu connoistras que les vents ne sont autre chose qu'une compression d'aër, engendrée par la descente des eaux: d'autant qu'après que les eaux sont tombées en bas, les vents sont soudain pacifiés: & de là est venu le proverbe que lon dit, petite pluye abat grand vent. ainsi donc la pluye auoit *Des vents.* causé lesdits vents, lesquels estant pacifiés par la cheute de la pluye, deslors l'aër, qui estoit obscurcy, commence à s'esclaircir. C'est pour te faire entendre que ie ne nie pas que les eaux encloses dedans les cauernes & gouffres des montaignes ne se puissent exaller contre les rochers & voutes, qui sont au dessouz desdits gouffres: mais ie n'ye que ce soit la cause totale des sources des fontaines, tant s'ent faut: car si tu veux cōsiderer que depuis la creation du monde, il est sorti continuellement des fontaines fleuves & ruisseaux desdites montaignes, tu connoistras bien qu'il est impossible que lesdittes cauernes puissent fournir d'eau pour vne année non pas pour vn mois, autant de fleuves qui d'escoulent iournellement. Il faut donc conclure que les eaux qui sortent desdittes cauernes ne viennent n'y de la mer n'y des abysses: car ie sçay à la verité que desdits creux des rochers il sort vne merueilleuse quantité d'eau: & en plusieurs montaignes on la void sortir comme vne grosse fumée espesse, qui en s'esleuant en haut obscurcit l'aër en se dilatât parmi icelluy d'une part & d'autre,

tre, & quand ladicte vapeur vient à se dissoudre ce n'est autre chose que pluye. I'ay veu plusieurs fois sortir de telles espoisses vapeurs au pays d'Ardenne, & ceux qui les voyoyent sortir comme moy disoyent que dans peu de temps nous aurions de la pluye, estans bien asseurez que lesdittes vapeurs se dissoudroyent en eau. I'ay veu aux montaignes Pyrenées plusieurs fois sortir de telles vapeurs, qui estant esleuees en haut se conglaçoient en neiges, & bien tost apres lesdittes neiges couuroient toute la terre. Je ne nie donc pas que les vapeurs aqueuses des cauernes souzternées ne puissent contenir grande quantité deaux: mais il faut necessairemēt qu'elle y aye esté mise & portée par les postes & messagers de Dieu, sçauoir est: les vents, pluyes, orages & tempestes, comme il est escrit que ce sont les herauts de la iustice de Dieu. Or donc les eaux des cauernes y ont esté mises par les pluyes engendrees tant des eaux qui sont esleuees de la mer, que de la terre & de toutes choses humides, lesquelles en dessechant les vapeurs aqueuses, sont esleuees en haut pour tomber de rechef, voila comment les eaux ne cessent de monter & descendre, comme le Soleil & la Lune n'ont en eux nul repos, semblablement les eaux ne cessent de trauailler à engendrer, produire, aller & venir ainsi que Dieu leur à commandé.

Theorique.

Tu as cy deuant conclud comme par vn arrest
definitif

definitif, que toute les sources des fontaines & fleuves ne procedét d'autre chose que des eaux de pluyes, chose fort esloingnée de toute opiniõ commune; ie te prie donc moy quelque raison qui aye apparece de verité, pour me faire croyre que ton dire soit fondé sur quelque preuue legitime.

Practique.

Au parauant que venir aux raisons, il te faut cõsiderer la cause des montaignes, & consequemment des valées, & ayant considéré de bien pres ces choses, tu entendras directement la raison pourquoy en certaines cõtrées l'on ne peut trouuer aucune source d'eau, non pas mesme souz la terre, pour faire des puits, Et quant tu auras entendu ces choses, il te sera aisé à croire que toutes fontaines ne procedent que des sources prouenant des pluyes. Venons donc à la connoissance des montaignes, pourquoy c'est qu'elles sont plus hautes que la terre; Il n'y à autre raison que celle de la forme de l'homme: car tout ainsi que l'homme est soustenu en sa hauteur & grandeur à cause des os, & sans iceux l'homme seroit plus acroupy qu'une bouze de vache. En cas pareil si ce n'estoit les pierres & mineraux qui sont les os de la forme des montaignes, elles seroyent soudain conuerties en valées, ou pour le moins tous pays seroyent plats & à niueau, par les faits des eaux, qui descēdroyēt avec elles des terres & môtagnes droit aux valées. Ayant mis en ta memoire vne telle cõsideration

*La cause de
la forme des
montaignes.*

ration tu pouras connoistre la cause pourquoy il y a plus de fontaines & riuieres procedantes des montaignes que non pas du surplus de la terre, qui n'est autre chose sinon que les roches & montaignes retienent les eaux des pluyes comme feroit vn vaisseau d'airain. Et lesdittes eaux tombantes sur lesdittes montaignes au trauers des terres & fentes, descendent tousiours & n'ont aucun arrest iusques à ce qu'elles ayent trouué quelque lieu forcé de pierre ou rocher bien contigu ou condensé: Et lors elles se reposent sur vn tel fond, & ayât trouué quelque canal ou autre ouuerture, elles sortent en fontaines ou en ruisseaux & fleuves, selon que l'ouuerture & les receptacles sont grands & d'autant qu'une telle source ne se peut ietter (contre sa nature) aux montaignes, elle descend aux vallées. Et combien que les commencements desdittes sources venant des montaignes ne soyent gueres grandes, il leur vient du secours de toutes pars, pour les agrandir & augmenter: & singulierement des terres & montaignes qui sont à dextre & à senestre du cours desdittes sources. Voyla en peu de paroles la cause des sources des fontaines, fleuves & ruisseaux: & ne te faut chercher nulle autre raison que celle là. si les philosophes ont escrit que les sources estoient engendrées d'un aër espois sourdant du bas des montaignes, & que cedit aër estant dissout en eau, cauçoit les fontaines: c'estoit donc de l'eau au parauant prouenant des pluyes

pluyes estans tombées auant que remonter.

Venons à present à la cause pourquoy il n'y à
aussy bien des sources és plats pays & campagnes
comme és montaignes. Tu dois entendre que si
toute la terre estoit sableuze, deliée ou spongieu-
se, comme les terres labourables, l'on ne trouue-
roit iamais source de fontaines en quelque lieu
que ce fust. Car les eaux des pluyes, qui tombe-
roient sur lesdittes terres, s'en iroyent tousiours
en bas iusques au centre, & ne se pouroyēt iamais
arrester pour faire puits ny fontaines. La cause
done pourquoy les eaux se trouuent tant és sour-
ces qu'és puits, n'est autre qu'elles ont trouué vn
fond de pierre ou de terre argileuse, laquelle peut
tenir l'eau autāt bien cōme la pierre; & si quelqu'un
cherche de l'eau dedans des terres sableuses il n'en
trouuera iamais si ce n'est qu'il y aye au desouz de
l'eau quelq̃ terre argileuse, pierre, ou ardoize, ou
mineral, qui retiennent les eaux des pluyes quand
elles auront passé au trauers des terres, tu me pou-
ras mettre en auāt que tu as veu plusieurs sources
fortāt des terres sableuses, voire dedans les sables
mesmes: A quoy ie respons, cōme dessus, qu'il y à
dessouz quelque fond de pierre, & que si la source
monte plus hault que les sables, elle vient aussy de
plus haut: & ne t'abuses point en ta seule opiniō:
car tu ne trouueras iamais raisons plus certaines
que celle que ie t'ay mis en plusieurs endroits de
ce discours. & si tu ne me veux croire c'est à moy

Pourquoy il
n'y à des sour-
ces en plats
pays comme
és montai-
gnes.

D

grand

grand folie de t'en parler d'auantage. parquoy ie feray fin de la cause des sources des fontaines.

Theorique.

A la verité il y à long temps que nous sommes sur ce propos, & i'ay esté bien deceu: par ce que des le commencement tu m'as promis de me montrer à faire des fontaines és lieux sterilles d'eau, & en quelque part que ie voudrois: mais iusques icy tu ne m'en as pas dit encores vn seul mot.

Practique.

Tu n'és gueres sage, ne crois tu pas que le Medecin prudent, n'ordonnera iamais vne medecine à vn malade, si premierement il ne connoist la cause de la maladie? en cas pareil ne faloit il point que, au parauant que t'apprendre à faire des fontaines, ie te montrasse la cause de celles qui se font naturellement? Ne sçais tu pas que ie t'ay promis des le commencement de t'apprendre à faire des fontaines à l'imitation de celles du souuerain fontenier? & comment cela se pouroit il faire sans premierement contempler les natures? voila pourquoy ie t'ay voulu inciter à te faire entrer en vne telle contemplation. Et combien que cy deuant ie t'aye beaucoup parlé de l'essence des sources, si est ce que ie te veux encores faire entendre qu'il est impossible qu'elles puissent proceder de la mer, pour vne cause que i'ay oublié à dire cy deuant, qui est qu'il n'y à rien de vuide souz le ciel, & que lors que la mer se retire des canaux, concauit

tez, trous ou voyes ou elle estoit entrée quand elle estoit haute, les eaux n'ont pas si tost laissé lesdits trous ou canaux vuides, qu'ils ne soyent remplis d'aër, & si l'eau retournant de la mer vient à enclore & enfermer l'aër qui aura pris possession en son absence dans lesdits trous, iceluy fera obstacle à l'eau s'il ne trouue quelque subtile aspiration, pour luy ceder place: & si cela se fait en vne fiole de verre tant soit elle petite ou grande, combien cuides tu que cela se peut faire plus asseurement en vn canal d'eau qui iroit depuis la mer iusques aux montaignes d'Auuergne? si tu dis que entre les môtaignes & la mer il y peut auoir quelques subtiles aspirations par lesquelles l'aër s'en pourra fuir au deuant de l'eau, ie respons que si l'aër y passe, l'eau y passera aussi: & est certain que l'eau de la mer vient d'vne telle vitesse, que quand il y auroit vn canal bien clos depuis la mer iusques aux montaignes, & qu'elle fut aussi haute que les montaignes, si est ce que l'eau ne pouroit venir iusques ausdites montaignes, qu'elle ne fit creuer le canal, à cause de la grâde distance & de l'aër enclos avec elle. Et comme i'ay dit vne autrefois, si cela se pouoit faire, les riuieres, fontaines & sources des montaignes, tariroient quand la mer s'en seroit allée, qui est vne regle aussi certaine que celle que i'ay dit cy dessus, asçauoir que si les fontaines & riuieres venoyent de la mer les eaux seroyent salées. I'ay encores vne exemple, singulie-

re, & pour la dernière de ce propos, qui est que aux pays & isles de Xaintonge l'imitrophes de la mer, il y a en plusieurs bourgs & villages, des puits doux & des puits salez, l'on peut connoistre clairement par la que les puits dont les eaux sont salées, sont abreueuz de l'eau de la mer, & les puits d'eau douce, qui sont pres des salées, & aussi pres de la mer, s'ont abreueuz des esgouts des pluyes qui viennent de la partie contraire de la mer. Et qui plus est, & bié à noter, il y a plusieurs petites isles, enuironnées & entourées d'eau de la mer, mesme quelques vnes qui ne contiennent pas vn arpent de terre ferme, esquelles il y a des puits d'eau douce; ce qui dōne clairement à connoistre que lesdites eaux douces ne prouiennent n'y de source ny de la mer: ains des esgouts des pluyes, trauersant les terres iusques à ce qu'elles ayent trouué fond, ainsi que ie t'ay desia dit. Apres que i'eus conneu sans nulle doute que les eaux des fontaines naturelles estoient causees et engendrées par les pluyes, i'ay pensé que c'estoit vne grande ignorance à à ceux qui possedēt heritages steriles d'eaux qu'ils n'auiroyent les moyens de faire des fontaines: veu & entendu que Dieu enuoye des eaux autant bien sur les terres sableuses que sur les autres, & qu'il faut bien peu de science pour la sçauoir recueillir. Si les antiques n'eussent autrement contemplé les cuures de Dieu, ils se fussent nourris de la pasture des bestes, il eussent seule-

ment

ment pris les fruits des champs tes qu'ils fussent venus sans labour: mais ils se sont voulu sagement exercer à planter, semer & cultiuer, pour aider à nature, c'est pourquoy les premiers inuenteurs de quelque chose de bon, pour aider à nature, ont esté tant estimez par noz predecesseurs, qu'ils les ont reputez estre participans de l'esprit de Dieu. Ceres laquelle s'aduisa de semer & cultiuer le ble, à esté appelée deesse; Bachus hōme de bien (non point yurongne comme les peintres le font) fut exalté par ce qu'il s'auisa de planter & cultiuer la vigne: Priapus en cas pareil, pour auoir inuenté le partage des terres, affin que chacun cultiuast sa part: Neptune pout auoir inuenté la nauigation; & consequemment tous inuenteurs de choses vtiles, ont esté estimez estre participans des dōs de Dieu, Bachus auoit bien trouué des raisins sauuaiges, Ceres auoit bien trouué du bled sauuaige: Mais cela ne suffisoit pas pour les nourrir suauement, comme quand les choses furent transplantées. Nous connoissons par la que Dieu veut que l'on traueille, pour aider à nature, cōme ainsi soit que toutes choses transplantées sont beaucoup plus suauies que non pas les sauuaiges: & veu que Dieu nous enuoye de l'eau pure & nette, iusques à noz portes, qui ne couste riē que à luy preparer lieu pour la recueillir: ne sera pas à nous vne grande paresse apres auoir veu vne bonne inuention pour recueillir les eaux que Dieu nous enuoye

de croupir en nostre paresse, sans daigner receuoir vne telle benediction? or ie feray mon deuoir suyuant la promesse que ie t'ay faite, protestant que si tu la mesprises tu es indigne de iamais iouir du benefice des eaux de fontaines, ie di partant que tu ayes quelque heritage auquel tu puisses recueillir des eaux, ainsi que ie te feray entendre.

Theorique.

Ie te prie donc ne me faire plus languir, mais me monstrier promptement le moyen d'y proceder.

Practique.

Ie ne te puis sagement instruire, que ie n'ay entendu de toy si le lieu ou tu veux faire ta fontaine est montueux ou plat: par ce que selon la commodité du lieu il faut que la chose soit designée, ou autrement l'on trauailleroit en vain.

Theorique.

I'ay vne maison champestre aupres de laquelle y à vne montaigne assez roide, & ma maison est pres du pied de ladicte montaigne.

Practique.

Si ainsi est tu as vne grande commodité pour construire ta fontaine à peu de frais, & te diray comment; il n'est point de montaigne qui ne soit foncee de rochers, cōme ie t'ay dit plusieurs fois. Tu te peux donc asseurer que si tu prens garde qu'il n'y ait quelque trou ou fente le long de la montaigne, tu pouras recueillir grande quantité d'eau, & la faire descendre iusques aupres de ta mai-

maison. Prends donc garde qu'il n'y aye quelque ouuerture, par laquelle ton eau se puisse perdre, & s'il y en à ferme la de pierres & de terre, & puis rempare la circonference à dextre & à senestre du lieu que tu auras destiné pour receuoir les eaux des pluyes : Et ayant ainsi fait vn rempart en maniere de chaussée toute l'eau qui tombera dedans ton enclos se viendra rendre au lieu que tu luy auras préparé : Et ce fait tu feras deux receptacles, l'un apres l'autre : le second sera plus bas que le premier : afin que l'eau du premier, estant desia purifiée se vienne rendre au second. Et pour purifier les eaux, faut qu'elles passent au trauers d'une quantité de sable, que tu auras mis au deuant du premier receptacle, & faut maçonner les pierres du premier receptacle sans mortier : afin que les eaux puissent passer iusques au second, ou bien faire quelque grille d'airain, ou vne platine percée de petis trous ; afin qu'il ne passe rien que l'eau ; & ainsi quand elle aura passé au trauers le sable, & par le premier receptacle, elle sera bien affinée quand elle se rendra au second, & au bas d'iceluy pource que le premier receptacle sera grand, & descouuert en l'air comme vn estang, il faudra faire vn troisieme degré plus bas que les deux autres, duquel sortiront les eaux pour l'usage de la maison : si tu veux enrichir la face du receptacle du costé que tu tires l'eau, tu le pouras enrichir de telle beauté q bon te semblera,

soit en façon de roc ou autrement; & si tu pouras planter des arbres à dextre & à fenestre, que tu feras courber en forme de tonnelle ou cabinet, pour donner beauté à ta fontaine.

Theorique.

Voyre: mais si ma maison estoit vn Chasteau entouré de fossez, cela ne me pouroit servir.

Practique.

Si ainsi estoit il faudroit amener l'eau du spectacle par tuyaux iusques au dedans du chasteau, tout ainsi que tu vois les fontaines de Paris, & celles de la Roynie, que l'on fait passer au trauers les fossez, par dedans certaines piéces de bois, qui sont creusées pour cest effect, & sont couuertes par dessus, & y à dedans vn tuyau de plomb par ou l'eau desdittes fontaines passe.

Theorique.

Ie connois à ce coup qu'il y à quelque apparece de verité en ton dire: toutefois quand i'aurois fait tout ce que tu dis ie n'aurois rien fait sinon vne cisterne. ie me tiens tout asseuré que tous ceux qui verroyent ma fontaine ne l'appelleroyēt point autrement.

Practique.

Mais penses tu cōnoistre la verité n'y le poids de mes paroles, si tu n'as souuenance de ce que i'ay dit au parauant, de la cause des sources naturelles? Il est bien certain que si tu ne retiés qu'une partie de tout ce que ie di tu n'entendras rien:

Mais

Mais toute personne qui entēdra les beaux exemples & preuues singulieres que ie t'ay dites cy deuant, il confessera tousiours que la fontaine que ie te veux mōstrer à faire ne peut estre appellée cisterne: Ains à bon droit elle sera appellée fontaine naturelle; d'autant que l'eau qu'elle iettera procede du mesme tresor que les autres fontaines. Et n'y à nulle difference, sinon deux points; le premier est que l'on à aydé à recueillir ou pour mieuz dire receuoir le bien qui nous est présenté: Mais qu'est ce que ie di? n'y à il point de peine? & ne fait on point de frais pour amener les sources naturelles dedans les villes & chasteaux? ne faut il pas aussi bien de la maçonnerie cōme à celle que ie te monstre à faire? & qui est celuy qui la pourra legitiment appeller cisterne? veu qu'elle n'a rien moins que les fontaines naturelles: Je t'ay dit qu'elle estoit toute semblable aux naturelles, excepté deux points: le premier est, comme i'ay dit, que l'on à aidé à nature: tout ainsi que semer le bled, tailler & labourer la vigne, n'est autre chose qu'aider à nature: Le second est de grand poids, & ne peut estre entendu si tu n'as bien retenu le commencement de mes propos, & l'ayant bien entendu tu pouras iuger par les preuues que i'ay alleguees, que nulle des fontaines naturelles ne sçauroyent produire eaux desquelles on puisse estre asseuré qu'elles soyent bonnes, comme de celle que ie te monstre à faire. La raison est, comme

me tu peux auoir entendu, que toute la terre est pleine de diuerses especes de sels & de mineraux, & qu'il est impossible que les eaux passans par les conduits des rochers & veines de la terre, n'amenent avec elles quelque sel ou mineral veneneux, ce que ne peut estre en l'eau de la fontaine, que ie t'apprens à faire. Item tu sçais bien que c'est vne regle generale, que les eaux les plus legeres sont les meilleures: ie te demande, y à il des eaux plus legeres que celles des pluyes? ie t'ay dit par cy deuant qu'elles sont montees au parauant que descendre, & cela à esté fait par la vertu d'vne chaude exalation: or les eaux qui sont montées ne peuuent porter en elles que bien peu de substance terrestre, & encores moins de substance minerale. Et ceste eau, qui est ainsi legerement montée par exalation, redescend sur les terres, lesquelles tu sçais bien qui sont nettes de tous minerals & autres choses qui peuuent rendre les eaux mauuaises. Voila pourquoy ie puis conclure que les eaux des fontaines faites selon mon dessein, seront plus asseurement bonnes que non pas les naturelles, & ne deurôt point estre appelez autrement que fontaines naturelles: & tout ainsi que les arbres fruitiers ne peuuent changer de nom pour estre entez & transplantez, aussi mes fontaines ne peuuent changer de nom pour estre meilleures que les autres, & s'il estoit loisible de leur changer de nom, il
fau-

faudroit appeller les sources naturelles sauvages au regard de celles que ie te montre: Tout ainsi que les arbres fruitiers qui croissent naturellement es bois, sont appelez sauvages: & estât transplanter on les appelle francs. Et pour te faire mieux connoistre que les eaux des pluyes sont les plus legeres, & par consequent les meilleures, interro- gue vn peu les teinturiers & les affineurs de sucre, ils diront que les eaux des pluyes sont les meilleures pour leurs affaires, & pour plusieurs autres choses. Si tu ne veux croire tant de belles preuues que ie t'ay amenees, ie te renuoye voir le grand Viétruc, qui est celuy de tous ceux qui ont parlé des eaux, qui en parle le plus sainement: il preuue dans son liure, par raisons suffisantes, que l'eau des pluyes est la meilleure & la plus saine.

Theorique

Ie connois à present que ce que tu dis est fort aisé à faire, & que les eaux de telles fontaines seront asseurement bonnes: Mais ie crain vne difficulté, qui est que quand il pleut asprement de pluye d'orage, les eaux qui dessendent violemment du haut de le montaigne ne viennent à amener grande quantité de terres, sables & autres choses, qui empeschent le cours de la fontaine ou bien des eaux qui se pouroyent rendre en icelle.

Practie-

Practique.

Pour vray ie connois à ce coup que tu n'es pas aliené de iugement, & par ce que ie voy que tu es attentif à mes paroles, ie te feray cy apres vn pourtrait ou dessein conuenable pour la place ou lieu que tu m'as fait entendre, pour faire ta fontaine. Et pour obuier à la malice des grandes eaux qui se pouroyent assembler en peu d'heure par quelque tempeste, il faut qu'apres que tu auras designé ton par terre pour recevoir les eaux, tu mettes des grosses pierres au trauers des plus profonds canaux qui viennent en ton parterre. Et par tel moyen la violence des eaux & rauines sera amortie, & ton eau se rendra paisiblement dans tes receptacles.

Theorique.

Ie te demande s'il le long de la montaigne que ie veux choisir pour le parterre, il y a des arbres, faudra il les couper?

Practique.

Nenny de par Dieu, donne t'en bien garde: car lesdits arbres. te seruironr beaucoup en cest affaire. Il se treuve en plusieurs parties de la France, & singulierement à Nantes, des ponts de bois, que pour desrompre la violence des eaux & glaces qui pouroyent offenser les pilliers desdits ponts, l'on a mis grâde quâtité de bois debout, au deuât desdits pilliers: parce que sans cela ils seroyent de peu de duree. Semblablement les arbres qui sont plan-
tez le

rez le long de la montaigne, ou tu veux faire ton parterre, feruiront beaucoup pour abatre la trop grande violence des eaux, & tant s'en faut que ie te conseille de les couper, que s'il n'y en auoit point ie te conseillerois d'y en planter: car ils te feruiroyent pour empescher q̄ les eaux ne puissent concauer la terre: & par tel moyen l'herbage sera conserué, au long duquel herbage les eaux descendent fort doucement droit à ton receptacle: Et te faut noter vn point singulier le quel n'est conçu que de peu de gens, qui est q̄ les fueilles des arbres qui tomberont dedans le parterre & les herbes croissantes au dessouz, & singulierement les fruits s'il y en à aux arbres estant putrifiées, les eaux du parterre attireront le sel desdits fruits, fueilles & herbages, lequel rendra beaucoup meilleure l'eau de tes fontaines, & empeschera toute putrefaction. Quand nous parlerôs des sels tu pouras plus clairement connoistre ce point: parquoy ie ne t'en diray plus.

Theorique.

I'ay vne autre maison champestre: mais la montaigne est bien à demy quart de lieüe à costé de ma maison: n'y auroit il point de moyen d'y faire venir la fontaine? car quand les eaux descendent elles s'en vont tomber dedans des prairies assez loing de ma maison.

Pratique.

N'as tu pas moyen de remparer les eaux au
 pied

pied de la montaigne, & leur faire prendre le chemin vers le costé de ton heritaie? & quand tu les auras amenées iusques à la pleine, deuers le costé de ta maison, il te les faudra amener le surplus du chemin par tuyaux de plomb, de terre, ou de bois: tu feras bien cela; c'est chose bien aisée.

Theorique.

Et si ie voulois faire vne fontaine en vn lieu chapestre, q̃ la terre fut à niueau cōme l'on voit communemēt aux cāpagnes y auroit il quelque moyen d'en faire?

Practique.

Ouy bien: mais c'est à plus grand frais que non pas és montaignes: d'autant que la ou la place est droitte, il luy faut donner pente à force d'hommes.

Theorique.

Cōment est il possible de luy dōner pente si elle n'y est de nature?

Practique.

Encores n'est ce pas le piz: car il est bien aisé de dōner pente à force d'hōmes: Mais le piz est qu'estant haussée d'un costé & abaissée de l'autre, il la faut necessairement paier: car autrement tout ne vaudroit rien.

Theorique.

Il faut donc conclure tout en vn coup, que cela ne se peut faire: parquoy il n'en faut plus parler.

Practique.

Si fait si fait: & la chose est biē aysée, moyennāt que l'on veuille employer du tēps & de l'argent.

Theorique.

Je te prie me dire cōment tu y voudrois proceder.

der.

Practique.

Ie voudrois en premier lieu choisir vn chp bien pres de la maison, & selon la grdeur de ma famille ie voudrois faire mo parterre, & ayt tendu mes cordeaux i'aurois vn nombre de mercenaires, auxquels ie ferois oster la terre du bout prochain de la maison ou ie voudrois faire les receptacles, & la ferois porter  l'autre bout de mon parterre, & par ce moye ie n'aurois pas si tost baiss la partie prochaine de la maison de deux piedz, que l'autre partie ne se trouuast plus haute de quatre pids, qui seroit vne hauteur assez capable pour amener toutes les eaux des pluyes qui tomberoyt deds ton parterre, les frais de cela ne sont pas si grands qu'ils vaillent le disputer. Mais qunt aux frais du paue il pouroit couster plus ou moins, selon la comodite des estoffes qui se trouueront pres du lieu.

Theorique.

Et qu'el besoing est il de pauer ce parterre?

Practique.

Par ce que tu m'as dit que c'est vn pays plat, & que tu as tach  y faire des puits, ou tes predecesseurs & toy auez beaucoup despendu, & si n'auez sceu trouuer d'eau, ie t'ay dit cy deur q si toutes terres estoient sableuses & spongieuses, que les eaux des pluyes passeroyt soudain qu'elles seroyt cheutes: & q si toutes terres estoient ainsi, que iamais n'e pouroit auoir source de fteine, & q les fontaines ne sont causes q de ce que les terres sont fonces de pierre, ou de qlque mineral;

pour ces causes quand tu aurois fait apporter les terres du bout de ton parterre à l'autre, & qu'il seroit tout préparé à recevoir les pluies, cela ne te seruiroit de rien: parce qu'elles ne trouueroyent rien qui les peut arrêter. voyla pourquoy ie t'ay dit qu'il faut necessairement que ton parterre soit pavé: afin qu'il puisse contenir l'eau. Je n'entens pas qu'il faille que ce soit vn pavé taillé ny choisi de pierres dures, comme celuy des villes, n'y assis avec du sable, s'il ne se trouue sur le lieu, ains les poser toutes cornues avec de la terre simplement. Voyla comment ie l'entends: afin que tu ne pen- ses que la despence soit si grande; & s'il se trouue de la pierre plate, comme l'on voit en plusieurs contrées, il les faut mettre de plat; afin qu'elles tiennent plus de place, pourveu qu'elles puissent empescher que les terres ne boyuent l'eau: cest tout vn, comment elles seront mises.

Theorique.

Et si ie veux eriger ma fontaine en quelque lieu ou il n'y aye point de pierre?

Practique.

S'il n'y a point de pierre, fonce la de brique.

Theorique.

Et s'il n'y a n'y pierre n'y brique?

Practique.

Fonce la de terre argileuse.

Theorique.

Et comment? la terre argileuse ne boira elle point

point l'eau comme l'autre terre?

Practique.

Non car si les eaux pouuoient passer au trauers des terres argileuses l'on ne pourroit iamais faire du sel à la chaleur du soleil. Qu'ainsi ne soit les champs & parquétages des maraiz salans, sont foncez de terre argileuse, & par ce moyen l'eau de la mer, qui est enclose dedans lesdits parquétages, y est contenue pour estre congelée & reduite en sel. Mais il te faut noter que les terres argileuses dequoy lon se sert pour tenir lesdittes eaux, faut qu'elles soyent conroyées, comme ie te diray: le moyen duquel ceux des isles vsent pour la conroyer. premierement ils ont vn nombre de cheuaux attachez à la queue l'un de l'autre tout d'un ranc, & au premier cheual pour la cōduite d'iceux y à vn homme qui tient la bride d'une main, & de l'autre les touche tout à coup d'un fouët, les faisant pourmener tout le long de la place, iusques à ce qu'elle soit bien conroyée: apres ils l'apploissent & la mettent en telle forme qu'elle leur puisse seruir a tenir les eaux. & pource ie t'ay dit que tu pourois foncez ton parterre de terre argileuse, par faulte de pierre, ou de brique, ie te parleray plus emplement de cecy en traitant du sel commun.

Theorique.

Et si mon parterre estoit paué de pierre de brique, ou de terre d'argile, mon champ ne me

E

pour-

pourroit seruir sinon pour receuoir les eaux, & ce seroit grand dommage à vn pauvre homme, qui n'auroit qu'un peu de terre, de l'employer en vne fontaine seulement.

Practique.

Si tu me veux croire, ledit parterre te portera grand prouffit & vtilité; asçauoir en y plantant grand nôbre d'arbres fruitiers de toutes especes, & les planter par lignes directes, & puis paucras ton parterre & à l'endroit d'un chacun arbre, tu laisseras trois ou quatre poulces de terre sans estre paué, afin que ledit paué n'empesche l'accroissement des arbres. Et quand cela sera fait tu pouras faire apporter sur ledit paué, de la terre iusques à vn pied de haut & d'auantage: apres tu pouras semer telle espece de legumes que tu voudras, & par ce moyen les arbres croistront, & la terre fructifiera & te portera plusieurs fruits, & mesme du bois pour te chauffer, & n'y aura piece de terre de si grand reuenu: parce qu'elle seruira à plusieurs choses. Premieremēt pour les fontaines, secōdemēt pour les fruits, tiercemēt pour le bois, quaterment pour les choses que tu semeras audit parterre: que si tu n'y veux rien semer de ce que nous auons dit, semes y du foing lequel seruira de pasture: & pour la fin, ce sera vn pourmenoir fort delectable, or voyla vne piece de terre qui portera cinq belles commoditez.

Theorique.

Voire

Voire mais si ie couure ledit parterre paué de terre, & q̄ ie seme quelque chose dessus, les eaux qui passeront submergeront les sémences que ie y auray semées. *Practique.*

Tu as fort mal retenu le propos que ie t'ay dit plusieurs fois, que les terres spongieuses & labourées ne peuuent contenir l'eau. parquoy tu dois entendre que les pluyes qui tomberont dedans ton parterre descendront à trauers des terres iusques sur le paué, & estant sur ledit paué, trouuant la pente d'iceluy, descendront iusques au sable qui sera ioignant les recepiacles, & en continuât passeront à trauers des sables, pour se rendre iusques au premier. Cela te doit bien faire considérer que les eaux des pluyes qui tombent par les montaignes, terriers & toutes places qui ont inclination vers le costé des riuieres ou fouteines, ne si rendent pas si soudain. Car si ainsi estoit toutes sources tariroyent en esté: mais parce que les eaux qui sont tombees durant l'hyuer sur les terres, ne peuvent passer promptement, mais petit à petit descendent iusques à ce qu'elles ayent trouué la terre fôcée de quelque chose, & quâd elles ont trouué le roc elles suyuent la partie inclinée, se rendât es riuieres, de la vient que au dessouz desdites riuieres, il y à plusieurs sources continuelles, & par ainsi ne pouuant passer q̄. peu à peu toutes sources sont entretenues depuis la fin d'un hyuer iusques à l'autre.

Theorique.

Tu m'as donné le desseing de trois fontaines, deux es môtaignes & vne en plat pays: mais d'autant que celle du plat pays ne se peult faire sans frais, & tous n'ont pas la commodité des montaignes, ne me sçauois tu donner quelque inuention, de laquelle les laboureurs se puissent aider en plat pays, sans estre contrains de pauer la sole? parce que tous n'ont pas la puissance d'auoir du paué: mesme qu'il y à plusieurs campagnes ou l'on ne sçauoit trouuer n'y pierre n'y brique, n'y terre argileuse.

Practique.

Si i'estois homme de village, & que mon habitation fut en pleine campagne, i'aurois espoir de trouuer moyen de faire quelque fontaine pour la prouision de ma famille.

Theorique.

Je te prie me dire comment tu voudrois faire.

Practique.

I'eslirois quelque piece de terre prochaine de ma maison, & l'ayant haussée d'un bout, comme i'ay dit cy deuant, ie voudrois auoir certains maillets de bois, & battois la terre fort vnice: & estant ainsi batue & bien dressée, ie ferois les deux receptacles que i'ay dit cy dessus, & chercherois en quelque part, soit prez ou bois, quelque terre qui fut bien espoisse d'herbe, & d'icelle ie ferois vn si grand nombre de gazons, que i'en aurois pour fon-

foncer tout le dedans de mon parterre, & afin que les racines des herbes entraissent d'un gazō à l'autre, ie remplirois toutes les iointures de terre fine, & par tel moyen les racines des gazons passeroient de l'un à l'autre, & lors ce seroit un paue de pré qui ameneroit les eaux iusques au receptacle, par le moyen de son inclination.

Theorique.

Et cuides tu que les eaux des pluyes ne puissent passer au trauers desdits gazons, ou pour mieux dire, que les terres les boiroient sans leur donner le loisir de se rendre au receptacle?

Practique.

Et penses tu que ie te baille un tel conseil sans auoir premieremēt contemplé les préés naturelles. l'en ay veu plus d'un milier qui n'auoyent pas trois pieds de pente, ou toutesfois les eaux des pluyes se rendoyent en la partie basse de la préée, & demeuroyent là un bien long temps au parauant que la terre les eut succees. Car la quantité des herbes & racines empesche q̃ la terre ne puisse succer l'eau comme les terres labourées. ie ne di pas que les fentes qui suruiennent en esté à cause de la siccité ne puissent boire vne partie des eaux, quand les terres sont alterées: mais l'inclination ou pente du parterre, cause que la plus grād part des eaux qui tombent se rendent soudain entre les sables qui sont au dessus du premier receptacle. Si tu auois seulement bordé ton parterre de plusieurs

especes d'arbres, cela donneroit ombrage audit parterre: afin que le soleil ne fit fendre lesdits gazons. Item ie voudrois laisser croistre l'herbe desdits gazons, sans la couper, & les pluyes descendantes du haut du parterre en bas, feroient coucher ton herbage & lors elle seruiroit de couverture aux fentes de la terre. Et quand lesdites herbes se putrefieroyent, leur sel seroit amené par les eaux dedans le receptacle qui causeroit vne bonté es eaux, comme i'ay dit.

Theorique.

Tu m'as donné tant de raisons que ie suis contraint de confesser que les fontaines naturelles ne procedent que des eaux des pluyes. toutesfois i'ay veu de si grandes sources qu'elles faisoient mou dre des moulins, & d'autres qui estoient commencement de riuieres, & cela ne se peut faire qu'il n'y aye quelque autre cause que les pluyes.

Practique.

Tu t'abuses: par ce que tu n'entends pas que celles des grandes sources viennent de bien loing, à cause qu'elles trouuent la continuation des rochers fort grande, & ayant trouué vn canal naturel, lequelles eaux mesmes auront fait par longue espace de temps, tout ainsi que tu vois que dans les grandes riuieres, il se rend plusieurs petites riuieres: ce qui se fait en cas pareil dedans la matrice des montaignes: y ayant des canaux principaux qui amènent les sources, ausquels s'en rendent
plusieurs

plusieurs autres. Cela se fait di-ie aussi bien dans les montaignes interieurement comme il se fait visiblement à toutes riuieres. & ne cherche plus la cause de la grâdeur ou petitesse des sources : car tu ne trouueras nul qui t'en puisse donner d'autre plus veritable. *Theorique.*

Et si le champ lequel i'aurois mis en parterre pour recueillir les eaux à fornir ma fontaine, ne suffit pour toute l'annee & qu'elles viennât à tarir aux grandes chaleurs, par quel moyen pouroy-ie obuier au defaut desdites eaux?

Practique.

Le moyen est fort aisé, & ne faut pas grand esprit pour la connoistre. Si ton parterre ne suffit, aioustes y encores vne piece de champ : & le paue en cas pareil que ie t'ay dit : & par tel moyen tu n'auras iamais faute d'eau.

Theorique.

Ie n'ay pas encores entendu vn poinct principal, asçauoir si c'este fontaine sourdera continuellement ou bien si l'eau se doit tirer par vn Robinet.

Practique.

Ie t'ay dit cy deuant qu'en la face de ta fontaine tu mettrois telle beauté ou enrichissement q bon te sembleroit, & qu'il faudroit vn robinet en ladite face.

Theorique.

Et si ainsi est, il me faudra tirer l'eau comme le vin d'un tonneau, & pour ceste cause ne se pourra

appeller fontaine. Car les fontaines naturelles fourdent tousiours.

Practique.

Si iamais ie n'auois veu de fontaines tu me ferois acroire beaucoup de choses: & ne sçait on pas bien que celles de Paris & vn millier d'autres se tirent par robinets?

Theorique.

Voire mais tu m'as dit que les fontaines que tu m'apprens à faire seruiront pour moy & pour mes bestes; veux tu qu'elles aillent tendre la gueule au deffouz du robinet?

Practique.

Ie ne sçay comment tu oses faire vne telle demande. Ne sçauois tu faire quelque receptacle à costé, hors le chemin de ta fontaine, pour retirer de l'eau afin d'en abreuer ton bestail? ie ferois vn robinet à part sur le coing de la fontaine, & quâd il faudroit abreuer le bestail il le faudroit ouurir & le laisser d'escouler dedans l'abreuvoir, & alors tes bestes boiroient de l'eau fresche, pure & nette.

Theorique.

Voire, mais ce seroit dommage d'employer tant de terre pour seruir seulement en fontaine.

Practique.

Ie ne connus iamais homme de si peu d'esprit; estimes tu si peu de chose l'vtilité des fontaines? y à il quelque chose en ce monde plus necessaire? ne sçais tu pas que l'eau est l'vn des elements,
voire

voire le premier entre tous, sans lequel nulle chose ne pouroit prendre cōmencement? ie dy nulle chose animee, n'y vegetatiue, n'y minerale, ne mesmes les pierres, comme ie te feray entendre en parlant d'icelles.

Item ie t'ay dit que tu pouras planter toutes especes d'arbres dedans le parterre: & si ainsi est, estimes tu vne terre inutile de produire arbres fructiers ou autres? il faut à present que ie te face vn long discours de ton ignorance, & de cent mil autres, laquelle ie ne puis assez detester, & mon esprit n'est pas capable de crier assez contre vne telle ignorance. Premièrement regarde que c'est que ie t'ay dit, que l'homme n'y la beste ne sçauoyent viure sans eau: Aussi dis-ie qu'ils ne sçauoyent viure sans feu. voyla pourquoy ie di que quand ton parterre ne scruiroit que d'apporter du bois, ce seroit la plus belle chose que tu sçauois auoir en ton heritage. Je t'ay dit cy dessus que tu pouras recueillir du bois, des fruits, & de toutes especes de pasturages dās ton parterre, sans que les eaux en soyent aucunement desbauchées. cuides tu que ce soit peu de chose à l'homme prudent, qui considerera l'vtilité du bois, & qui sur toutes choses s'estudiera d'en auoir en son heritage? que sçauois tu faire sans bois? feras tu cuire ton disner au soleil? ie te prie considere vn peu si tu trouueras quelcun, de quelque estat que ce soit qui s'en puisse passer. regarde qu'il y a peu d'artisans
sans

sans qui ne gagnēt leur vie par le moyen du bois. Si tu veux bastir des maisons il faut du bois tant pour les poutres, solives, que cheurons, pour cuire la chaux, pour faire la maçonnerie; s'il est question de faire outils & instrumēts pour trauailler de quelque estat que ce soit, il faut du charbon pour les forger. S'il est question de nauiger pour trafiquer en pays estranges, il faut du bois pour faire les nauires, s'il est question d'auoir des armes de defence, il les faut monter de bois. Il faut du bois pour faire les chariots & charettes, les mareschaux, serruriers, & orfeures, & tous ceux qui besongnent de charbon, quel estat prendront ils pour se passer de bois? Bref s'il est question de faire des moulins; de conroyer les cuits, de faire les teintures, de faire des tonneaux à mettre du vin & autres choses, desquelles on ne se peut passer, pour toutes ces choses il faut necessairement du bois. Quand est des fruits, comme poires, pommes, cerises, chastaignes, prunes, & autres aspeces, d'où les recueillera on si on ne plante des arbres? Si ie voulois mettre par escript combien la necessité du bois est grande, & comme il est impossible de s'en passer, ie n'aurois iamais fait.



ADVERTISSEMENT AV GOUVERNEUR & habitans de Iaques Pauly, autrement nommé Broüage.

LN poursuyuant le discours des fontaines i ay trouué bon d'aduerdir par cest escrit le gouuerneur de Broüage, du beau moyen & utilité qui est audit lieu, pour faire une fontaine selon mon deseing, & à peu de frais. d'autant qu'audit lieu il y a commencement des bois des pompes tout percé qui ne reste qu'à les emboïster l'un dans l'autre, depuis le bois d'Yers insques au lieu de Iaques Pauly autrement Broüage, la pente du lieu est si commode que l'on pourroit faire pïsser une fontaine plus d'une lance haute audit lieu de Iaques Pauly, & cela di-ie pour auoir entendu la grande indigence d'eau que l'on à eu audit lieu durant un siege qui à esté fait de nostre temps deuant ladicte ville.



DV MASCARET QVI S'ENGENDRE au fleuve de Dourdongne en la Guinne.

Theorique.



V m'as fait cy deuant vn bien long discours des effects des eaux, des feux & des tremblement de terre: mais tu ne m'as rien dit de la cause de l'essence du Mascaret.

Practique

Et qu'est ce que tu appelles mascaret? car ie n'ouis iamais parler de mascaret, n'y ne sçay que ce peut estre, si tu ne me le diz.

Theorique.

L'on appelle mascaret vne grande montaigne d'eau qui se fait en la riuiera de Dourdongne, vers les côtrees de Libourne, & ladicte môtaigne ne se fait sinon au temps d'esté: mesmes és saisons les plus paisibles, & lors q les eaux sont les plus tranquilles, & tout en vn moment, en vne saison inconnue la montaigne d'eau se forme en vn instant & fait vne course, quelquefois bien longue, le long de l'eau, & quelque fois plus courte: & lors que la môtaigne fait son cours, elle renuerse tous les bateaux qu'elle trouue en son chemin: parquoy les habitans l'imithrophes de la riuiera, quand ils voyent

voient le mascaret en sa formation, ils se prennēt soudain à crier de toutes pars garde le mascaret, garde le mascaret, & les battelliers qui pour lors sont en la riuere s'enfuyent és riuages, pour sauuer leurs vies, qui autrement seroyent pres de leur fin.

Practique.

Et qu'en disent les hommes du pays ou se forme ledit mascaret?

Theorique.

Ils ne sont pas tous d'une opinion. Car les vns disent d'un & les autres disent de l'autre. Toutesfois les Bordelois & Libournois & Guitrois, tiennēt pour certain que la cause de ce, n'est autre que la venue du montant de la mer, qui rencontre le descendant de la riuere, & veulent conclure par là que le combat des deux eaux cause d'engendrer c'elle grande montaigne. Voila l'opinion plus certaine & commune des habitans du pays.

Practique.

Et à toy que t'en semble il de la cause de cet effect?

Theorique.

Je suis de l'opinion des autres.

Practique.

N'y toy n'y eux n'y entendez rien : car si ainsi estoit que le montât de la mer & la descente de la Dourdongne causât le mascaret, il se formeroit aussi bien des mascarets en la Garône comme en la Dourdongne, voire à la Charête, & en la riuere
de

de Loyre, voire pour mieux dire tout en vn coup en toutes les riuieres qui descendent dedans la mer, & toutesfois nous n'auons iamais entendu qu'és mois d'autonne & és iours tranquilles il se trouuaft mascaret sinõ, en ladite riuiere de Dordongne: parquoy il faut chercher autre cause que la susditte, pour venir à la connoissance de cest effect.

Theorique.

Je t'en prie dy moy donc qu'elle peut estre la cause de ce.

Practique.

Je ne puis penser n'y croire que ce soit autre chose qu'un aër enclos au dedans de quelque canal qui est souz terre, trauersant depuis le fleuue de Garonne iusques au desouz du fleuue de la Dordongne, & est bien croyable voire que cela ne se peut faire que par vn aër enclos souz les eaux. toutesfois l'aër ne le pouroit faire pour cause de la foiblesse s'il n'estoit poussé par accident, il faut donques penser & croire que quand il vient au descendant de la mer, que la riuiere de Garonne est basse pour l'absence de la mer, que lors il y à quelques canaux vuides, lesquels se réplissent d'aër, depuis la Dordongne iusques à la Garonne, estant ainsi répli d'aër quand la mer retourne elle fait enfler & augmenter la riuierre de Garonne, & estant ainsi enflée elle vient à entrer dedans les canaux qu'elle auoit laisse vuides en sa descète & de là vient que l'aër qui est dedans les canaux se trouuent enclos entre les deux fleuues, & estât viuemēt poussé par

se par les eaux de la Garône, il s'ëfuit au deuât desdites eaux & en s'enfuyant il se trouuent enclos souz la riuere de Dordongne & se trouuât enclos il esleue les eaux comme vne môtaigne, & ne les pouuât si tost percer il les meîne ainsi en leur hauteur, sans se desformer n'y se laisser, iusques à ce que par quelque mouuemēt les eaux ainsi môtees se trouuent plus foible en quelque endroit, & lors l'air enclos les viēt à esclater aux parries plus foibles, & les ayant esclatées ledit aër s'enfuit & les eaux s'abbaisent tout en vn coup, & la riuere reuient en la premiere tranquillité: & ne faut que tu cherches autre raison pour connoistre la cause du mascaret.

Theorique.

Je trouue en ton dire vne opinion contraire à la verité: car nous scauons qu'il se fait ordinairement des vagues dedans la mer aussi hautes que les môtaignes, & mesmes ës passages de Maumussou, lesquelles vagues sont si grâdes que les nauires n'y peuuent passer sans estre en peril de naufrage, & s'en pert grâd nôbre audit passage. cela ne fait riē contre mon dire. Car ~~iamais les vagues de la mer~~ ne sont formées sinō par l'actiō des vents qui cause ainsi esleuer les eaux de la mer: & la cause pourquoy elles sont plus enflées & esleuées au passage de Maumussō, c'est parce qu'il y à des rochers contre lesquels les eaux de la mer, estants poussées par les vents, viennent frapper impetueusement, qui cause vne grande eleuation es eaux,

ie diz

ie diz vne eleuation si grande que le bruit est entendu de plus de sept lieues loing. Et quand la mer est aussi esmeüe les nauires se donnent bien garde d'y passer : par ce que les vagues les ietteroyent contre les rochers & seroyent soudain froissees. Toutesfois cela ne contrarie en rien à mon dire touchant le mascaret. Car ie te di que le mascaret se forme au temps de l'autonne és iours les plus tranquilles, & lors q̄ les eaux des fleues sont basses, & si ledit mascaret estoit causé par les vents, comme les vagues de la mer, il apparoitroit & se formeroit plus souuent en hyuer que non pas en esté. Mais iamais homme ne l'a veu en hyuer. aussi sçay-ie bien que la terre qui fait diuision entre la Dourdongne & la Garonne, fait vne pointe entre Bordeaux & Blaye, là ou les deux riuieres se rencontrent, laquelle pointe, viz à viz de bourc, l'on appelle le bec d'Ambez. Je me suis trouué quelquefois en laditte pointe ou il y a plusieurs maisons ou metairies, lesquelles sont fondees sur la terre, par ce que s'ils creusoyent pour faire fondement, ils trouueroyent l'eau qui les empescheroit de bastir, & ne faut douter qu'il n'y aye vn grand pays de ladite pointe qui est soutenu par les eaux d'un bout, & de l'autre bout elle est arrestée par les terres fermes deuers le costé du haut pays. cela ay-ie conneu, parce qu'en me secoüant sur lesdites terres ie faisois branfler tout alentour de moy, comme si c'eust esté vn plancher : ie voyois aussi qu'au

qu'au mois d'Aoust & de Septembre, les terres de laditte pointe sont fendues de fentes si grâdes que bien souuēt la iambe d'un homme y pouroit entrer: cela me fait croire & assurer que le mascarret n'est causé sinon de l'aër enclos, dont i'ay aussi conneu par autres exemples des pluyes qui tombent des couuertures des maisons és ruisseaux, & forment par les vents vne vessie ronde, laquelle se creue quand le vent en est sorty. I'ay aussi plusieurs fois contemplé les sources naturelles, lesquelles amènent en cas pareil des vents enclos formés en globe, qui tiennent leurs formes rondes iusques à ce que l'aër les ait creuées. puis que tu vois que l'aër estant poussé par la pesanteur des eaux, à puissance d'esleuer vne si grande quantité desdites eaux, tu peuz connoistre par là que telles choses ou semblables peuuēt engendrer vn tremblement de terre, non pas si grand comme les trois matieres, desquelles i'ay traité au discours escript en ce liure, sur les faits des causes du tremblement.

F

Au



Au lecteur.



Ainsi le grand nombre de mes iours & la diuersité des hommes m'a fait connoistre les diuerses affections & opinions indicibles qui sont en l'univers: entre lesquelles j'ay trouué l'opinion de la multiplication, generation & augmentation des métaux: plus inueterée en la ceruelle de plusieurs hommes que nulle des autres opinions. Et par ce que ie sçay que plusieurs cherchent ladite science sans penser en fraude n'y malice: ains pour vne aßeurance qu'ils ont que la chose est possible: cela m'a causé protester par cest escrit que ie n'entens aucunement blasmer trois manieres de personnes. Sçauoir est les seigneurs, qui pour occuper leurs esprits & par maniere de recreatiõ, sans estre menez d'affection de gaing illegitime. Les seconds sont toutes espèces de physitiens, ausquels est requis de connoistre les natures. Les troisiemes sont ceux qui ont le pouuoir, & qui croyent la chose estre possible, & qui pour rien ne voudroyent en abuser. Et par ce que j'ay entrepris de parler contre vn milier d'autres qui sont indignes d'une telle science, & totalement incapables, à cause de leur ignorâce & peu d'experiance

perience. Aussi parce qu'ils n'ont le pouuoir de supporter les pertes des fautes qui suruiennent, ils sont contrains abuser de teintures exterieures & sophistications de metaux. Pour ces causes ay-ie entrepris de parler viuemēt, avec preuues inuincibles, ie dis inuincibles à ceux desquels ie parle, & s'il y à quelqu'un qui aye tant fait par son labeur qu'il ait esmeu la charité de Dieu à luy reueler un tel secret, ie n'entend parler de tels personnages: Mais au contraire, d'autant que la capacité de mon esprit ne peut s'accōmoder à croire que telle chose se puisse faire, lors que ie verray le cōtraire, & que la verité me redarguera, ie confesseray qu'il n'y à rien plus ennemy de science que les ignorāces entre lesquels ie n'auray point de honte de me mettre au premier rang, en ce qui consiste la generation des metaux. Et s'il y à quelqu'un à qui Dieu aye distribué ce don, qu'il excuse mon ignorance: car suyuant ce que i'en croy ie m'en vay mettre la main à la plume, pour poursuivre ce que i'en pense, ou pour mieux dire, ce que i'en ay appris avec un bien grand labeur, & non pas en peu de iours; n'y en la lecture de diuers liures: Ains en anatomizant la matrice de la terre, comme l'on pourra voir par mon discours cy apres.



TRAITE' DES METAVX
& Alchimie.

Theorique.

L me semble que tu as assez parlé des fontaines: ie voudrois que suyuant ta promesse tu m'eusses donné quelque connoissance du fait des metaux. Car ie sçay qu'il y à vn grand nombre d'hômes en France, qui se trauaillent tous les iours à l'euure de l'achimie, & plusieurs y font de grands proufits, ayants trouué de beaux secrets, tant pour augméter l'or & l'argent, qu'autres effets: choses que ie voudrois bien sçauoir & entendre.

Practique.

Par là tu peux connoistre combien l'insatiable auarice des hommes, amene de maux en ce bas siecle. Il n'est abus entre les hommes qui cause plus de larcins & tromperies que l'auarice, ainsi qu'il est escrit, q l'auarice est racine de tous maux. Il est certain que plusieurs desirans d'estre riches se sont enuelopez en plusieurs douleurs: suyuant quoy ie ne puis mieux cōnoistre que tu veux estre compris au rang des auaricieux, que de ce que tu desires sçauoir, faire ou augmenter l'or ou l'argent.

gent. Car plusieurs actes auaricieux se peuuent cacher par hipocrisie. Mais quant est de ceux qui veulent faire l'or & l'argent, leur auarice ne se peut cacher. & leurs intentions ne peuuent estre mises en autre rang qu'en celuy des conuoiteux & ventres paresseux, qui pour obuier à trauailler à quelque art vtile & iuste, voudroyent sçauoir faire de l'or & de l'argent: afin de viure à leur aise, & se faire grands à peu de labeur: & estants menéz d'une telle conuoitise, ne pouuant paruenir à faire ce qu'ils cherchent, ils vsent de ce qu'ils peuuent, iuste ou iniuste. Voila vn point que tout homme de bon esprit auroit honte de me le nier: parquoy si tu m'en veux croire tu ne mettras iamais ton affection à ces choses.

Theorique.

Tu me donnes ici de terribles traits, tu me veux quasi accuser d'un mal que ie n'ay pas encores fait: d'autre part, me veux tu faire croire que ce soit mal fait de prendre de l'huile d'antimoine ou de l'huile d'or, & avec lescdites huiles par vn art philosophale puisse teindre l'argēt en couleur d'or? est ce mal fait de conuertir l'argent en or? Si ie prens du fin cuyure & que ie vienne à luy oster son flegme, ou teincture rouge, & que ie le puisse reduire en couleur d'argent, ie dis en telle sorte qu'il endurera la coupelle & tous autres examens, quel mal est ce si ie le puis faire, moyennant que ce soit bon argent?

Practique.

Tu as beau faire, & trauaille tant que tu voudras, & consôme tes iours & tes biens cōme tant de milliers d'autres ont fait, tu n'y paruiendras iamais.

Theorique.

Et ne sçay-ie pas bien que plusieurs parcy deuant sont paruenus à ce que ie di? n'auons nous pas tant de beaux liures qu'ils nous ont laissé par-
cscrit; entres autres vn Gebert, vn Arnould de vil-
leneufue, le Romant de la Rose, & tant d'autres,
mesmes que quelqu'vns de noz anciens ont fait
autre fois vne pierre philosophale, laquelle en
mettant vn certain poix dedans l'or elle l'augmen-
toit de cent fois autant, & c'est ce que plusieurs
cherchent aujourd'huy, sachant bien que cela à
esté fait autre fois, & cela s'appelle le grand euure.

Practique.

Et vray Dieu! és tu encores si ignorant de croire
cela? cuides tu que les hōmes du temps passé n'euf-
sent en eux quelque mensonge, pour sçauoir atti-
rer l'argent par falace, aussi bien que ceux du iour-
dhuy? sçais tu pas ce que dit Dauid de son temps,
Seigneur aide nous: car nous sommes tous des-
nuez d'hommes droits. les hommes (dit-il) sont
tous pleins de flaterie, & parlent tout au contrai-
re de leurs pensées. Et Salomon dit que l'iniquité
est si grande qu'il n'y à pas vn artisan qui ne soit
enuieux contre son semblable. Cuides tu que ie
vucille

vueille croire vn Gebert, vn Arnauld de Vileneufue, ou vn Romant de la Rose, en ce qu'ils auront parlé contre les eures de Dieu? Et cuides tu que ie sois si mal instruit, que ie ne sache bien que l'or & l'argent & tous autres metaux sont vne eure diuine, & que c'est temerairement entrepris cõtre la gloire de Dieu, de vouloir vsurper sur ce qui est de son estat. Or tout ce qui est donné à l'homme de pouuoir faire enuers les metaux, c'est d'en tirer les excrements, & les purifier & examiner, & en former telles especes de vaisseaux ou monnoyes que bon luy semblera, & est chose semblable aux cueillettes & cultiuement des semences. Car c'est à l'homme seulement de trier le grain d'avec la paille, le son d'avec la farine, & de la farine en faire du pain, & de pressurer les grappes pour en tirer le vin: Mais c'est à Dieu de leur donner le croistre, la sauueur & couleur: ie di qu'ainsi que l'homme ne peut rien en cest endroit, aussi ne peult il enuers les metaux.

Theorique.

Comment? tu parles icy de semer; comme si les metaux venoyent de semence, comme le bled ou autres vegetatifs.

Practique.

Ie n'ay pas entrepris vn tel propos, n'y mis vn tel argument en auant sans quelque raison. Ne sçay-ie pas bien que tous ces conuoiteurs de richesses, qui tachent de sçauoir faire l'or & l'argẽt,

quand on leur dit qu'il y à long temps qu'ils sont apres, & que l'on ne voit aucune experience, ils disent que tout en cas pareil que le laboureur attend patiemment le temps & saison de la cueillette, apres auoir semé: aussi faut qu'ils attendent, & que cela ne se peut faire qu'avec la generation qu'ils ont conclud faire dedans leurs vaisseaux, qu'ils ont destineez à besongner & seruir comme vne matrice à la generation des metaux. Et cela disent ils à esté bien consideré & preueu par les philosophes antiques: car tout ainsi que l'on iette la semence du bled pour causer l'augmentation en sa seconde generation: Aussi (disent ils) qu'apres qu'ils ont separé par calcinations, distillations ou autres manieres de faire, les matieres l'une de l'autre, ils mettent couuer ou generer selon leurs desseings, leurs matieres, par poix & mesure, telle qu'ils ont imaginee, & ce fait ils mettent lescdites choses en vn feu fort lent, voulant imiter la matrice de la femme ou de la beste: sachant bien que la generation se fait par vne lente chaleur: & afin d'auoir tousiours vn feu continuel & d'une mesme sorte, ils se sont aduisez de faire vne lampe avec vne mesche toute d'une grosseur, & leurs matieres estans dedans la matrice, ils les font chauffer de la chaleur de la lampe, & attendent ainsi long temps à couuer les œufs: ie di aucuns ont attendu plusieurs annees, tesmoing le magnifique magret, homme docte & fort experimenté en ces cho-

ses, qui toutesfois ne pouuant venir à son dessein, se vinta que si les guerres n'eussent esteint sa lampe deuant le temps, qu'il auoit trouué la féue. Autres font des fourneaux que le feu vient d'un degré assez loing de là ou l'on a mis couuer les œufs: Mais afin qu'il continue tousiours à vne chaleur lente & de mesure, ils font quelques portes de fer, lesquelles ils ouurent selon le degré qu'ils veulent donner à leur feu, telle gens ne dorment gueres & ont beaucoup de pensées en leurs poitrines, & tourments desprit, languissans apres le temps de la visitation de la couuée. Voila l'un des points par lequel ie preue que les Alchimistes vsent de ce mot de semence & autres termes. Ce n'est pas sans cause que i'ay dit que c'est l'euure de Dieu que de semer la matiere des metaux & leur donner l'accroissement, & aux hommes de les recueillir, purifier & examiner, fondre & mallier, pour les mettre en telle forme que bon leur semblera, pour leur seruice.

Theorique

Voila vn propos qui est assez long, & toutesfois ie ne le puis entendre: d'autant que ie sçay qu'il est permis à l'homme de semer de toutes especes de semences, & ce pendant tu appelles les metaux semences diuines, & tu me veux empêcher de les semer.

Prattique.

Tuas beaucoup mieux dit que tu ne pensois,
que

que les matieres des metaux sont semences diuines. ie di tellement diuines qu'elles sont incon-
nues aux hommes: voire inuisibles : & de ce n'en
faut douter, & croy que si me mets apres pour te
le prouuer, ie te le mostreray si clairement que tu
seras contraint d'accorder mes fins & conclu-
sions.

Theorique.

Ie te prie donc de m'en faire le discours tout
au long, par lequel ie puisse connoistre ton dire
estre veritable.

Practique.

Il faut donc que tu tiennes pour chose certaine,
que toutes les eaux qui sont au monde qui ont
esté & seront, furent toutes créés en vn mesme
iour, & si ainsi est des eaux, ie te di que les semen-
ces des metaux & de tous mineraux & de toutes
pierres ont esté créés aussi en vn mesme iour: au-
tant en est il de la terre, de l'aër & du feu, car le
souuerain createur n'à rien laissé de vuide, & com-
me il est parfait, il n'a rien laissé d'imparfait. Mais
(comme ie t'ay dit tant de fois, en te parlant des
fontaines) il à commandé à nature de trauailler,
produire & engendrer, consommer & dissiper,
comme tu vois que le feu consomme plusieurs
choses, aussi il nourrit & soustient plusieurs cho-
ses; les eaux desbordées dissipent & gastent plu-
sieurs choses, & toutesfois sans elles nulle chose
ne pouroit dire ie suis. Et tout ainsi que l'eau &
le feu

Le feu dissipent d'une part, ils engendrent & produisent d'autre. Suyuant quoy ie ne puis dire autre chose des metaux, sinon que la matiere d'iceux est vn sel dissout & liquifié parmy les eaux communes, lequel sel est inconnu aux hommes: d'autant qu'iceluy estant entremeslé parmi les eaux estant de la mesme couleur que les eaux liquides & diafanes ou transparentes, il est indistinguable & inconnu à tous: n'ayant aucun signe apparent, par lequel les hommes le puissent distinguer d'avec les eaux communes. Voila vn trait singulier, lequel (comme ie pense) est caché & inconnu à beaucoup d'hommes, qui pensent estre bons philosophes: & te souuienne de ce point, & le garde pour t'en seruir contre tous ceux qui te voudront faire accroire que la generatiō des metaux se peut faire par euure manuelle. Car quand tu n'aurois que ce seul poinct, il suffira pour conuaincre toutes les opinions des alchimistes.

Theorique.

Voire! mais comment les pouroy-ie vaincre par ce point? ie ne voy point que pour cela ils puissent estre vaincus.

Practique.

Ie me romps la teste en vain. Ie te demande, di moy par quel moyen les alchimistes besongnent à la generation, multiplication ou augmentation des metaux, & quant tu me l'auras dit ie te

ie te montreray que tu n'as pas bien entendule principe que ie t'ay baillé.

Theorique.

Les Alchimistes besongnent par feux de reuerberation, calcination, distillation, putrefaction, & infusion.

Practique.

Et pourquoy vsent ils de tant de sortes de feux,

Theorique.

Parce qu'ils en font aucuns pour destruire le cuyure, l'or & l'argent, & autres metaux: & quant ils les ont destruits, calcinez & puluerisez, ils font vn amas de plusieurs desdites matieres: Et parce que le vis argent duquel ils vsent volontiers, s'exalerait à vn grand feu, il est requis qu'ils vsent de feux gueres chauds, & ayant enclos le vis argent, qu'ils appellent Mercure, dedans des vaisseaux bien lutez & fermez, ils taschent à le fixer petit à petit, & le captiuer à vn petit feu, pour le contraindre de se congeler; afin que puis apres il puisse endurer vn plus grand feu. C'est pourquoy ils ont beaucoup de sortes de vaisseaux, & diuerses especes de fourneaux.

Practique.

Ie ne demande autre preuue que celle que tu mas alleguée pour te monstrier, & par ta confession mesme, que autant qu'il y a d'Alchimistes en France chercent la generation des metaux par feu, & toutesfois ie t'ay dit pour regle certaine & metho-

methode asseurée, que les metaux sont engendrez d'une eau, à sçavoir d'eau salée, ou pour mieux dire d'un sel dissout. & si ainsi est (comme la verité est telle) tous les alchimistres cherchent à edifier par le destructeur. Le feu est destructeur de l'eau, & en quelque part qu'il entre, il faut qu'il chasse l'eau, ou s'il ne la chasse, elle le fera mourir: puis qu'ainsi est que le feu & l'eau sont contraires. c'est donc une pure folie de vouloir generer les metaux par feu: veu qu'il est ennemi & destructeur d'iceux.

Theorique.

J'ay bien entendu que tu m'as dit que les metaux estoient engendrez d'un sel liquifié: Mais cela ne fait rien contre mes propos; ains au contraire il me iustifie. La raison est telle, que ce sel qui est dissout parmi les eaux de la mer est inconneu, comme sont les sels metaliques: & toutes-fois il se congele & distingue d'avec les eaux par feu.

Practique.

Tu t'abuses. Toutes congelations faites par froidure se dissolvent par chaleur; & toutes congelations faites par chaleur, se dissolvent par humidité: comme le sel que tu as allegué, il se congele par chaleur & se dissout par humidité. Or les metaux se dissolvent tous par chaleur, il s'ensuit donc qu'ils sont engendrez & cōgelez par humidité. Te voila forclos de deffences à la mode des practiciens.

Theori-

Theorique.

Tu me la bailles belle, de me vouloir faire croire que les métaux soyent engendrez ou congelés en humidité.

Practique.

Et si tu ne le veux croire, va voir les minières ou l'on tire l'or & l'argent, & autres métaux, & tu trouueras dedans la pluspart d'icelles qu'il faut espuizer l'eau nuit & iour, pour auoir le metal qui est dans icelles. Vn iour Antoine Roy de Nauarre commanda de poursuyure la veine de quelques mines d'argent qui auoyent esté trouuees aux montaignes Pyrenées. Mais quand l'on en eut tiré quelque quantité, les eaux qui y estoient contraignirent les maistres des minières de quitter tout. Et l'on sçait bien que plusieurs minières ont esté delaissées par tel moyen. Tu trouueras donc bien estrange quand ie te prouueray cy apres que nulle pierre ne peut estre congelé n'y formée sans eau, & s'il y a de l'eau, c'est donc par humidité, chose directement contraire à ceux qui cherchent la generatiō des métaux par feu, ie t'en dirois beaucoup de preuues fort propres pour soustenir mon propos: Mais d'autāt qu'il se trouuera beaucoup meilleur en parlant de l'essence, matiere & congelatiō de toutes pierres: ie lesseray le reste de mes preuues pour ce temps la.

Theorique.

Tu diras ce que tu voudras: mais i'ay veu vn philo-

philosophe qui augmenta vn teston deuant moy:
& affin qu'il n'y eust tromperie il me la fit faire à
moy mesme.

Practique.

Et comment?

Theorique.

Il me fit peser vn teston & autant de vis argent.
& me fit mettre le tout dedans vn creuset, lequel
ayant mis dedans le feu, il me bailla d'une poudre
pour meller, laquelle auoit vertu d'arrester le vis
argent: Et puis me fit souffler iusques à ce que le
tout fut fondu ensemble, & estant fondu il se
trouua le poix de deux testons de bon argent:
car le vis argent s'estoit fixé par la vertu de la pou-
dre qu'il m'auoit baillée, & moy-mesme auois
mis toutes ces choses: parquoy n'y auoit nulle
tromperie.

Practique.

Di moy vn peu comment c'est que tu faisois?

Theorique.

Pendant que les matieres fondoyent ie les re-
muois d'un baston.

Practique.

Ou auois tu pris ce baston là?

Theorique.

En vn coing, le premier q'ie trouuay à la main.

Practique.

Ie scauois bié que l'on t'auoit trôpé Car ce mai-
stre philosophe auoit mis ce baston aupres de toy,
sachant

sachant bien qu'il te le feroit prendre pour mesler les matieres:& voila comment il te trompa. car il auoit mis de l'argent au bout du baston, & pendant que tu remuois les matieres dedans le creuset, la cire, de laquelle il auoit fermé l'argent au bout du baston, se fondit, & l'argent tomba dedans le creuset, & le vif argent & la poudre s'en alloit en fumée:& par tel moyen ne demeueroit rien dans le creuset sinon l'argent du teston, & autant poisant d'argēt qu'il auoit mis au bout du baston: Voila cōment il augmenta ton teston de moytié.

Theorique.

Est il bien possible qu'il se fut aduisé de me tromper par ce moyen?

Practique.

Et mon amy c'est la moindre des finesse desquelles ils trompent les hommes: si ie voulois dire toutes les tromperies qu'ils sçauent faire, & dōt i'ay esté aduertty, ie n'aurois iamais fait. Si par tel moyen il n'eut mis l'argent dans le creuset, il t'eust baillé d'une poudre d'argent, laquelle reust esté incōnue, & t'eust fait acroire que laditte poudre auroit arresté le vif argent:& ceste poudre eut pesé autant comme il eut voulu faire l'augmentation: ou s'il n'eust mis l'augmentation par vn tel moyen, il eut mis l'argent en cachette de toy, dedans vn grand charbon, duquel il t'eut fait couvrir ton creuset, & le charbon & l'argent fut rombé dans ton creuset: par ainsi tu ne pouuois aschapper la

per la tromperie. Di moy ie te prie, te monstra il à faire la multiplication de l'argent?

Theorique.

Non.

Practique.

Et pourquoy faisoit il donc cela en ta presence?

Theorique.

C'estoit qu'il me le vouloit monstrier pour de l'argent.

Practique.

T'ay-ie pas bien dit que ce n'estoit que tromperie? Car si la science estoit veritable il n'auroit garde de te la monstrier : mais il tendoit ses filets pour attraper ton argent. Et quant tu eusses esté afronté, tu n'eusses eu garde de t'en venter. Car il n'en eust esté autre chose, sinon que tu eusses esté assez moqué, ie sçay bien qu'il y en à en France plus de deux mil, qui ont esté afrontez pour cest affaire, que iamais l'on en vist vn qui ait intenté proces pour recouurer son argent.

Theorique.

Et tu estimes donc qu'il y à beaucoup de gens qui se meslent d'affronter les hommes par tels moyens?

Practique.

Ie ne di pas par tels moyens seulement ; car ie sçay qu'ils ont vn millier d'autres moyens plus subtils, desquels ils afrontent les plus fins, & ceux mesme qui se pensent mieux donner de garde. Le

G

sieur

sieur de Courlange, varlet de chambre du Roy
 sçauoit beaucoup de telles finesse, s'il en eut vou
 lu vser. Car quelque iour venant à disputer de ce
 choses deuant le Roy Charles neuuiesme, il se ven
 ta par maniere de facetie, qu'il luy apprendroit
 faire l'or & l'argent, pour laquelle chose experi
 menter il commanda audit de Courlange qu'il eu
 à besongner promptement: ce qui fut fait, & au
 iour de l'experience ledit de Courlange apport
 deux phioles plaines d'eau claire comme eau de
 fontaine, laquelle estoit si bien accoustree qu
 mettant vne esguille ou autre piece de fer trem
 per dans l'une desdites phioles, elle deuenoit sou
 dain de couleur d'or, & le fer estant trempé dan
 l'autre phiole, venoit de couleur d'argent: puis fu
 mis du vif argent dedans lesdites phioles, qui sou
 dain se congela; celuy de l'une des phioles, en cou
 leur d'or, & celuy de l'autre en couleur d'argent
 dont le Roy print les deux lingots & s'alla vante
 à sa mere, qu'il auoit appris à faire de l'or & de l'ar
 gent: Et toutesfois c'estoit vne tromperie, com
 ledit de Courlange me l'a dit de sa propre bouche
 Voila pourquoy ie t'ay dit que la tromperie de la
 quelle l'autre te vouloit empoigner, estoit de
 plus grossieres.

Theorique.

Or di ce que tu voudras: mais ie sçay que plu
 sieurs alchimistes ont trouué de sçauoir faire vn
 medium d'argent & vn tiercelet d'or, desquel
 il

Ils besongnent ordinairement : car i'en suis tout assuré.

Practique.

Et moy ie suis tout assuré que si leur medium d'argent & tiercelet d'or estoit mis à la coupelle, il ne s'y trouueroit rien de bon que ce, qui y auroit esté mis de naturel, & le surplus de ce qui y auroit esté adiousté seroit connu estre faux : & ie sçay bien que toutes les additions & sophistiqueries, qu'ils sçauent faire, ont causé vn millier de faux monnoyeurs : par ce qu'ils ne se peuuent desfaire de leur marchandise sinon en monnoye, car s'ils la vendoyent en lingots la fausseté se trouueroit à la fonte. Mais ils se desfont aisément de monnoyé à toutes gens. C'est pourquoy quand ils ont bien trauaillé & ne se peuuent releuer de leurs pertes, ils sont contrains se ietter sur la monnoye. Il fut pris vn iour vn faux monnoyeur (Bearnois) au diocèse de Xaintonge, auquel fut trouué quatre cents testons prêts à marquer, que s'ils eussent esté marquez, il n'y auoit orfeure n'y autre qui ne les eut pris pour bons. Car ils enduroyent le mail, la touche, la fonte, & le ton; tout semblable aux bons. Mais quand ils furent mis a la coupelle, la fausseté fut decouuëte. En ce tēps la il y auoit vn preuost à Xaintes nommé Grimaud, qui m'assura qu'en faisant le proces à vn faux monnoyeur, iceluy luy bailla le nom & surnom de huit vints hommes, qui se m'esloy-

de son mestier, ensemble leurs aages, qualitez & demeurances & autres enseignements asseurez. Et quand ie dis audit preuost pourquoy il ne faisoit prendre lesdits monnoyeurs nommez en son rolle, il me respondit qu'il n'oseroit l'entreprendre: parce qu'au nombre d'iceux il y auoit plusieurs Iuges & Magistrats, tant du Bordellois, Perigord, que de Limosin: & que s'il auoit entrepris de les fascher, qu'ils trouueroyent moyen de le faire mourir. Quand l'iniquité est entre les grâds, & entre ceux qui doyuent punir les autres, c'est vn si grand feu alumé qu'il n'est possible de le steindre par forces d'hommes. Si ie voulois dire tous les abus qui se commettent sous ombre de iuste labour, ie n'aurois iamais fait. Je t'ay donné seulement cest exemple, afin qu'il ne te prenne iamais enuie de chercher generation, augmentation n'y congelation des metaux: parce aussi que c'est vne euvre qui se fait par le commandement de Dieu, inuisiblement & par vne nature si tresocculte qu'il ne fut iamais donné à homme de le connoistre.

Theorique.

Tu m'as beau prescher, car ie sçay qu'il y à plusieurs gens de bien & grands personages, qui cherchent tous les iours ces choses, & qui pour rien du monde ne se vouldroyēt atacher à la monnoye: aussi qu'ils ont bien le moyen de s'en passer.

Practi-

Practique.

Je confesse qu'il y à plusieurs seigneurs gens de bien & grands personnages, qui s'occupent à l'alchimie, & y despendent beaucoup. Laisse les faire: cela les garentist d'un plus grand vice: & puis ils ont du reuenu pour approuuer ces choses. Quant aux medecins, en cherchant l'alchimie ils apprendront à connoistre les natures: & cela leur seruira en leur art: & en ce faisant ils connoistront l'impossibilité de la chose. J'ay recouuert certaines pierres transparentes comme cristal, sans nulle couleur ni tache, ce neantmoins par examen l'on peut faire apparoir directement qu'il y à du metal parmy lesdittes pierres, combien qu'elles soyent aussi cleres, nettes & transparentes, que lors qu'elles estoient encor en eau.

Theorique.

Tu dis tousiours qu'il est impossible: & ton opinion veut surmonter celles de plusieurs milliers d'hommes, qui sont plus doctes sans comparaison que toy, lesquels te feroyēt rougir, si tu auois entrepris de disputer contre eux: Car tu n'as pas beaucoup de raisons, & ils t'en ameneroyent vn milier, ausquelles tu ne scaurois contredire.

Practique.

S'il n'estoit question que de raisons, i'en ay vn grand nombre, que la moindre suffira pour vaincre toutes celles qu'ils me scauroyent amener.

Theorique.

Je te prie donc donne moy vne de ces belles raisons que tu dis.

Practique.

Quand les alchimistes veulent faire de l'or ou de l'argent, il calcinent & puluerisent leurs metaux, & les ayans puluerisez par calcinations, ils se trauaillent pour faire regenerer lesdites matieres. Or si par ce moyen ils peuuent faire nouuelle generation des metaux hors la matrice ou ils ont esté faits premierement, il leur seroit beaucoup plus aisé de faire regenerer vne noix, vne poire, ou vne pomme, qu'ils auoyent mise en poudre. Di donc au plus braue d'iceux qu'il pile vne noix, i'entés la coquille & le noyau, & l'ayât puluerisée qu'il la mette dedans son vaisseau alchimistal, & s'il fait rassembler les matieres d'une noix, ou d'une chasteaigne pilée, les remettant au mesme estat qu'elles estoient au parauant, ie diray lors qu'ils pourront faire l'or & l'argent, voire mais, ie m'abuse. car ores qu'ils peussent rassembler & regenerer vne noix ou vne chasteaigne, encores ne seroit ce pas la multiplier n'y augmenter de cent parties, comme ils disent que s'ils auoyent trouué la pierre des philosophes, chascun poix d'icelle augmenteroit de cent. Or ie sçay qu'ils feront aussi bien l'un que l'autre.

Theorique.

Pourquoy est ce que tu m'allegues des noix
de

des chastaignes & autres fruits? veu que ce sont
 ames vegetatiues, ne pouuant estre formées sinon
 avec vn long temps, & faut que premierement
 elles soyent venues de semences. Mais quant aux
 metaux, il n'y à nulle raison de les accompagner
 aux fruiçts: d'autant que leurs corps & leur effect
 est insensible,

Pratique.

A ce ie respond qu'il est beaucoup plus aisé de
 contrefaire vne chose visible, que non pas celle
 qui est inuisible. les fruits sont formez visiblement
 & toutesfois il est impossible de les contrefaire:
 mais encores est il plus aisé que non pas les me-
 taux. Et quant est de ce que tu dis que les fruits se
 forment par vne action vegetatiue, & que les me-
 taux sont corps mors & insensibles, en cest en-
 droit ie te veux reueler vn secret que tu n'entends
 pas. Scache donc que deslors que Dieu crea la ter-
 re, il mist en icelle toutes les substances qui y sont
 & qui y seront: car autrement nulle chose ne pou-
 roit vegeter, n'y prendre forme: & faut croire que
 les arbres plantez & semencez, ont pris accroisse-
 ment des le commencement de leur nature par le
 commandement de Dieu, & depuis (comme iay
 dit en parlant des fontaines) les hommes ayans
 des semences sauages les ont semées, cultiuées,
 transplantées. Mais lesdittes semences ne pou-
 roient prendre accroissement si la matiere de l'a-
 croissement n'estoit en terre. Il fault donc con-

clure que deffors que la terre fust crée qu'auec elle furent créés toutes matieres vegetatiues, toutes douceurs & amertumes, toutes couleurs, senteurs & vertus, & de là vient, que chacune des semences eftant iettée en terre, attirent à soy odeurs & vertus. Aucunes attirent des matieres veneneufes & pernicieufes, prenant toutes ces choses en la terre.

Theorique.

Tout ce que tu m'as allegué cy deffus ne fait rien contre mon opinion.

Prattique.

Si fait: car tout ainfi que ie t'ay dit que les semences ou matieres de toutes choses vegetatiues, eftoyent créés des le commencement du monde auec la terre: Auffi t'ay ie dit que toutes les matieres minerales (que tu appelles cors mors) furent auffi créés comme les vegetatiues, se trauaillent à produire semées pour en engendrer d'autres. Auffi les minerales ne font pas tellemēt mortes qu'elles n'enfantent & produifent de degré en degré choses plus excellentes, & pour mieux te le fair entendre, les matieres minerales font entremeflées & inconnues parmy les eaux, en la matrice de la terre, ainfi que toute humaine creature & brutale eft engendrée fouz efpece d'eau en fa formation: & eftant entremeflées parmy les eaux, il y a quelque matiere fuprefine, qui attire les autres qui font de fa nature pour fe former. Et ne faut
penfer

penſer qu' au parauant leur formation & congelation leur couleur fuſt connue parmy les eaux. Mais comme tu vois que les chaſtaignes ſont blanches en leur premiere formation, & noires en leur maturité: les pommes noires au commencement, & rouges en leur maturité: les raiſins verds en leur premiere eſſence, & noirs en leur maturité: Semblablement les metaux en leur premier eſtre n' ont aucune couleur que d' eau ſeulement: & cela ay-ie connu avecques vn grand travail; proteſtant que iamais ie n' en ay rien cherché en intention de pretendre au fait de l' alchimie. Car i' ay touſiours eſtimé la choſe impoſſible: ie di ſi fort impoſſible, qu' il n' y à homme qui me ſçeuſt donner raiſons legitimes, que cela ſe puiſſe faire. Quand i' ay cōtemplé les diuerſes euures & le bel ordre que Dieu à mis en la terre, ie me ſuis tout eſmerueillé de l' outrecuidance des hōmes: car ie voy qu' il y à pluſieurs coquilles de poiſſons, leſquelles ont vn ſi beau poliſſement qu' il n' y à perle au monde ſi belle. Entre les autres y en à vne au cabinet de monsieur Raſce, qui à vn tel luſtre, qu' elle ſemble vne eſcarboucle, à cauſe de ſon beau poliſſement, & voyant telles choſes ie dy en moy meſme, pourquoy eſt ce que ceux qui diſent ſçauoir faire l' or ne pulueriſent vn nombre deſdites coquilles & en faire de la paſte pour en former quelque belle coupe? ie ſuis aſſeuré qu' vne coupe bien faitte de telle matiere ſeroit plus chere & plus

plus precieuse que l'or. Ou bié que ne regardét ils de quoy le poisson à formé ceste belle maison, & prendre de semblables matieres, pour faire quelque beau vaisseau. Le poisson qui fait laditte coquille n'est si glorieux que l'homme, c'est vn animal qui à bien peu de forme, & toutesfois il sçait faire ce que l'homme ne sçauoit faire. En quelque partie de la mer Oceane, se trouue yne grande quantité de poissons portans chascun vne coquille sur le dos, lequel s'atache contre le roc, & par ce qu'il est couuert de sa coquille, il forme au dessus d'icelle six trous, pour auoir aër, ou pour receuoir nourriture; & ainsi qu'il augmente sa coquille, il fait vn nouveau trou, & en ferme vn autre; La plus grande desdites coquilles n'est pas plus grande que la main de l'homme: Le dedans de laditte coquille est de couleur de perle, & plus beau: par ce qu'il tient des couleurs de l'arc celeste, comme la pierre que l'on appelle opalle: Le dessus de laditte coquille est assez rude & mal plaisant, à cause de l'eau de la mer qui donne dessus: Mais quant la croute en est ostée, le dessus de laditte coquille est aussi beau que le dedans. Ledit poisson n'a aucune forme. & toutesfois il sçait faire ce que les alchimistes ne sçauoyét faire. Il y à vne isle en laquelle se trouue si grande quantité dudit poisson, que les habitans d'icelle en engraisent les pourceaux, & pour les arracher de leurs coquilles, ils les font boullir, & font brusser lesdites coquilles, pour

faire.

faire de la chaux.

Theorique.

Pourquoy est ce que tu me fais vn si long discours d vne coquille, veu que nostre propos n'est autre que du fait de l'alchimie?

Practique.

C'est pour vaincre ton erreur & de tous ceux qui sont de ton opinion, que j'ay mis en auant vn poisson le plus difforme que l'on scauroit trouuer en toutes les parties maritimes, lequel scait faire vne maison peinte d vne telle beauté que tous les alchimistes du monde n'en scauroient faire vne semblable. J'ay plusieurs fois admiré les couleurs qui sont esdictes coquilles, & n'ay peu comprendre la cause d'icelles: toutesfois en fin j'ay considéré que la cause de l'arc celeste n'estoit sinon d'autant que le soleil passe directement au trauers des pluyes qui sont opposites de l'aspect du soleil: car l'on ne vist iamais l'arc celeste que le soleil ne luy fust opposé; Aussi ne vist on iamais l'arc celeste que la pluye ne tombast deuers la partie de sa formation: Suyuant quoy j'ay pensé que quand ledit poisson fait sa maison, il se met sur quelque roche, alendroid de laquelle l'eau de la mer n'a pas beaucoup d'espoisseur, & que pendant le temps que ledit poisson forme sa maison, le soleil donne au trauers de l'eau & cause les couleurs de l'arc celeste en laditte eau, & les matieres desdictes coquilles estant aqueuses & liquides en leur formation

tion & congelation retiennent les couleurs acti-
onnées par la reuerberatiō du soleil passant au tra-
ners desdittes eaux. Voila commēt il y a temps &
faisō aussi biē pour les hōmes que pour les bestes,
les vegetatifs qui n'ont aucun sentimēt nous don-
nent enseignemēt de ces choses, i'ay veu plusieurs
fois besongner les limaces à bastir leurs maisons;
mais, iamais hōme ne les vist bastir en tēps d'hy-
uer. Les abeilles ou mouches à miel & autres ani-
maux ne le font pas aussi. parquoy il est aisē à con-
clure q̄ les metaux & tous mineraux ont quelque
saison pour leur formation, qui nous est incōnue.
Nous pouuons connoistre en ces choses, la folie
de ceux qui veulent entreprendre de generer l'or
& l'argent hors la matrice de la terre, & qui plus
est, les veulent engendrer sans connoistre les ma-
tieres propres à leur essence: & (encore piz) veu-
lent faire par feu ce qui est naturellement fait par
eau. Et (comme i'ay dit cy dessus) les matieres des
metaux sont en telle sorte cachées, qu'il est im-
possible à l'homme de les connoistre au parauant
qu'elles soyent congelées, non plus qu'une eau en
laquelle l'on auroit fait dissoudre du sel, nul ne
sauroit dire qu'elle fust salée sans la taster à la lan-
gue.

Theorique.

Et comment sçais tu ces choses, & surquoy te
fondes tu, pour entreprendre de parler à l'encon-
tre de tant de sçauans philosophes, qui ont fait de
si beaux liures d'alchimie? veu que tu n'es ny Grec
n'y

ny Latin ny gueres bon François.

Practique.

Je te le diray. Il aduint vn iour que ie fis bouillir & dissoudre vne liure de salpêtre dedans vn chaudron plein d'eau, & puis ie le mis refroidir, & quâr elle fust froide, ie trouuay le salpêtre qui en se conglaçant s'estoit attaché audit chaudron par glaçons longs, ayât forme quadrangulaire. Quelque temps apres i'achetay du cristal qui auoit esté apporté d'Espagne, qui estoit formé ainsi que le salpêtre que i'auois fait dissoudre. Je connuz lors que combien que les metaux soyent corps morts (comme tu as dit) toutes fois le cristal n'est pas tellement mort qu'il ne luy soit donné de se sçauoir separer des autres eaux, & au milieu d'icelles se former par angles & pointes de diamants; & comme il est donné au cristal, salpêtre & sel commun, de se sçauoir cōgeler & faire vn corps apart au milieu de l'eau commune, il est donné aussi aux matieres minerales de faire le semblable, comme ie prouue par vne ardoise que tu vois icy, en laquelle sont plusieurs marcasites formez. Et non sans cause t'ay-ie mis en auant le propos de ceste ardoise: car elle me donne à connoistre la conclusion de ce que i'ay allegué cy dessus. Tu vois que les marcasites metaliques qui sont en icelles sont quarées par faces semblables à vn dé. Si ie te demande lequel des deux à esté formé le premier, ou l'ardoise ou le marcasite, tu ne me sçauois respon-

respondre ; ie seray donc le prestre Martin, ie me
respondray moy mesme, prenant pour argument
les coquilles, lesquelles ie preuue estre formées
dedans l'eau qui depuis ont esté petrifiées & l'eau
& les vases ou elles habitoyent. Et tout ainsi com-
me les coquilles estoient formées au parauant
qu'estre petrifiées, & le lieu ou elles habitoyent.
Semblablement les marcaffites qui sont en ceste
ardoise estoient formées au parauant l'ardoise, &
est chose certaine que quand elles se formoyent
elles estoient couuertes d'eau meslée de terre, la-
quelle depuis s'est reduite en ardoise, & les marca-
ffites ont demeuré en leurs propres formes en-
chassées dedás ladicte ardoise, comme les coquil-
les se trouuent anchassées dedans la pierre. Con-
clus donc que lesdites marcaffites sont formées
d'une matiere qui (au parauant sa formation) e-
stoit incónue dedans les eaux, & par vn ordre que
Dieu à mis en nature, les matieres, qui au para-
uant estoient vagantes, se sont formées en telle
sorte, que les hommes deuroyent grandement
s'esmerueiller des euures de Dieu, & connoistre
que c'est vne grande folie de le penser imiter en
telle chose, quelque temps apres que i'eus pris
garde à ce que dessus ie m'en allois par les champs
la teste baissée, pour contempler les euures de na-
ture: lors ie trouuay certains mercenaires qui ti-
roient de la mine de fer, assez bas dans la terre, &
laditte mine estoit en pierres d'environ la gros-
seur

feur d'un œuf, ie nomme la grosseur par ce qu'es
Ardenne la mine de fer y est fort menue. or celle
que lesdits mercenaires tiroient n'auoit aucune
forme, les vnes pierres estoient longues & les au-
tres rondes, bicornues, selon le lieu ou la matiere
s'estoit arrestee au temps de sa congelation. Quel-
que temps apres i'en trouuay certaines pierres as-
sez grosses, que toute la superficie estoit formee
a pointes de diamants. ie fus plusieurs ans a son-
ger qui pourroit estre la cause de la forme desdit-
tes pointes, & ne pouuant entendre la cause, ie la
mis quelque temps a nonchaloir, ne m'en sou-
ciant plus. Et comme vne autre fois ie cherchois
la cause de la formatiõ de toutes pierres, qui d'un
coste estoient formees a pointes de diamants, &
estoient lesdittes pointes pures, nettes, candides,
& transparentes comme cristal; & de l'autre coste
elles estoient tenebreuses, rudes, & mal plaisan-
tes. Or d'autant qu'elles auoyent este cõgelées en ce
mesme lieu, iay conneu que la partie diaphane es-
toit formee d'eau pure, & la partie tenebreuse d'un
eau trouble meslee de terre: Mais quant aux
pointes de diamants i'en en sceus encores pour lors
entendre la cause, il aduint vn iour que quelqu'un
me monstra de la mine d'estain qui estoit ainsi for-
mee par pointes, vne autre fois me fust monstre
de la mine d'argent tenant encores avec la roche,
ou les matieres dudit argent auoyent este conge-
lees,

lées, laquelle mine estoit aussi formée en pointes de diamans. Quand j'ay eu considéré toutes ces choses iay conneu que toutes pierres & especes de sels, marcaffites & autres mineraux, desquels la congelation est faite dans l'eau, apportent en soy quelque forme triangulaire, ou quadrangulaire, ou pentagone, & le costé qui est en terre & contre le roc, ne peut porter autre forme que celle de l'assiete du lieu ou elle repositoit au temps de sa congelation. Voila qui suffira pour renuerfer les opinions de tous ceux qui cherchent a faire l'or & l'argent par son contraire. Car puis qu'il y a des formes de pointes de diamant és minieres d'or, d'argét, de plomb, d'estain & autres metaux, tu te peux asseurer que la principale matiere d'iceux n'est autre chose qu'un sel dissout, lequel habitant avec les autres eaux se separe d'avec icelles, attirant a soy les choses qu'il aime, pour les congeler & reduire en metal. Et combien que tous les philosophes ayent conclud que l'or est fait de souphre, & d'argent vif, ie maintiens que le souphre que nous voyons, ne se scauroit mesler avec les matieres minerales ou semences d'icelles, bien confesserai-je que parmy les eaux il y a quelque genre d'huile, lequel estant meslé avec l'eau & le sel mineral, ayde a la generation des metaux, & les metaux estans paruenus en leur parfaite decoction, l'huile est lors congelée parmy le metal, & prend le nom de souphre. Il y a des secrets si fort cachez &

& inconneuz en toutes natures, que de tant plus vn homme sera sçauant en philosophie, de tant plus il craindra les hazards qui suruiennent ordinairement en toutes entreprises fusibles, metaliques, & vulcanistes. N'est ce pas chose estrange & de grande consideration qu'il y a, à Montpelier certaines eaux ou l'on reduit le cuyure en verd de griz, & tout aupres d'icelle, il y à autres eaux ou l'on n'en sçauoit faire? Ny a il pas aussi des eaux qui sont bonnes aux teintures & à cuire legumes, & autres eaux bien pres d'icelles n'y vaudront rien. J'ay veu du temps que les vitriers auoyent grand vogue, à cause qu'ils faisoient des figures es vitreaux des temples, que ceux qui peignoyent lesdittes figures n'eussent osé menger aux, n'y oignons. Car s'ils en eussent mēgé la peinture n'eust pas tenu sur le verre. l'en ay connu vn nommé Jean de Connet, par ce qu'il auoit l'alene punaise, toute la peinture qu'il faisoit sur le verre ne pouuoit tenir aucunement, combien qu'il fust sçauant en son art. Les historiens disent que s'il y a vne palme plantée sur le bord d'un fleuve, & vne autre de l'autre costé dudit fleuve, que les racines iront de l'un à l'autre par dessous ledit fleuve, à cause de l'amitié ou affinité qu'elles ont ensemble. Il est certain aussi que les femmes alaiçtantes, estās loing de leurs enfans endormis, sentēt à leurs memmelles quand ils crient estant esueillez. J'ay veu vne femme pudique saige & honorable, que

H

quand

quand son mari estoit aux champs, elle sentoit par quelque mouuement secret, le iour que son mary deuoit arriuer. Tels mouuemens ne sont pas seulement aux creatures humaines & brutales, mais aussi aux vegetatiues & metaliques. Et tout ainsi comme les matieres animées se seruent de choses alimentaires, & en ayant pris la substance nutritiue, enuoyent le demeurant és vaisseaux excrementaires, semblablement les metaux engendrent quelques excrements inutiles apres leur formation. Je prens donc le souphre comme vne colofaigne ou excrement qui à serui à la generation, laquelle estant parfaite les excrements n'y seruent plus de rien, & si cela aduient és creatures humaines & brutales, aussi fait il a tous vegetatifs. Et qu'ainsi ne soit, tu vois les noix & les chastaignes qui ont vne robbe excrementale, & deslors qu'elles viennent a leur perfection elles iettent en bas leurs robbes comme vn excrement inutile. Ainsi toutes semences ou plantes vegetatiues, produisent quelque chose pour leur aider & seruir pour vn temps seulement. Semblablement ceux qui affinent les mines des metaux, separent le souphre d'auec le metal: comme chose inutile, tout ainsi comme le laboureur separe le bled d'auec la paille. Voila pourquoy ie te di que le souphre vulgaire n'est pas tel comme lors qu'il à generé les metaux, & qu'au parauant ce ne pouuoit estre qu'vne huile inconnue; tout ainsi que tu vois que la gomme

me

me n'est qu'une eau quand elle est au dedans de l'arbre, & quand elle est sortie & qu'elle decoule le long de l'arbre elle se dessèche & endurecist, & lors elle prend le nom de gomme. La terebentine est une huile qui distille des piniers, & quand elle est cuite elle s'edurecist, & puis s'appelle poix-rasine, Voila comment il faut que tu entendes que la generation des metaux est faite par matieres & vertus inconnues aux hommes. Et ne pense pas que le vis argent soit autre chose qu'un commencement de metal, fait ou commencé par une matiere aqueuse & salcitiue. Je ne dis pas de sel commun: car ie sçay que le nombre des especes de sels est infiny à nostre connoissance, comme ie te feray entendre cy apres en parlant des sels.

Theorique.

Tu es terriblement prompt à detracter des philosophes, & c'est la plus belle chose du monde que la philosophie. car par philosophie l'on fait des distillations les plus utiles pour la medecine que chose que l'on sçauroit trouuer: mesme l'on tire par philosophie toutes sœurs, vertus & saveurs, tant des especeries que de toutes choses odoriferantes.

Practique.

Tu te moques bien de moy, de dire que l'ay en haine la philosophie, & tu sçais bien que ie n'ay rien en plus grande recommandation, & que ie la cherche tous les iours, & ce que j'en parle n'est pas contre les philosophes actuels & dignes

de ce nom. Mais ie parle contre ceux qui meritent plus d'estre appelez antiphilosophes q̃ philosophes. Car ie louë grandement les distillateurs & tireurs d'essences, & estime cette science grãdement vtile & proufitable. Ie n'entens parler sinon contre ceux qui veulēt vsurper (pour viure à leur aise vn secret que Dieu a reserué à soy, aussi bien cōme la puissance de faire vegeter & croistre toutes plātes & toutes choses. Car c'est Dieu luy mēme qui a ietté la semence des metaux en la terre. Et ils veulent entreprendre de faire vne euvre qui se fait occultement dans la terre, de laquelle ils ne connoissent ny le moyen ny les matieres, ny par qu'elle vertu ny comment, ny en combien de tēps la chose peut paruenir à la perfectiō. L'on a quelque connoissance du temps quil fault pour la maturité des bleds & autres semences : Mais quant est de la semence des metaux, ils n'en ont aucun tesmoignage, ny connoissance de la vertu, par laquelle les matieres se lient & congelent. Ie sçay bien que ces choses ont quelque vertu d'attirer l'un a l'autre, comme l'aimant tire le fer. Aussi sçay ie bien que quelque fois i'ay pris vne pierre de matiere fusible, qu'apres l'auoir pilée & broyée aussi finement que fumée, & l'ayant ainsi puluerisée ie la meslay parmy de la terre d'argile, & quelques iours apres quand ie vouluz besongner de laditte terre, ie trouuay que laditte pierre se estoit commencée à rassembler, combien qu'elle fut

le fust meſſée ſi ſubtilement parmy la terre, que nul homme n'en euſt ſçeu trouuer vne pierre auſſi groſſe que les petits aromes que lon void dedans les rayons du ſoleil, entrant dans la chambre, choſe que i'ay trouué merueilleuſement admirable. Cela te doit faire croire que les matieres des metaux ſe raſſemblent & congelent admirablement, ſuyuant l'ordre & vertu admirable que Dieu leur à ordonné,

Theorique.

Tu as beau parler contre l'alchimie, toutefois i'ay veu pluſieurs philoſophes qui m'ont baillé de grandes raiſons du fait de la generation de l'or & autres metaux.

Practique.

Le me doute que ceux que tu appelles philoſophes, ne ſoyent les plus grands ennemis de philoſophie. Car ſi tu ſçauois que c'eſt que philoſophie tu cōnoiſtrois que ceux qui cherchent à faire l'or & l'argent, ne meritent pas ce titre: par ce que philoſophe veut dire amateur de ſapience. Or Dieu eſt ſapience: l'on ne peut donc aimer ſapience ſans aymer Dieu. Et ie m'emeraille comment vn tas de faux monnoyeurs, leſquels ne s'eſtudient qu'à tromperies & malices, n'ont honte de ſe mettre au reng des philoſophes. Or cōme i'ay dit des le commencement, l'auarice eſt racine de tous maux, & ceux qui cherchent à faire l'or & l'argent, ne peuuent eſtre exemps du titre d'auaricieux, & eſtants auaricieux, ne peuuent eſtre dits

philosophes n'y compris au nombre de ceux qui aiment sapience. J'ay mis ce propos en auant par ce que tous ceux qui cherchent à faire l'or & l'argent, ont tousiours ce mot en la bouche, que les secrets de sçauoir faire les metaux n'appartiennēt sinon aux enfans de philosophie, & non seulement le disent de bouche, mais le mettent es liures imprimez : comme ainsi soit qu'il fut imprimé à Lyon vn liure de l'or potable, du temps que le Roy Henri troisieme y estoit à son retour de Polongne, auquel liure est clairement escrit, que l'alchimie ne doit estre reuelée sinon aux enfans de philosophie. S'ils sont enfans de philosophie, ils sont enfans de sapience : & consequemment enfans de Dieu. Si ainsi estoit il seroit bon que nous fussions tous de la religion des alchimistes.

Theorique.

Tu m'as allegué cy dessus des chaistaignes, des noix, & autres fruits: Mais cela ne fait rien contre moy : par ce que les metaux sont vn & les fruits sont vn autre.

Practique.

J'ay grand honte que ce propos dure si longuement : toutesfois à cause de ton opiniatrité ie parleray encores de ce fait. Que ne consideres tu le fait de l'aimant, qui par vne vertu singuliere attire à soy le fer: combien qu'il n'ait nulle ame vegetatiue; & si ainsi est hors de la matrice de la terre, combien cuides tu qu'il aye plus grāde ver-

tu en

tu en la terre, quād il est encores en matiere liquide? l'aimant n'est pas seul qui ait pouuoir d'attirer à soy les choses qu'il aime: Ne vois tu pas le l'ayer & L'ambre, lesquels attirēt le festu? Item de l'huile estant iettée dedans l'eau se ramasse à part de laditte eau, veux tu meilleures preuues que du sel commun, du salpestre, de l'alun, de la coperoze, & de toutes especes de sels? lesquels estās dissouz dedens l'eau se sçauent bien separer & faire vn corps à part distingué & separé d'avec l'eau, & en confirmant ce que i'ay dit cy dessus, ie te di encores, que la semence des metaux est liquide & inconnue aux hommes: Et tout ainsi que ie t'ay dit que la semence du sel liquide se sçait separer de l'eau commune, pour se congeler: autant en est il des matieres metaliques. Et te faut icy philosopher encores de plus pres: regarde les semences quand l'on les iette en terre, elles n'ont qu'une seule couleur, & venant à leur croissāce & maturité elles se forment plusieurs couleurs, les fleurs, les branches, les feuilles & les boutons, ce seront toutes couleurs diuerses, & mesme en vne seule fleur il y aura diuerses couleurs. Semblablement tu trouueras des serpens, des chenilles, & papillons, qui seront de plusieurs belles couleurs. Venons à present à philosopher plus outre, tu me cōfesseras que d'autāt que toutes ces choses prennent nourriture en la terre, que leur couleur procede aussi de la terre: Et ie te diray par quel moy-

en? & qui en est la cause? Si tu peux attirer de la terre par art alchimistal, les couleurs diuerses comme font ces petis animaux, ie t'accorderay que tu peux aussi attirer les matieres metaliques, & les rassembler pour faire l'or & l'argent. Mais (comme ie t'ay dit tant de fois) tu y procedes tout au contraire de la nature. Tu as entendu par mes arguments que toutes matieres metaliques sont aqueuses & se forment dedans l'eau, & ce pendant tu les veux former par le feu, qui est son contraire. Ne t'ay-ie pas monstré euidemment par vne ardoise remplie de marcassites, que les matieres metaliques estant encores fluides dedans les eaux, elles s'atirēt l'vne à l'autre pour se reduire en corps: & comme i'ay tousiours dit, elles sont inconnues & indistinguibiles des autres eaux, iusques à leur congelation.

Theorique.

Le trouue fort estrange que tu dis que les matieres metaliques sont incōnues dedans les eaux, & toutesfois l'on void le contraire. car tous tant qu'il y a de philosophe disent que tous metaux sont composez de souphre & de vif argent. S'il est ainsi pourquoy croiray-ie qu'ils ne se peuuent cōnoistre dedans l'eau? car ie suis certain que s'il y en auoit dedans l'eau ie les connoistrais bien.

Prattique.

Et comment n'as tu point de souuenance que ie t'ay allegué le sel commun & autres, pour te faire

faire entendre que tout ainsi que le sel n'à aucune couleur estant liquide dedans l'eau, que aussi les matieres metaliques n'ont aucune couleur, iusques à leur congelation. Mais ils la prennent en se r'assemblant & congelant: tout ainsi que toutes especes de fruits changēt de couleur en leur croissance & maturité. Si ie voulois allēguer les semēces humaines & brutales, y trouuera on quelque couleur au parauant leur formation? non! non plus qu'aux metaux. Je t'ay desia dit cy dessus que tu n'as iammais veu souphre, ne vif argent, qui ne fut congelé, & qu'au parauant ils n'estoyent pas de la couleur qui sont à present, & qu'ils estoyent inconnus, comme le sel est inconnu dedans l'eau de la mer. Il y à long temps que ie pensois faire fin au propos de l'alchimie, estimant qu'en parlāt des pierres tu pourois connoistre la verité de mes preuues: Mais par ce que ie te trouue de dure ceruelle & par trop arresté en ton opinion, ie suis contraint pour conclure à ce que dessus, te dire qu'il ne se peut entendre autre chose des metaux, sinon ce que les natures humaines, brutales & vegetatiues me donnent à connoistre: Qui est, que quand la chasteigne, la noix, & tous autres fruits, sont semez en terre: en iceux sont enclos les racines, les branches, les feuilles, & toutes les parties: vertus, senteurs & couleurs, que l'arbre scauroit produire quand il sera né. Aussi qu'en la semence des natures humaines & brutales, les os, la chair, le sang

le sang & toutes les autres parties sont comprises en laditte semence. Et tout ainsi que tu vois que nulle de ces choses ne demeure en sa premiere couleur: Mais en la croissance d'iceux ils chagent de couleur, & en vne mesme chose y à plusieurs couleurs: En cas pareil te faut croire que les semences des metaux (qui sont matieres liquides & aqueuses) changent de couleur, pesanteur & dureté. La premiere connoissance que j'ay eu de ces choses, fut à vne miniere de terre argileuse, qui estoit à vne tuilerie pres saint Sorlin de Marennes és isles de Xaintonge, là ou ie trouuay parmi laditte terre vn grand nombre de marcasites de diuerses grandeurs & pesanteurs, toutes lesquelles estoient formees de telle sorte que l'on pouuoit iuger, que la matiere de leur formation estoit liquide, & qu'elle estoit cheutte du haut en bas, és iours de sa congelation, tout ainsi que si l'on auoit laissé tomber de la cire fondue petit à petit pour la faire congeler.

Theorique.

J'ay bien entendu tes raisons. Mais ne seroit ce pas vn grand bien en France, s'il y auoit cinq ou six hommes qui fussent paruenuz à leur fin, touchant la pierre des anciens philosophes. Car j'ay entendu par le dire de plusieurs alchimistes que s'ils y estoient paruenuz, ils feroient assez d'or, pour faire la guerre contre tous aduersaires: & mesme contre le Turc.

Practi-

Practique.

Entre tous les propos que tu as dit par cy deuant, il n'y en à pas vn si esloigné de sapience que celui que tu viens de dire: Mais ie di au contraire qu'il vaudroit mieux vne peste, vne guerre, & vne famine en France, que non pas six hommes qui sceussent faire l'or en si grande abondance que tu dis. Car apres que lon seroit assuré que la chose se pouroit faire, tout le monde mespriseroit le cultiuement de la terre, & s'estudieroit a chercher de faire de l'or, & par ce moyen la terre demeureroit en friche, & toutes les forests de la France ne scauroyent fournir de charbon tous les alchemists l'espace de six ans. Ceux qui ont veu les histoires disent que vn Roy ayant trouué quelques mines d'or en son Royaume, employa la plus grande partie de ses suiets pour tirer & affiner laditte mine, qui causa que les terres demeuroyent en frische, & la famine commença audit royaume. Mais la Royne (comme prudente & esmeüe de charité enuers ses suiets) fist faire secretement des chapons, poulets, pigeons, & autres viandes de pur or, & quant le Roy voulust disner, elle le fist seruir desdittes viandes, dont il fust ioyeux, n'entendant pas à quoy la Royne tendoit: mais voyant que l'on ne luy apportoit point d'autres viandes, commença à se fâcher, quoy voyant la Royne le supplia de considerer que l'or n'estoit pas nourriture, & qu'il valoit mieux employer
ses

ses suiets à cultiuer la terre que non pas à chercher les mines d'or. Si tu ne te veut arrester à vn si bel exemple, entre en toy mesmes, & t'asseure que s'il y auoit six hommes en France, comme tu dis, qui sceussent faire l'or, ils en feroient si grande quantité que le moindre d'eux se voudroit faire monarque, & ils se feroient la guerre entre eux; & apres que la science seroit diuulgee, il se feroit si grande quantité d'or qu'il viendrait à tel mespris, que nul n'en voudroit bailler pain ne vin pour eschange. Je ne di pas que ce ne soit chose iuste que les princes commettent gens és minieres, mesmes des forsaies criminels, pour extraire lesdites mines, afin de s'en ayder, tant pour le commerce que pour les instruments necessaires, que l'on forme desdits metaux.

Theorique.

Tu m'as cy dessus donné beaucoup d'argumens contre ceux qui veulent generer les metaux par chaleur, & mesme t'es vanté de prouuer vn cinquieme element: desquelles choses ie ne puis me contenter, si ie n'ay vne conclusion plus certaine.

Practique.

Je ne puis conclure autre chose sur le fait des metaux, sinon la mesme chose que i'ay dit cy dessus: que toutes matieres metaliques sont liquides, fluides, & diafanes, & inconnues parmy les eaux communes, iusques à leur congelation, & quand est du cinquieme element, ie ne te puis donner
autre

autre preuue que celle que i'ay donné publiquement deuant mes auditeur, où tu estois present, dont la preuue a esté faite par vne pierre, que tu vois icy.

Ne te souuiens il pas qu'en faisant la demonstration de c'este pierre, que ie disois que toutes pierres ayans forme triangulaire, ou pentagonne, ou quadrangulaire, ou a pointes de diamants, estoient formées dedans l'eau, & qu'autrement elles ne pouuoient prendre les formes susdittes: ayant donc resolu vn tel argument, ie leur monstrois la ditte pierre, laquelle est composée de trois matieres diuerses; sçauoir est, le dessus de ladicte pierre est de cristal pur & net, formé en la superficie supérieure en pointes de diamants, & l'autre partie suyuant au deffouz d'icelle, est de mine d'argent: & la troisieme partie, est d'une pierre commune, qui donne clairement a entendre que celle que j'appelle commune qu'aucuns appellent tuf, semblable a celle des carrieres, estoit formée la premiere; & depuis sa formation la matiere d'argent descendant d'en haut au parauant sa congelation, s'est arrestée sur la carriere de ladicte pierre, & quelque temps apres s'est congelée en mine d'argent, & en vn autre temps, la matiere cristalline s'est arrestée sur ladicte mine, & s'est congelée & formée en pointes de diamants, & ce durant le temps que les eaux communes estoient plus hantes que lesdittes matieres: car autrement iamais
le cri-

le cristal ne se fust formé par pointes. Tu sçais bien que tous ceux a qui i'ay fait demonstration de la ditte pierre ont approuué mes arguments, sans aucune contradiction. Et pour venir à la preuue du cinqiesme elemēt : laditte pierre m'a aussi serui de preuue: par ce que leur ay prouué que iamais ne se forma cristal n'y autres pierres à pointes ou à faces, qu'elles ne fussent dedens les eaux communes, & que la verité est telle, que le cristal, le diamant, & toutes pieres diaphanes ne sont formées que de matieres aqueuses, & puis que le cristal & autres pieres diaphanes se forment au milieu des eaux communes, ne voulant auoir aucune affinité avec elles en leur congelation, non plus que le suif, la graisse, les huiles, la poix-rasine & autres telles matieres, lesquelles se separent des eaux communes: Il faut conclure donc que l'eau de laquelle le cristal est formé, est d'un autre genre que non pas les eaux communes: & si elle est d'un autre gēre, nous pouuons donques assurer qu'il y a deux eaux, l'une est exalatiue & l'autre essenciue, congelatiue & generatiue, lesquelles deux eaux sont entremeslées l'une parmi l'autre, en telle sorte qu'il est impossible les distinguer au parauant que l'une des deux soit congelée.

Theorique.

Si tu mets vn tel propos en auant l'on se moquera de toy: par ce que les philosophes tiennent pour chose certaine qu'il n'y a que quatre ele-

ments

ments : & s'il y auoit deux genres d'eau , comme tu dis, il y en auroit cinq.

Practique.

Ie te l'ay assez fait entendre par le cristal, lequel quand il se veut congeler le plus souuent dedens les neiges il se separe des autres eaux , & les eaux cōmunes qui sont demeurées en neiges se dissoluent, & le cristal ne se peut dissoudre, n'y au soleil ny au feu : qui est vn argumēt bien certain que les eaux cōmunes ne font qu'aller & venir, mōter & descendre, comme l'ay dit en parlant des fontaines, & t'ose dire encores , que les eaux congelatiues sont aussi euaporatiues & exalatiues , & leur habitation & demeure est parmi leau commune, iusques à leur congelation.

Theorique.

Ily à bien peu d'hommes qui veulent croire ce que tu dis : par ce qu'il voudront s'arrester aux philosophes antiques.

Practique.

Tu diras ce que tu voudras : Mais si est ce, que quand tu auras bien examiné toutes choses par les effets du feu , tu trouueras mon dire veritable , & me confesseras que le commencement & origine de toutes choses naturelles est eau: l'eau generatiue de la semence humaine & brutale, n'est pas eau commune, l'eau qui cause la germination de tous arbres & plantes, n'est pas eau commune, & combien que nul arbre , n'y plante,
n'y

n'y nature humaine, n'y brutale, ne ſçauroit viure ſans l'ayde de l'eau commune, ſi eſt ce que parmi icelle, il y en à vne autre germinatiue congelatiue, ſans laquelle nulle choſe ne pourroit dire ie ſuis: c'eſt celle qui germine tous arbres & plantes, & qui ſouſtient & entretient leur formation iuſques à la fin: & meſme quand la fin & conſommation d'iceux eſt ſuruenue par feu, icelle eau generatiue ſe trouue és cendres, deſquelles l'on peut faire du verre ſemblable a l'eau de laquelle le criſtal eſt formé, & ne faut que tu penſes que autrement les bleds & autres plantes ſeiches ſe puiſſent ſouſtenir: par ce que l'eau exalatiue qui eſtoir au parauant leur maturité, s'eſt exalée par l'attraction du ſoleil: Mais l'eau cōgelatiue à tousiours ſouſtenu la forme de la paille. En ce cas pareil te faut croire que combien que l'homme ne boiue que de l'eau cōmune en aparence, ſi eſt ce qu'en beuuant & mergē il attire de ladite eau generatiue, ce qui eſt en toute matieres nutritiues: & ſclō l'effect de nature, la durté des os eſt cauſée par l'actiō de l'eau cōgelatiue, & pour ces cauſes, il y a pluſieurs eſpeces d'os qui endurent plus grand feu que non pas les pierres naturelles. Il te ſera plus aiſé de conſumer au feu vne pierre naturelle, que non pas les os d'un pied de mouton, ou les coquilles d'œufs. Tu peux par là cōnoiſtre que l'eau criſtalline, qui cauſe la veuē, à quelque affinité avec l'eau generatiue, de laquelle les lunettes, le criſtal & miroir ſont faits.

Theo-

Theorique.

Il me semble que tu te contredis en parlant de ceste eau generatiue: par ce qu'en parlant des sels tu dis qu'il y a du sel en toutes choses, & que sans iceluy nulle chose ne pouroit estre.

Practique.

Tu ne trouueras point de contradiction en mes propos, veux tu que i'appelle l'eau de la mer sel, tandis qu'elle sera vagante parmy les eaux communes? ie ne puis appeller les choses fluides & liquides ou aqueuses (pendant qu'elles sont inconnues parmy les eaux communes) sinon eau. Non pas mesme les metaux au parauant leur congelation: par ce que ie ray dit que les matieres metaliques n'ont aucune couleur sinon deau, iusques à leur congelation.

Theorique.

Tu m'as tant de fois dit que les matieres metaliques estoient liquides comme l'eau commune, au parauant leur congelation, toutesfois ie ne puis comprendre comment cela peut estre veritable, si tu ne me donnes preuues plus intelligibles.

Practique.

Ie ne te scaurois donner preuues plus suffisantes que celles que i'ay montré euidentement en ta presence à mes disciples, qui est (comme tu sçais) vn grand nombre de bois reduit en metal. Ne te souuiens il pas que quād ie faisois montre desdits bois, ie leur disois, comment seroit il pos-

fible que le bois se fut reduit en metal, s'il n'eut
premierement long tēps reposé dans les eaux me-
taliques entremeslées parmy les eaux communes?
& si les eaux metaliques n'eussent esté autāt liqui-
des & subtiles comme les communes, comment
eussent elles peu entrer dans le bois & l'embiber
par toutes ses parties, sans luy oster aucunemēt sa
forme premiere? c'est vn point que tous ceux qui
le considerēt seront contrains condescēdre à mon
opinion: & te diray encores vne autre preuue plus
asseurée, pour te mōtrer combiē il faut q̄ les ma-
tieres metaliques soyent subtiles pour actioner &
reduire en metal, sans desformer, les choses des-
quelles ie te veux parler. Premieremēt il se treuue
grand nombre de coquilles de poisson, qui pour
auoir croupi quelque temps dans les eaux me-
taliques sont reduites en metal sans perdre leur for-
me, desquelles coquilles i'en ay veu quelque quā-
tité au cabinet de monsieur de Roisi. De ma-
part i'en ay vne que i'ay monstré au mestre ma-
çon des fortificatiōs de Brest en basse Bretagne,
qui ma atesté qu'il s'en trouuoit grand quantité
en icelle contrée. Au cabinet de monsieur Race
chirurgien fameux de ceste ville de Paris y a vne
pierre de mine d'airain, ou il y auoit vn poisson de
mesme matiere. Au pays de Mansfeld se trouue
grande quantité de poissons reduits en metal, &
cela est trouué fort estrange à ceux qui viuēt sans
philosophie: Et ne peuuent iamais paruenir à la
con-

connoissance de la cause : cōbien qu'elle soit assez facile, cōme ie feray entendre cy apres: mais premieremēt il faut que i'anticipe sur le discours que i'ay à te faire de la cause des coquilles & bois petrifiēz qui est q̄ les coquilles sont formees d'une matiere alise, serree & fort compacte, & bien fort dure : & toutes fois quand lesdites coquilles ont long temps croupi dedens les eaux cōmunes, elles font attraction d'une eau cristaline generatiue, de laquelle i'ay tant parlē, laquelle les rend de matieres de coquilles en matiere de pierre, sans rien changer de leur forme. le n'en demande autre tesmoing que toy, qui as esté present, quand i'ay monstrē à mes auditeurs vn grand nombre de coquilles de diuerses especes, reduites en pierre, & non seulement les coquilles, mais aussi les poissons: aussi plusieurs pieces de bois. Il est donques aisē à conclure que les poissons qui sont reduits en metal ont esté viuants dens certaines eaux & estangs esquelles eaux se sont entremēlées autres eaux metaliques, qui depuis se sont congelées en miniere d'airain, & ont congelé le poisson & le vase, & les eaux communes se sont exalées suyuant l'ordre commun, qui leur est ordonné comme ie t'ay dit cy dessus, & si lors que les eaux se sont congelées en metal il y eut en icelles quelque corps mort, soit d'homme ou de beste, il se fut aussi reduit en metal: & de ce n'en faut aucunement douter. & tout ainsi que tu vois que les eaux commu-

nes descendantes amenant avec elles plusieurs incommoditez, comme terres, & sables, & autres ordures, aussi les eaux metaliques estans impures en leur congelation, elles congelent toutes choses qui sont en icelles: parquoy les affineurs ont grand peine a separer le pur d'avec l'impur, comme tu pouras plus clairement entendre en la conclusion que ie feray sur le traitté des pierres. Tu sçais bien que la cause qui m'a meu de te remōstrer ces choses, n'est autre sinon afin que i'amaies ne te prenne enuie de t'associer avec ceux qui veulēt generer les metaux. Car par les instructions que ie ta'y donne tu peux aisément connoistre qu'ils abusent, de vouloir faire par feu ce qui se fait par eau. Ie te puis asseurer auoir connu vn grand nombre des chercheurs susdits qui sont si ignorants qu'ils pensent retenir les esprits enfermez dans des vaisseaux de terre, chose à eux impossible.

Theorique.

Et qu'est ce qu'ils appellent esprits?

Practique.

Ils appellent esprits toutes matieres exalatiues, & singulierement le vis argent, qui est vne eau qui s'exale comme l'eau commune, quand elle est pressée du feu, & ils ont opinion que s'ils pouuoient trouuer quelque terre, de laquelle ils peussent faire des vaisseaux pour faire chauffer le vis argent, estant enclos dedans iceux, qu'iceluy se congeleroit en argent, & seroit rendu malea-

maleable. Mais les pauvres gens s'abusent si lourdement que iay honte de le dire. Car quand le vaisseau auroit cent toises d'espoisseur, il seroit impossible de le garder de creuer, s'il estoit tout clos, partant qu'il y eut au dedens tant peu soit d'humidité: comme ie t'ay fait entendre en parlant des tremblements de terre, que les matieres humides estans touchées par le feu, font de merueilleux efforts, & ne peuuent endurer estre encloses sans aër comme tu as entendu par vne pomme d'airain, & mesme les œufs, les chastaingnes, les pommes, & autres fruits sont contrains se creuer, quand l'humour est eschauffée: & voyla pourquoy l'on est contrainct de creuer la peau des chastaignes, afin que l'humour eschauffée ne les face petter: si ces bonnes gens consideroyent ces effects, ils ne chercheroient point de terre pour retenir les esprits.

Theorique.

Tu m'as allegué cy dessus des chastaignes, des noix & autres fruits, contre mon opinion de l'alchimie: mais cela ne fait rien contre moy: par ce que les metaux sont vn, & les fruits sont vn autre.

Practique.

I'ay grand honte que ce propos dure si longuement: toutesfois à cause de ton opiniastreté ie suis contrainct parler encores de ce fait. Es tu si grand beste que tu ne consideres le fait de l'aimant, qui par vne vertu singuliere attire à soy le fer, combien qu'il n'ait aucune ame vegetative. & si

ainſi eſt hors de la matrice de la terre, combien cuidoſ tu qu'il y aye plus de vertu eſtant en la terre, quand il eſt encores en matiere liquide? Et cuidoſ tu que l'aimant ſoit ſeul qui ait pouuoir d'attirer à ſoy les choſes qu'il aime? ne voy tu pas biẽ que le layet & L'ambre attirẽt à eux le feſtu? Item ne voy tu pas bien que l'huile eſtãt iettẽ dedens l'eau ſe ramaffe a part de l'eau? Vveux tu meilleure preuue que du ſel commun, du ſalpeſtre, de l'alun, de la coperoze, & de toutes eſpeces de ſelz? qui eſtans diſſoulz dedens l'eau ſe ſcãuẽt tresbien ſeparer & faire vn corps à part, diſtinguẽ & ſeparẽ d'auẽques l'eau. En confirmant ce que ie t'ay dit cy deſſus, ie te dy encores que la ſemence des metaux eſt liquide & inconnue aux hommes, tout ainſi comme le ſel diſſout, ne ſe peut connoiſtre parmy l'eau commune iuſques à ſa parfaite congelation: Auſſi pour tout certain la ſemence des metaux ne ſe peut connoiſtre eſtant en matiere liquide entremẽſlẽe parmi les eaux, iuſques à ſa congelation: Et tout ainſi que ie t'ay dit que la ſemence du ſel liquide ſe ſcãit ſeparer de l'eau commune pour ſe congeler, autant en eſt il des matieres metaliques. Et te faut ici philoſopher encores de plus pres. Regarde les ſemences, quand tu les iettes en terre elles n'ont qu'une ſeuille couleur, & en venant à leur croiſſance & maturitẽ elles ſe forment pluſieurs couleurs, la fleur, les fueilles, les branches, les rameaux & les boutons, ſeront
toutes

toutes couleurs diuerſes, & meſme à vne ſeulle fleur il y aura diuerſes couleurs. Semblement tu trouueras des ſerpens, des chenilles & des papil-
lôs, qui ſeront figurez de merueilleuſes couleurs,
voire par vn labeur tel que nul peintre n'y bro-
deur ne ſçauroit imiter leurs beaux ouurages.
Venons à preſent à philoſopher plus outre: tu me
confefferas que d'autant que toutes ces choſes
prennent nourriture en la terre, que leur couleur
procède auſſi de la terre: & ie te diray par quel
moyen, & qui en eſt la cauſe? Si tu me donnes rai-
ſons apparentes de ce que deſſus, & que tu puiſſes
attirer de la terre par ton art alchimical, les cou-
leurs diuerſes, comme ſont ces petits animaux.
Ie te confeffèray que tu peux auſſi attirer les ma-
tieres metaliques, & les rafſembler, pour faire l'or
& l'argent. Mais quoy! ie t'ay dit tant de fois que
tu y procedes tout au contraire de la nature, & tu
vois bien par mes arguments que les matieres
metaliques ſont toutes aqueuſes, & ſe forment
dedens l'eau, & tu les veux former par le feu, qui
eſt ſon contraire. Ne t'ay-ie pas monſtré euident-
ment cy deſſus par vne ardoiſe remplie de mar-
quaſites & autres pierres & mineraux, que les ma-
tieres metaliques eſtant encores fluides dedens
les eaux, elles s'attirent l'vne à l'autre pour ſe re-
duire en corps metalique & (côme i'ay touſiours
dit) elles ſont inconnues & indiftinguibles des
autres eaux, iuſques à leur congelation.


Theorique.

Je trouue fort estrange que tu di que les matieres metaliques sont inconnues dedens les eaux & toutesfois on voit le contraire: car autant qu'il y a de philosophes disent que tous metaux sont composez de souphre & de vif argent. S'il est ainsi me veux tu faire croire que le souphre & l'argent vif, ne se peuuent connoistre dedens l'eau? Je me tiens pour certain que s'il y auoit du souphre & du vif argent dedens l'eau, ie le connoistrais.

Practique.

Je voy bien que ie pers mon temps: Tu es aussi grand beste aujourd'huy comme hier. Et n'as tu point de souuenance que ie tay allegué le sel commun & autres: pour te faire entendre que tout ainsi que le sel n'a aucune couleur ce pendant qu'il est liquide dedens l'eau, que aussi les matieres metaliques n'ont aucune couleur iusques à leur congelation: mais prennent leur couleur en se rassemblât & congelant: tout ainsi que tu vois toutes especes de fruits chager de couleur en leurs croissances & maturitez. Si ie voulois alleguer les semences des natures humaines & brutales, y trouueroit on quelque couleur au parauant leur formation non plus qu'aux metaux? T'ay ie pas dit cy dessus que tu ne sçauois dire jamais auoir veu souphre ne vif argent qui ne fut congelé? penses tu que le vif argent que tu vois & le souphre ayent esté des le
com-

commencement des couleurs qu'ils sont a presentie sçay bien que non, & qu'au parauant ils estoient inconnuz, comme le sel est inconnu dedens l'eau de la mer.



AVTANT que i'ay reprouné par le discours precedent, la medecine alchimistale sur l'effet de la generation, augmentation & fixation, sur le fait des metaux: i'ay treuvé bon & à propos de reprouuer aussi les effects de l'or potable lequel i'estime ennemy de la nourriture corporelle des humains.



TRAITE' DE L'OR POTABLE.

Theorique.



VAND tu m'alleguerois toutes les plus belles raisons du monde, si est ce, que tu ne me sçauois faire mespriser l'alchimie: car ie sçay que plusieurs font de belles choses, & quasi des miracles en la medecine, par le moyen d'icelle, tesmoing l'or potable que les alchimistes ont inuenté: chose de grand poix & digne de louange. Car il fait quasi resusciter les morts: il garist toutes maladies, il entretient la beauté, il prolonge la vie, & tient l'homme ioyeux: que sçauois tu contredire à cela?

Practique.

Et comment és tu encores en ces resueries? n'as tu point veu vn petit liure que ie fis imprimer durant les premiers troubles, par lequel i'ay suffisamment prouué que l'or ne peut seruir de restaurant, ains plustost de poison, dont plusieurs docteurs en medecine ayant veu mes raisons furent de mon party: tellement que depuis quelque tēps il y à eu vn certain medecin docteur & regent en la faculté de medecine, lequel estant à Paris en la chaire à confirmé mes propos, les proposant a ses disci-

disciples comme doctrine bien asseurée. Quand il n'y auroit que cela c'est assez pour te réduire confus en tes arguments.

Theorique.

Et comment, oses tu tenir vn tel propos? veu que tant de milliers de medecins ont de si long temps ordonné de l'or pour seruir de restaurant aux malades, & mesmes les medecins Arabes en vsoient, qui estoient les plus excellens de tous les autres.

Pratique.

Je t'accorde qu'il y a vn nombre infini de medecins qui ont fait boullir des pieces d'or dedens des ventres de chappons, & puis fesoient boire le bouillon aux malades, & disoient que le bouillon auoit retenu quelque substance de l'or: par ce que lesdittes pieces estoient vn peu blanchies sur la superficie a cause du sel & de la graisse: Ce qui estoit faux, & s'ils eussent poisé lesdittes pieces apres les auoir bouilli ils les eussent trouuées aussi poissantes que deuant. Autres faisoient limer lesdittes pieces d'or & faisoient manger la limeure aux malades, parmy quelque viande: ce qui estoit pire que s'ils eussent mangé du sable. Autres prenoient de l'or en feuille dequoy vsent les peintres: mais tout cela seruoit autant d'une sorte que d'autre.

Theorique.

Encores que l'or ne serue rien aux malades en la sorte que tu dis, tu ne peux nier qu'il ne leur serue

ue quand il est potable. Car les alchimistes qui le rendent potable le calcinent en poudre fort subtile, & quand il est meslé parmy quelque liqueur il s'incorpore aussi bien comme pourroit faire la graisse de chapon parmy le bouillon. Voila comment & par quel moyen l'or peut servir a restaurer & nourrir le malade.

Practique.

Tu n'entends pas bien ce que tu dis. Car tu sçais bien que les fournaises de feu ne peuvent consommer l'or pur, comment seroit il donc possible que l'estomac d'un malade le peut consommer? attendu qu'il est desia si debile qu'il ne sçauroit digerer vne pomme cuite.

Theorique.

Et tu te moques bien de moy, l'or n'est il pas desia consommé quand il est potable? l'alchimiste qui l'a rendu potable l'a rendu aussi liquide que de l'eau clere.

Practique.

Tu t'abuses, & n'entens rien de tous mes propos, ou bien tu fais semblant de n'en vouloir rien entendre: Car quand tous les alchimistes auroient mis l'or en potage plus subtil que la fine essence ou quinte distillation de vin, encores dirois ie qu'ils n'ont rien fait à ce qu'il puisse servir de nourriture. Vray est que s'ils pouuoient dissoudre l'or sans aucune addition, alors ie serois de leur party, moyennant aussi qu'il se peust dissoudre.

foudre à vne chaleur du tout semblable à celle de l'estomac : Car autrement quel proufit pourroit faire vne matiere à l'estomac si la chaleur naturelle n'est capable de la dissoudre, comme elle fait les viâdes qui luy sont données pour nourriture? Mais quoy! ils ne font qu'adulterer, calciner & pulueriser, & puis mettent autres liqueurs pour le faire boire. Ne sçay ie pas bien que toutes choses dures, seiches & alterées, estant puluerisées se peuuent boire avec autres liqueurs? ce n'est pas à dire pourtant qu'elles puissent seruir de nourriture, tu pourras bien boire du sable & autres poucieries ; diras tu pourtant que cela te soit nourriture? lon sçait bien que non.

Theorique.

Ce n'est pas tout vn: car on prend l'or pour restaurant, comme le plus parfait de tous les alimēs, & dit on qu'un homme qui se nourrirait d'or seroit immortel, ainsi que l'or ne se peut consommer, & dure a iamais.

Practique.

Vrayement tu as bien dit a ce coup: car si vn homme se pouuoit nourrir d'or, ô que ce seroit vn bel idole. Je m'esmerueille que tu n'as honte de mettre vn tel propos en auant: d'autant que ce propos est suffisant pour vaincre toutes tes disputes. Tu dis que l'or est eternal selon le cours de ce siecle. Or s'il est eternal l'estomac de l'homme n'aura donc garde de le consommer, puis que le temps,
la ter-

la terre, l'aër n'y le feu ne le peuuent consommer. par quel moyen sera il donc consommé en l'estomac? car l'effect de l'estomac de l'homme est de cuire & cōsommer ce qui luy est donné: & ce qui est bon pour la nourriture est enuoyé par tous les membres, pour augmenter la chair & le sang & tout ce qui est en l'hōme, & le surplus il l'enuoye hors aux escrements. Or ie te demande, vn homme qui seroit nourri d'or sans manger autre chose, pouroit il engendrer quelque excrement? si tu dis qu'ouy, l'or n'est donc pas eternal: si tu dis que non, il ne faudra pas de priuez, n'y de chaires percées, pour ceux qui seroyēt nourris d'or potable.

Theorique.

Il est impossible de vaincre tes opinions: toutesfois plusieurs ont escrit que l'or potale a des vertus merueilleuses. N'as tu pas veu vn liure imprimé depuis n'agueres, qui dit que le Paracelse, medecin Alemand, medecinalement a guari vn nombre de ladres par le moyen de l'or potable. Et toy qui n'es qu'un tarracier desnue de toutes langues sinon de celle que ta mere t'a appris, oses tu bien parler contre vn tel personnage? qui a composé plus de cinquante liures de medecine, lequel est estimé vnique voire monarque entre les medecins.

Prattique.

Quand le Paracelse & tous les medecins qui furent iamais n'auroyent presché, ie diray tousiours

siours que si l'or potable estoit mis dedás vn creu-
fer, & soufflé, que la liqueur qui auroit esté mise
avec l'or se viendroit à exaller, brusler & consom-
mer, & l'or qui auroit esté potagé se rendroit en
vn lingot, & si l'estomac de l'homme estoit aussi
chaud qu'une fournaise, il feroit aussi venir cest or
potable en vne masse ou lingot: & s'il estoit au-
trement, l'or ne pouroit estre appellé fixe ou
eternel, comme tu dis.

Theorique.

Et que deuiendra donc le dire du Paracelse qui
en à guari tant de ladres?

Practique.

Je me doute que le Paracelse est plus fin que
toyn'y moy: Car peut estre qu'apres qu'il à eu
trouué quelque rare medecine, par le moyen des
metaux imperfects, marcasites, ou autres simples,
il fait accroire que c'est or potable, pour la faire
trouuer meilleure, & s'en faire mieux payer. C'est
la moindre finesse de quoy il se pouroit aduiser:
l'en ay Lien veu de plus fines en vne petite ville de
Poitou, ou il y auoit vn medecin aussi peu scauant
qu'il y en eut en tout le pays, & toutesfois par vne
seule finesse il se faisoit quasi adorer, il auoit vne
estude secreete bien pres de la porte de sa maison,
& par vn petit trou voyoit venir ceux qui luy ap-
portoyét des vrines, & estants entrez en la court,
sa femme bien instruite se venoit assoir sur vn
bois, pres de l'estude ou il y auoit vne fenestre
fer-

fermée de chaisis & interrogoit le porteur d'vrines d'ou il estoit, & que son mari estoit en la ville, mais qu'il viendroit bien tost, & les faisant assoir aupres d'elle les interrogoit du iour que la maladie print au malade, & en quelle partie du corps estoit son mal, & conseqüemment de tous les effects & signes de la maladie, & pendant que le messager respondoit aux interrogations, monsieur le medecin escoutoit tout, & puis sortoit par vne porte de derriere & rentroit par la porte de deuant, par ou le messager le voyoit venir, lors la dame luy disoit, voyla mon mari parlez à luy, ledit porteur n'auoit pas si tost présenté l'vrine que monsieur le medecin ne la regardast avec fort belle contenance, & apres il faisoit vn discours de la maladie, suyuant ce qu'il auoit entendu du messager par son estude: Et quand ledit messager estoit retourné au logis du malade, il contoit comme par vn grand miracle le grand sçauoir de ce medecin, qui auoit conneu toute la maladie soudain qu'il auoit veu l'vrine, & par ce moyen le bruit de ce medecin augmétoit de iour a autre. Voyla pourquoy ie ray dit que peut estre Paracelse faisoit a croire que sa medecine estoit d'or potable, & qu'il n'en vsa jamais.

Theorique.

Ie ne sçay comment tu l'entends: tu as dit cy dessus que peut estre le Paracelse faisoit quelque medecine pour la lepre, de quelques metaux ou
autre

autres simples, & puis faisoit a croire que c'estoit or potable, afin d'estre mieux payé. Puis qu'il peut faire medecine de metaux, pourquoy l'or ne pourra il aussi bien servir à la medecine comme les autres metaux?

Practique.

Tu te trompes : le desir que tu as de faire trouver ta cause bonne, t'empesche d'entendre mon propos. Car ie ne t'ay pas dit que le Paracelse prenoit des metaux : Mais bien des metaux imperfects, ou quelques marcasites, ou autre mineral, comme pouroit estre l'anthimoine, duquel plusieurs font estat en la medecine.

Theorique.

Te voila pris par ta propre bouche : car puis que tu cōfesses que l'anthimoine peut servir en la medecine, ie di que l'or y peut aussi bien servir : car l'anthimoine est vn metal, partant la victoire me demeure, & faut que tu confesses estre vaincu.

Practique.

Te voila aussi sage qu'au parauant, de dire que l'anthimoine est vn metal, & que il sert en medecine. Et tu sçais bien que toute nostre dispute n'est que sur le fait du restaurant, qui vaut autant adire comme reparation de nature. En premier lieu tu parles fort mal de dire q' l'anthimoine est vn metal ; car il est certain que ce n'est qu'une espeece de marcasite, ou bien commencement de metal : d'autre part tu dis que i'ay dit qu'il sert en medecine ;

K

ouy

ouy bien: mais non pas de restaurant. Car s'il pou-
uoit seruir de restaurant, lon en pourroit menger
comme d'une autre viande. Mais tant s'en faut:
car l'homme qui en prendra plus de quatre ou six
grains se met en hazard de mourir. Or ceux qui
veulent faire valoir l'or potable disent qu'un ma-
lade en peut prendre deux fois par chacun iour:
parquoy l'anthimoine n'est pas a propos pour
prouuer le restaurât d'or. Car un metal parfait ne
se peut mouuoir a la chaleur de l'estomac. Mais il
n'est pas ainsi de l'anthimoine. Car son action est
veneneuse, & par sa venenosité il esmeut toutes
les parties de l'estomac, du ventre & de tout le
corps: & cela se fait par vne exalation qui est cau-
sée de luy mesme, par ce qu'il est imperfect, & qu'il
a esté tiré de la maniere au parauant que sa deco-
ction fut venue en sa perfectiō: comme ainsi soit
que les metaux parfaits ne pouroyent esmou-
uoir aucune vapeur en l'estomac comme fait l'an-
thimoine. Voila comment il faut parler des choses
auecques preuues fondées sur quelque raison, nō
pas aller chercher les corps celestes, comme au-
cuns qui pour prouuer le restaurant d'or, montēt
iusques au ciel & vont chercher vn sol, luna, mer-
cure & autres planettes, iusques au nombre de
sept: disans qu'elles ont dominatiō sur les metaux
& sur les corps humains: ie n'entends rien en l'a-
strologie, mais biē sçay-ie que le corps humain ne
peut estre nourry que de choses suiettes a putre-
faction

faction: & d'autant que l'or ne se peut putrifier
n'y consommer au corps de l'homme, ie dy &
maintiens qu'il ne peut servir de medecine, ny de
restaurant: & que toutes choses desquelles la lan-
gue ne peut faire attraction de saueur, ne peuuent
servir a la nourriture. Car Dieu a mis la langue
pour sonder les choses qui sont vtils, pour les au-
tres parties du corps, & faut noter que quand vn
homme est fort malade, on luy baille des viandes
les plus tendres: si on luy baille du fruit, on le
fait cuire afin qu'il soit plustost mis en putrefa-
ction: Autremēt l'estomac debile, ne les pourroit
consommer pour enuoyer la liqueur nutritiue à
toutes les parties du corps, & le marc aux parties
excrementales. Si ainsi est qu'un estomac debile
trouaille beaucoup a digerer vne pomme cuite,
comment peux tu croire qu'il peut consommer
l'or? & veu que le corps ne peut rien consommer
sinon les choses desquelles la langue puisse tirer
quelque saueur au parauant qu'elles aillent plus
oultre, comment pourra il consommer l'or? tu l'as
beau taster à la langue, tu n'as garde d'en tirer au-
cune saueur, veux tu que ie te die vn beau trait a-
uant que finir mon propos? Si la langue pouuoit
tirer quelque saueur d'une piece d'or, ie te puis
asseurer qu'elle amoindriroit de poids; d'autant
que la langue en auroit attiré. Aussi ie di que quel-
que fleur que tu flaires avec le nez, que tu dimi-
nes sa vertu, d'autant que tu en prends avec le nez.
Et note encores ce point, que toutes les choses

que tu presentes a la langue & que tu en tires quelque saueur, laditte saueur n'est autre chose que le sel qui est en la chose que tu tastes. Car le sel est de telle nature qu'il se dissout a l'humidité & quand l'humidité est chaude il se dissout plus promptement Or la langue apporte avec soy vne humeur chaude, qui cause soudain faire attraction de quelque peu de sel de la chose qui luy est présentée. Voyla pourquoy ie di que si la langue pouuoit tirer quelque saueur de l'or ce seroit du sel, & l'or diminueroit d'autant que la langue en auroit attiré: Et n'en pouuant rien tirer comme des alimens nutritifs il est aise à conclure que l'or ne peut seruir de nourriture.



DV MITRIDAT, OV
THERIAQUE.



OR ayant desconfit vn erreur de si long temps inueteré, touchant le restaurant dor, il m'est pris enuie de parler vn peu du Mitridat, auant que de parler des sels.

Theo-

Theorique.

Et as tu quelque chose à dire cōtre le Mitridat.

Practique.

Ouy bien: mais afin de ne rendre mal contents les medecins, & que par là ils ne prennent occasion de detracter de mes autres eures, ie n'en parleray sinon par maniere de despute, prenant mon argument sur ce que aucuns disent qu'il faut de trois cens sortes de drogues pour le composer, ce que ie trouue bien fort eslongué de ma capacité, & ne puis penser, que tant de sortes de simples puissent loger ensemble dans vn estomac, sans faire ennuy l'un à l'autre.

Theorique.

Si tu mets vn tel propos en auant tu te feras hair de beaucoup de gens, voudrois tu bien entreprendre de contredire à tant de notable medecins, qui ont plusieurs fois examine diligemment vne telle matiere, & à esté disputé plusieurs fois aux vniuersitez & escoles de medecine? ie scay qu'en vne ville d'Allemagne fut commandé, aux medecins dudit lieu, par les magistrats de s'assembler pour aduiser ensemble de donner quelque moyen, contre le venin de la peste, qui estoit pour lors en ladite ville. Suivant quoy les medecins ne trouuerent rien meilleur que le Mitridat qu'ils ordonnerent, & fut composé du nombre des simples susdits. Voila pourquoy ie te di que si tu parles cōtre tant de sçauans hommes que l'on t'esti-

mera fol.

Practique.

Mais n'est il pas aussi possible que les medecins se puissent tromper en la composition du Mitridat, comme ils se sont trompez, adherant à l'opinion des Arabes, touchant le restaurant d'or? Car tu as bien entëdu ci dessus que c'est vn abus manifeste, les medecins sages n'auront garde de trouuer mauuais ce que i'en dis: parce que c'est par maniere de dispute, & cela les incitera à penser s'il y à quelques raisons en mes arguments.

Theorique.

Et quels sont tes arguments.

Practique.

Ils sont bien notables, & entre les autres i'en ay trois singuliers: Le premier est la cōsideration d'un bouquet composé de plusieurs fleurs, iamais la senteur dudit bouquet, ne sera si amiable cōme s'il estoit d'une fleur seulement, & par là tu connoistras que les senteurs meslées ensemble font vne confusion telle que tu ne saurois iuger: laquelle est la supreme & meilleure d'icelles. Item si tu prens vn chapon, vne perdrix, vne beccasse, vn pigeon & de toutes sortes de chairs, le tout bien cuit & préparé. puis que tu les mettes dens vn mortier & les pilles ensemble pour les manger, elles seront bonnes; mais y trouueras tu aussi bon goust, comme si tu les mangeois particulièrement? l'on sçait bien que non. Item si tu prens de
l'azur

l'azur, du vermillon, du massicot & de toutes autres couleur, & que tu les broyes toutes ensemble & en face vn mellinge, tu cōnoistras que la moindre de toutes estoit plus belle à part soy, qu'elles ne sont toutes meslées ensemble. Cela me fait penser que tant de simples ensemble ne peuuent estre qu'ils n'effacent & destruisent la vertu l'un de l'autre: tout ainsi que les senteurs, sçauours & couleurs. Je te prie aussi considere vn peu quel accord pouroit estre en vne musique de trois cent musiciens chantans tous ensemble. Depuis quelque iours i'ay veu vn liure duquel les Apotiquaires se seruent pour les compositions de leurs drogues, & ayant demandé à l'Apotiquaire qu'il me dit en François les drogues du Mitridat, il le fit volontiers, entre autres il me nomma le gif & l'alebastre: Ce qui me fait parler plus asseurement; parce que ie sçay que l'un & l'autre sont indigest: Et quand ils sont calcinez ce n'est autre chose que plastre, i'ay veu quelque liure ancien qui dit que le plastre est mortel: par ce (dit il) qu'il estoupe les conduits. par là ie connois que plusieurs escriuent des choses qu'ils n'entendent pas. Car par ce qu'ils ont veu quelques fois fermer des trous de murailles avec du plastre, ils ont pensé qu'il pouroit faire le semblable dens le corps de l'homme, chose fort mal entendue: car le plastre ne durcist iamais quand il est rendu potable, & si l'on y met de l'eau plus qu'il n'en faut, il

perd toute sa force. L'argument est donc mal fondé de dire que le plaistre estoupe les conduits. Je croy qu'il est aussi bon au Mitridat comme à autre medecine. Si ie voulois composer vn electoire ou medecine de pierreries, ie voudrois premierement connoistre deux choses: l'une de qu'elle matiere les pierres sont formées, & l'autre, si l'estomac est capable de les digerer. Or puis que les pierres verdes sont teintes par la couperose elles ne peuuent estre que ennemies de nature.

Theorique.

Or ça, pour les mesmes causes que tu dis l'on met plusieurs simples ensemble, par ce qu'aucuns sont trop rudes, mordicatifs, corrosifs, & laxatifs: & mesmes aucuns pernicious, estans pris particulièrement: mais pour les corriger l'on y melle des matieres douces.

Pratique.

En cela ie trouue vne difficulté bien grande, qui est telle, que ie ne sçay qu'une composition de trois cents simples ne peut estre qu'il n'y en ait plusieurs d'iceux de plus dure digestion que les autres, qui me fait penser qu'estans dans l'estomac, les plustost cuittes son enuoyées les premieres en nourriture, suuant l'ordre naturel; tout ainsi que ie t'ay montré par certaines marassites, que les matieres, qui ont quelque affinité, se scauent si parer & ioindre ensemble en la matrice de la terre; cela dis-je se peut aussi bien faire dans l'estomac,

estomac, sçauoir est que les matieres nutritiues seront dispersées par les membres, & les ennemies de la nature seront enuoyées aux excréments, & si entre tant de simples il y en a quelqu'un que l'estomac ne puisse digerer, commét pouuons nous esperer qu'il puisse seruir? Aussi ie trouue fort estrange des electoires, qui est vne medecine faite de pierres pilées, lesquelles ie sçay qu'il y en a aucunes si fixes, qu'il est impossible à l'estomac de les digerer. or vne matiere indigeste ne peut seruir à vn estomac.

Theorique.

Comment oser tu reprouer le Mitridat? lequel de si long temps a esté approuué, & plusieurs en ayans mengé a iun, ont esté garentis de poison, & mesme que le Roy Mitridates fut mort, lon tronua en son cabinet la recepte dudit Mitridat au milieu de ses besongnes les plus precieuses, & parce qu'il en prenoit tous les matins il ne peut estre empoisonné.

Practique.

Ce propos ne fait rien contre moy: parce que le contrepoison de Mitridates n'estoit composé que de quatre simples, sçauoir est, de noix, de figues, de rue & de sel; c'est bien loing de trois cens. Pour connoistre si vne matiere peut seruir contre le poison, il faut premierement sçauoir que c'est q poison. Quelqu'un a mis en ses escrits qu'il y en a de trois cés sortes. Si ainsi est, qui sera celuy qui
dira

dira qu'un Mitridat puisse seruir a toutes especes de poison? Quant est du contrepoison de Mitridates, il y a quelque grande raison, par laquelle l'on peut iuger de son vtilité, & pour en donner quelque iugement, il faut auoir esgard a ce que le sublimé qui est le plus commun poison, n'est pas de matiere oleagineuse, ains d'une matiere aqueuse, & les matieres oleagineuses n'ont aucune affinité avec les aqueuses: il faut donc croire que celui qui composa le contrepoison du Mitridat de quatre simples, eut esgard a ce que le sublimé & aucuns autres poisons, qui estans dans l'estomac, ou boyaux, s'attachent & incisent la partie ou il reposent, & par tel moyen leur action est pernicieuse & mortelle: & pour obuier a un tel effect il estoit de besoin que ledit contrepoison fut composé de matieres oleagineuses & bonnes a manger: afin que l'estomac ne les abominast. nous ne pouuons nier que les noix ne soyent oleagineuses & plaisantes a manger, les figues consequemment ont un sel en elles si fort corosif & dissolutif, qu'au pays d'Agénés & lieux circonuoisins, ou il y a grande quantité de figuiers, ceux qui mangent les figues auant qu'elles soyent meures ont les leures fendues, a cause de la mordication du lait desdites figues. Le lait desdites figues, a grande vertu de dissoudre les choses visqueuses: quand les peintres se veulent seruir de blanc d'euf pour destremper leurs couleus, ils y mettent des petites
figues

figues decoupées, ou bien des gittres des branches de figuier, & soudain que cela est remué parmy ledit blanc d'euf, il se vient a dissoudre & se rend aussi cler qu'eau de fontaine, sans aucüe visquosité. Je dis cecy pour donner a entēdre que le Mitridat composé de ces quatre choses pouuoit engraisser l'estomac & les boyaux, par la vertu oleagineuse des noix, & dissoudre le poizon par la vertu des figues & de la rue: quant est du sel, c'est vne chose certaine qu'il est contraire au venin. comme ie te diray en parlant des sels. Voila comment le Mitridat ne peut estre mauuais: non pas qu'il soit vtile pour tous poisons ou venins. Si ie connoissois la cause i'en pourrois parler. le venin de la peste est inuisible. Il va de iour & nuit ainsi que Dieu luy a commandé. Aucuns disent que la cause de la verole, de la peste, & de la lepre sont inconnues. Je sçay que toutes maladies se garissent par leurs cōtraires: & si ie ne connois la maladie, comment connoistray-ie son cōtraire? il ne faut point douter qu'il n'y ait acunes choses qui sont mortelles par leur frigidité, & autres par leur grande chaleur & mordication extreme, & autres qui estouffent les esprits vitaux, se rengeāt communement au cerueau, s'esleuant en quelque vapeur aérée. En la mer Oceane enuiron le temps de Pasques, il se prent vn grand nombre de poissons, qui sont grands comme enfans, que l'on nomme maigres, desquels les pescheurs font grand argent. l'ay
veu

veu plusieurs fois des hōmes & des femmes, qui ont pelé par le corps, les mains & le visage, pour auoir mangé du foye desdits poissons, & dit on que cela se fait quant ledit poisson se prend lors qu'il est en chaleur. Or parce que les natures des diuers venins sont si mal aisées à connoistre, i'ay dit par maniere de dispute, que ie ne puis croire qu'une composition de trois cents simples puisse estre si bonne comme celle de Mitridates, qui n'est composée que de quatre seulement.



DES GLACES.

Theorique.

IE ne vis iamais homme si opiniastre que toy : car depuis que tu as quelque chose en la teste il est impossible de te faire croire le contraire. Cela me fait souuient d'un iour que tu estois au long de la riuere de Seine vis à vis des tuileries, ou plusieurs personnes mesme des bateliers disoyent & soustenoyent que les glaces qui courent sur la riuere, quand il gele fort, sortoyent du fond d'icelle, toute fois tu soustenois le contraire par ton opiniastreté.

Practique.

Appelles tu opiniastreté de soustenir la verité?

Theo-

Theorique.

Et quoy persistes tu encores en ta folle opinion?

Practique.

T'y persiste & y persisteray tant que ie viuray : car ie sçay que mon dire est veritable, que l'eau ne se peut geler au fond de la riuere que premiere-ment toute la superficie ne soit gelée, & qu'elle n'aye entieremēt perdu son cours: & suis fort aise q tu m'as reproché vn tel propos: par ce qu'il me seruira d'argument pour prouuer que si en vne chose visible & aisée a connoitre vne si grāde multitude d'hommes soustienent le contraire de verité, disans que les glaçons que la riuere porte ont esté gelez au fond d'icelle, combien plus se peuvent ils estre abusez és choses interieures, comme ils ont fait du restaurant d'or, qui m'a incité à disputer du Mitridat.

Theorique.

Ne sçais tu pas que plusieurs t'ont maintenu en barbe qu'en temps de gelée ils voyent ordinairement monter les glaçons du fond de l'eau? Ne sçait tu pas aussi que plusieurs gens doctes t'ont maintenu par raisons philosophiques (que tu n'as sçeu conueindre) que cela estoit veritable?

Practique.

Tant plus tu veux confondre mon dire, & plus ie suis assuré en mon opinion, & n'y a homme en ce monde qui m'en sceut faire rougir, car ie sçay qu'il est impossible que les glaces puissent estre

estre formées au fond de l'eau.

Theorique.

Mais puis que tes contraires t'alleguent raisons naturelles tu deusses aussi produire les tiennes en auant: afin que l'on conneut si elles sont meilleures que les leurs.

Practique.

Si ie me voulois estudier à chercher les raisons, i'en trouuerois vn millier de plus suffisantes que non pas celles que mes contredisans alleguent. Premierement il faut tenir pour chose certaine que si les riuieres se glaçoient au fond, comme ils disent, que tous les poissons qui sont en l'eau mourroient, & de cela n'en faut douter. Il ne se trouueroit glaçon montât de l'eau qui ne fut tout l'ardé de poissons. Je croy que tu ne cōnois pas qu'els sont les effects mortels des glaces: leur actiō pernicieuse est telle que comme l'eau se conglace, elle fait vne compressiō si grande, que les choses qui sont meslées parmi icelle, ne la peuuent endurer, mesmement les choses animées, faut qu'elles rendent l'esprit, quelques puissantes qu'elles soyent. Regarde les bleds quād ils sont gelez, tu ne cōnoistras point qu'ils soyēt perdus iusques au desgel. Mais quand il sera desgelé, tu cōnoistras que la cōpression de la gelée aura coupé la iambe du bled, & qu'il n'y a autre cause qui l'ay fait mourir. Si tu pensois me faire croire que les poissons fussent plus

plus durs à la gelée que les pierres, tu tabuſerois. Je ſçay que les pierres des montaignes d'Ardenne ſont plus dures que le marbre: & ce neantmoins les habitans du pays ne tirent point deſdites pierres en hyuer: à cauſe qu'elles ſont ſuiettes à la gelée: & pluſieurs fois l'on à veu les rochers tomber au parauāt qu'eſtre coupez: dont pluſieurs perſonnes en ont eſté tuées, au temps que leſdites roches deſgeloient. Tu ſçais bien que l'eau des puits eſt plus chaude en hyuer que en eſté: car l'aër, qui eſt chaud en temps d'eſté, ſe retire en temps de froidure, pour fuir ſon contraire. & quainſi ne ſoit, te ſouuient il point quand nous allasmes dens les carrieres de ſaint Marceau, au dedens deſquelles i'eſtois tout degouſtant de ſueur, combien que dehors l'aër eſtoit fort froid? & ſi c'eut eſté en temps de chaleurs, nous euſſions trouué le dedens deſdittes carrieres froid. Aucuns diſent que pour ces cauſes l'homme mange mieux en hyuer qu'en eſté: par ce que la chaleur naturelle ſe tient ſerré au dedens aidant à la concoction de l'eſtomac. Voicy à preſent vne autre exemple, qui te deura ſuffire pour toutes preuues. Lors que les riuieres ſe gellent, elles commencent aux extremes parties & ſur la ſuperficie, & quand elles ont gelé vne nuit le cours principal & le reſidu de l'eau qui n'eſt point gelée ſe baiſſe, & quand elle eſt vn peu baiſſée & qu'elle à laiſſé ſes glaçons atachez cōtre les terres

terres des extremitez, il aduient qu'ils tōbent dedens l'eau, emportās avec eux grande quantité de terre & de pierre, qui causent enfōcer lesdits glaçons, & les glaçons estans au dedēs de l'eau, & trouuant la chaleur du fond, se viennent à dissoudre, & ainsi qu'ils cōmencent à eschauffer, la terre & pierre qui les auoyēt contrains d'aller au fonds tombent & laschent lesdits glaçons, & eux estant allégés, s'eleuent en haut sur la superficie. & quand il y en a grāde quantité, l'eau les amene iusques à ce qu'ils ayent trouué quelque retour ou obstacle, pour les arrester, & ayant trouué arrest, il se soudent l'un contre l'autre, & par tel moyen les riuieres se glaçant tout au trauers. Voila la cause qui les trompe & qui leur fait soustenir que la riuiere se glace au fond. Si ainsi estoit, ou eût ce que les poissons habiteroyēt, quand les riuieres seroyent geles? C'est vne chose toute certaine que plusieurs poissons maritimes se retirent au fond de la mer, durant les grandes froidures: Ce qui se peut verifier par les pescheurs Xaintonniques, qui en temps d'esté peschent des maigres, & des seiches en si grand nombre, qu'il y a tel homme qui en fait saler & secher pour plus decinq centz liures tous les ans, desquels ne s'en pesche pas vn en hyuer: & si ainsi est des poissons de la mer, combien plus de ceux des riuieres? il n'est pas iusques aux grenoilles qu'elles ne se plongent au fond de l'eau, mesme dens les vases: pour conseruer

seruer leur vie durant le froid. Car autrement tous les poissons moureroÿent. aucuns ayans fréquenté en Moscouie, Prusse & Pologne: disent qu' en temps d'hyuer, les pescheurs de ces pays là prennent grand peine à rompre les glaces de certaines riuieres, ou lacs: & ayant fait vn trou d'vn costé & vn d'vn autre, il mettent les filets a l'vn des trous, & par l'autre ils chassent le poisson, & par ce moyen prennent vne grande quantité de poissons. Brouille & fagotte a present tes opinions, tu n'as garde de me faire croire que la riuiere soit aussi gelée au fond, & que l'habitation des poissons soit entre deux glaces. Autre exemple, consideres vn peu la forme des glaçons lors que la riuiere commence à glacer, ils n'ont autre forme que platte, comme le verre duquel les vitriers besongnent, & s'ils ne sont ainsi a niueau, les formes bossues y sont venues a la seconde gelation, par l'empeschement des premiers glaçons, qui causent faire quelques sauts és eaux qui donnent cōtre, & apres vient plus grāde quantité de glaçons qui sont contrains par le poussement de l'eau, de se ietter l'vn sur l'autre. Or si lesdits glaçons estoÿent formez au fōd de la riuiere, il faudroit qu'ils tinssent necessairement la forme des fosses & cōcauitez du fond de la riuiere: & outre cela, il ne se pourroit faire, qu'ils n'aportassēt avec eux de la terre ou sable du lieu ou ils se formeroyēt: & si ainsi estoit que les eaux se gelassent au fond, il faudroit que les

L

froi-

froidures vinssent du dessous de la terre: ce qui seroit contre verité. Car si elles venoyét du fond de terre il faudroit que toutes les sources des fontaines gelaissent les premieres, & consequemment les puits, & les vins qui sont dens les caues: & si la froidure vient de l'aër (comme la verité est telle) & qu'elle causast geler les eaux au fond, il faudroit que la riuere fut plus spongieuse que nulle chose de ce monde, encores geleroit elle dessus le premier; puis qu'ainsi est que la froidure viét de l'aër. Mais tant s'en faut qu'elle soit spongieuse, que ie ne trouue rien plus alié qu'elle est: & qu'ainsi ne soit, tu le peux connoistre par elle mesme, quand elle est glacée: car il n'y a, ny trou ny veine, ny artere: tu le peux aussi connoistre par les diamans, qui sont d'une eau pure congelée: que s'il estoient tant peu soit poreux, ils ne prendroyent nul polissement. Il faut donc conclure que la froidure viét de l'aër, & que la riuere est alize ou cōdensée comme le cristal, & que la froidure de l'aër vient dessus, & ne scauroit passer iusques au fond de l'eau, & qu'il y a une chaleur naturelle au fonds d'icelle, aidée en partie par plusieurs petites sources, qui pocedent du fond de la terre, qui causent que les poissons conseruent leurs vie au plus profond des eaux.

Theorique.

Pose le cas qu'ainsi soit: toutes fois il me semble qu'il n'estoit pas besoin d'en faire si long discours

cours, & que le temp seroit bien mieux employé à parler des autres choses, dont tu m'as fait promesse.



DES SELS DIVERS.

Practique.

L'A VOIS bien pense qu'apres l'or, potable & le Mitridat, ie te parlerois des sels: mais toimeisme m'as interrompu, en me reprochant la dispute que l'auois eue autresfois des glaces. Or venons donc en propos: Car ie te veux montrer qu'il n'est nulle chose sans sel. Si tu es homme d'esprit (comme ie t'estime) tu connoistras plusieurs secrets en parlant desdits sels, qui te pourront mienx asseurer de l'impossibilité de la generation des metaux: & ce d'autant que les sels seruent beaucoup a ceux qui se meslent d'altuterer, augméter & sophistiquer les metaux.

Theorique.

Et comment? tu dis des sels, commes'il y en auoit de plusieurs sortés.

Practique.

Ie te di qu'il y en a vn si grand nombre qu'il est impossible à nul homme de les pouoir nom-

mer, & te dis d'auantage, qu'il n'y à nulle chose en ce monde, qu'il n'y aye du sel, soit en l'homme, la beste, les arbres, plantes, ou autres especes de vegetatif: voire mesme és metaux: & di encores plus, que nulles choses vegetatiues ne pouroyent vegeter sans l'action du sel, qui est és semences; qui plus est, si le sel estoit osté du corps de l'homme, il tomberoit en poudre en moins d'un clin d'œil. Si le sel estoit separé des pierres qui sont és bastiments, elles tomberoyent soudain en poudre. Si le sel estoit extrait des poutres, soliuës & cheurons, le tout tomberoit en poudre. Autant en dis-je du fer, de l'acier, de l'or & de l'argent, & de tous metaux. Qui me demanderoit combien il y à de diuerses especes de sels, ie respondrois qu'il y en à autant que de diuerses especes de saveurs & senteurs.

Theorique.

Si tu veux que ie croye ce que tu dis, nommes en donc quelques vnes.

Practique.

La copperose est vn sel, le nitre est vn sel, le vitriol est vn sel, l'alun est sel, le borras est sel, le sucre est sel, le sublimé, le salpestre, le sel gemme, le salicor, le tartre, le sel armoniac, tout cela sont sels diuers. Si ie les voulois nommer tous, ie n'aurois iamais fait. Le sel que les alchimistes appellent salis Alkali, est extrait d'une herbe qui croit és ma-

rez

rez salans des isles de Xaintonge. Le sel de Tartare n'est autre chose que le sel des raisins, qui donne goust & faueur au vin, & empêche la putrefaction d'iceluy, partant ie dis encores, que la faueur de toutes choses est par le sel, lequel mesmes à causé la vegetation, perfection, maturité, & la totale bonté de la chose alimentaire. Et combien qu'il y ait beaucoup d'arbres & d'especes de vegetatifs, desquels le sel est plus fixe & de plus dure dissolution que celuy de la vigne & du salicor: si est ce qu'il y en a en tous les arbres & plantes, ie di autant ou peu s'en faut qu'aux susdites. Et autrement plusieurs especes de cendres ne vaudroyent rien à blanchir le linge: en l'effect desdites cendres, tu peux connoître qu'il y a du sel en toutes choses. Et ne faut que tu penses que les cendres ayent pouuoir de blanchir sinon par la vertu du sel, autrement elles pouroyent seruir plusieurs fois. Mais d'autant que le sel qui est dedens lesdites cendres, se vient à dissoudre en l'eau que l'on met dans le cuuier, il passe au trauers du linge, & par sa vertu & acuité, ou mordication, les ordures du linge sont dissipées, mollifiées & emmenées en bas avecques l'eau, laquelle apres se nomme lexiue, à cause qu'en icelle demeure le sel qui estoit aux cendres, estant dissout par l'action de l'eau, & les cendres estant ainsi dessalées n'ont aucune vertu de plus blanchir le linge, & on les iette comme inutiles. Autre exemple. Quand

les salpestreus font attraction du salpestre, qui est en terre, ils le font par vne telle maniere que la le-
xue, & quand ils ont tiré le salpestre, les cendres & la terre duquel ils ont extrait le sel, sont inutiles: par ce que le sel qui cauſoit l'operatiō n'y est plus. Si tu n'as assez d'exemples pour croire qu'il y a du ſel en tous les bois & plantes, considere les Tanneurs de cuirs, ils prennent de l'escorce de cheſne & l'ayant ſeichée & pulueriſée, ils la meſſent entre les cuirs qu'ils font tanner dens vn certain receptacle: & quand le cuir a demeuré le temps prapordonné parmy ladite escorce, le teneur prend ſon cuir & iette l'escorce hors, comme choſe inutile: vray eſt qu'és lieux ou le bois eſt cher, l'on fait des mottes de ladite escorce, en forme de fromage, lesquelles on fait ſecher pour les bruſler à faulte de bois: mais les cendres n'en valent rien: à cauſe que le ſel en eſt dehors. Ne peus tu pas connoiſtre par là que ce n'eſt pas l'escorce qui & endurec & tanné le cuir, mais q'c'eſt le ſel qui eſtoit en icelle? Car autrement l'escorce pourroit ſeruir pluſieurs fois: mais d'autant que le ſel eſt diſſout, il s'eſt mis dedens le cuir; à cauſe de ſon humidité, & en a fait attraction, pour ſeruir a ſoy meſmes. Il faut que tu notes qu'en toutes eſpeces de bois le ſel eſt preſque tout a l'escorce: auſſi le bois ſans escorce ne produit iamais bonnes cendres. Monsieur Siſſy, medecin du duc de Montpenſier, me montra quelque fois vne verge de balsamum, ou de canel-

le, laquelle contenoit enuirō quatre pieds en longueur, & en grosseur vn ponce ou enuiron : il me fit gouter de l'escorce, qui auoit saueur naturelle de fine canelle: mais quand au reste du bois, il n'auoit nō plus de saueur qu'vne pierre. Voila pourquoy les tanneurs ne se seruent que de l'escorce: par ce que le sel y est. autrement le surplus du bois estant puluerisé pourroit aussi bien seruir que l'escorce. Et en continuant mes preuues, qu'il y a du sel en toutes choses : Les Egyptiens auoyent de coustume de saler les corps de leurs Roys & princes, cē q̄ nous appellons embaumer. Les histoires disent qu'ils les embaumoyent de nitre & d'espiceries aromatiques. Il te faut noter q̄ le nitre est vn sel conseruatif, & qui empesche la putrefactiō: toutesfois il n'eust sceu empescher la putrefaction par tant de mil anne'es, n'eust esté lesdites espiceries aromatiques: desquelles le sel à causē l'incorruption desdits corps, qui en estoient embaumez. Et outre, la chair desdits corps, est appelée *La Mommye.* à cause desdites espiceries, dont ils estoient poudrez. Les princes Egyptiens gardent ladite mommye pour leurs seruir en leurs maladies. Je croiray plustot qu'vne telle manducation seroit plus vtile que l'or potable. Quelques modernes ont voulu imiter les anciens, voulants faire de la mommye de quelques pendus ou decapitez: Mais qui la mettroit vn peu tremper, on la feroit retourner en puante charongne: par ce qu'elle

elle n'a pas esté confitte d'espicerics ayant telle vertu que celles des anciens Egyptiens. Aussi dit on communement que les odeurs & Rubarbes, gommcs & espicerics aromatiques, sont toutes adulterées au parauant qu'elles soyent venues iusques à nous. Et le sel commun n'a pas la vertu de conseruer comme les aromatiques, qui viennent de l'Arabie heureuse & autre pays chauds. Et par ce que nostre propos est de prouuer qu'il y à du sel en toutes choses, ie mettray ce point en auant, qui est que l'on peut faire du verre de toutes cendres: cōbien que les vnes sont plus dures à la fonte que non pas les autres: & s'il n'y auoit du sel és bois & és herbes, il seroit impossible d'en pouuoir faire verre. C'est assez prouué qu'il y à du sel en toutes choses: parlons de leurs vertus, qui sont si grandes que nul homme ne les conneut iammais parfaitement. Le sel blanchist toutes choses: le sel endurest toutes choses: il cōserue toutes choses: il donne saueur à toutes choses; c'est vn mastice qui lie & mastique toutes choses: il rassemble & lie les matieres minerales: & de plusieurs milliers de pieces il en fait vne masse. Le sel donne son à toutes choses: sans le sel nul metal ne rendroit sa voix. Le sel resiouist les humains: il blanchist la chair, donnant beauté aux creatures raisonnables: il entretient l'amitié entre le male & la femelle: à cause de la vigueur qu'il donne és parties genitales: il aide à la generation: il donne voix aux

*Les vertus
des sels.*

cra-

creatures comme aux metaux. Le sel fait que plusieurs cailloux puluerisez subtilement, se rendent en vne masse pour former verres & toutes especes de vaisseaux : par le sel on peut rendre toutes choses en corps diafane. Le sel fait vegeter & croitre toutes semences : Et combien qu'il y ait bien peu de personnes qui sachent la cause pourquoy le fumier sert aux semences, & qu'ils l'apportent seulement par coustume & non pas par philosophie ; Si est ce, que le fumier que l'on porte aux champs ne seruiroit de rien, si ce n'estoit le sel que les pailles & foinz y ont laissé en se pourrisant. parquoy ceux qui laissent leurs fumiers à la mercy des pluyes, sont fort mauuais mesnagers, & n'ont gueres de philosophie acquise n'y naturelle. Car les pluyes qui tombent sur les fumiers, decoulant en quelque vallee emmeinent avec elles le sel dudit fumier, qui se sera dissout à l'humidité, & par ce moyen il ne seruira plus de rien, estant porté aux champs : la chose est assez aisée a croire : & si tu ne le veux croire, regarde quand le laboureur aura porté du fumier en son champ, il le mettra (en deschargeant) par petites pilles, & quelques iours apres il le viendra esandre parmi le champ, & ne laissera rien à l'endroit desdites pilles : & toutesfois apres qu'un tel champ sera semé de bled, tu trouueras que le bled sera plus beau, plus verd & plus espois à l'endroit ou lesdites pilles auront reposé, que non pas en autre lieu. & cela aduiet par
ce que

ce que les pluyes qui sont tombées sur lefdits pilots, ont prins le sel en passant au trauers & descendant en terre. par la tu peux connoistre que ce n'est pas le fumier qui est cause de la generatiō: Ains le sel que les semences auoyent pris en la terre. Encores que j'aye deduit autrefois ce propos des fumiers, en vn petit liure que ie t'ay dit que ie fis imprimer des les premiers troubles, si est ce qu'il me semble qu'il n'est point superflu en cest endroit. car par là tu entendras aussi la cause pourquoy tous excremēts peuuent aider à la generatiō des semēces. Je di tous excremēts, soit de l'homme ou de la beste: C'est tousiours confirmation d'un propos que j'ay repeté plusieurs fois en parlant de l'alchimie, que quand Dieu forma la terre il la remplist de toutes especes de semēces: Mais si quelqu'un seme vn chāp par plusieurs années sans le fumer, les semēces tirerōt le sel de la terre pour leur accroissement, & la terre par ce moyen se trouuera de séuée de sel & ne pourra plus produire: parquoy la faudra fumer, ou la laisser reposer quelques années: afin qu'elle reprenne quelque salcitude, prouenant des pluyes ou nuées. Car toutes terres sont terres: mais elles sont bien plus salées les vnes que les autres. Je ne parle pas d'un sel commun seulement, mais ie parle des sels vegetatifs. Aucuns disent qu'il n'y a rien plus ennemy des semences que le sel, & pour ces causes quand quelqu'un a commis quelque grand crime, on le condamne

damne que sa maison soit rasée & la folle labourée & semée de sel, afin qu'elle ne produise iamais semence. ie ne sçay s'il y a quelque pays ou le sel soit ennemy des semences: Mais bien sçay- ie que sur les bossis des marez sallans de Xaintange, l'on y cueille du bled autant beau qu'en lieu ou ie fus iamais: & toutesfois lesdits bossis sont formez des vuidâges desdits marez: ie di des vuidâges du fond du champ des marez, lesquelles vuidanges & fanges sont aussi salées que l'eau de la mer: & toutesfois les semences y viennent autant bien qu'en nulle terre que j'aye iamais veüe: ie ne sçay pas ou c'est que noz iuges ont pris occasion de faire semer du sel en vne terre en signe de malediction, si ce n'est qu'il y aye quelque contrée ou le sel soit ennemi des semences.

Theorique.

Peut estre que les iuges ne le font pas pour l'occasion que le sel soit ennemi des semences, mais ils le font plustot par ce que le sel est vne semence qui ne vegete point.

Practique.

Tu diras ce que tu voudras, mais ie sçay biẽ que plusieurs medecins & autres personnes, m'ont voulu maintenir que le sel estoit ennemi des semences: Et c'est pourquoy j'ay mis ce propos en auant: afin de parler amplement des sels: Et en continuant encores mon propos, pour te mōstrer que le sel n'est pas ennemi des natures vegetatiues, n'y sensibles, les vignes du pays de Xaintōge, plantée au milieu
des

des marez salans apportent d'un genre de raisins noirs, qu'ils appellent chauchetz, desquels on fait du vin qui n'est pas moins à estimer que hyppocras, & y fait on des rosties tout ainsi qu'à l'hyppocras. Et lesdites vignes sont si fertiles qu'une plante de vigne apporte plus de fruit que non pas six de celles de Paris. Voila pourquoy ie dis que tant s'en faut que le sel soit ennemy des natures, que au contraire il aide à la bonté, douceur & maturité, generation & conservation desdits vins. Et non seulement le sel aide à ces choses, mais aussi l'air duquel les exalations sont salées. Ausdites isles & parmi les marez salans, on y cueille de l'herbe salée, de laquelle on fait les plus beaux verres, laquelle on appelle salicor: aussi on y cueille de l'absinte appelée Xaintonnie: à cause du pays de Xaintonge. ladite herbe à telle vertu que quand on la fait bouillir & prenant de sa decoction, on en destrempe de la farine pour en faire des bignets fricassés en sein de porc ou en beurre, & que l'on mange desdits bignets, ils chassent & mettent hors tous les vers qui sont dans le corps, tant des hommes que des enfans. Au paravant que j'eusse la connoissance de ladite herbe, les vers m'ont fait mourir six enfans, comme nous l'avons connu tant pour les avoir fait ouvrir, que par ce qu'ils en rendoyent souvent par la bouche, & quand ils estoient pres de la mort, les vers sortoyent par les naseaux. Les pays de Xaintonge, Gasconne,

Agenès.

Agènes, Quercy, & le pays deuers Toloze, sont fort suiets ausdits vers, & y à peu d'enfans qui en soyent exempt : à cause que les fruits desdits pays sont fort doux. Je le di parce que les medecins de Paris m'ont attesté que c'estoit chose rare de trouuer des versés enfans dudit lieu : toutesfois és pays des Ardennes ils y sont fort suiets. Je ne sçay si c'est à cause de la biere, ou des laitages. Je ne puis rendre tesmoingnage sinon des pays que j'ay fréquentés. Dans les rochers des isles de Xaintonge l'on y cueille aussi de la criste-marine, autrement appelée perce-pierre, laquelle à vne merueilleuse bôte & senteur, à cause de la vapeur de la mer, qnād elle est fraîche, les sallades en sont fort bonnes, & plusieurs en font confire pour toute l'année. A Paris quelques vns ont planté de ladite criste-marine: mais elle n'à garde d'auoir la bonté de celle qui vient naturellement sur les rochers limitrophes de la mer. Je ne veux pas prouuer par là que le sel commun soit plaisant à toutes especes de plantes: Mais ie sçay bien que les terres salées de Xaintonge portent de toutes especes de fruits qui y sont plantez, lesquels ont vne telle douceur & autant suauē qu'en lieu la ou i'aye iamais esté. Les herbes sauuages, espines & chardons, y croissent autant gaillardes qu'en nuls autres pays. c'est tousiours cōfirmation de mon argument, contre ceux qui disent que le sel est ennemy des plantes. S'il estoit ennemi des plantes, il seroit ennemi des
natures

natures humaines. Les Bourgongnōs ne le diront pas: car s'ils eussent conneu que le sel fut ennemi de nature humaine, ils n'eussent ordonné de mettre du sel en la bouche des petis enfans quand on les baptise, & on ne les appelleroit pas Bourgongnons salez, comme l'on fait. Les natures brutales ne diront pas que le sel leur soit ennemi: car les cheures en mangeront autant qu'on leur en scauroit bailler, & mesmes vont cherchāt les murailles pissieuses, pour les lecher: à cause du sel des vrines, les pigeons ne pouuans trouuer du sel à leur cōmodité, quand ils trouuent quelque vieille muraille, de laquelle le mortier ait esté fait de chaux & de sable, & qu'elle soit tant peu commencée à ruiner, on verra les pigeons tous les iours apres ladite muraille; & les hommes qui viuēt sans philosophie disent que les pigeons mangent le sable: Mais c'est vne moquerie: ce seroit l'or potable de pigeons: car il est indigest, & ne faut penser qu'ils cherchent autre chose que la chaux, qui est dens le mortier, à cause de sa salcitude, & ils aualent quelque grain de sable, c'est contre leur volonté & intention. Les huistres se nourrissent la plus grand part de sel, & leurs coquilles en sont faites, lesquelles elles mesmes ont basties; & qu'ainsi ne soit, on le void euidentement: par ce que lesdites coquilles estant iettées dans le feu elles pettent en pareille sorte que le sel commun. Et si le sel à ceste vertu d'esnouoir les partie genita-

lel

les (comme i'ay dit) c'est vne chose certaine & bien approuué que les huïstres causent vne mesme action ; qui est attestation de ce que i'ay dit, que les huïstres sont nourris la pluspart de sel. Et pour mieux monstrier que le sel n'est pas ennemi des natures vegetatiues, voyons vn peu la maniere de faire des laboureurs Ardennois, en certaines contrées des Ardennes ils coupent du bois en grande quantité, le couchent & arengent en terre, en sorte qu'il puisse auoir aër par dessouz : apres ils mettent grand nombre de mottes de terre sur ledit bois, sçauoir est de la terre herbeuse en forme de gasons, puis ils font brusler le bois au dessouz desdites mottes, en telle sorte que les racines des herbes qui sont en ladite terre sont bruslées, & quand laditte terre & racines ont souffert grand feu, ils l'espendent par le champ comme fumier, puis labourent la terre & y sement du seigle : au lieu qui au parauant n'estoit que bois le seigle s'y treutte fort beau : & font cela de seize ans en seize ans : car ils la laissent reposer seize années, & en quelques endroits six années, & en d'autres que quatre : durant lequel temps la terre n'estant point labourée, produit du bois aussi grand & espois comme il estoit au parauant ; & autant comme il leur faut de terre pour en semencer vne année, ils coupent des bois, & font brusler des

des mottes, comme j'ay desia dit, & consequemment tous les ans, iusques au nombre de seize : & alors recommencent à la premiere piece de terre qu'ils auoyent labourée seize ans au parauant, en laquelle ils trouuent le bois aussi grand comme la premiere fois. J'ay dit cecy pour deux occasions, l'une par ce que mon propos du sel n'est pas encores finy, & par ce que les laboureurs dudit pays disent, que la terre est eschauffée par ce moyen, & qu'autrement elle ne produyroit rien, à cause que le pays est froid, surquoy ie di que comme l'eau qui a esté boulie est plus subiecte à geler que l'autre, aussi le feu qu'ils y font, ne cause pas l'accroissement des fruits, ains faut croire que c'est le sel que les arbres, herbages & racines brulées, y ont laissé. L'autre cause est pour donner à connoistre combien sont heureux ceux qui habitent és regions moderées & fertiles, qui produisent tous les ans. Ces pources gens sont en grand peine quand l'année est pluueuse, qu'ils ne peuuent brusler leurs bois en la saison conuenable, en la meilleure de leurs années ils ne cueillent n'y vin, n'y fruits, n'y aucune chose, que du seigle : & en chacun village le pource à autant de terre que le riche, pour faire son cultiuage. Si le sel estoit ennemi des semences, il est certain que le bois & herbes qu'ils font brusler n'amenderoit point la terre, mais la rendroit inutile : par ce qu'en brulant lesdits bois, le sel qui est en iceux demeure en la terre. Si ie con-

noissois

noïssois toutes les vertus des sels, ie penserois faire des choses merueilleuses. Aucun alchimistes blanchissent le cuiure avecques du sel de Tartare ou autres especes de sels, le sel est fort vrile aux teintures. l'alun, qui est vn sel, attire à soy les couleurs du bresil, de la gale, & autres matieres, pour les donner aux draps, aux cuirs ou soyes, tellement que les teinturiers quelque fois voulant teindre vn drap blanc en rouge, le trempent dens de l'eau d'alun : le sel d'alun estant dissout dens l'eau, sera cause que le drap recevra la teinture que l'on luy aura preparée, & vn autre drap qui ne sera point trempé en l'eau d'alun, ne le pourra faire. Le sel donc est vne chambriere qui oste la couleur à l'un pour la bailler à l'autre. Aucuns sels endurcissent le fer & le trenchant des armes, en telle sorte que on en coupe du fer comme si c'estoit du bois. Je ne suis point capable de descrire l'exellence des sels, n'y leurs vertus merueilleuses: Toutes fois en parlant des pierres i'en diray quelque chose de ce qui aura esté oublié, aussi que l'on ne scauroit traiter d'icelles sans parler quelque fois des sels.

Theorique.

Il y a long temps que tu parles des sels, mais iusques icy tu n'as point dit vn mot de la definition de sel, & toutes fois c'est le principal que d'entendre que c'est que sel.

Practique.

Je n'en scaurois dire autre chose sinon que le sel

M

est

*La definition
de sel.*

est vn corps fixe, palpable, & conneu en son particulier, conseruateur & generateur de toutes choses, & en autrui, comme és bois & en toutes especes de plantes & mineraux. C'est vn corps inconneu & inuisible, comme vn esprit, & toutesfois tenant lieu, & soustenant la chose en laquelle il est enclos, & si iamais il ne sentoit d'humidité, plusieurs choses, ou il est enclos, seroyent perpetuelles: comme le sel qui est au bois empescheroit qu'il ne pouriroit iamais: & s'il ne reccuoit aucune humidité, il ne s'engendreroit iamais de vers dans ledit bois: Car iamais ne se peut faire de generation sans qu'il y ait vne humeur eschauffée par putrefaction. Si le foin, la paille, & choses semblables estant bien seichées, sans recevoir aucune humidité, estoient gardées en lieu sec, ils seroyent perpetuels par la vertu du sel qui y est. Il y à aucuns sels lesquels estant és lieux secs tiennent la forme qui leur aura esté donnée, & estants mis en lieu humide se reduisent en huile, desquels le Tartare est vn, & le sel de salicor vn autre. Ce point bien entédu peut beaucoup aider à l'intelligence des propos que i'ay tenus en parlant de la generation des metaux: partant il est de besoing que tu entendes bien le tout: par ce que toutes ces matieres sont si bien concateuées ensemble, que l'une donne intelligence de l'autre.



DV SEL COMMVN.

Theorique.

LE n'eusse pas pensé qu'il y eust eu tant d'especes de sels, ne qu'ils eussent eu tant de vertus, si tu ne me l'eusses dit: Mais puis que nous sommes sus le propos des sels, deuant que passer outre, ie te prie me faire le discours de la maniere de faire le sel commun, comme il s'en fait aux isles de Xaintonge, & me monstre la figure de la forme comme sont fait les marez salans: car tu le sçais bien: d'autant que ie t'ay ouy dire qu'autre fois tu as esté sur les lieux avec commission de figurer lesdits marez.

Practique.

Ce qui est vray, ce fut du temps que l'on vouloit eriger la gabelle audit pays. Or puis que tu as enuie d'entendre ces choses, donne moy audience & ie t'en feray voloutiers le discours, & puis ie t'en monstretay vne figure.

Premieremēt tu dois entendre que d'autant que la mer est presque toute bordée de grāds rochers ou de terres plus hautes que non pas la mer, pour faire les marez salans, il à fallu trouuer necessairement quelque plainne plus basse que la mer:

Car autrement il eut esté impossible de trouuer moyen de faire du sel à la chaleur du soleil: Et faut croire que si l'on eut trouué en quelque autre partie de la France limitrophe de la mer, lieu propre pour former marez, qu'il y en auroit en plusieurs endroits. Or ce n'est pas assez d'auoir trouué vn platin ou campagne plus basse que la mer: Mais il est aussi requis que les terres ou l'on veut eriger marez, soyent tenantes, glueuses, ou visqueuses, cōme celle dequoy on fait les pots, briques & tuilles: Il y à vn seigneur d'Anuers qui à beaucoup despendu pour faire des marez és pays bas, en la forme & semblance de ceux des isles de Xaintonge: Mais combien qu'il ait trouué assez de lieux bas pour faire venir leau de la mer, ce neantmoins d'autant que la terre n'estoit pas glueuse n'y tenante comme celle de Xaintonge, il n'a peu venir au bout de son intention, & sa despence à esté perdue: d'autant que les terres qu'il auoit fait creuser pour former lesdits marez estoient arides & sableuses, qui ne pouuoient contenir l'eau.

Combien que noz predecesseurs des isles Xaintoniques ayent trouué certains platins, ou lieux bas, limitrophes de la mer, & que les terres du fond ayent esté trouués naturellement glueuses ou argileuses, cela n'à pas suffit pour paruenir à leur dessein: car il à fallu inuenter vne maniere de conroyer ladite terre en la sorte & maniere que

de te diray cy apres.

Si nosdits predecesseurs n'eussent eu vn grand iugement & consideration en formant les marez sallans, ils n'eussent rien fait qui eut valu: ayans donc consideré les platins plus bas que la mer, ils ont trouué qu'il falloit trancher vn canal qui peut amener aisement l'eau de la mer iusques aux lieux pretendus, pour faire le sel. Ayant ainsi creusé certains canaux ils ont fait venir l'eau de la mer iusques a vn grand receptacle qu'ils ont nommé le iard, & ayant fait vne ecluse audit iard, ils ont fait au bout d'iceluy d'autres grands receptacles, qu'ils ont nommé conches, dedens lesquelles ils laissent couler de leau du iard en moindre quantité que non pas audit iard, & d'icelles conches ils font passer l'eau dedens le forans par vne troncée de bois percée, qu'ils appellent l'Amézau, lequel est par dessouz le bossis, & d'iceluy forans la font passer par deux bois percés qu'ils appellent les pertuis des poelles, pour entrer dedens certains lieux qu'ils nomment entablemens, vire sous, & moyens, lesquels sont faits par vne telle mesure, que l'eau de laquelle l'on veut faire sel, faut qu'elle tourne & enuironne vn bien long chemin & par diuers degrez, au parauant que l'on la laisse entrer dedés les parquets du quarré destiné à faire le sel. Il faut noter que combien que l'on face passer la dite eau par plusieurs degrez enclos aux receptacles, si est ce que de receptacle en autre,

L'eau est mise en moindre quantité, decoulât de l'un à l'autre tousiours en diminuât, afin que ladite eau soit bien preparée & eschauffée au parauât qu'elle soit mise dedés les aires salans, ausquels l'on l'a fait cōgeler en sel, c'est à dire auant que ouuerture luy soit faite pour entrer dedens lesdits aires. Car il y a certaines petites tablettes que l'on hausse pour laisser descouler dedés les aires, l'eau qui vient des viresons & entablements & autres degrez.

Mais pour monstrier qu'elles n'ont pas esté faites sans grand labeur & avec vn bien long temps, il à fallu creuser la quadrature du champ des marez, plus bas que le canal venant de la mer, ny que les iards & conches, afin de donner pente ou inclination es degrez & mēbres susdits: afin d'amener l'eau iusques à la grande quadrature du champ de marez. Et faut noter qu'en creusant celle grande quadrature il à fallu apporter les terres & vuidanges tout à l'entour de ladite quadrature, laquelle estant mise tout à l'entour fait vne grande platte forme que l'on appelle bossis, laquelle sert pour mettre de grāhs monceaux de sel qu'ils appellent vaches de sel, & quant ce vient en hyuer que la saison de faire sel est passée, ils courent lesdits monceaux de sel aiec des rōcs, lesquels se vendēt bien, à cause de leur utilité. Lesdits bossis seruent aussi pour aller de marez, en marez, pour passer les hōmes & chenaux en tous tēps: & il est requis qu'ils ayent vne grande largeur, par ce que quand quel-
qu'un

qu'un à vendu vne vache de sel ou deux, selon que la distance est longue pour apporter le sel dedès le nauire, il est requis pour les lieux lointains vn grãd nôbre de bestes pour porter le sel a bord, & cela se fait aucc vne merueilleuse diligence, tellemēt que lon diroit qui n'e auroit iamais veu, que ce sont esquadrōs qui veulent cōbatre les vns contre les autres. Il y à gens sur le bord du bateau, qui ne font q' vuidier les sacs, & vn autre qui marque, & chacune beste ne porte qu'un sac à la fois, & ceux qui touchēt les cheuaux sont cōmunement petis garçons, qui soudain q' le cheual est deschargē & le sel vuidē, se iettent de vitesse sur leur cheual & ne cessent de courir la poste iusques à la vache de sel, où il y a autres hōmes qui emplissent les sacs & les chargēt sur les cheuaux, & estants rechargēz lesdits garçons les remeinent en diligence iusques au nauire. Et d'autant que les vns & les autres vont & viennent tous en diligēce, il est requis q' les bossis ou plateformes soyēt bien larges: car les cheuaux se rencōtreroient l'un l'autre. Entens maintenant l'industrie de laquelle il à fallu vser pour rēdre les marez propre pour garder q' la terre ne succe l'eau qui y est mise, pour saller. Quand la grande quadrature à esté creusée & les vuidanges ostées, au parauāt que former les voyes & parquetages, ils ont vn nôbre de cheuaux & iuments, lesquels ils attachēt l'un à l'autre en quelque sorte, pour les poumēner puis les mettent dedens icelle grande quadrature,

où ils veulent former les marez, il y à vn personnage qui tient le premier cheval d'une main & de l'autre main vn fouët, lequel pourmene lesdis chevaux & iuments en diligence, iusques à tant que la terre de la solle soit bien conroyée, & qu'elle puisse tenir l'eau, comme vn vaisseau d'airin. Et la terre estant ainsi bien conroyée, ils dreslent leurs voyes & parquetages par lignes directes, donnant la pente requise de degré en degré, en telle sorte qu'il n'y à maçon n'y geometrien qui la sçeut mieux niueller avec tous les outils de geometrie, qu'ils là niuellent avec de l'eau, car l'eau leur donne à cōnoistre clairemēt les lieux plus haut ou plus bas.

Après di-je que la terre est ainsi conroyée, ils forment leurs voyes & parquetages ainsi que si c'estoit de la terre à potier. voyla pourquoy ie r'ay dit ci deuant que ores que l'on peut trouuer des lieux plus bas que la mer, il seroit impossible de dresser marez sallans si la terre n'est naturellement argileuse ou visqueuse comme celle des potiers.

Il y à encores vn grand labeur qu'il à conuenu faire à noz predecesseurs pour dresser les marez, il ne faut point douter que les premiers qui en ont erigé, n'ayent choisi les lieux les plus proches de quelque canal naturel: car s'il n'y auoit point de canal, il seroit difficile d'amener le sel qui se fait sur les marez, iusques au nauire dedens la grande mer: par ce que les grans nauires ne peuuent approcher du bord, à cause de leur grandeur: parquoy
ceux

ceux qui vendent du sel amènent des petites barques qui entrent au dedens du platin le plus pres qu'ils peuuent du sel qu'ils auront vendu, ils posent l'ancre, & ainsi l'on apporte ledit sel premierement en la barque, puis l'on meine ladite barque pour descharger dens le nauiere: & faut noter que le plus souuent en certains canaux l'on n'y peut entrer que au plein: & pour en sortir, si la mer s'en est allée, il faut attendre qu'elle soit de rechef au plein: Et combien que aucuns canaux ont esté trouués naturels, ce neantmoins il à esté nécessaire d'aider à nature: afin que les barques & petis nauieres puissent approcher des lieux ou l'on fait le sel: & ne faut douter que noz predecesseurs n'ayent aussi esté contraincts de former des canaux es lieux ou il ne s'en est point trouué de nature: car autrement ils ne pouroyent tirer le sel desdits marez: d'autant que les plates formes sont faites si fort obliques, qu'il semble que c'est vn labirinte, & ne sauroit on faire vne lieuë au trauers qu'elle n'en mōte à plus de six, à cause des enuironnemēts qu'il faut faire pour en sortir: & si quelque estrangier y estoit enclos, à peine en pouroit il sortir sans conduite: par ce qu'il faut trouuer vn grand nombre de pontages, qu'il faut chercher l'un à dextre & l'autre à fenestre, quelque fois tout au contraire du lieu ou l'on veut aller: Car il faut entendre que tout le platin des marez est concaué de canaux, de iards, de conches, ou de champ de marez, aucuns desdits

desdits champs sont quarrez, & autres longs & estroits, d'autres en forme desquerre: afin q toute la terre soit employée en façons de marez: tout ainsi qu'en vne ville les premiers edifiās ont pris place cōmunemēt quarrée à leur cōmodité, & les derniers ont pris les places & restes des autres, ainsi qu'elles se sont trouuées: le semblable s'est fait es marez. car les premiers ont pris place à leur cōmodité le plus pres des canaux & de la mer qu'il leur à esté possible, & les derniers venuz ont pris les places, non pas telles qu'ils desiroyēt, mais ils les ont edifiez quelque fois es lieux bien lointains des canaux & riuēs de la mer, qui cause que ceux là ne sont pas tant venduz: d'autant que les frais de l'aménage du sel sont par trop grands.

Autres ont edifié des marez qui sont de peu de valeur, par ce que bien souuent l'eau leur defaut au plus grand besoing, d'autant que les canaux, iards & conches ne sont pas assez bas en terre, pour reconurer de l'eau de là mer à leur souhait, & faut icy noter vn point singulier, qui est qu'en chascun marez il y à vn canal fait à force d'hommes, pour amener l'eau de la mer dens le iard, & autres canaux comme petites riuieres, qui seruent pour amener les barques entre plusieurs marez, dedens lesquelles on porte le sel au grand nauire, comme i'ay dit vne autre fois: par tel moyen toute la terre de la vallée des marez est labourée, fossoyé & retranchée pour l'vtilité & seruice dudit sel, &
pour

pour ces causes ay-ie dit ci dessus que si vn estrang-
ger estoit au milieu des marez, ores qu'il verroit
le lieu ou il voudroit aller, à peine en pourroit il
sortir: d'autant que bien souuent il luy faudroit
tourner le dos pour chercher les pontages: aussi
qu'il n'y a chemin ne voye que seulement les
bossis, qui sont erigez par lignes obliques, &
n'est possible de trouuer chemin ne voye dens
lesdits marez autre que les bossis, lesquels sont
haut esleuez, parce que toutes les vuidanges des
champs des marez y ont esté mises, & si l'on y
estoit en hyuer l'on verroit tous lesdits champs
couverts d'eau, comme de grands estangs, sans
apparoir aucune forme d'iceux. Ce qui a fait
que aucuns peintres, ayants esté enuoyez és isles
pour sçauoir la cause pourquoy il est impossi-
ble de passer vne armée au trauers desdits marez,
ont esté deceus: d'autant qu'ils y sont allez és sai-
sons que l'eau estoit dedens lesdits marez, &
en ont rapporté des figures incertaines, du temps
que l'on vouloit eriger la gabelle au pays de
Guienne le sieur de la Trimouille & le general
Boyer, enuoyerent vn mestre Charles, (peintre
fort excellent) sur les isles, pour remarquer les
passages, ledit peintre apporta figure certaine &
au vray des bourgs & villages: Mais quand eist des
formes des marez, ce n'estoit que confusion en
sa figure: d'autant que pour lors les marez estoient
couuers d'eau, & pour mieux te le faire entendre,
il faut

Il faut necessairement qu'apres que les chaleurs sont passées & qu'il n'y a plus d'apparence de faire du sel, les sauniers pour la conseruatiō des marez, ouurent certaines bondes des canaux qui passent par le iard, & par ces conches, & laissent entrer l'eau dans lesdits marez iusques à ce que toutes les formes soyent couuertes. Car s'ils laissoyent lesdits marez descouuerts les gelées les dissiperoyēt en telle sorte qu'il les faudroit refaire tous les ans: mais par le moyen de l'eau ils sont conseruez d'une année à autre.

Et afin que tu entendes mieux que le sel n'est pas vne chose qui se puisse faire aisement & à peu de frais, il conuient noter que l'on n'en peut faire que durant trois ou quatre mois de l'année, pendant les grandes chaleurs. Et pour le premier preparatif du sel, il faut prendre l'eau de la mer au plein de la lune du mois de Mars. Car en ce tēps là, la mer est plus haute & enflée qu'en nulle saison, & lors qu'elle est en sa pleine grandeur, les sauniers desbondent les conduits des canaux & grandes tranchées, pour emplir ce grand receplacle qu'ils appellent iard, lequel faut qu'il contienne autant d'eau qu'il en fait besoing, pour faire le sel iusques à la pleine lune du mois de iullet, auquel temps la mer se remet en sa grandeur & hauteur comme celle de Mars, & alors vn chascun saunier se trauaille à remplir le iard: toutesfois quelque labour & diligence que noz predecesseurs sauniers ayent

ayent sçeu faire, si est ce que quand vn esté est fort sec, il y à plusieurs marez qui ne font rien vne partie de l'esté : Car l'eau du iard estant faillie deuant le temps, ils n'ont aucun moyen d'en remettre d'autre, si ce n'est au temps des grandes malignes (qu'ils appellent) qui est lors que la mer est en sa superbe grâdeur. Voila pourquoy les marez qui sont pres du port, & qui peuuent auoir de l'eau au plein de toutes les lunes sont beaucoup plus estimez que les autres.

Il faut aussi noter vn point qui est, que si durant que l'on fait le sel il aduenoit vne pluye l'espace d'une nuit ou d'un iour, mesmes seulement deux heures, l'on ne sçauroit faire de sel de quinze iours apres: par ce qu'il faudroit nettoier tous les marez & oster l'eau d'iceux, aussi bien la salée que la douce, tellement que s'il pleuuoit tous les quinze iours vne fois, l'on ne feroit iamais de sel à la chaleur du Soleil: parquoy faut croire qu'aux régions & contrées pluuieuses & froides, l'on n'y sçauroit faire de sel à la maniere qu'il se fait és isles de Xaintonge, encores qu'ils eussent toutes les autres commoditez cy dessus alleguées.

Il est encores de besoing d'entendre qu'au parauant que faire le sel il faut espuiser toute l'eau qui est dens les marez, laquelle y auoit esté mise pour les conseruer en hyuer: ce qui n'est pas vn petit labeur, & ayant nettoyé tous lesdits marez communement au mois de May, quand le temps

vient

vient à s'eschauffer, ils lachent les bondes pour laisser passer telle quantité d'eau qu'ils veulent, laquelle ils font couler dedens les conches, entablemēts, moyens & virefons, afin qu'elle se commence à eschauffer, & estant eschauffée, ils la mettēt à sobriété dedēs les aires ou l'on fait crespier le sel. Et pour mieux te mōstrer encōres la despense desdits marez, il faut entendre qu'en chascun champ de marez il y a deux ecluses faites en maniere d'un pont, lesquelles ne se peuuent faire qu'avec grands despens, à cause de la grandeur du bois: car il faut que les montans viennent du fond & concauité du canal bien profond, & les pieces trauesantes seruent de passer hommes & cheuaux: ils nomment lesdits ponts l'un la varengne & l'autre le gros mas: par ce qu'il sert aussi à retenir les eaux du iard: Outre lesdits ponts en chacun marez il y a plusieurs pieces de bois qui sont percées tout du long, pour faire passer les eaux, de degré en degré. En chascun champ de marez, il faut bien vne piece de bois autant longue que le pied d'un grand arbre, laquelle est percée tout du long, qu'ils appellent l'Amezau, & faut que ledit pied d'arbre soit bien gros, & les autres pieces qui sont moindres sont percées selon leur grosseur. Le te di ceci afin que tu entendes que les bois des marez estans pourris ou bruslez, les forestz de la Guyenne ne sçauroyent suffire pour les refaire. Et n'y a homme ayant veu le labeur de tous les marez de

Xain-

Xaintonge, qui ne iugeast qu'il à fallu plus de despence pour les edifier, qu'il ne faudroit pour faire vne seconde ville de Paris.

Theorique.

Voire mais ceux qui se sont meslez d'escrire par cy deuant, disent que le sel prouient de l'escume de la mer, & mesme vn autheur (qui à escrit, depuis que le sel est si cher, vn petit liure, de l'exellence dignité & vtilité du sel) l'à ainsi dit, & semblablement à dit que nous serions bien heureux si nous auions vne fontaine d'eau salée en France, comme ils ont en la Lorreinne & autres pays.

Practique.

Tu peux bien auoir entendu par mon discours, le contraire de leur dire, il n'est pas besoing que i'en repete quelque chose. Et quāt à l'auteur que tu m'as allegué, il n'entend pas bien ce qu'il à mis en son liure, & plusieurs le croyans se pourront abuser: Car quant il y auroit cent fontaines d'eau salée en France, elles ne sçauroyēt suffire à la moitié du Royaume. Et qui plus est, quand il y en auroit mille, elles seroyent inutiles. Car ou sont les bois pour faire ledit sel? i'ose bien dire que toutes les forests de France ne sçauroyēt faire en cent ans autant de sel de fontaines ou de puits salez, qu'il s'en fait en vne seule année en Xaintonge à la chaleur du soleil, non pas vne année mais seulement depuis la my-May iusques à la my-Septembre. Car ils n'en sçauroyent faire en antre saison.

Il y

Il y a des puits ou fontaines en Lorraine, desquels l'on fait grande quantité de sel: Mais ie te prie considere vn peu la grande despense. La chaudiere ou l'on fait boullir l'au, ha trente pieds de long & autât de large, elle est maçonnée sur vn four qui à deux gueules, & chacune gueule il y à deux hommes qui ne cessent de ietter bois dens icelles. Il y à vn grand nombre de chariots pour charier le bois, & des hommes pour le mettre pres du four, autres sont au bois pour le couper. L'on tient pour certain que toutes les années il faut la leuée de mil arpens ou quartiers de bois tallis pour entretenir lesdittes fournaies, & l'ordre est tel qu'il y à quatre mil quartiers de bois destinez pour l'entretienement des fours: & par chascun an l'on en coupe mil quartiers, & au bout de quatre ans les quatre mil quartiers estans coupez, ils recommencent au premier milier qui auoit esté coupé. Or considere si quelqu'un auoit en France mil quartiers de bois taillis, s'il vouldroit bailler la leuée dudit bois pour le pris que pouroit estre vendu le sel qui se feroit de dix mil quartiers, il est certain que le bois vaudroit plus, & s'en trouueroit plus d'argent que du sel. Et combien que le bois ne couste rien au duc de Lorraine, si est ce que les frais de faire le sel au feu, sont si grands que le sel est trois fois plus cher en Lorraine, que non pas en Erance. O combien la beatitude de la France est plus grande en cest endroit que celle des autres
nati-

nations. Et combien qu'en Portugal il s'en face à la chaleur du Soleil, si est ce qu'il n'est pas si naturel que celui de Xaintonge: parce qu'il à vne acuité si grande & corrosiue, que plusieurs en ayant salé des lards ont trouué des trouz & incisîōs que les gros grains de sel auoyent fait au travers desdits lards. Quant est de celui de Lorraine, tant il s'en faut qu'il soit si conseruatif que celui de Xaintōge, que bien souuēt les lard dudit lieu sont tous remplis de vers apres auoir esté salez. Plusieurs Royaumes estrangers, ayant quelque quantite de sel en leur pays, ne laissent pour cela d'en venir que-
rir en France, & quand ils en ont, ils l'augmentent & accroissent du leur: ceux des Ardenes sçauent tresbien que le sel de Xaintonge est meilleur que celui de Lorraine, & pour ces causes ils sont soigneux d'en auoir: ils le connoissent à la couleur & grosseur: car les grains du sel qui est congelé au soleil sont plus gros que de celui qui est fait au feu, & faut croire que le sel de Xaintonge est aussi blanc que nul autre sçauroit estre: Mais par ce que la terre des marez est noire, ceux qui font le sel ne le peuuent tirer hors des aires sans racler & entremesler quelque peu de terre: ce qui luy oste vne partie de sa blancheur: toutesfois quand les sauniers commencent à faire du sel, ils en font d'aussi blanc que neige, pour seruir à table, & en font des presens à leurs parents & amis, qui sont esparsés terres douces. Ils prennent ledit sel

N

blanc.

blanc tout dessus, auant que de racler iusques au fond, & sans esmouuoir rien de ladicte terre. Ce n'est donc pas la faute de l'eau, que le sel de Xaintronge ne soit aussi blanc que celuy des autres pays. Et ne faut plus auoir opinion qu'il s'en face de l'écume de la mer, ainsi que l'on l'a creu iusques au iourd'huy.

Le Sel blanchit toutes choses.

Et donne ton à toutes choses.

Et si fortifie toutes choses.

Et si est compaignon de toutes natures.

Et si entretient l'amitié entre le malle & la femelle.

Et si aide à la generation de toutes choses animales & vegetatiues

Il empesche la putrefaction & endurest toutes choses.

Il aide à la veüe & aux lunettes.

Sans le sel, il seroit impossible de faire aucune espece de verre.

Toutes choses se peuuent vitrifier par sa vertu.

Il donne goust à toutes choses.

Il aide à la voix de toutes choses animées, voire à toutes especes de metaux, & instruments de musique.



DES PIERRES.

Theorique.

LE suis fort aisé d'avoir entendu ce discours du sel commun : car ie ne pensois pas qu'il se fit avec tant de labeur, & cela meriteroit bien d'estre mis en lumiere. Car ie croy fermement que nuls des cosmographes n'en ont iamais parlé. Maintenant ie te prie de me parler des pierres : d'autant que tu m'as dit qu'en parlant d'icelles ie connoistrois de beaux secrets. Je voudrois bien sçavoir que tu en veux dire : car les vns disent qu'elles ont esté formées des la creation du monde, & les autres disent qu'elles croissent tous les iours

Practique.

D'autant que ie t'ay veu si fort attaché à l'alchimie ie suis content de te parler des pierres : car peut estre qu'en parlant de la formation & essence d'icelles, tu pouras te reduire à mon opinion. Ceux qui disent que les pierres sont formées des la creation du monde errent, & ceux qui disent qu'elles croissent errent aussi. Or il faut que tu rememores ce que i'ay dit plusieurs fois en parlant des fôteines & de l'alchimie, qu'il n'y à nulle chose sous le ciel en repos, & que toutes choses se travaillent en se formant, & en se deformant tournent bien

souuent de nature à autre, & de couleur à autre. S'il estoit ainsi que les pierres eussent esté créés des la fondation du monde & qu'il ne s'en fit plus l'on n'en pourroit plus trouuer à present. Considerer la grande quantité de pierres qui est consumée tous les iours: vne partie par les gelées qui la font venir menue comme cendres: vne autre partie par les fours à chaux: autre partie par les maçons & tailleurs de pierres. C'est chose certaine qu'en faisant vn logis de pierre de taille la moitié s'en ira en poussiere à coups de marteau, aussi tu sçais q les cheuaux, chariots & charrettes, en passant & repassant en dissipent vne grande quantité. Si tu as bien regardé les rochers qui sont le long de la mer, tu as veu comment ses flots impetueux ont ruiné vne bonne partie desdits rochers. D'autre part le vent d'Est & de Sus, cause vne dissolution du sel qui entretient la pierre en son estre, tellement qu'elles tombent en poussiere: & de la vient qu'aucuns disent que telles pierres sont gelisses ou venteuses. A la verité les pierres, de lesquelles l'eau est sortie au parauant que leur decoction fut faite si estant abreuées d'eau, la gelée vient là dessus elles ne faudront à se reduire en poudre: & voila comment les pierres sont suiettes à la dissolution des vents & des gelées. Si tu consideres toutes ces choses tu connoistras que si les pierres eussent esté faites des la fondation du monde, & qu'il ne s'en fit plus depuis, il y à long temps que
l'on

l'on n'en sçauroit trouuer vne seule. Je ne di pas que Dieu n'ait crée des le commencement & montaignes & vallées, lesquelles montaignes ne sont causées que des rochers, comme ie t'ay dit en parlant des fontaines.

Theorique.

Et pourquoy m'as tu donc nié que les pierres croissent?

Practique.

Je te le nie bien encores : car les pierres n'ont point d'ame vegetatiue: mais insensible. parquoy elles ne peuuent croistre par action vegetatiue: mais par vne augmentation congelatiue.

Theorique.

Et qu'appelles tu augmentation congelatiue.

Practique.

C'est vn trait qui te pourra beaucoup seruir à connoistre la generation des metaux. I'appelle augmentation congelatiue comme qui ietteroit de la cire fondue sur vne masse de cire déjà congelée, & que icelle se vint cōgeler avec ladite masse, laquelle seroit augmentée d'autant que l'addition y auroit esté mise. En cas pareils les rochers des montaignes sont augmentez par quelque chute de pluye qui auroit amené avec soy vne matiere pierreuse. Mais la vraye addition des pierres & la plus certaine, est celle qui se fait es pierres qui sont encores dans le ventre de la terre. Car tout ainsi que i'ay dit des metaux, qu'ils ne peuuent estre generez hors la matrice de la terre

& qu'il estoit besoing qu'ils fussent enclos dens lieux humides & aqueux, comme se fait la formation de nature humaine: Aussi semblablement les pierres des carrieres ne peuuent estre engendrées sinon és lieux creux & cachez dens la matrice de la terre, & la ils recoyuent tous les iours vn augmentation cōgelatiue, & cela se fait par le moyen que i'ay plusieurs fois dit, & qui est le fondemēt principal de mes arguments: asçauoir que deslors que Dieu crea la terre, il la remplit de toutes substances. Or par ce que les substances pierreuses & metaliques sont inconnēues parmi la terre, & consequemment parmi les eaux, les pluies qui passent au trauers des terres prennent les sels qui sont aussi inconnuz, lesquels sels ou matieres metaliques, sont fluentes & se laissent couler avec les eaux qui entrent dens la terre iusques à ce qu'elles ayent trouué quelque fonds pour s'arrester: & si elles s'arrestent sus vne carriere, ou miniere de pierre, lesdites matieres estant liquides passent au trauers des terres & ayans trouué lieu pour s'arrester, se viennent à congeler & endurcir & faire vn corps & vne masse avec l'autre pierre. Voila pourquoy ie t'ay dit que les pierres ne croissent point, mais bien qu'elles peuuent augmenter par vne adition congelatiue: & cela fait que toutes carrieres contigues ont les siēs veines & assemblages de trauers, & non point descendantes du haut en bas, qui est vne vraye attestation que la congelation desdites pier-

pierrres n'à pas esté faitte tout en vn coup: autrement elle ne se pouroit iamais fendre, ains seroit autant dure en l'vn endroit comme en l'autre. Et quand l'on la veut fendre l'on trouue cōmunemēt certaines ioinctures que l'on nomme fins, & bien à propos: par ce que c'est la fin d'une congelation faite en vn temps, suyuant ce que i'ay dit que les congelations des rochers ou carrieres contigues, n'ont pas esté faites tout en vn coup.

Theorique.

Et ou est ce que tu as trouué cela par escript, ou bien di moy en quelle escole as tu esté, ou tu puisses auoir entendu ce que tu dis?

Prattique.

Ie n'ay point eu d'autre liure q̄ le ciel & la terre, lequel est conneu de tous, & est dōné à tous de cōnoistre & lire ce beau liure. Or ayant leu en iceluy i'ay consideré les matieres terrestres, par ce que ie n'anois point estudié en l'astrologie pour cōtempler les astres. Et ayāt de bien pres regardé les natures i'ay conneu en la forme de plusieurs pierres, qui estoient faites comme des glaçons qui pendent aux goutieres des maisons quand il gele, que les pierres estoient faites & engendrées de quelqs matieres liquides & distilates cōme eau, & ay esté l'espace de dix ans en opinion q̄ les eaux cōmunes se reduisoient en pierre par quelq̄ vertu cōgelatiue, & singulieremēt le cristal, lequel ie ne trouuois en rien diferent à l'eau cōmune. Toutesfois cōme les
scien-

sciences se manifestent à ceux qui les cherchēt, depuis quelque tēps i'ay conneu q̄ le cristal se cōge-
loit dedens l'eau, & ayant trouué plusieurs pieces
de cristal formées en pointes de diamāts, ie me suis
mis à penser qui pouroit estre la cause de ce, &
estant en telle resuerie, i'ay consideré le salpestre,
lequel estant dissout dedens l'eau chaude, il se cō-
gele au milieu ou aux extremitēz du vaisseau ou
elle aura bouilli: & encores qu'il soit couuert de
laditte eau, il ne laisse à se congeler: par tel moyen
i'ay conneu que l'eau qui se congèle en pierres, ou
metaux n'est pas eau commune. Car si c'estoit eau
cōmune elle se congelerait, également par tout,
comme elle fait par les gelées. Ainsi donc l'ay
conneu par la congelation du salpestre que le cri-
stal ne se congèle point sur la superficie, ains au
milieu des eaux communes, tellement que toutes
pierres portans forme quarrée, triangulaire ou
pentagonne, sont congelées dedens l'eau. Depuis
que ie suis en telle connoissance, i'y trouuée plu-
sieurs mines de fer, d'estain & d'argent, qui auoy-
ent les formes de cristal, qui m'a fait croire que
toutes ces choses estoient congelées dedens leau,
comme i'ay dit en parlant de l'alchimie. Et pour
confirmation de ce que ie dis, i'ay veu vn lapidaire
(nōmé Pierre Seguin) qui auoit trouué vne pier-
re de cristal au dedens de laquelle il y auoit de l'eau
qui n'estoit pas congelée, & dedens ladite eau y
auoit vne petite ordure noire qui estoit plus lege-
re que

re que l'eau, car quád il tournoit la pierre de quelque costé, ladite ordure se tenoit tousiours dessus. Et d'autant que ledit lapidaire l'auoit fait tailler & enchasser en vn anneau, aucuns croyoyent fermement que c'estoit vn esprit enclos dedens icelle, ne se doutant du secret de ceste philosophie. Il y auoit vn nommé de Trois rieux, homme curieux & de bon iugement, lequel auoit vne autre pierre de cristal en laquelle y auoit de l'eau enclose comme en la susdite: Mais il fust bien trompé: car l'ayant baillé à vn lapidaire pour tailler vne larme, en la taillant trouua vne petite veinne par laquelle l'eau (qui n'estoit pas congelée) s'enfuit. L'ay trouué aussi plusieurs cailloux cornuz, qui estoient creuz dedens & auoyent plusieurs pointes comme de diamants: cela m'a fait connoistre que quand lesdits cailloux se formoyent, ils estoient pleins d'eau, & que depuis l'eau commune s'est exhalée & a laissé la matiere congelatiue en forme d'un caillou creux. Voila les liures de mon estude.

Theorique.

Et cuides tu que ie croye que l'eau se puisse reduire en pierre?

Practique.

Ie t'ay dit que i'ay esté long temps en ceste opinion. Mais à present ie te di que ce n'est pas l'eau commune, ains vne eau de sel, laquelle tu ne scaurois distinguer d'avec la commune: toutesfois elle est fluide & autant candide que l'eau commune. Et

ne. Et de cela i'ay bon tesmoignage: car moy estât à Paris l'année passée 1575. il y eust vn medecin nommé monsieur Choyfuin, duquel la cōpagnie & frequentation m'estoit vne grande consolatiō, qui apres m'auoir entēdu parler ainsi des natures, & cōnoissant qu'il estoit amateur de philosophie, ie le priay de venir avec moy dēs les carrieres pres saint Marceau, afin de luy oster toute doute de ce que ie luy auois dit de la generation des pierres. Et celuy meu de bō zele & sans espargner sa peine, fit soudain apporter des flambeaux de cire, & amenant avec luy vn escolier medecin nommé Milon, nous allasmes pres d'une lieue dens lesdites carrieres, estants conduits par deux carriers: Et là nous vismes ce que long temps au parauant i'auois conneu par les formes des pierres faites cōme des glaces pendantes: Aussi que i'auois veu vn nombre de telles pierres, qui auoyent esté apportées de Marseille par le cōmandement de la Royne mere du Roy, d'une cauerne qui s'appelle la Mauue l'ouriere, laquelle a pris son nom par ce q les loups y vont souvent manger les cheures & brebis qu'ils ont desrobées. I'auois aussi veu grande quātité de telles pierres à la grotte de Meudon, qui ont esté apportées des parties maritimes. I'en ay aussi veu es rochers qui sont du long de la riuierre de loire: Mais quand nous fusmes es carrieres de Paris nous vismes distiler l'eau qui se cōgeloit en nostre presence. Parquoy tu ne me peux nier ce point: car i'ay bon tesmoignage.

Theorique.

Voila vne chose bien estrange de dire qu'il se forme des pierres tous les iours.

Practique.

Ie ne dis pas des pierres seulement, mais aussi des metaux, & te di que le bois & les herbes se peuuent reduire en pierre.

Theorique.

Si tu dis cela, gueres de gens ne le voudront croire, & te conseille de ne tenir iamais vn propos si eslongné de verité

Practique.

I'ay trouué autrefois des asnes comme toy, qui trouuoient fort estranges mes propos, & crioyent apres moy cōme au regnart, que bien souuent i'en estois honteux: toutefois ie faisois tousiours mon compte que la science n'à plus grād ennemi que l'ignorance. A present l'on n'à garde de m'en faire rougir: car ie suis trop asseuré en mon affaire. Et di que non seulement le bois se peut reduire en pierre, ains aussi le corps de l'homme & de la beste.

Theorique.

Voila vne chose plus qu'estrange, que l'homme, la beste & le bois se puissent reduire en pierre.

Practique.

Quād est du bois ie t'ē mōstreray plus de cēt pie-
ces reduites en pierre & en cailloux: quand est de
l'hōme ie n'ē ay pas veu: mais i'ay bō tesmoignage
d'un hōme de bien, médecin, qui dit auoir veu des
le cabinet d'un seigneur, le pied d'un hōme petrifié
Et

Et vn autre medecin m'à asseuré auoir veu la teste d'un homme aussi petrifiée. vn monsieur Iulles demourant à Paris m'à asseuré qu'il y à vn prince en Alemagne, lequel à en son cabinet le corps d'un homme la plus part petrifié. Je me tiens tout asseuré que si vn corps estoit enterré dans vn lieu ou il y eust quelque eau dormante, parmi laquelle y eust de l'eau congelatiue, de laquelle se forme le cristal & autres matieres metaliques & pierreuses, que ledit corps se petrifieroit: par ce que la semence congelatiue est d'une nature salcitine, & que le sel du corps de l'homme attireroit à soy la matiere congelatiue, qui est aussi salcitine, à cause de l'afinité que les deux especes ont, elles viendroyent à congeler, endurcir & petrifier le corps mort, & cela je preuue par le bois de hêtre, qui est le plus salé, & dequoy l'on fait plus aisement du verre.

Theorique.

Voila encores vn propos plus eslongué de vérité que tous les autres, selon mon iugement, & ne crois point que le corps de l'homme se puisse reduire en pierre.

Practique.

Je ne dis pas seulement en pierre, mais ie di qu'il se peut reduire en metal, & l'homme, & le bois, & les herbes. Et cela se peut faire quand vn homme seroit enterré en quelque lieu aquatique, ou la terre seroit pleine d'une semence de vitriol, ou coperoze. Car ladite semence n'est autre chose qu'un sel

sel qui n'est iamais oyfis. Et comme i'ay desia dit, les sels ont quelque affinité ensemble. Le sel du corps mort estant en la terre fait attraction de l'autre sel, lequel sera d'un autre genre, & les deux sels ensemble pouront endurcir & reduire le corps de l'homme en matieres metalique : d'autant que la nature du sel nommé copperose, ou vitriol, ne peult faire autre chose que conuertir en airain les choses qu'il treuve au lieu ou il fait sa demeurance. Je te donne ce trait pour vng point inuincible & bien asseuré.

Theorique.

Tu le dis que cest vn point bien asseuré. Ouy si ie te veux croire. Voila toute l'assurance que ie scaurois auoir de toy.

Practique.

Je ne t'ay pas mis ces points en auant sans que i'en feusse bien asseuré. Il y a long temps que l'on m'a asseuré qu'il y a vn personnage de qualité, au pays d'Auuergne, qui a vn pal, lequel a esté arraché d'un estang, lequel s'est trouué partie en bois, partie en pierre, & l'autre partie en fer. Sçauoir est, la partie qui estoit dens terre estoit conuertie en fer, & la partie qui estoit dens l'eau conuertie en pierre, & la partie qui restoit hors de l'eau, est ancores bois. Quand i'euz entendu vne telle chose, ie me mis en deuoir d'en sçauoir la cause: Et quelque iour en cherchant de la terre argileuse, ie trouuay plusieurs pieces de bois reduites en metal:

en metal: Et i'apperceu que dedens laditte terre y auoit grande quantité de vitriol: Lors ie conneuz que ainsi que le bois se putrifioit en la terre il s'abreuioit de ceste matiere falsitiue ou vitriolique, qui causa la congelation & transmutatiõ de la nature du bois, en matiere metalique: & par ce que ie sçauois bien que le bois le plus salé estoit le plus prompt à se reduire en pierre, ie mis peine de cõnoistre de qu'elle espeece de bois estoient ces pieces metaliques, & le cõneuz par la forme d'icelle: car ayant consideré qu'autrefois le lieu ou ie les auois trouuées, auoit esté planté de vignes, lesquelles auoyent esté arrachees, pour tirer de la terre d'argille à faire des tuilles, ie vis que lesdites pieces de bois metalisées estoient semblables aux iâbes & pieds des vignes qui auoyent esté arrachées dudit lieu. Lors ie ne doutay plus que ce ne fut lesdits piedz de vignes, qui auoyent esté transmuez de bois en metal: non pas par le moyen du feu, cõme les alchimistes cherchent à faire, hors la matrice de la terre. Car ie trouuay & contremplay de bien pres que ces choses auoyent esté transmüées dens ladite terre d'argille, qui est de ceste nature froide: dõt quelques vns ont dit q pour ceste cause elle restraint le flus de sang, estant mise sus les tēples avec du vinaigre. Apres que ie fus bien certain que ladite vigne se cõgeloit & transmüoit en matiere metalique, par la vertu de la cõperose, ie cõneuz qu'il y auoit encores vne autre cause operante

rante & aidante à laditte coperose: Et tout ainsi que le sel d'un corps mort estant couuert dens la terre és lieux aqueux peut tirer à soy autres sels par l'afinité qu'ils ont l'un à l'autre. Aussi les sels de la vigne peuvent auoir aidé à la congelation & transmutation dudit bois, & de cela ie m'en tiens pour tout asseuré, sachant bien que le sel de la vigne que l'on nomme tartare à grande vertu enuers les metaux. Je sçay que plusieurs alchimistes en blâchissent le cuire, qui a causé que plusieurs en ont abusé. Aucuns font un tirepoil dudit tartare, que ie n'ose dire, craignant que tu m'estimes menteur: par ce que la chose semble impossible. Parquoy ayant conneu telles choses à la verité, & en estant bien asseuré, j'ay considéré que j'auois beaucoup employé de temps à la cōnoissance des terres, pierres, eaux des metaux, & que la vieillesse me presse de multiplier les talens que Dieu m'a donnez, & partant qu'il seroit bon de mettre en lumiere tous ces beaux secrets, pour laisser à la posterité. Mais d'autant que ce sont matieres hautes & connues de peu d'hommes, ie n'ay osé me hazarder, que premierement ie n'eusse senti si les Latins en auoyent plus de connoissance que moy: Et j'estois en grand peine, par ce que ie n'auois iamais veu l'opinion des philosophes, pour sçauoir s'ils auoyent escrit des choses susdittes. L'eusse esté fort aise d'entendre le

Latin

Latin, & lire les liures desdits philosophes, pour apprendre des vns & contredire aux autres: Et estât en ce debat d'esprit ie m'auisay de faire mettre des afiches par les carrefours de Paris, afin d'assembler les plus doctes medecins & autres, ausquels ie promettois monstrier en trois leçons tout ce que i'auois conneu des fontaines, pierres, metaux & autres natures. Et afin qu'il ne si trouuast que des plus doctes & des plus curieux, ie mis en mes afiches que nul n'y entroit qu'il ne baillast vn escu à l'entree desdites leçons, & cela faisoie ie en partie pour voir si par le moyē de mes auditeurs ie pourrois tirer quelque contradiçtiō, qui eust plus d'assurance de verité que non pas les preuues que ie mettois en auant: sachant bien que si ie mentois il y en auroit de Grecs & Latins qui me resisteroient en face, & qui ne m'espargneroyēt point, tant à cause de l'escu que i'auois pris de chascun, que pour le temps que ie les eusse amusez: car il y auoit bien peu de mes auditeurs qui n'eussent profité de quelque chose, pendant le temps qu'ils estoient à mes leçons. Viola pourquoy ie dis que s'ils m'eussent trouué menteur, ils m'eussent bien rembarré: Car i'auois mis par mes afiches que partant que les choses promises en icelles ne fussent veritables, ie leur rendrois le quadruple. Mais graces à mon Dieu, iamais homme ne me contredit d'un seul mot. Quoy considéré & voyant que ie ne pouuois auoir de plus fideles tesmoings, ne
plus

plus asseurez en sçauoir qu'iceux, i'ay pris hardiesse de te discourir toutes ces choses bien tesmoignées, afin que tu ne doutes qu'elles ne soyent veritables. Et pour te les rendre encores mieux asseurées, ie te feray icy vn catalogue des gens de bien, honorables & doctissimes, qui ont assisté à mesdites leçons (lesquelles ie fis le caresme de l'an mil cinq cens septante cinq) au moins de ceux desquels ie pouray sçauoir le nom & la qualité: lesquels m'ont asseuré qu'ils seront tousiours prestz à rendre tesmoingnage de la verité de toutes ces choses, & qu'ils ont veu toutes les pierres minerales & formes monstreuses, lesquelles tu as veües à mes dernieres leçons de l'an mil cinq cens septante six, lesquelles i'ay continué, afin d'auoir plus grand nombre de tesmoings.

Sensuit le catalogue desdits tesmoins qui ont veu les choses susdites au parauant l'impression du liure.

Et premierement mestre François Choinin, & monsieur de la Magdalene, tous deux medecins de la Royne de Nauarre.

Alexandre de Campege medecin de Monsieur frere du Roy.

Monsieur Milon medecin.

Guillaume Pacard, medecin de saint Amour en la comté de Bourgongne, diocese de Lion.

Philibert Gilles medecin, natif de Muy en la duché de Bourgongne.

Monsieur Drouyn medecin, natif de Bretaigne.

O

Mon-

Monsieur Clement medecin de Dieppe.

Iehan du pont au diocèse d'Aire, medecin.

Monsieur Misere medecin Poiteuin.

Iehan de la Salle, medecin du mont de Marfan.

Monsieur de Pena medecin.

Monsieur Courtin medecin.

Tous ceux cy sus nommez, sont medecins doctes.

Monsieur Paré premier chirurgien du Roy.

Monsieur Richard aussi chirurgien du Roy.

Messieurs Paiot & Guerin Apoticaire à Paris.

Messire Lordin, Marc de Saligny en Bourbonnois, cheualier de l'ordre de Roy.

Monsieur d'Albene & l'abbé d'Albene son frere.

Iaques de Narbonne presenteur de l'Eglise cathedrale de Narbonne.

Monsieur de Camas gentilhomme prouençal.

Noble homme Iaques de la Primaudaye du pays de Vendomois.

La Roche Larier gentil'homme de Tourainne.

Monsieur Bergeron aduocat au parlement de Paris, homme docte & expert aux mathematiques.

Maistre Iehan du Clony diocèse de Renes en Bretagne, aussi aduocat en parlement de Paris.

Brunel de saint Iaques Bearnois, des salies, diocèse de Dax, licencié és loix.

Iehan Poirier escolier en droit, Normand.

Monsieur Bracher d'Orléans & monsieur du Môt.

Maistre Philippe Oliuin gouverneur du seigneur du chasteau bresi, homme docte és lettres.

Maistre

Maistre Bertolome prieur, homme expérimenté és ars.

Maistre Michel Sager, homme de iugement & de bon engin.

Maistre Ian Vinct homme expert aux ars & mathematiques.

Or i'ay veu autrefois vn liure que Cardan auoit fait imprimer des subtilitez, ou il traite de la cause pourquoy il se trouue grãd nombre de coquilles petrifiées iusques au sommet des montaignes & mesme dens les rochers: ie fus fort aise de voir vne faute si lourde pour auoir occasion de contredire vn homme tant estimé: d'autre costé i'estois fasché de ce que les liures des autres philosophes n'estoyét traduits en François, cōme cestuy la, pour voir si d'auēture i'eusse peu cōtredire cōme ie cōtredis à Cardan sur le fait des coquilles lapifiées.

Theorique.

Et comment? voudrois tu contredire a vn tel sçauāt personnage, toy qui n'és rien? Nous sçauōs que Cardā est vn medecin fameux, lequel a regéré à Tolette & qui a composé plusieurs liures en langue Latine: & toy qui n'as que la langue de ta mere, en quoy est ce que tu le voudrois contredire?

Practique.

En ce qu'il a dit que les coquilles petrifiées qui estoient esparſes par l'vniuers estoient venues de la mer és iours du deluge, lors que les eaux surmonterent les plus hautes montaignes, & comme

les eaux couuroient toute la terre, les poissons de la mer se dilatoyent par tout l'vniuers, & que la mer estant retiree en ses limites, elle laissa les poissons: & les poissons portans coquilles se sont reduits en pierre sans chager de forme. Voila la sentence & l'opinion de monsieur Cardan.

Theorique.

Pour certain voila vne fort belle raison, & ie ne scaurois croire que la verité ne soit telle.

Pratique.

Si est ce que tu n'as garde de me faire croire vne telle bauasse. Car il est certain que toutes especes d'ames ont quelque connoissance du courroux de Dieu & des mouuements des astres, foudres & tempestes. & cela se voit tous les iours és parties maritimes. Il y à plusieurs especes de volailles qui au parauant les tempestes aduenues en la mer se retirent és riuieres douces en attendant que les tormentes soyent pacifiées, & apres s'en retournent en la mer comme au parauant. Entre lesquels oyseaux il y en à vn genre qui sont blancs & grands comme pigeons, que lon appelle goilants, qui au temps de tempeste se scauent retirer és eaux douces. Lon voit communement les porcilles (qui est vn grand poisson) venir és costes de la mer au parauant la tempeste, qui est vn signe qui donne à connoistre aux habitans du pays que la tempeste est prochaine. Et quant est du poisson portant coquille, au temps de la tempeste ils s'at-

tachent

rachent contre les rochers en telle sorte que les vagues ne les sçauroyent arracher, & plusieurs autres poissons se cachent au fond de la mer, auquel lieu les vents n'ont aucune puissance d'esbranler n'y l'eau n'y le poisson. Voila vne preuue suffisante pour nier que les poissons de la mer se soyent espandues par la terre és iours du Deluge. Si Cardanus eust regardé le liure de Genese il eust parlé autrement: Car là, Moysé rend tesmoignage qu'és iours du Deluge, les abymes & ventailles du ciel furēt ouuertes, & pleut l'espace de quarante iours, lesquelles pluyes & abymes amenèrent les eaux sus la terre, & non pas le desbordement de la mer.

Theorique.

Mais d'ou vouldrois tu donc dire la cause de ces coquilles dedens les pierres, si ce n'est par le moyen que Cardanus a escrit?

Practique.

Si tu auois bien considéré le grand nombre de coquilles petrifiées, qui se trouuent en la terre; tu cōnoistras que la terre ne produit gueres moins de poissons portans coquilles, que la mer: comprenant en icelle les riuieres, fontaines & ruisseaux. L'on voit aux estangs & ruisseaux plusieurs especes de moules & autres poissons portans coquilles, que quand lesdites coquilles sont gettées en terre, si en icelle il y a quelque semence falcitiue elle se viendront à petrifier.

Theorique.

Je ne croyay jamais qu'en la terre se trouue presque autant de poissons portans coquilles que dens la mer, & l'on sçait bien qu'il n'y a endroit en la mer qui n'en soit tout remply, & que dens la terre ou és riuieres il n'y en peut auoir qu'en certains lieux bien rarement.

Practique.

Tu t'abuses de penser que par toutes les parties de la mer, il y ait des poissons portans coquilles: Car tout ainsi que la terre produit des plantes qui ne sçauroyent venir en vn pays comme en l'autre, ainsi que les orengiers, figuiers, palmiers, amandiers, & grenadiers, ne peuuent venir en tous pays: aussi en la mer il y a certaines contrées ou l'on pefche des maquereaux, autres contrées ou l'on pefche des harés, autres contrées des seiches, autres des maigres, & mesmes nous sommes contraints aller querir des moulûs és terres neuues. Tous poissons portans coquilles se tiennent près des limites de la terre, & viennent en partie des matieres salcitives, qui sont amenées des bords de la terre prochaine de la mer: Et encôres ne faut penser trouuer desdits poissons par tout les endroits des bordures de la mer. Il faut donc conclure qu'il y a quelques endroits ou les semences des poissons peuuent prendre nourriture, & autres non. Tout ainsi comme des vegetatifs. Je
n'en-

n'entends pas dire qu'il y a à present aussi grand nombre de poissons armez en la terre comme il y a eu autre fois. Car pour le certain les bestes & poissons qui sont bons à manger, les hommes les poursuuēt de si pres qu'en fin ils en font perdre la semence. J'ay veu plusieurs ruisseaux ou l'on prennoit grand nōbre de lamproyons, qu'à present l'on n'y en trouue plus. J'ay veu aussi autres ruisseaux ou l'on prenoit des escreuisses par milliers, là ou l'on n'en trouue plus. J'ay veu des riuieres ou l'on prenoit du saumon, & à present ne s'y en trouue plus. Et que la terre ou riuieres d'icelle ne produisent aussi bien des poissons armez comme la mer, ie le prouue par les coquilles petrifiées, lesquelles on trouue en plusieurs endroits par milliers & millions, desquelles j'ay vu grand nombre qui sont petrifiées, dont la semence en est perdue, pour les auoir trop poursuuies. Et est vne chose qui se void tous les iours, que les hommes mangent des viandes desquelles anciennement l'on n'en eust mangé pour rien du monde. Et de mon temps j'ay veu qu'il se fut trouué bien peu d'hommes qui eussent voulu manger n'y tortues n'y grenouilles, & à present ils mangent toutes choses qu'ils n'auoyent accoustumé de mager. J'ay veu aussi de mon temps qu'ils n'eussent voulu mager les pieds, la teste, n'y le ventre d'un moutō, & à present c'est ce qu'ils estiment le meilleur. parquoy ie maintiens q̃ les poissons armez & lesquels

sont petrifiez en plusieurs carrieres, ont esté engendrez sur le lieu mesme, pendât que les rochers n'estoyent que de l'eau & de la vase, lesquels depuis ont esté petrifiez avec lesdits poissons, comme tu entendras plus amplemēt cy apres, en parlant des rochers des Ardennes.

Theorique.

Par ce propos tu n'as rien fait contre l'opinion de Cardan : car tu n'as pas dit la cause de la petrification des coquilles.

Practique.

Aucunes ont esté ietées en la terre, apres auoir mágé le poisson, & estât en terre, par leur vertu salutiue ont fait attraction d'un sel generatif, qui estât ioinct avec celuy de la coquille en quelque lieu aqueux ou humide, l'affinité desdites matieres estants iointes à ce corps mixte ont endurcy & petrifié la masse principale. Voila la raison, & ne faut pas que tu en cherches d'autres. Et quant est des pierres ou il y à plusieurs especes de coquilles, ou bien qu'en vne mesme pierre, il y en à grande quantité, d'un mesme genre, comme celles du faubourg saint Marceau l'és Paris, elles là sont formées en la maniere qui sensuit, sçauoir est, qu'il y auoit quelque grand receptacle d'eau, auquel estoit vn nombre infini de poissons armez de coquilles, faites en limace pyramidale. Et lesdits poissons ont esté engendrez dens les eaux dudit receptacle, par vne lente chaleur, soit qu'elle soit

proue-

prouenue par le soleil au descouuert, ou bien par vne lente chaleur qui se trouue sous la terre, comme i'ay apperceu estant dens lesdites carrieres. Je mets ceste difficulté en auant, par ce qu'il y à vne veine de pierre esdites carrieres, laquelle n'est que cinq ou six piedz de profonds au dessous de la terre, laquelle veine contient autant que toutes les terres de ceste contrée là, & icelle n'a gueres qu'un pied & demy d'espoisseur, mais elle à grande estendue. La cause que ie pense estre la plus certaine est, qu'il y à eu autrefois quelque grand lac, auquel lesdits poissons estoient en aussi grand nombre que l'on y trouue leurs coquilles: Et parce que ledit lac estoit remply de quelque semence salcitiue & generatiue, iceluy depuis s'est congelé, a sçauoir l'eau, la terre & les poissons. Tu l'entendras mieux cy apres quand ie te parleray des pierres des deserts des Ardenes. Et voila pourquoy l'on trouue communement és rochers de la mer, de toutes especes de poissons portans coquilles. Il s'ensuit donc que apres que l'eau à deffailly ausdits poissons, & que la terre & vase ou ils habitoient s'est petrifiée par la mesme vertu generatiue des poissons, il se trouue autant de coquilles petrifiées dedans la pierre qui à esté congelée desdits vases, comme il y auoit de poissons en icelle, & la vase & les coquilles ont changé de nature, par vne mesme vertu, & par vne mesme cause efficiente. I'ay prouué ce point deuant

uant mes auditeurs, en leur faisant monstre d'une grande pierre que i'auois fait couper à vn rocher pres de Soubize, ville limitrophe de la mer: Lequel rocher auoit esté autrefois couuert de l'eau de la mer, & au parauant qu'il fut reduit en pierre, il y auoit vn grand nombre de plusieurs especes de poissons armez, lesquels estants morts dedens la vase, apres que la mer à esté retiree de ceste partie là, la vase & les poissons se sont petrifiez, la chose est certaine que la mer s'est retirée de c'este partie là, comme i'ay verifié, du temps qu'il y auoit sedition au pays de Xaintonge, lors qu'on y vouloit eriger la gabelle. Car en ces iours la ie fus commis pour figurer le pays des marez fallans, & estant en l'isle de Brouë, laquelle fait vne pointe vers le costé de la mer, où il y a encores vne tour ruinée. Les habitans du pays m'ont attesté que autrefois ils auoyent veu le canal du haure de Brouage venir iusques au pied de ladite tour, & que l'on auoit edifié ladite tour, pour garder d'entrer les pirates & brigands de mer, qui en temps de guerre venoyent bien souuent rafraichir leurs eaux à vne fôteine, qui estoit pres de ladite tour, & ladite tour s'appelle la tour de Broue à cause de l'isle ou elle est assise, laquelle se nomme Broue, dont le haure de Brouage à pris son nom. Et pour autant qu'il est au iourd'huy impossible d'aller le long du canal pour aprocher de ladite tour, l'on connoist par là que la mer s'est retirée
de

de celle contrée, & qu'elle peut auoir autant gagné en vn autre endroit: comme ainſi ſoit que pres la coſte d'Aluert, gueres loing du paſſage de Maumuiſſon, qui eſt ſi fort dangereux: & les habitans du pays diſent auoir paſſé autrefois de lieſſe d'Aluert en l'iſle d'Oleron, en ayant mis ſeulement vne teſte de cheual ou de bœuf à vn petit foſſé, ou autrement petit bras de mer, qui ſe ioingnoit des deux bouts à la grand mer. Et auioird'huy les nauires de quelque grâdeur qu'elles ſoyent, paſſent par la pour le plus court chemin de Bordeaux à la Rochelle, ou en Bretagne, en Flandres & en Angleterre: & au parauât il falloir tourner alétour de l'iſle d'Oleron. Voila vn teſmoignage cōment la mer ſe deminuant d'vne part, accroiſt d'autre part. Dont i'ay priſ teſmoignage que le rocher qui eſt tout plein de diuerſes eſpeces de coquilles à eſté autrefois vaſes marins, produiſâs poiſſons. Si aucuns ne le veulēt croire, ie leur mōſteray ladite pierre, pour couper broche à toutes diſputes. Et par ce qu'il ſe trouue auſſi des pierres remplies de coquilles, iuſques au ſommet des plus hautes mōtagnes, il ne faut q̄ tu penſes que leſdites coquilles ſoyēt formées, cōme aucuns diſent que nature ſe iouē a faire quelque choſe de nouueau. Quand i'ay eu de bien pres regardé aux formes des pierres, i'ay trouué que nulle d'icelles ne peut prendre forme de coquille ny d'autre animal, ſi l'animal meſme

mesme n'a basti sa forme : parquoy te faut croire qu'il y a eu iusques au plus haut des montaignes des poissons armez & autres, qui se sont engendrez dedens certains cassars ou receptacles d'eau laquelle eau meslée de terre & d'un sel congelatif & generatif, le tout s'est reduit en pierre avec l'armure du poisson, laquelle est demourée en sa forme. Et ne faut pas que tu m'allegues qu'il faudroit donc que l'eau des pluyes eust avec soy quelque substance salcitue & generatiue ; & ne faut point que tu doutes de ce : car si autrement estoit les crapaux & grenouilles, qui tombent bien souuent avec les pluyes ne pouroyent estre engendrez en laër ; d'autre part tu vois souuent des murailles bien hautes ; ou il y aura des arbrilleaux & herbages, qui n'auront esté produits ny engendrez sinon des semences & humeurs apportées par les pluyes, & si les pluyes n'apportoyent avec elles quelque substance generatiue, elles ne pouroyent aider à l'accroissement des semences, & mesmes les fruits arrousez d'une eau qui ne fut point salée, viendroyent soudain en pourriture. C'est la raison pourquoy ie t'ay dit que le sel est la tenue & mastiq generatif & conseruatif, de toutes choses : ien'ay pas pourtant dit que tous sels fussent poignans & mordicatifs : tu trouueras que toutes coquilles petrifiées sont plus dures que non pas la masse de la pierre ou elles sont, & ce pour cause qu'il y a plus de matiere salcitue. Or

com-

combien que par cy deuant i'aye assez desconfit
l'opinion de Cardan, sur le fait des pierres mon-
streuses, si est ce que ie suis deliberé de donner
plus amples preuues de mon opinion contraire à
la sienne, & ce d'autant qu'il y à bien peu d'hom-
mes qui ne disent avec luy que les coquilles des
poissons petrifiez, tant és montaignes qu'és va-
lees, sont du temps du Deluge, pour à quoy resi-
ster & prouuer le contraire, i'ay fait plusieurs figu-
res de coquilles petrifiées, qui se trouuent par mil-
liers és montaignes des Ardennes, & non seule-
ment des coquilles, ains aussi des poissons, qui ont
esté petrifiez avec leurs coquilles. Et pour mieux
faire entendre que la mer n'à point amené lesdi-
tes coquilles au temps du Deluge, ie te monstre-
ray presentement la figure d'un rocher qui est es-
dites Ardennes, pres la ville de Sedan, auquel ro-
cher & en plusieurs autres, il se trouue des coquil-
les de toutes les especes figurées en ce papier: de-
puis le sommet de la montaigne iusques au pied
d'icelle: combien que ladite montaigne soit plus
haute que nulle des maisons n'y mesme le clocher
dudit Sedan, & les habitans dudit lieu coupent
iournellement de la pierre de ladite montaigne,
pour bastir, & en ce faisant il se trouue desdites
coquilles aussi bien au plus bas cōme au plus haut.
voire encloses dedens les pierres les plus conti-
guës: ie puis asseurer en auoir veu d'un genre qui
contenoit seize poulces de diametre. Je deman-
de

de maintenant à celuy qui tient l'opinion dudit Cardanus, par quelle porte entra la mer pour apporter lesdites coquilles au dedens des rochers les plus contigus? Je r'ay cy dessus donné à entendre que lesdits poissons ont esté engédrez au lieu mesme ou ils ont changé de nature, tenans la mesme forme qu'ils auoyent estans viuans. Parquoy ie repeteray le mesme propos, disant que dedens les rochers susdits se trouuent plusieurs fosses, cōcauitez, & receptacles d'eau, qui entre par les fentes desdits rochers, descendant du haut en bas, & en descendant l'on connoist euidentement qu'elles se petrifiēt en la forme des eaux glacées, qui coulent du haut des montaignes en bas. Il faut donc conclure que au parauant que cesdites coquilles fussent petrifiées, les poissons qui les ont formées estoient viuans dedens l'eau qui reposoit dens les receptacles desdites montaignes, & que depuis l'eau & les poissons se sont petrifiez en vn mesme temps: & de ce ne faut douter. Es montaignes desdites Ardennes se trouue par milliers des moules petrifiées, toutes semblables à celles qui sont viuantes dens la riuiera de Meuse, qui passe pres desdites montaignes. I'ay contemplé autrefois les habitations des huistres de la mer Oceane: mais ie ne vis onques les huistres naturelles ne leurs coquilles en plus grande quantité qu'il s'en trouue en plusieurs des rochers d'Ardenne: lesquelles combien qu'elles soyent petrifiées,

fiées. Si est ce qu'elles ont esté animées, & cela nous doit faire croire qu'en plusieurs contrées de la terre les eaux sont salées, non si fort cōme celle de la mer Mais elles le sont assez pour produire de toutes especes de poissons armiez. Et faut croire ce que j'ay dit cy deuant, que tout ainsi cōme la terre produit des arbres & plantes, d'une espece en vne contrée, & en l'autre contrée elle en produit d'une autre espece : & comme aucuns champs produisent de la feuchere, & autres des yebles, & autres chardons & espines: aussi la mer produit des genres de poissons en vn endroit qui ne pouroyent viure en l'autre Il est certain que les huîtres, les moules, auailons, petoncles & sourdons & toutes especes de burgants, qui ont leur coquilles en façon de limace, toutes ces especes, dy-ie, se tiennent és rochers limitrophes de la mer, ce que les autres especes de poissons ne font pas. Ceux qui vont pescher les moules à trois ou quatre cēts lieuës me seront tesmoins de ce que j'ay dit. Et comme les orangiers, figuiers, oliuiers, & espiceries ne pouroyent viure és pays froids, en cas pareil les poissons ne vivent sinon és lieux là ou il a pleu à Dieu de ietter la semēce de leur generation & nourriture, comme ainsi soit que j'ay dit cy deuant qu'il a fait des semēces des metaux & de tous mineraux, & des vegetatifs iusques icy ie n'ay parlé que des coquilles petrifiées, & ainsi que ie cherchois & m'enquerois de toutes parts des lieux ou i'en pourois recouurer pour le tesmoignage

de mes conclusions, il me fut dit que au pays de Valois, pres d'un lieu nommé Venteul, il y auoit grande quantité de coquilles petrifiées, qui me causa me transporter sur ledit lieu, pres d'un hermitage ioignant la montaigne dudit lieu, auquel ie trouuay grand nombre de diuerses especes de coquilles de poissons, semblables à celles de la mer Oceane & autres. Car parmi icelles coquilles s'en treuue de pourpres & de buccines de diuerses grandeurs, bien souuent d'aussi longues que la iambe d'un homme, lesquelles coquilles n'ont point esté petrifiées, ains sont encores telles comme elles estoient quand le poisson estoit dedens, qui te doit faire croire qu'il y à autrefois eu des eaux en celieu là, qui produisoient les poissons qui ont formé lesdites coquilles: mais d'autant qu'il y à eu faute d'eau commune & d'eau generatiue la montaigne ne s'est peu lapifier ains est demeurée en sable, & si ladite montaigne se fut petrifiée comme celle des Ardennes & plusieurs autres, lesdites coquilles se fussent aussi petrifiées, & en quelque endroit que la roche eust esté coupée, icelles se fussent trouuées incastrees au dedens d'icelle roche, en pareille forme q̃ tu voids celles des carrieres de saint Marceau les Paris. Depuis auoir veu ladite montaigne i'ay trouué vne autre montaigne pres la ville de Soissons, ou il y à par milliers de diuerses especes de coquilles petrifiées, si pres à pres l'une de l'autre que l'on ne sçauoit rom-

rompre le roc d'icelle montaigne en nul endroit, que l'on ne treuve grande quantité desdittes coquilles, lesquelles nous rendent tesmoignage que elles ne sont venues de la mer, ains ont generé sur le lieu, & ont esté petrifiées en mesme tēps que la terre & les eaux où elles habitoyent, furent aussi petrifiées. Quelque temps apres que i'euz recouvert plusieurs coquilles & poissons petrifiez, ie fus d'avis de reduire ou mettre en pourtraiture ceux que i'auois trouué lapifiez, pour les distinguer d'avec les vulgaires, desquels l'vsage est à present commun: Mais à cause que le temps ne m'a voulu permettre, mettre en execution mon dessein lors que i'estois en telle deliberation, ayant differé quelques années le dessein sudit, & ayant tousiours cherché en mon pouuoir de plus en plus les choses petrifiées, en fin i'ay trouué plus d'especes de poissons ou coquilles d'iceux, petrifiées en la terre, que non pas des genres modernes, qui habitent en la mer Oceane. Et combien q' i'aye trouué des coquilles petrifiées d'huistres, sourdōs, auailons, iables, moucles, d'alles, couteleux, petoncles, chastaignes de mer, escreuices, burgaulx, & de toutes especes de limaces, qui habitent en ladite mer Oceane, si est ce que i'en ay trouué en plusieurs lieux, tant és terres douces de Xaintonge que des Ardēnes, & au pays de Champagne d'aucunes especes, d'esquelles le genre est hors de nostre connoissance, & ne s'en trouue

point qui ne soyent lapifiées: parquoy i'ay osé dire à mes disciples que monsieur Belon & Rondelet auoyent pris peine a descrire & figurer les poissons qu'ils auoyēt trouuez en faisant leur voyage de Venize, & que ie trouuois estrange de ce qu'ils ne s'estoyent estudiez a connoistre les poissons qui ont autrefois habité & genere abondamment en noz regions. desquels les pierres ou ils ont esté petrifiez en mesme temps qu'elles ont esté congelées, nous seruent à present de registre ou original des formes desdits poissons. Il s'en treuue en la Champagne & aux Ardennes de semblables à quelque especes d'aucuns genres de pourpres, de buccines, & autres grandes limaces, desquels genres ne s'en trouue point en la mer Occane, & n'en void on sinon par le moyen des nautonniers, qui en apportent bien souuent des Indes & de la Guinée. Voila pourquoy i'ay conneu qu'en plusieurs & diuers endroits des terres douces il y à eu autrefois habitation & generation desdits poissons, & ce d'autant, cōme i'ay dit, qu'il s'en trouue aucuns qui ne sont encores petrifiez, par ce qu'il ne le peuent auoir esté à cause que la terre ou ils viuoyent est encores terre, ou pour mieux dire fable. Mais les autre qui se trouuēt dedens les pierres des montaignes se sont petrifiez lors que le lieu ou ils habitoyent s'est congelé, sçauoir est, l'eau & la vase & tout ce qui y estoit, comme ie t'ay dit tant de fois, pour te le
mieux

mieux faire entendre. Tu verras en mon cabinet, que j'ay dressé pour cela, plusieurs formes desdits poissons, de ceux qui sont armez: par ce qu'il s'en trouue bien peu d'autres de putriez: à cause que les parties plus tendres se petrifient au parauant estre petrifiez: & qu'ainsi ne soit j'ay trouué plusieurs escailles ou armures de l'ocustes & escreuices petrifiées, qui estoient separées l'une d'auec l'autre, pour cause de la putrefaction, qui estoit suruenue en la chair, au parauant la petrification: toutesfois j'ay trouué aux montagnes des Ardennes de ces grands moules, qui habitent communement és estangs, que le poisson estoit aussi bien petrifié comme la coquille. Et par ce que nous sommes sur le propos des pierres il faut poursuyure premierement les formes d'icelles, & en cherchant la cause j'ay trou- *Des formes.* ué que le cristal prent sa forme dedens l'eau, & que autrement il n'y auroit aucunes formes de pointes n'y faces, comme l'on void qu'il se trouue audit cristal. Je trouue aussi que toutes marcasites & mineraux ayant quelque forme pentagone, triangulaire, quadrangulaire, ou hexagone, sont toutes formées au dedens de l'eau, cōme j'ay dit cy dessus, qu'il se trouue des pierres de mine de fer formées à pointes. Au dedens des carrieres ou l'on tire l'ardoise aux pays d'Aardēne, il se trouue dedens l'eau parmy les ardoises vne grande quantité de marcasites quarrées naturellement,

formées à quatre quarres, ou faces polies & égales en grandeur, & lesdites marcasites sont de couleur de fer ou de plomb, assez luisantes. l'en ay veu des autres qui ont sept ou huit faces formées naturellement comme les susdites. Il y à vn certain personnage qui m'à asseuré qu'il s'en trouue au pays de Languedoc & de Prouence, que chacunes desdites marcasites portoit en soy trente six faces diuisées par esgales parties. Or toutes ces formes ne se font n'y ne se peuuent faire sinon dedens l'eau. Nous voyons aussi que le sel qui est congelé dedens l'eau, si on le laisse congeler sans le mouuoir, il prendra quelque forme pentagone ou quadrangulaire, comme i'ay dit du salpestre. Mais quand est des cailloux & autres pierres particulieres, qui n'ôt aucune forme diuisée, elles prennent leur forme selon la forme du trou ou receptacle ou les matieres seront arestées & ou elles se congelent: Et de ce genre de pierre & cailloux, il s'en forme tous les iours: car quand ce vient sur la fin de l'esté, que les herbes, pailles & foin & autres herbages commencent à pourrir par les champs, les eaux des pluyes ramassent & font decouler le sel vegetatif, qui est esdites pailles & herbes & en tous vegetarifs qui seront consumez és chaleurs, & estant ainsi dissout & liquide en la terre, iceluy mesme cause la generation de nouuelles plantes & de pierres. Et ce genre de pierres se font communement selon la grandeur de la matiere

tiere, par fois grandes & par fois petites, & par fois aussi menues que sable selon le peu de matiere qui se presentera. Quant est des grandes pierres contigues i'en ay assez parlé des le commencement, il y à vne autre espece de pierres desquelles ont fait des meules pour aiguïser toutes especes de tranchans. Si tu regardes de bien pres & consideres la rudesse de ces pierres, tu trouueras qu'elles estoient premierement formées en sable, & apres que le sable à demeuré quelque temps en la terre, il est aduenue que par l'action des pluyes, ledit sable s'est embibé d'eaux & sels congelatifs, qui ont rassemblé & ioinct ensemble tous ces petits grains de sable en vne grande pierre, & d'autant que le sable est d'une eau plus pure que non pas la seconde generation de la pierre, c'est la cause pourquoy il est plus dur que non pas la masse seconde, & de la vient que ladite masse estant plus tendre, se mine & gaste en aiguïfant les ferremens: ainsi les grains de sable demeurent tousiours plus hauts, & les tancautez qui sont entre lesdits grains, causent vne aigreur & rudesse à la meule, d'ou vient sa puissance & action d'aiguïser les outils. Et ce qui m'a donné connoissance de ces choses est qu'un iour j'achetay un plein muid de sablon d'Estampes, & en le tamissant ou faisant ie trouuois plusieurs pierres formées dudit sablon, en telle sorte attachées l'une à l'autre par la liqueur seconde qui auoit mastiqué ledit sable,

que l'on voyoit euidentement que leſdittes pierres estoient formées dudit ſablon. Voila comment de degré en degré ie ſuis parueniu a la connoiſſance de ces choſes. Il y a vn autre gère de pierres qui ne tiennent aucune forme, ains ſont contigues comme les pierres des carrieres, & ce genre la ne peut eſtre engendré qu'il ne ſoit pour le moins auſſi dur que marbre. Ce ſont les pierres qui ſont engendrées des terres argileuſes, leſquelles ſont bien ſouuent reduictes en marbre, iaſpe, & en caſſidoinne, & autres telles pierres dures. Mais parce que i'ay vouloir de traiter a part les duretez, peſanteurs & couleurs, ie garderay ce propos pour en traiter quand le temps ſe preſentera, & pourſuyray à parler des formes, deſquelles i'ay bonne connoiſſance. Quant eſt du bois petrifié, il tient ſa forme comme au parauant : il y a pluſieurs eſpèces de fruiçts leſquels eſtans lapifiéz tiennent la meſme forme qu'au parauant : i'ay perdu vne poire petrifiée autant bien formée qu'elle eſtoit deuant auoir changé ſa ſubſtance. I'ay encores dans mon cabinet vne pomme de coing, vne figue, & vn naueau petrifié, tenant la meſme forme qu'ils auoyent auant qu'eſtre lapifiéz. Monsieur Race, chirurgien fameux & excellent m'a montré vn cancre tout entier petrifié, il m'a auſſi montré vn poiſſon petrifié & pluſieurs plantes d'une certaine herbe, auſſi petrifiée. I'ay veu auſſi pluſieurs chaſtaignes marines petrifi-

trifiées sans auoir rien perdu de leur forme. Il y à en la ville d'Angers vn maistre orfeure nommé Marc Thomaseau lequel ma monstre vne fleur reduite en pierre chose fort amirable, d'autant que l'on voit en icelle le desouz & desus des parties de la fleur les plus tenures & deliées. L'ay trouué vne miniere de terre argileuse en laquelle y à vn nombre infiny de pierres de marcasites, metaliques de plusieurs grandeurs, les vnes grandes comme la palme de la main, les autres comme iocondales & testons, lesquelles m'ont instruit en la philosophie beaucoup plus que non pas Aristote: Et c'est d'autant que ie ne puis lire en Aristote & iay bien leu ausdites marcasites & ay entendu par icelles que les matieres generatiues des metaux estoient fluides, liquides & aqueuses, & cela ay-ie conneu en contemplant leurs formes: d'autant qu'elles sont formées en telle sorte que si quelqu'un auoit ietté de la cire fondue en bas en assez bonne quantité, & comme la premiere seroit ietté en plus grande abondance que la seconde, & estant ietté tousiours en diminuant le premier iet, en se congelant seroit vne forme plus euasée que le second, & le second plus euasée que le tiers, & cela se feroit a cause de la diminution de la matiere. Car ie voyois, euidentement dedens lesdites marcasites que les gouttes qui tomboyent les dernieres monstroient vn signe de defaillance de matiere: Ce-

la ne se peut aisément entendre sans voir se la chommesme: parquoy tu la pouras venir voir en mon cabinet. Il y a beaucoup d'autres pierres qui sont formées selô le suget qu'ils ont pris, comme quelques autres pierres que i'ay veuës que l'on nomme pierre d'Aigle, Quelque chose que l'on en die, ie croy que ce n'est autre chose qu'un fruit lapifié, & ce qui iouë dedens est le noyau, qui estant amoindry quand on secouë ladicte pierre, ledit noyau frappe des deux costez d'icelle. Voila comment les pierres peuuent auoir diuerses formes par diuers suiets: lesquelles choses nous sont inconnues par faute d'y regarder. Plusieurs m'ont certifié qu'il y a vn lac à Rome nommé Thioli, duquel les eaux qui passent par les riuages d'iceluy s'attachent & congelent contre les herbages & autres choses pendâtes sur les bords desdits riuages, i'ay veu plusieurs desdittes pierres, qui ont esté apportées du lac susdit, qui sont fort blanches & belles, à cause des pores & cōcautez perçées & spongieuses & embrouillées par diuerses formes, q̃ les herbes leur ont causé. Je feray fin au propos des formes, & parleray de la cause des couleurs.

Il y a vn grand nombre de matieres qui causent les couleurs des pierres, & plusieurs d'icelles sont inconnues aux hommes: Toutesfois l'experience, qui de tout temps est maistresse des arts, m'a fait connoistre que le fer, le plomb, l'argent & l'antimoine, ne peuët faire autres couleurs que iaune.

Ayant

Ayant donc vne telle certitude ie puis asseuremēt dire , que plusieurs pierres iaunes ont pris leurs teintures de l'vn diceux mineraux: l'entens quand les eaux passent par des terres esquelles y à de la semence desdits mineraux, ayans apporté avec elles de ladicte substance, laquelle aura actionné en la couleur & en la congelation ; parce que toutes ces matieres metaliques sont falsitiues, & comme i'ay tant de fois dit, il ne se fait point de congelation sans sel ; aussi ladicte teinture à esté faite des le temps de l'essence de la pierre, au parauant que les matieres fussent endurcies. Je comprends entre les pierres iaunes, les pierres rares aussi bien que les communes, comme la Topasse. Je mets aussi au reng d'icelles le sablon, duquel il se trouue grande quantité de couleur iaune. Voila l'vne des causes des pierres iaunes. Il y a vne autre cause bien fort certaine & veritable, que les bois qui sont pourriz en terre, ayans rendu par dissolution & putrefaction le sel qui estoit en eux, & que les eaux & les matieres congelatiues (par vne defluxion qui se fait és temps de pluyes, le sel dudit bois, amenant avec soy sa teinture) causent la congelation & la couleur de quelque pierre, qui sera formée au premier receptacle, là où telle matiere fluide se viendra reposer: & de ce n'en faut douter. car ie sçay que le verre iaune, que l'on fait en Lorraine, pour les vitriers, n'est fait d'autre chose que d'un bois pourry, qui est vn tesmoignage de
ce

ce que ie dy , que le bois peut teindre le bois en iaune, si tu as regardé autrefois des ais, ou du plancher & autres pieces, & que le bois soit verd , & qu'ils soyent fraîchement siez , s'il vient à pleu- uoir dessus, tu verras que l'eau qui degoute vers la partie pendante sera iaune. Il y à aussi plusieurs es- peces d'herbes & plantes , qui peuuent teindre les matieres desquelles les pierres sont formées: en- tre les autres la paille d'auoyne à aueç soy vne teinture fort iaune. l'Absinthe Xaintonnie ha- sa teinture fort iaune: l'on sçait aussi que les tein- turiers se seruent d'une herbe qu'ils appellét Gàu- de, de laquelle ils font leurs iaunes.

*Des bleus ou
Azurs.*

Ie ne connois n'y plante, n'y mineral, n'y aucune matiere qui puisse teindre les pierres bleües ou a- zurées, que le saphre, qui est vne terre minerale, extraite de l'or, argent & cuiure, lequel à bien peu de couleur autre que grise, tirant vn peu sur le violet: toutes fois quand ledit saphre est fait vn corps auecques les matieres vitreuses, il fait vn a- zur merueilleusement beau: par là peut on con- noistre que toutes pierres ayans couleur d'azur, ont pris leur teinture dudit saphre. Et afin que tu ayes assurance certaine de ce que ie di, considere vn peu les pierres que l'on nomme lapis lazuli, les- quelles sont d'une couleur d'azur, autant viuë qu'il en est point au monde, & parmy lesdites pierres se treuuent plusieurs veinnes & petites esclincelles d'or, aussi se treuue en plusieurs endroits d'icelle
du

du verd ressemblant au chrysocolle des anciens, que nous appellons au iourd'huy borras. Ceux qui font auourd'huy ledit borras le font blanc, par quelque industrie qu'ils tiennent bien secrette. Le borras des anciens qu'ils nomment chrysocolle, estoit pris és canaux d'eau qui distilloit des minieres de cuiure & de saphre. Et d'autant que ie t'ay dit tant de fois qu'il y auoit du sel és metaux & que leur congelation estoit faite par la vertu dudit sel, tu as à presēt à noter ce point sur tous les autres, qui est que le chrysocolle ou borras n'estoit autre chose qu'un sel que les eaux auoyent pris en passant par les minieres d'airain: & les eaux douces des pluyes estāt sorties & acheminées hors des minieres ayāt attiré ledit sel, s'exaloyēt & s'estant axalées le fixe demeuroit, qui estoit le sel leq̃l se cōgeloit le long des canaux exterieurs, là ou les eaux l'auoyēt amené: estāt ainsi cōgelé on s'en seruoit à souder l'or & l'argent & le cuiure. Or note dōc q̃ ce chrysocolle n'estoit verd sinō à l'occasion du sel de coperose, qui auoit engēdré la miniere de cuiure. Ce n'estoit pas mō propos de parler en cest endroit des couleurs verdes, ains de celles d'azur: mais d'autant q̃ dedās le lapis lasuli, il se trouue du verd, ie ne pouuois eschaper que ie ne parlasse des deux ensēble. Par là tu peuz cōnoistre q̃ le saphre se prend dedēs les minieres d'or & de cuyure: Car s'il n'y auoit de l'or en la miniere dudit saphre, il ne se trouueroit pas dedēs le lapis, & si n'y auoit
du

du cuyure, il ne s'y trouueroit pas du verd. Voila comment les matieres sont colligées & comment de degré en degré les occasions se presentēt de produire tousiours la vertu des sels.

Theorique.

Il me semble que ton propos est fort loing de verité, & ce d'autant que tu dis que le saphre cause vne tant belle couleur au lapis, & toutesfois tu dis que ledit saphre n'à point la couleur viue ny belle: comment donques se pouroit faire cela? le saphre pouroit il bien donner ce qu'il n'à point?

Practique.

Pour certain ton argument est assez bien fondé: toutesfois ie suis bien certain que le verre d'azur se fait de saphre, & sçay bien aussi qu'au parauāt qu'il soit fondu avec les matieres vitreuses il n'à point de couleur: Aussi ie sçay bien que l'herbe salicor luy baille sa viue couleur: combien qu'il n'aye nulle couleur, non plus que le sel commun, c'est à dire il le fait fondre ou liquifier avecques le caillou ou sable: & sçay bien aussi que les trois matieres ensemble font vn fort bel azur, ie di apres que les matieres sont liquifiées, & de rechef endurcies & formées en telles formés des vaisseaux de verre que l'on les veut employer.

Theorique.

J'ay ici deux arguments à te proposer à l'encontre de ton dire, en premier lieu tu dis que le sel de salicor cause de faire deuenir le saphre en couleur d'azur

d'azur, & puis tu dis que cela se fait à force de feu. Voila donc commét le lapis, lazuli, ne peut prendre sa couleur par ces deux moyēs d'autant qu'au lieu ou ledit lapis est trouué il n'y à ny feu ny salicor.

Practique.

A ce ie respōd, que le sel de vitriol fait en la terre, ce que le salicor fait au feu des verriers. Quand à la decoction ce n'est pas chose estrange de voir faire plusieurs decoctions en la matrice de la terre. Car elle ce fait en toutes especes de pierres & metaux, & mesmes és terres argileuses, celles qui sont noires en vn temps deuient blanches en vn autre temps.

Theorique.

Et veux tu conclure par là qu'il n'y à aucune matiere qui puisse faire la couleur d'azur que le saphre?

Practique.

Ie n'en connois point d'autre.

Theorique.

Tu n'y entends donques rien: car on void bien que le lapis & le saphir sont de couleur d'azur bien viue, & toutesfois la Turquoyse tire plus sur l'azur que nulle autre couleur: ce neantmoins il y à grande difference: car elle tient vn peu de la couleur verde: d'autre part le saphir à vn corps diaphane, & la Turquoyse & le lapis ont vn corps tenebreux. Ie prouue par la que ces couleurs differentes ne se peuuent trouuer en vn mesme suiet.

Practique.

Practique.

Tu t'abuses : car la cause que le saphir est transparent & diaphane, c'est par ce qu'il à esté formé de matieres aqueuses, pures & nettes: mais il n'est pas ainsi du lapis: Car avec les matieres d'icelluy, il y à de la terre entremeslée, laquelle luy rend sa couleur obscure. Aussi ledit lapis en est beaucoup plus foible, comme l'on peut voir qu'il y à plusieurs veinnes, à l'endroit desquelles il ne peut prédre si beau polissement à l'un endroit cōme à l'autre : les petites veinnes d'or, & les parties verdes qui y sont rendét tesmoingnage q̃ les matieres de son essence estoyēt mal entremeslées. Quāt est de la Turquoise Il faut prédre le mesme argumēt, sçauoir est qu'il y a de la terre qui luy rend son corps tenebreux, & ce qui luy cause vn peu de verdeur n'est autre chose que quelq̃ substance de cuiure entremeslée avec les autres matieres. Voila cōment il faut tousiours donner l'honneur de toutes couleurs d'azur au saphre, cōme principal fondemēt, les pierres qui tiēnēt de couleur de pourpre sont de semblables matieres, sauf qu'il y à quelque espece de matiere rouge, qui fait tourner l'azur en couleur purpurée.

Theorique.

Tu dis ne cōnoistre aucune matiere qui puisse faire l'azur que le saphre, & toutefois il y à quelques vns qui en font avec du cuiure.

Practique.

Ce n'est pas selon nature s'ils le font, c'est par acci-

accident.

Theorique.

Et cōment pourois tu sōstenir qu'il n'y aye que le saphre qui puisse faire l'azur, attendu q nous voyōs tant de miliers de fleurs bleuës, & entre les autres flambe, de laquelle on fait de la couleur bleuë?

Pratique.

Tu respōds mal a propos: car ie te parle des couleurs des pierres & tu me respōds des couleurs de peintres. Il y à bien a dire des couleurs minéralles aux couleurs qui se font d'herbes: Car toutes celles qui se font d'herbes sont de peu de durée, cōme le saphran, le verd de vessie, le tournesol, & autres telles couleurs. Mais celles des pierres qui viennent des minieres, ou qui sont faites des metaux calcinez ne peuuent perdre leur couleur.

Theorique.

Quelque beau argumenteur que tu sois, si est ce que tu t'és pris à ce coup, en telle sorte que tu ne te sçauois iustificier: d'autant que par cy deuant tu m'as dit que les pierres iaunes pouuoient prendre leur tincture des bois pourris & de diuerses especes d'herbes, & à present tu dis tout le cōtraire.

Pratique.

Ce que i'ay dit est biē dit, & ne suis pas prest de m'en desdire. Quād ie t'ay dit que les pierres pouuoient estre teintes quelquefois de bois pourris & des herbes, ie ne t'ay pas dit que la pierre pouuoit estre teinte apres que les matieres sont endurcies: Mais bien t'ay-ie dit que lors que les
matie-

matieres sont liquides & fluentes qu'elles peuuent estre teintes de quelque bois ou espece d'herbes, & les matieres après estants endurcies peuuent retenir lesdites couleurs: & la cause pourquoy elles ne peuuent perdre leur couleur, comme celles des peintres, c'est par ce qu'elles sont encloses en la masse, & d'autant que l'air n'y le vent ne peut penetrer laditte masse, les couleurs y sont conseruées. Si tu interrogues les peintres sur le fait des couleurs qui sont faites d'herbes ils te diront qu'elles sont suiettes à s'esuenter, & pour mieux entendre ce fait considere vn doublet, tu trouueras aucuns lapidaires qui feront de fort belle couleur de ruby & de grenad, de quelque sang de dragon ou autre matiere, & ayant taillé deux pieces de cristall ils en teindront vne de ceste couleur rouge & puis mastiqueront l'autre dessus icelle, & ainsi ce rouge sera conserué en sa beauté entre les deux pierres, autrement il ne pouroit garder sa couleur. En pareille sorte les pierres naturelles gardent leurs couleurs encloses en icelles. I'ay encores à te proposer deux arguments sur ce fait, l'vn est quant ie t'ay dit que les couleurs des pierres se peuuent prendre quelque fois des bois & des plantes, ie ne t'ay pas parlé des fleurs: car les couleurs des fleurs sont de peu de durée, comme l'on voit que les roses, les œillets & autres fleurs, perdent leurs couleurs en vn instant: Mais il n'est pas ainsi des couleurs qui procedent des
bois

bois pourriz: Car ie t'ay dit cy dessus que le bois pourry sert à faire du verre iaune. C'est autant que si ie disois que la teinture du bois s'est fixée en sa putrefaction, & ne se peut perdre pour ceste cause, à l'extreme chaleur du fourneau, chose admirable. Semblablement il y peut auoir plusieurs simples, desquels la teinture se peut fixer. Or voycy a present le second argument qui est fort notable. Si tu me mets en auant que les teintures des vegetatifs ne peuuent estre fixes, ie t'allegueray ce que dessus, que le bois pourry fait le verre iaune. Et partant que tu ne te veuilles contenter d'vne telle preuue, ie te diray qu'entre toutes les pierres de couleur, il s'en trouuera bien peu desquelles la teinture soit fixe. I'ay fait calciner plusieurs fois du marbre noir, des caillous, & pierres noires, & autres de diuerses couleurs, comme iaspe, cassidoine, & marbre figurez: Mais ie n'en trouuay iamais que les couleurs ne se perdissent au feu: & combien que l'agate & cassidoine ne se peuuent calciner, ains se vitrifient, si est ce qu'estant examinées par le feu, elles perdent toutes leurs couleurs: parquoy il ne faut plus douter que les vegetatifs ne puissent donner quelque couleur en la matiere des pierres, au parauant qu'elles soyent endurcies, comme i'ay dit vn autrefois. Quant est des emeraudes, il ne faut point douter que les couleurs d'icelles ne soyent causées de la coperoze, c'est a dire de quelque eau pure, qui a passé par les

Q

minieres

minieres du cuiure & de copperose. Quand est des pierres noires, leurs teinture peut estre causée par diuers moyens & de plusieurs sortes. Nous auons plusieurs arbres desquels la teinture est noire, aussi bien comme des noix de galle, entre autres les noires, les aulnes ou vergnes, apportent teinture noire, & estant pourris en terre leur teinture peut estre retenue pour seruir quelquefois à la generation des pierres : pour le moins la terre là ou ils pourriront en sera teinte de noirs. I'ay aussi plusieurs fois cōtemplé que les pierres sont bien souuent de la couleur de la terre ou elles ont esté engendrées, & celles qui sont dedens les sables sont aussi bien souuent de la couleur des sables ou elles sont trouuées: Toutesfois il se trouue bien souuent des pierres blanches dedens les terres noires, & cela vient a cause que les matieres d'ou elles ont esté formées, ont changé de couleur en leur decoctiō, ce qui aduient bien souuēt à plusieurs mineraux, & generallyment à tous les fruits de la terre, lesquels ont autre couleur à leur maturité que non pas a leur commencement. Quand est des couleurs des marbres figurez, iaspes, porphyres, serpentins, & autres telles especes, leurs couleurs sont causées par diuers egousts d'eau qui tombent du haut de la terre, iusques au lieu ou lesdites pierres se forment: les eaux venant de plusieurs & diuers endroits de la terre en descendant elles apportent avec elles ces diuerses couleurs, qui

qui sont esdittes pierres. Car ainsi qu'une partie de l'eau, en passant, trouuera quelque miniere d'airain ou de copperoze, elle fera des taches verdes sus la pierre, tombât goutte a goutte sus icelle. Autres gouttes tomberont a mesme instant qui passeront par quelques minieres de fer, & tombans (comme i'ay dit) sur le receptacle ou ladicte pierre se formera, lesdittes gouttes se congeleront en jaune. Autres gouttes porteront autres couleurs diuerfes, qui causeront plusieurs figures ausdites pierres.

Theorique.

Si ainsi estoit comme tu dis, les figures seroyēt toutes rondes, comme le porphyre: mais quoy, nous voyons aux iaspes, marbes, & pierres mixtes, des figures faites par idees estranges: cela mōstre bien qu'elles ne se font pas par vne eau desgouttante, comme tu dis.

Practique.

Si tu eusses esté a mes leçons, tu eusses bien cōneu que ce que ie te dy est vray: car il y auoit plusieurs hommes vn peu plus sçauans que toy, ce neantmoïs ie leur fis connoistre que la verite est telle, que ie te dy, & n'y eust iamais homme qui me sçeut contredire. Vray est que pour leur faire entendre mon dire i'en fis vne figure en leur presence. Il est vray que si les gouttes qui tombent du haut en bas se congeloient soudain qu'elles sont tombées, elles ne feroient autre figure que ronde,

selon la grosseur de la goutte qui tomberoit: mais d' autant que la matiere qui se conglaçant fait quelques bossés, les matieres qui tombent de plusieurs endroits tout en vn coup, trouuant la place bossüe, sont contrains de se couler en la vallée: & ainsi que trois ou quatre pisseures d'eau diuerses en couleurs, tomberont sur vne bosse ou petite montaigne, elles seront contraintes se couler en bas, & en coulant feront chascune d'elles vne veine de la couleur qu'elles apporteront: & outre cela ainsi qu'elles descendront de vitesse, par la violence de leurs descentes, elles s'entremesleront en tournoyant comme deux riuieres qui se rencontrent, avec ce que vne autre descente, ou deux ou trois, se pourront faire tout a vn coup en ce mesme lieu, qui en se combatant ou contrepoussant l'vne l'autre, il ne faudront à faire des figures confuses. Quant est du porphyre ou autres pierres, qui ont les figures rondes, elles se peuuent faire à la cheuté des eaux, comme les gouttes tombent, & en tombant il y a plusieurs petites gouttes qui se separent d'avec les grandes, comme l'on voit audit porphyre. I'ay veu aussi du porphyre qui auoit esté fait par vn autre moyen, qui est que quelque terre sableuse, s'estoit congelée, & avec elle le sable qui y estoit. & quād on tailloit ledit porphyre les grains de sable qui estoient plus blans seruoient de moucheture. Pour connoistre comment le cassidoine & plusieurs especes de iaspes ont

ont prins leurs couleurs. Il faut chercher les terres argileuses, & l'on trouuera que plusieurs d'icelles ont les mesmes couleurs que le cassidoine. Il y en a aussi qui ont des figures semblables à l'agate. Je laisseray le reste adire lors que ie parleray d'icelles.

Theorique.

Tu m'as promis cy deuant de me dire la cause pourquoy les pierres sont plus dures les vnes que les autres, tu me ferois plaisir de m'en parler.

Practique.

C'est vn point bien aisé a prouuer: & pour ce faire ne t'enuoyeray sinon éscarrières de Paris, *La dureté des pierres.* desquelles les pierres sont tendres dessus, enuiron de dix ou douze pieds de profondeur, & lescdites pierres tendres sont appellées moilon, a cause qu'elles sont mal condensées: mais au dessous dudit moilon, il se trouue de la pierre que l'on appelle liais, laquelle est tellement condensée que lon en peut tirer des pierres de telle grandeur que l'on veut, & sont lescdites pierres fort dures, & en fait on communement des marches pour les escalliers, & aussi l'on en fait des couuertes sus les monuments. Ceste preuue te deuroit suffire: par ce que tu pouras contempler esdites pierres que la cause pourquoy elles sont plus dures dessous que dessus, n'est autre sinon que les eaux, qui passent au trauers des terres, descendent en bas, & ayant trouué le bas foncé de quelque terre argileuse, au trauers de laquelle les eaux n'ont sçeu passer

si promptement comme elles faisoient en haut, elles ont esté arrestées, & quand le premier liét à esté congelé il a seruy de vaisseau pour retenir les autres eaux, qui descendoient au trauers des terres, & par ce moyen lefdites pierres ont tousiours eu abondance d'eau, qui a causé qu'elles sont beaucoup plus dures que celles de dessus. Et te faut noter que celles de dessus ne sont tendres sinon par ce que les eaux n'y peuuent demeurer iusques a ce que la congelation soit paracheuée. Et ce deffaillement d'eau est pour deux causes principales, l'une est celle que i'ay dit, que les eaux descendent tousiours & delaisent la partie haute, l'autre est que la terre est alterée en esté, par la vertu du soleil, & de la vient qu'elle ne peut produire les pierres en leur perfection : & telles pierres superieures se pouroyent appeller marcaffites : par ce que au dessus des minieres metalique, & en plusieurs autres lieux, se treuve des metaux imparfaits, que l'on appelle marcaffites, à cause de leur imperfection. Et tout ainsi comme les pierres congelées és parties les plus basses & plus aqueuses, sont plus parfaites que les autres, aussi voit on que les metaux les plus parfaits se treuvent bien souuent dedens les eaux, lesquelles il faut pomper avec grand labeur. Il faut donc tenir pour chose certaine qu'il y a deux causes qui donnent la dureté aux pierres, l'une est l'abondance d'eau, l'autre est la longue decoction : car plusieurs pierres peuuent estre engendrées

gendrées d'eau, qui toutefois ne seront pas dures. Nous en auons vn fort bel exemple aux plâtrieres de Montmartre, pres Paris : car parmy icelles il se treuue certaines veines d'vn plâtre qu'ils appellent gif, ou miroirs, lequel se fend comme ardoise, aussi tenue que feuilles de papier, & est aussi cler que verre: Il est comme vne espee de talc, sa diafanité ou transparence nous donne bien a connoistre que la plus grand par de son essence n'est autre chose que de l'eau: toutesfois il se calcine, & lon en besongne tout ainsi que de l'autre plâtre. Il faut donc conclure par la, que la trop hastiue cōgelation ne peut souffrir endurcir les pierres : Et cela peut on connoistre és lieux là où ledit plâtre se treuue. Car c'est vn pays sableus, & les terres sont alterées, & en ce mesme endroit & ioingnant lesdites plâtrieres. Il y a certains rochers desquels les pierres sont fort legeres, tendres & tenantes à la langue, comme du boliarmeny, & lesdits Rochers sont for mal condensez. Voila comment ie prouue que les pierres ausquelles l'eau deffault trop tost, ne peuuent estre dures : pour bien connoistre vne pierre qui à eu faute d'eau en sa formation: au pays de Bigorre ne se trouue point de pierres, ains sont tous caillous durs : le pays est froid & fort pluuieux: & y a grande quantité de riuieres, à cause qu'il est fort pres des montaignes: parquoy en la formation des pierres dudit pays il n'y peut auoir faute d'eau : aussi sont ils contrains

de defaire leurs maçonneries de cailloux, qui ne se peuent tailler, à cause de leur dureré. Aux Ardenes les terres sont fort sableuses, & leurs pierrieres ne sont d'autres matieres que d'icelles terres: Mais par ce que le pays est fort pluuieux, les pierres sont fort dures, aigres & mal plaisantes: tellement que ceux qui bastissent sont contrains aller querir de la pierre tédre en France, pour tailler leurs iambages de cheminees, croisées, corniches, frises & architraves: car ils ne pouroyent former leurs moulures de la pierre du pays. Les pierriers qui la tirent sont tout au contraire de ceux de Paris: car ils ne prennent que le dessus, & quand ils ont osté la moins contiguë & qu'ils commencent à trouuer celle que les Parisiens nomment liais, ils sont contrains la laisser, à cause qu'elle est trop dure. Les pierrieres dequoy ie parle sont formées d'une sorte que l'on n'en voit gueres de semblables. Car apres que l'on a trouué vn lit de pierre de l'espeſſeur de pied & demi ou deux pieds, l'on trouue vn autre lit de sable, & toutes les pierres de ladite contrée sont ainsi faites, & le sable qui fait la ſeparation entre les lits des pierres, est aussi dur & aussi bien condensé que la pierre blanche qu'ils vont querir en France, pour tailler leurs fenestres: ce que ie trouue fort estrange, & ne puis croire autre chose sinon que ledit sable est commencé à petrifier. Dedens les forests desdites Ardenes il y a vn grand nombre de cailloux de plu-

plusieurs grosseurs & couleurs, lesquels se treuvent en plus grande quantité le long des ruisseaux qui passent par les vallées, par ce q̃ les eaux des pluyes qui descendent des montaignes amènent le sel des bois pourris aux ruisseaux desdites vallées, qui est encores vne preuue que les pierres & cailloux ne peuuent estre dures sans qu'il y ait abondance d'eau. Et communement les plus dures se trouuent és pays froids & pluuieux, cōme l'on voit par exemples aux mōts pyrenées, ou il se trouue de beau marbre. Il s'en trouue aussi à Dynan qui est pays froit & pluuieux. Aux montaignes d'Auuergne il se trouue du cristal, & tout cela ne se fait que par abondance d'eau & de froidure. L'on sçait bien que à Fribourg en Brisgot le beau cristal se trouue és montaignes ausquelles il ya de la nege presque en tout temps: & suyuant ce que i'ay dit du pays de Bigorre, qu'il ne s'y trouue que des caillouuz, par ce que le pays est pluuieux & froid, l'on peut dire le semblable d'une grande partie des contrées limitrophes des Ardennes, & principalement sur le chemin allant de Messieres à Anuers: chose plus merueilleuse que i'aye encores veue. Car le long de la riuere de Meuse au pays du Liege, ladite riuere passe entre des mōtaignes lesquelles sont d'une merueilleuse hauteur, elles sont formées la plus grande partie de matiere semblable aux cailloux blanc, & autre partie de gris & afin que tu n'entendes que la montaigne soit de
de

de diuers cailloux , ie di qu'vne grande montiagne ne fera qu'un caillou. Et ie di encores qu'il y en a plusieurs qui ne produisent ny arbres ny plantes : à cause de leur grand dureté elles sont inutiles : parce que lon ne les scauroit couper pour s'en seruir en bastiments , & au dessouz d'icelles bien auant souz terre, se trouue des carrieres d'ardoises : semblablement les maisons de Bigorre sont couuertes d'ardoise, comme celles des Ardennes : car elles se prennent communement és pays frais.

Theorique.

Et di moy ie te prie la cause des pesanteurs diuerses.

Practique.

Vn homme de bon iugement l'entendra assez par les causes que i'ay dit cy dessus. car la mesme chose qui cause la dureté , cause la pesanteur des pierres : parquoy tu peux connoistre que ce n'est autre chose que l'eau : car toutes pierres legeres, comme la croye, & certaines pierres blanches, ne sont legeres sinon à cause que l'eau leur à deffailli en leur formation, & à laissé lescdites pierres spongieuses & pleines de pores. Et qu'ainsi ne soit, prens vne pierre de croye & la mets tremper dens l'eau, apres l'auoir pesée, & estant trempee repoise la, tu trouueras par la pesanteur qu'elle est spongieuse, qui luy à causé boire beaucoup de laditte eau. si tu mets tremper vn caillou ou quelque piece de cristal, tu trouueras qu'il ne boira pas l'eau comme

comme la pierre legere. car il en a beu son soul en sa congelation.

Theorique.

Ie te prie de me dire la cause de la fixation des pierres. Car i'en voy aucunes qui sont suiettes à se calciner, & estant calcinees sont plus legeres quelles n'estoyent au parauant, & soudain que l'on y met de l'eau elles se rendent en poussiere, & autres se blanchissent & candident & liquifient, se tenans tousiours en vne mesme masse.

Prattique.

Il y à deux effects qui causent la fixation de plusieurs pierres, l'un est l'abondance d'eau & l'autre la longue decoctiō, & faut noter que toutes pierres qui se calcinent sont imparfaites en leur decoction. Voila en peu de parolles tout ce que ie te peux dire de la fixation des pierres. Il y à quelques contrées ou climats, là ou la malice du temps & vents impetueux, geles & froidures, causent quelque aigreur aux pierres & aux bois, comme nous voyons par les minieres de fer qui sont aux Ardēnes és terres du Duc de Bouillon. Car tout ainsi que i'ay dit q̄ les pierres dudit lieu sont aigres, rudes & mal plaisantes, semblablement le fer qui se fait és forges dudit pays est fort aigre, rude & frayable : & non seulement le fer se resent de l'air mal plaisant, mais aussi les bois qui sont és riuēs & limites des forests sōt, rudes, durs, suiēts à gauchir, mal aisez à mettre en besongne. Aussi les vignes
ne peu-

ne peuvent croistre audit pays, par ce qu'il y a bien peu d'esté. Les terres du Duc de Bouillon sont bien pourueues de mine de fer, mais ladite mine à les grains fort menus, & la faut chercher bas en terre, qui est tousiours confirmation de ce que j'ay dit des metaux, qui ne se peuuent venerer par feu. Tout ainsi qu'aucunes plantes & fruits viennent en vne contrée qui ne peuuent venir en vn autre, aussi en aucuns climats les pierres ne sont point semblables à celles d'un autre climat: comme aussi ne sont les terres argileuses.

Theorique.

Tu m'as baillé beaucoup de raisons des formes, couleurs, duretez & pesanteurs des pierres, lesquelles choses m'estoyent aisées à entendre lors que tu en faisois la monstre: Mais s'il me failloit à present instruire vn autre de ce que tu m'as m'osté, ie serois fort empesché, n'ayât aucunes preuves, comme tu auois lors que tu faisois les demonstrations: par quoy ie voudrois que tu m'eusses baillé en peu de parolles, quelques belle conclusion, comme tu as fait des metaux & de l'eau generatiue.

Practique.

S'il te souuiert des points que ie t'ay enseignez, tu te rememoreras que pour la derniere conclusion de l'effet des pierres, ie prouuois deuant mes auditeurs que la matiere principale de toutes pierres n'estoit autre que l'eau congelatiue, de laquelle

quelle le cristal & diamant & toutes pierres diafa-
nes sont composées. Et s'il te souuient, ne te mon-
strois-ie pas certaines pierres d'agate & autres,
qui estoient candides sur la partie superieure &
tenebreuses en la partie inferieure? ne disoy-ie
pas, avec preuues, que toutes les pierres tenebreu-
ses & coulourées, de quelque couleur que ce soit,
ne sont tenebreuses ny coulourées sinon par acci-
dent? qui est que les pierres desquelles sont les
meules pour esguiser les ferremens, sont rendues
tenebreuses à cause d'un sable qui est meslé parmi
l'eau congelatiue. Autres pierres sont rendues te-
breuses à cause de la terre qui est entremeslée par-
mi ladite eau. tu peux assez auoir entendu la cause
de ce, quand i'ay parlé des couleurs des pierres: &
pour te rememorer les preuues que i'ay alleguées
en mes leçons. Il te faut souuenir de ce que ie te
dis lors. Considere le Cristal qui est en la roche, &
tu connoistras que durant sa congelation la ma-
tiere d'iceluy estoit dedens les eaux, comme i'ay
dit plusieurs fois: & quand les eaux sont troublées
à cause des terres, la terre cherche tousiours le bas
comme la lie dens un poinçon de vin: & de la vient
que l'eau pure & l'impure se congelēt toutes deux:
mais la partie superieure sera de cristal pur & net,
& l'inferieure sera d'un cristal trouble. Autant en
est il comme ie t'ay dit des matieres metaliques.
lesquelles apportent tousiours avec elles, quelque
chose qui cause leur impurité.



DES TERRES D'ARGILE.

Theorique.

Vas si souvent allegué les terres argileuses, en parlant des fontaines & des pierres, & toutesfois ie n'ay point entendu de toy, que c'est que terre argileuse.

Practique.

I'ay ouy lire quelque liure d'un auteur, lequel en traitant des pierres & terres, dit que la terre d'argile a pris son nom d'un vilage qui se nomme Argis, & que par ce qu'en ce lieu furent faits les premiers vaisseaux de terre, l'on appelle depuis ce temps là toutes terres bonnes à faire pots, terre d'argille, tout ainsi que l'on appelle le boliarmeny qui se prend en France bolus armenus: combien qu'il ne fut iamais pris en Armenie. Toutesfois i'ay depuis entendu par quelques Latins que cela estoit faux, & que toute terre propre a faire vaisseaux s'appelle argille, à cause de son action tenante: & disent qu'argille veut dire terre grasse. Telles opinions m'ont causé double hardiesse d'en parler. car i'ay conneu par là en partie que les Latins & les Grecs peuuent aussi bien faillir que les François. Et qu'ainsi ne soit ils appellent la terre d'argille terre grasse: & tant s'en faut quelle soit grasse

grasse: car l'on prend de la terre d'argille pour degraisser, tesmoins les foulons de draps: & aucuns merciers en ont fait des trochisques à vèdre, pour degraisser. Il est bien certain que la terre d'argille n'a aucune affinité avec les choses grasses, & ne se peut non plus entremêler avec la graisse que fait l'eau avec l'huile. Et ce qui cause que la terre d'argille oste la graisse des draps, la raison n'est autre sinon que la graisse luy est aduersaire. Et tout ainsi comme le chaud chasse l'humide, la terre d'argille chasse la graisse du lieu ou elle est la plus forte.

Theorique.

Comment? voudrois tu donc que l'on nommast la terre des potiers sinon terre grasse? car ie sçay bien que le glus, qu'aucuns appellent besq, est composé de matieres grasses: aucuns le font de la pelure d'un arbre que l'on appelle houx: les autres prennent la grainne d'un certain brandon qui croit le plus communement sus les pommiers: laquelle est fort visqueuse: Aussi aucuns appellent ledit brandon besq. Or tous ces deux la sont bons à prendre des oyseaux, & quand on la manie il faut auoir les mains mouillées, autrement elle prendroit aux mains: & toutesfois quand les François & Latins parlent des terres argileuses ils disent que cest vne terre visqueuse, grasse & glueuse: & mesme aucuns ont escrit que la terre d'argille est vne terre tenante, glueuse & visqueuse.

Præ-

Practique.

Par tes propres paroles tu confesses que tous ceux qui parlent ainsi, l'entendent fort mal: par ce qu'il n'y à rien plus cōtraire aux matieres visqueuses que l'eau. Or la terre argileuse est toute composée de matiere aqueuse: parquoy se peuuent lier ensemble. La terre d'argile se dissout en l'eau, & toutes matieres visqueuses & oleagineuses y deuiennent plus dures. Il seroit beaucoup plus conuenable de la nommer terre pasteuse que non pas visqueuse: parce que la farine à faire la paste se destrempe avec l'eau comme la terre d'argille.

Theorique.

Et puis quelles sont toutes bonnes à faire vaisseaux, quelle difference y treuues tu?

Practique.

Entre les terres argileuses il y à si grande difference de l'une à l'autre qu'il est impossible à nul homme de pouuoir raconter la cōtrarieté qui est en icelles. Aucunes sont sableuses, blanches & fort maigres: & pour ces causes leur faut vn grand feu au parauant qu'elles soyent cuittes au debuoir. Tel le espee de terre est fort bonne à faire des creusets: par ce qu'elle endure vn bien grand feu, il y en à autres especes qui pour cause des substances metaliques qui sont en elles, se ployent & liquifient quand elles endurent grande chaleur. J'ay veu quelques fours de tuiliers que les arceaux estoient en telle sorte liquifiez que les voultres estoient
toutes

toutes pleines de formes pendantes comme tu vois les glaçons és goutieres des maisons durant les gélées. Il y en à d'autres especes que quand elles sont cuittes, soit en thuiles ou en briques, il faut que le maistre de l'euure se donne bien garde de tirer sa besongne du four, qu'elle ne soit bien refroidie: Et qui plus est, ceux qui en besongnent sont contraincts d'estouper tous les asprals de leurs fourneaux, soudain que leur besongne est cuite: par ce que si elle sentoit tant peu soit de vent en refroidissant, les pieffes se trouueroient toutes fêdues. Il y en à vne espece à Saugny en Beauuoisis, que ie cuide qu'en France n'y en à point de semblable. car elle endure vn merueilleux feu, sans estre aucunemēt offensée, & à ce bien là, de se laisser former autant tenue & deliée que nulle des autres: Et quād elle est extrememēt cuite elle prend vn petit polissement vitrificateif, qui procede de son corps mesme: Et cela cause que les vaisseaux faits de ladite terre tiennent l'eau fort autant bien que les vaisseaux de verre. Il y à autres especes de terres qui sont noires en leurs essence, & quand elles sont cuittes elles sont blanches comme papier. autres especes sont iaunes, & quād elles sont cuittes elles deuiennent rouges. Il y en à aucuns genres qui sont de mauuaise nature: par ce que parmy elles, il y à des petites pierres, que quand les vaisseaux sont cuits les petites pierres, qui sont dedens lesdits vaisseaux, sont reduittes en chaux.

& soudain qu'elles sentent l'humidité de l'aër se viennent à enfler, & font creuer ledit vaisseau à l'endroit ou elles sont encloses: & c'est pour cause que lescdites pierres se sont calcinées en cuisant: & par ce moyé plusieurs vaisseaux sont perdus quelque grand labeur que l'on y aye employé. Il y à autres especes de terres qui sont fort bonnes & endurent fort bien le feu: Mais elles sont si vaines & lasches que l'on n'en peut faire aucuns vaisseaux legers: par ce que quand l'on la veut former vn peu haut elle se laisse aller en bas, ne se pouuant soutenir. C'est vne regle generale que toutes terres argileuses & singulierement les plus fines sont sujettes à pèter au feu, au parauant qu'elles soyent cuittes: pour ces causes ceux qui en besongnent sont contrainct de mettre le feu petit à petit, afin de chasser l'humidité qui est dedens la besongne, tellement que si les pieces que l'on fait cuire sont espoisses, & qu'il y en ait quantité, il faudra tenir le feu quelque fois trois & quatre iours & nuits, & si la besongne est vne fois commécée à eschauffer, & que celuy qui conduira le feu s'endorme, & qu'il laisse refroidir sa besongne, au patauât qu'elle soit cuitte en perfection, il n'y aura nulle faute que l'euure ne soit perdue. Et par tel accident plusieurs thuiliers ont eu de grandes pertes. Il ne sera pas hors de porpos que ie te die vn autre secret fort estrange, qui est que plusieurs chafourniers ont aussi eu de grands pertes, par vn accident tout

sembla-

semblable : c'est que depuis que la pierre du four à chaux commence à eschauffer, iusques à auoir sa couleur rouge, & que la flambe aye commencé à passer entre les pierres, si celuy qui conduit le feu se vient à endormir, & qu'en feueillant il trouue que la flambe soit abbarue, & la chaleur en partie rabaissee au parauant que la pierre soit calcinee au degré requis. S'il venoit apres à recommencer à mettre du bois à son fourneau, & qu'il employast tout le bois des forests des Ardenes il ne luy est plus possible de faire remonter son feu, ne plus reduire sa pierre en chaux, ains à perdu tout ce qu'il y auoit mis. I'en ay congneu plusieurs qui sont deuenus pauures par tels accidens. Ceux qui besongnent impatientement de l'art de terre, perdent beaucoup bien souuēt par leurs impati en car s'ils ne chassent l'humeur exalatiue, qui est dedens la terre, petit a petit, & qu'ils veulent mettre le grand feu au parauant qu'elle soit ostee, il n'y a rien plus certain que le chaud & l'humide se rencontrant engendreront vn tonnerre, à cause de leur contraieté. Car ie sçay que les tonnerres naturels sont engendrez par la mesme cause, sçauoir est le chaud & humide: par ce qu'ils sont cōtraires, & ne peuuent habiter ensemble: car le feu (comme le plus fort) trouuant l'humide enclos dedens les parties de la terre, il le veut chasser violemmēt, comme son ennemy, & l'humide estant pressé de trop pres veut fuir en diligence: mais d'autant que

le feu ne luy donne pas le loisir de trouuer les petites portes, par ou il estoit entré, il est contraint de s'enfuir, & en s'enfuyant il fait creuer & casser les pieces ou il est enclos. P'ay veu autrefois que aucuns tailleurs d'images, instruits en l'art de terre par ouyr dire seulement, & assez nouueaux en la connoissance des terres, qu'apres auoir fait quelques images ils les venoyent mettre dedens les fourneaux, pour les cuire, selon qu'ils l'entendoient: Mais quand il commençoient à mettre le grand feu, c'estoit vne chose assez plaisante (cōbien qu'il n'y eut pas a rire pour tous) d'entendre ces images peter & faire vne baterie entr'eux comme vn grand nombre d'harquebusades & coups de canon, & le pauvre maistre bien fâché, comme vn homme à qui on rauiroit son bien: car le iour venu pour desenfourner les images, le four n'estoit pas si tost descouuert qu'il aperceuoit les vns la teste fenduë, les autres les bras rompus & les iambes cassées, tellement que le pauvre hōme ayant tiré ses images estoit bien empesché & auoit bien de la peine à chercher les pieces: car les vnes estoient aussi petites que mouches, & ne les pouuant rassembler estoit contraint bien souuent faire des nez de drapeau ou autre matieres à s'esdites images. Les hommes experimentez en l'art de terre ne besongnent pas ainsi inconsiderement, ains premierement, ils tachent de connoistre le naturel de la terre, & apres l'auoir connue, ils conside-

rent

rent l'espaisseur de la besongne qu'ils veulent faire cuire, ayant connoissance que la plus espaisse est la plus dangereuse à se creuer au feu: Aussi ils se donnent bien garde de la cuire qu'elle ne soit bien sèche. Et quand elle est dedens le four ils baillent le petit feu plus longuement à la besongne espesse, que non pas à la tenue: & en donnant le feu petit à petit ils donnent loisir à l'humide de sortir à son aise & sans violence: Et quant le maistre connoist que l'humide a quitté sa place, il donne congé au feu d'entrer avec telle violence que bon luy semblera, & lors il se vient esgayer & entrer avec toute liberté, mesme iusques à l'interieur de toutes les parties closes & fermées au dedens des pieces d'ouvrages, formées de ladicte terre: & par tel moyen l'on peut connoistre qu'en la terre argileuse y a deux humeurs, l'une euaporatiue & accidentale, & l'autre fixe & radicale: l'humide & accidentale est suierte à s'euaporer & estant euaporée, la radicale transinue la substance de terre en pierre: Toutes fois sans que premieremēt l'humide y besongne, cela ne se pouroit faire: car il faut necessairement que l'humide rassemble toutes les parties, & qu'il serue de mastic pour former toutes sortes d'ouvrages.

Il y a aucunes especes de terres auxquelles il ne faut pas tenir longuement le petit feu; Telles terres sont communement grosses, sableuzes & spōgieuses: & par ce qu'elles ont les pores ouuerts,

l'humide s'exale plus promptement, estant chassé par le feu. Il y a autres terres qui sont si alises, ou si peu poreuses que pour ces causes ceux qui en besongnent sont contrains d'y mettre du sable, pour obuier au long temps qu'il faudroit tenir le petit feu, pour garder de casser la besongne. La cause pourquoy le sable peut faire que la piece endurera plustost le grand feu, que quand la terre sera pure, est qu'il fait diuision des subtiles parties de la terre: & d'autant que sa subtilité la rendoit plus alise & reserrée, le sable luy cause quelques pores par lesquels l'humide s'exale plus promptement pour donner place au feu, son aduersaire. Pour ces causes les potiers de Paris mettent du sable à toutes leurs besongnes: aupres de Paris il y a de trois sortes de terres argileuses, la plus fine se prend à Gentilly, qui est vn village prez dudit lieu. Mais il y à certains endroits là où parmy ladite terre se trouue grand nombre de marcaissites metaliques & sulphurees, qui causent que lesdits potiers n'en veulent point, sinon pour faire de la brique, ou de la tuille. La cause pourquoy ils n'en veulent point faire de bonne besongne, est parce qu'en cuisant leur ouurage lesdites marcaissites rendent vne vapeur noire & puante, laquelle noircit tout l'ouurage qui est couuert de iaune & de verd. Il y a vne autre espee de terre à vn village pres Paris nommé Chaliot, de laquelle lon fait la tuille: elle est vn peu plus grosse que celle de Gentilly: il se trouue dedens

dedens icelle vn grand nombre de marcaffites, qui
toute fois font d'autre genre que celle de Gentilly.
Je te dy ces chofes pour te faire mieus entendre
que fi en fi peu de pays il fe trouue de diuerfes ef-
peces de terre, que cela te foit argument de te fai-
re croire qu'en la grandeur d'un Royaume il y en
peut auoir vn grand nombre de bien differentes.
Je n'ay pas conneu la difference des terres & leurs
diuers effets fans grans frais & labeurs. J'auois
quelque fois recouuert de la terre de Poitou, &
auois trauaillé d'icelle bien l'efpace de fix mois au
parauant que d'auoir ma fournée complete: par-
ce que les vaiſſeaux que i'auois faits eſtoient fort
elabourez, & d'afſez haut pris. Or en faiſant leſdits
vaiſſeaux de la terre de Poitou i'en fis qu'elques
vns de la terre de Xaintonge, de laquelle i'auois
beſongné pluſieurs années au parauant, & eſtois
afſez experimenté au degré du feu qu'il falloir a
ladite terre, & pēſant que toutes terres ſe peuſſent
cuire à vn meſme degré. Je fis cuire ma beſongne
qui eſtoit de terre de Poitou parmy celle de terre
de Xaintonge, qui me cauſa vne grande perte: d'au-
tant que la beſongne de terre de Xaintonge eſtāt
afſez cuitte, ie penſois que l'autre le ſeroit auſſi:
mais lors que ie vins à eſmaller mes vaiſſeaux,
iceux ſentant l'humidité, ce fut vne riſée mal plai-
ſante pour moy: parce qu'autant de pieces que
lon eſmailloit vindrent à ſe diſſoudre & tomber
par pieces, comme ſeroit vne pierre de chaux

trémpée dedens l'eau, & toute fois les vaisseaux de la terre de Xaintonge estoient cuits dans le mesme four, & d'un mesme degré de chaleur, & en mesme heure que les susdits, & se portoyent fort bien. Voila comment vn homme qui besongne de l'art de terre, est tousiours apprentif à cause des natures inconnuës és diuersitez des terres. Il y a des terres argileuses que combien qu'elles ayent receu vne cuisson raisonnable, & autant de feu qu'il leur en faut, si est ce que si les vaisseaux de telle terre sont moulléz, & que l'on les presente deuant le feu, ils se casseront comme s'ils n'estoyent pas cuits: ce qui n'auient point aux autres terres. Il y en a de certaines especes qui sont si visqueuses & si tres fines, qu'elles se laisseront allonger comme vne corde. L'ay veu des femmes besongner d'une telle terre, que pour faire des anses de pots, prenoient vne poignée d'icelle, & la tenant par vn bout d'une main, de l'autre main elles l'allongeoient autant longue qu'elles pouuoient leuer les bras en haut: & quand cela estoit fait elles laissoient aller vn bout pendant vers le bas, sans que laditte terre se rompist, & puis elles les mettoient par monceaux, pour faire leurs dittes anses. Cela ne se peut pas faire des terres sableuses: par ce qu'elles sont toutes courtes & vaines. Il y a autres especes de terres fort malignes: car quand elles sont vn peu trop cuittes elles sont suiettes a se brusser, noircir, & fendiller, & les vaisseaux qui
sont

sont dessous, pressez de la pesanteur de ceux qui sont dessus se ployent & tordent la geule comme s'ils estoient d'une matiere maleable. Il y a des terres argileuses vers les Ardennes, qui sont fort humides ou longues a seicher, dangereuses à brusler lesquelles tiennent quelque substance de mine de fer. I'en ay trouué quelque fois d'une espeece qui estoit fort nette, subtile & deliée, ayant apparence d'estre fort bonne: tellement que pour l'esperance que j'auois de m'en seruir i'en formay quelques pieces, & le mis au plus chaut du fourneau: mais quand ie vins à chercher mes pieces ie trouuay qu'elles estoient fondues, & laditte terre auoit coulé le long des cendres, comme plomb fondu. Il se trouue des vaisseaux antiques d'une terre rouge qui est polie, sans aucun email, & aucuns appellent les vaisseaux de laditte terre, vaisseaux de barc. Je ne sçay pour quelle cause ils les appellent ainsi: mais bien sçay-ie qu'anciennement ils estoient en grand vsage. Car l'on en trouue grande quantité de pieces rompues aux villes antiques: & plusieurs fois s'en est trouué dans des sepulchres avec des monoyes des Empereurs qui regnoient pour l'ors, & cela se faisoit par quelque ceremonie, qui depuis à esté laissée. Si ie voulois escrire toutes les diuersitez des terres argileuses, ie n'aurois iamais fait: tu en pouras auoir plus grande connoissance en traitant de l'art de terre: parquoy ie n'en parleray plus pour le present.

DE



DE L'ART DE TERRE, DE SON
vtilité, des esmaux & du feu.

Theorique.



V m'as promis cy deuant de m'apprendre l'art de terre: & lors que tu me fis vn si long discours des diuersitez des terres argileuses, ie fus fort resiouy, pensant que tu me voulusses monstrier le total dudit art: mais ie fus tout esbahy qu'au lieu de poursuyure tu me remis a vne autre fois, afin de me faire oublier l'affection que j'ay audit art.

Practique.

Cuides tu qu'vn homme de bon iugement vueille ainsi donner les secrets d'vn art, qui aura beaucoup cousté à celuy qui l'aura inuēté? Quant a moy ie ne suis deliberé de ce faire que ie ne sçache bien souz quel titre.

Theorique.

Il n'y a donques en toy nulle charité. Si tu veux ainsi tenir ton secret caché, tu le porteras en la fosse. & nul ne s'en ressentira, ainsi ta fin sera maudite: Car il est escrit qu'vn chacun selon qu'il a receu des dons de Dieu qu'il en distribue aux autres. par ainsi ie puis conclure que si tu ne me monstres ce
que

que tu sçais de l'art susdit, que tu abuses des dons de Dieu.

Practique.

Il n'est pas de mon art, ny des secrets d'iceluy comme de plusieurs autres. Je sçay bien qu'un bon remede contre vne peste, ou autre maladie pernicieuse, ne doit estre celé. Les secrets de l'agriculture ne doyuent estre celez. Les hazards & dangers des nauigations ne doyuent estre celez. La parole de Dieu ne doit estre celée. Les sciences qui seruent communément a toute la republique ne doyuent estre celées. Mais de mon art de terre & de plusieurs autres arts il n'en est pas ainsi. Il y a plusieurs gentilles inuentions lesquelles sont contaminées & mesprisées pour estre trop communes aux hommes. Aussi plusieurs choses sont exaltées aux maisons des Princes & seigneurs, que si elles estoient communes lon en feroit moins d'estime que de vieux chaudrons. Je te prie considere vn peu les verres, lesquels pour auoir esté trop cōmuns entre les hōmes sont deuenuz a vn pris si vil que la plus part de ceux qui les font viuēt plus mechaniquement que ne font les crocheteurs de Paris. L'estat est noble, & les hommes qui y besongnēt sont nobles: mais plusieurs sont gentils hommes pour exercer ledit art, qui voudroyent estre roturiers & auoir dequoy payer les subsides des Princes. N'est ce pas vn malheur aduenu aux verriers des pays de Perigord, Limosin, Xaintonge,

Sciences & secrets qui doyuent estre diuulgez à tous.

Choses communes, sont mesprisées, et les rares sont estimées.

An-

*Inuentions
seues secretes
causent
preiſils.*

Angoulmois, Gascongne, Bearn & Bigorre ? auxquels pays les verres sont mechanizez en telle sorte qu'ils sont venduz & criez par les vilages, par ceux mesmes qui crient les vieux drapeaux & la vielle ferraille, tellement que ceux qui les font & ceux qui les vendent trauaillēt beaucoup a viure. Cōsidere aussi vn peu les boutōs d'esmail (qui est vne inuention tant gentille) lesquels au commencement se vendoyent trois francs la douzaine. Or d'autant que ceux qui les inuenterent ne tindrent leur inuention secrette, vn peu de temps apres la conuoitise du gain, ou l'indigence des personnes fust cause qu'il en fut fait si grande quantite qu'ils furent contrains les donner pour vn solz la douzaine, tellement qu'ils sont venus a tel mespris qu'aujourd'huy les hōmes ont honte d'en porter, & disent que ce n'est que pour les belistres, par ce qu'ils sont à trop bon marché. As tu pas veu aussi les esmailleurs de Limoges? lesquels par faute d'auoir tenu leur inuention secrette, leur art est deuenu si vil qu'il leur est difficile de gagner leur vie au pris qu'ils donnēt leurs entres. Je m'asseure auoir veu donner pour trois sols la douzaine de figures d'enseignes que l'on portoit aux bōnets lesquelles enseignes estoient si biē labourées & leurs esmaux si bien parfondus sur le cuiure, qu'il ny auoit nulle peinture si plaisante. Et n'est pas cela seulement aduenu vne fois, mais plus de cent mil, & non seulement esdittes enseignes, mais aussi aux esguiercs.

eres, salieres, & toutes autres especes de vaisseaux, & autres histoires, lesquelles ils se sont aduisez de faire : chose fort a regretter. As tu pas veu aussi combien les imprimeurs ont endomagé les peintres & pourtrayeurs sçauans? i'ay souuenance d'auoir veu les histoires de nostre dame imprimées de gros traits apres l'inuention d'un Alemand nommé Albert, lesquelles histoires vindrent vne fois à tel mespris, a cause de l'abondance qui en fut faite, qu'on donnoit pour deux liars chacune desdites histoires, combien que la pourtraiture fut d'une belle inuention. Vois tu pas aussi combien la moulerie a fait de dommage a plusieurs sculpteurs sauas, a cause qu'apres que quelqu'un d'eux aura demeuré long temps a faire quelque figure de prince & de princesse ou quelque autre figure excelente, que si elle vient à tomber entre les mains de quelque mouleur il en fera si grande quantité que le nom de l'inuenteur ny son euure ne sera plus connue, & donnera on a vil pris lesdites figures a cause de la diligence que la moulerie a amenée, au grand regret de celui qui aura taillé la premiere piece. I'ay veu vn tel mespris en la sculpture, à cause de laditte moulerie, que tout le pays de la Gascongne & autres lieux circonuoisins estoient tous pleins de figures moulées, de terre cuite, lesquelles on portoit vendre par les foyres & marchez, & les donnoit on pour deux liards chascune dont aduint que du temps que lon commençoit à por-

a porter des ceintures & autres habits a la busque; il y eut vn homme lequel fut emprisonné & eut le fouët, a cause qu'il alloit par toute la ville de Tolouze avec vne balle pleine de crucifix criant crucifix, crucifix a la busque. Tu peux aisément connoistre par ces exemples & par vn millier d'autre semblables, qu'il vaut mieux qu'un homme ou vn petit nombre facent leur proufit de quelque art, en viuant honestement, que non pas si grand nombre d'hommes, lesquels s'endômageront si fort les vns les autres, qu'ils n'aurent pas moyen de viure, sinon en profanant les arts, laissant les choses à demy faites, comme lon voit communement de tous les ars, desquels le nombre est trop grand. Toutesfois si ie pensois que tu gardasses le secret de mon art aussi precieux comme il le requiert, ie ne ferois difficulté de te l'enseigner.

Theorique.

S'il te plaist de me l'apprendre ie te promets de le tenir aussi secret qu'un homme a qui tu le pourrois enseigner

Practique.

Ie voudrois faire beaucoup pour toy, & te voudrois auancer d'aussi bon cueur que mon propre enfant: mais ie crains qu'en te monstrant l'art de terre ce seroit plustost te reculer que t'auancer. La raison est parce que tu as besoing de deux choses, sans lesquelles il est impossible de rien faire de l'art de terre. La premiere est qu'il faut que tu sois veuillant, agile, portatif & laborieux. Secondement il te faut

Ce qui est requis à l'ouurier de terre.

faut auoir du bien , pour soustenir les pertes qui suruiennent en exerçant ledit art. Or d'autant que tu as indigence de ces choses ie te conseille de chercher quelque autre moyen de viure , qui soit plus aisé & moins hazardeux.

Theorique.

Ie cuide que ce qui te fait dire ces choses n'est pas pour pitié que tu ayes de moy: Mais c'est qu'il te fache de tenir ta promesse & de me reueler les secrets dudit art. Qu'ainsi ne soit ie sçay que quád premieremét tu te mis à chercher ledit art, tu n'auois pas beaucoup de biens , pour supporter les pertes & fautes que tu dis qui peuuent suruenir au labour dudit art.

Practique.

Tu dis vray, ie n'auois pas beaucoup de biens: Mais i'auois des moyens que tu n'as pas. Car i'auois la pourtraiture. L'on pensoit en nostre pays que ie fusse plus sçauant en l'art de peinture que ie n'estois, qui caufoit que i'estois souuent appellé pour faire des figures pour les proces. Or quand i'estois en telles commissions i'estois tresbien payé, aussi ay ie entretenu long temps la vitrerie, iusques à ce que i'aye esté assuré pouuoir viure de l'art de terre: aussi en cherchant ledit art i'ay appris a faire l'alchimie avec les dents, ce qu'il te feroit beaucoup de faire. Voila comment i'ay eschappe le temps que i'ay employé a chercher ledit art.

Theo-

Je ſçay que tu as enduré beaucoup de pauuretez & d'ennuis en le cherchant: mais il ne ſera pas ainſi de moy: car ce qui t'a fait endurer, ce à eſté à cauſe que tu eſtois chargé de femme & d'enſans. Or d'autant que au parauant tu n'en auois nulle connoiſſance, & qu'il te failloit deuiner, par ce auſſi que tu ne pouuois laiſſer ton meſnage pour aller apprendre ledit art en quelque boutique, auſſi que tu n'auois moyen d'entretenir aucuns ſeruiteurs qui te peuſſent faire quelq̃ choſe pour t'amener au chemin de l'art ſuſdit. Tous ces defauts t'ont cauſé les ennuis & miſeres ſuſdites. Mais il ne ſera pas ainſi de moy: par ce que ſuyuant ta promeſſe tu me donneras par eſcrit tous les moyens d'obuiuer aux pertes & hazards du feu: auſſi les matieres dont tu fais les eſmaux & la doſe, meſures & compositions diceux. Ainſi faiſant pourquoy ne feray ie de belles choſes ſans eſtre en danger de rien perdre, attendu que tes pertes me ſeruiront d'exemple pour me garder & guider en exerçant ledit art.

Practique.

Accidens qui ſeruiſſent à ceux qui travaillent en l'art de terre & eſmaux.

Quand i'aurois employé mille rames de papier pour t'eſcrire tous les accidens qui me ſont ſuruenus en cherchant ledit art, tu te dois aſſeurer que quelque bon eſprit que tu ayes qu'il t'auendra encor~~es~~ vint millier de fautes, leſquelles ne ſe peuuent apprendre par lettres: & quand tu les aurois meſme par eſcrit, tu n'en croiras rien iuſques à ce que

que la pratique t'en aye donné vn millier d'afflictions. Toutesfois afin que tu n'ayes occasion de m'appeller menteur, ie te mettray icy par ordre tous les secrets que i'ay trouué en l'art de terre, ensemble les compositions & diuers effects des esmaux: aussi te diray les diuersitez des terres argileuses, qui sera vn point lequel il te faudra bien noter. Or afin de mieux te faire entendre ces choses, ie te feray vn discours pris des le commencement que ie me mis en deuoir de chercher ledit art, & par la tu orras les calamitez que i'ay endurées au parauant que de paruenir à mon dessein. Je cuide que quand tu auras bien entendu le tout qu'il te prendra bien peu d'enuie de te ietter audit art, & m'asseure que d'autant que tu és a present desirieux de t'en approcher, d'autant tascheras tu à t'é esloinger: par ce que tu verras que l'on ne peut *Rien n'est* pour suiure n'y mettre en execution aucune chose, *fait d'excellēt* pour la rendre en beauté & perfection, que ce ne *sans grand la-* soit avec grand & extreme labour, lequel n'est ia- *beur.* mais seul, ains est tousiours accompagné d'un millier d'angoisses.

Theorique.

Ie suis homme naturel comme toy, & puis que les choses t'ont esté possibles sans auoir eu aucun enseigneur, il me sera beaucoup plus aisé quand i'auray obtenu de toy vn entiers discours de toute la maniere de faire, & les moyens par lesquels tu y és parueniu.

S

Practi-

Parctique.

Suyuant ta requeste, saches qu'il y a vint & cinq ans passé qu'il me fut monstré vne coupe de terre, tournée & esmaillée d'une telle beauté que deslors i'entray en dispute avec ma propre pensée, en me rememorant plusieurs propos, qu'aucuns m'auoyent tenus en se moquant de moy, lors que ie peindois les images. Or voyant que l'on commençoit à les delaisser au pays de mon habitatiō, aussi que la vitrerie n'auoit pas grand requeste; ie vay penser que si i'auois trouué l'inuention de faire des esmaux que ie pourois faire des vaisseaux de terre & autre chose de belle ordonnance, par ce que Dieu m'auoit donné d'entendre quelque chose de la pourtraiture, & deslors sans auoir esgard que ie n'auois nulle connoissance des terres argileuses, ie me mis a chercher les esmaux, comme vn homme qui taste en tenebres. Sans auoir entendu de qu'elles matieres se faisoient lesdits esmaux: ie pilois en ces iours là de toute les matieres que ie pouuois penser qui pouroyent faire quelque chose, & les ayant pilées & broyées i'achetois vne quantité de pots de terre, & apres les auoir mis en pieces ie mettois des matieres, que i'auois broyées, dessus icelles, & les ayant marquées ie mettois en escrit a part les drogues que i'auois mis sus chacune d'icelles, pour memoire; puis ayant fait vn fourneau a ma fantasie, ie mettois cuire lesdittes pieces pour voir si mes drogues

*L'auteur a
appris de soy
l'art de terre.*

*Discours de
l'auteur, de
la facon qu'il
a appris a
faire les es-
maux.*

gues pouroyent faire quelque couleur de blanc: car ie ne cherchois autre esmail que le blanc: parce que i'auois ony dire que le blanc estoit le fondement de tous les autres esmaux. Or par ce que ie n'auois iamais veu cuire terre, ny ne sçauois a quel degré de feu ledit esmail se deuoit fondre, il m'estoit impossible de pouuoir rien faire par ce moyen, ores que mes drogues eussent esté bonnes, parce qu'aucune fois la chose auoit trop chauffé & autrefois trop peu, & quand lesdites matieres estoient trop peu cuittes ou bruiées, ie ne pouois rien iuger de la cause pourquoy ie ne faisois rien de bon, mais en donnois le blâme aux matieres, combien que quelque fois la chose se fut peut estre trouuée bone, ou pour le moins i'eusse trouué quelque indice pour paruenir à mon intention, si i'eusse peu faire le feu selon que les matieres le requeroient: Mais encores en ce faisant ie commettois vne faute plus lourde que la susdite: car en mettant les pieces de mes epreuues dedens le fourneau, ie les arrangeois sans consideration, de sorte que les matieres eussent esté les meilleures du monde & le feu le mieux à propos il estoit impossible de rien faire de bon. Or m'estant ainsi abusé plusieurs fois avec grand frais & labeurs, i'estois tous les iours a piler & broyer nouuelles matieres & construire nouueaux fourneaux, avec grande despence d'argent & consommation de bois & de temps.

276
 i s'ensuy uoy
 et m'enuoy
 e i s'ensuy
 au d'ensuy

Quand i'eus bastelé plusieurs années ainsi imprudemment avec tristesse & souspirs, a cause que ie ne pouuois parueuir a rien de mon intention, & me souuenant de la despence perdue, ie m'auisay pour obuier a si grande despence, d'enuoyer les drogues que ie voulois approuuer, a quelque fourneau de potier, & ayant conclud en mon esprit telle chose i'achetay de rechef plusieurs vaisseaux de terre, & les ayant rompus en pieces, côme de coustume, i'en couuré trois ou quatre cent pieces d'esmail, & les enuoyay en vne poterie distante d'vne lieue & demie de ma demeure, avec requeste enuers les potiers qu'il leur pleust permettre cuire lesdittes espreuues dedès aucuns de leurs vaisseaux: ce qu'ils faisoient volontiers: mais quand ils auoyent cuit leur fournée & qu'ils venoyent a tirer mes epreuues, ie n'en receuois que honte & perte, par ce qu'il ne se trouuoit rien de bon, a cause que le feu desdits potiers n'estoit assez chaut, aussi que mes espreuues n'estoyent enfournées au deuoir requis & selon science, & parce que ie n'auois connoissance de la cause pourquoy mes espreuues ne s'estoyent bien trouuées, ie mettois (comme i'ay dit cy dessus) le blasme sus les matieres: de rechef ie faisois nombre de compositions nouuelles, & les enuoyay aux mesmes potiers, pour en vsfer comme dessus: ainsi fis ie par plusieurs fois tousiours avec grâds frais, perte de temps, confusion & tristesse.

Quand

Quand ie vis que ie ne pouuois par ce moyen rien faire de mon intention, ie pris relasche quelque temps, m'occupant a mon art de peinture & de vitrerie, & me mis comme en non chaloir de plus chercher les secrets des esmaux, quelques iours apres suruindrent certains commissaires deputez par le Roy pour eriger la gabelle au pays de Xaintonge, lesquels m'appellerent pour figurer les isles & pays circonuoisins de tous les marez salans dudit pays. Or apres que ladite commission fut paracheuée & que ie me trouuay munny d'un peu d'argent ie reprins encores l'affectiō de pourfuyure a la suitte desdits esmaux, & voyant que ie n'auois peu rien faire dens mes fourneaux ny a ceux des potiers susdits, ie rompi enuiron trois douzaines de pots de terre tous neufs, & ayant broyé grande quantité de diuerses matieres, ie couray tous les lopins desdits pots, desdites drogues, couchées avec le pinceau: mais il te faut entendre que de deux ou trios cents desdittes pieces, il n'y en auoit que trois de chascune composition: ayant ce fait ie prins toutes ces pieces & les portay a vne verrerie, afin de voir si mes matieres & compositions se pouroyēt trouuer bonnes aux fours desdits verreries. Or d'aurāt que leurs fourneaux sont plus chauds que ceux des potiers, ayāt mis toutes mes espreuues dans lesdits fourneaux, le lendemain que ie les fis tirer i'apperçey partie de mes compositions qui auoyent commencē à
S 3 fondre

fondre, qui fut cause que ie fus encores d'auantage encouragé de chercher l'esmail blanc, pour lequel i'auois tant trauaillé.

Touchant des autres couleurs ie ne m'en mettois aucunemét en peine, ce peu d'apparence que ie trouuay lors, me fit trauailler pour chercher ledit blanc deux ans outre le temps susdit, durant lesquels deux ans ie ne faisois qu'aller & venir aux verreries prochaines, tendant aux fins de paruenir à mon intention. Dieu voulut qu'ainsi que ie commençois à perdre courage, & que pour le dernier coup ie m'estois trāsporté à vne verrerie, ayāt avec moy vn hōme chargé de plus de trois cens sortes despreuues, il se trouua vne desdites espreuues qui fut fōdue dedēs quatre heures après auoir esté mis au fourneau, laquelle espreuue se trouua blāche & polie de sorte qu'elle me causa vne ioye telle que ie pésois estre deuenu nouuelle creature: Et pensois des lors auoir vne perfection entiere de l'esmail blāc: Mais ie fus fort esloingé de ma pensée: ceste espreuue estoit fort heureuse d'vne part, mais bien mal-heureuse de l'autre, heureuse en ce qu'elle me donna entrée à ce que ie suis paruenü, & mal-heureuse en ce qu'elle n'estoit mise en doze ou mesure requise; ie fus si grand beste en ces iours là que soudain que i'eus fait ledit blanc qui estoit singulierement beau, ie me mis à faire des vaisseaux de terre, combien que iamais ie n'eusse conneu terre, & ayant employé l'espace de sept ou huit mois à faire

faire lesdits vaisseaux, ie me prins à eriger vn fourneau semblable à ceux des verriers, lequel ie bastis avec vn labour indicible : car il falloit que ie maçonnasse tout seul, que ie destrempasse mon mortier, que ie tirasse l'eau pour la destrampe d'iceluy, aussi me failloit moy mesme aller querir la brique sur mon dos, à cause que ie n'auois nul moyen d'entretenir vn seul homme pour m'ayder en c'est affaire. Le fis cuire mes vaisseaux en premiere cuisson: mais quand ce fut à la seconde cuisson ie receus des tristesses & labeurs tels que nul homme ne voudroit croire. Car en lieu de me reposer des labeurs passez, il me fallut trauailler l'espace de plus d'un mois nuit & iour pour broyer les matieres desquelles i'auois fait ce beau blanc au fourneau des verriers, & quand i'eus broyé lesdites matieres i'en couuré les vaisseaux que i'auois faits: ce fait ie mis le feu dens mon fourneau par deux gueules, ainsi que i'auois veu faire audits verriers. ie mis aussi mes vaisseaux dès ledit fourneau pour cuider faire fondre les esmaux que i'auois mis dessus: mais c'estoit vne chose malheureuse pour moy: car combien que ie fusse six iours & six nuits deuant ledit fourneau sans cesser de brusler bois par les deux gueules, il ne fut possible de pouuoir faire fondre ledit esmail & estois comme vn homme desesperé, & combié que ie fusse tout estourdi du trauail, ie me vay aduiser que dès mon esmail il y auoit trop peu de la matiere qui

deuoit faire fondre les autres, ce que voyant ie me prins a piler & broyer de ladicte matiere, sans toutes fois laisser refroidir mon fourneau : par ainsi i'auois double peine, piler, broyer & chauffer ledit fourneau, quand i'eus ainsi composé mon esmail, ie fus contraint d'aller encores acheter des pots, afin desprouuer ledit esmail : d'autant que i'auois perdu tous les vaisseaux que i' auois faits : & ayant couuert lesdites pieces dudit esmail, ie les mis dès le fourneau continuât tousiours le feu en sa grandeur : mais sur cela il me suruint vn autre malheur, lequel me donna grande fascherie, qui est que le bois m'ayant failli, ie fus contraint brusler les estapes qui soustenoyent ies trilles de mon iardin, lesquelles estant bruslées ie fus contraint brusler les tables & plancher de la maison, afin de faire fondre la seconde composition. I'estois en vne telle angoisse que ie ne sçauois dire : car i'estois tout tari & deseché à cause du labeur & de la chaleur du fourneau, il y auoit plus d'un mois que ma chemise n'auoit seché sur moy, encores pour me consoler on se moquoit de moy, & mesme ceux qui me deuoyent secourir alloient crier par la ville que ie faisois brusler le plancher : & par tel moyen l'on me faisoit perdre mon credit, & m'estimoit on estre fol. Les autres disoyent que ie cherchois à faire la fausse monnoye, qui estoit vn mal qui me faisoit seicher sur les pieds, & m'en allois par les rues tout baissé, comme vn homme honteux :
I'estois

i'estois endetté en plusieurs lieux, & auois ordinairement deux enfans aux nourrices, ne pouuant payer leurs salaires, persône ne me secouroit: Mais au contraire ils se mocquoyent de moy, en disant il luy appartient bien de mourir de faim, par ce qu'il delaisse son mestier. toutes ces nouuelles venoyent à mes oreilles quand ie passois par la rue, toutesfois il me resta encores quelque esperance, qui m'accourageoit & soustenoit, d'autant que les dernieres espreuues s'estoyent assez bien portées, & deslors en pensois sçauoir assez pour gagner ma vie, combié que i'en fusse fort esloigné (comme tu entendras ci apres) & ne dois trouuer mauuais si i'en fais vn peu long discours, afin de te rendre plus attentif à ce qui te pourra seruir.

Quand ie me fus reposé vn peu de temps avec regrets de ce que nul n'auoit pitié de moy, ie dis à mon ame, qu'est ce qui te triste, puis que tu as trouué ce que tu cherchois? traueille à present & tu rendras honteux tes detracteurs: mais mon esprit disoit d'autre part, tu n'as rien dequoy pour suyure ton affaire, comment pouras tu nourrir ta famille & acheter les choses requises pour passer le temps de quatre ou cinq mois qu'il faut au parauant que tu peusses iouir de ton labeur? Or ainsi que i'estois en telle tristesse & debat d'esprit, l'esperance me donna vn peu de courage, & ayant considéré que ie serois beaucoup long pour faire vneournée toute de ma main, pour abreger & gain-

gaingner le temps & pour plus soudain faire apparoir le secret que i'auois trouué dudit esmail blanc, ie prins vn potier commun & luy donnay certains pourtraits, afin qu'il me fist des vaisseaux selon mon ordonnance, & tandis qu'il faisoit ces choses ie m'occupois a quelques medailles: mais c'estoit vne chose pitoyable: car i'estois contraint nourrir ledit potier en vne tauerne, a credit: parce que ie n'auois nul moyen en ma maison. Quand nous eusmes travaillé l'espace de six mois, & qu'il falloit cuire la besogne faite, il fallut faire vn fourneau & donner congé au potier, auquel par faute d'argent ie fus contraint donner de mes vestements pour son salaire. Or par ce que ie n'auois point d'estofes pour eriger mon fourneau, ie me prins a deffaire celuy que i'auois fait a la mode des verriers, afin de me seruir des estofes de la despoil le d'iceluy. Or par ce que ledit four auoit si fort chauffé l'espace de six iours & nuits, le mortier & la brique dudit four s'estoit liquifié & vitrifié de telle forte qu'en desmaçonnant i'eus les doigts coupez & incisez en tant d'endroits que ie fus contraint manger mon potage ayant les doigts enuelopez de drapeau. Quand i'eus deffait ledit fourneau il fallut eriger l'autre qui ne fut pas sans grand peine: d'autant qu'il me falloit aller querir l'eau, le mortier & la pierre, sans aucun aide & sans aucun repos. Ce fait ie fis cuire l'euure susdite en premiere cuisson, & puis par emprunt ou autrement ie

trou-

trouuay moyen d'auoir des estofes pour faire des esmaux, pour couvrir ladicte besongne, s'estant bien portée en premiere cuisson: mais quand i'eus acheté lesdites estofes il me suruint vn labeur qui me cuida faire rendre l'esprit. Car apres que par plusieurs iours ie me fus lassé a piler & calciner mes matieres, il me les conuint broyer, sans aucunes aide, a vn moulin a bras, auquel falloit ordinairement deux puissans hommes pour le virer: le desir que i'auois de paruenir a mon entreprinse me faisoit faire des choses que i'eusse estimé impossibles. Quand lesdittes couleurs furēt broyées ie couris tous mes vaisseaux & medailles dudit esmail, puis ayant le tout mis & arrangé dedens le fourneau, ie commençay a faire du feu, pensant retirer de ma fournée trois ou quatre cent liures, & continué ledit feu iusques à ce que i'eus quelque indice & esperance que mes esmaux fussent fondus & que ma fournée se portoit bien: le lendemain quand ie vins à tirer mon euure, ayant premierement osté le feu, mes tristesses & douleurs furent augmentees si abondeinment que ie perdois toute contenance. Car combien que mes esmaux fussent bons & ma besongne bonne, neantmoins deux accidens estoient suruenuz à ladicte fournée, lesquels auoyent tout gasté: & afin que tu t'en donnes de garde ie te diray qu'els y sont: aussi apres ceux la ie t'en diray vn nombre d'autres: afin que mon malheur te serue de bon heur, & que

ma perte te serue de gain. C'est par ce que le mortier dequoy i' auois maçonné mon four estoit plein de cailloux, lesquels sentant la vehemence du feu (lors que mes esmaux se commençoient a liquifier) se creuerent en plusieurs pieces, faisans plusieurs pets & tónnerres dans ledit four. Or ainsi que les esclats desdits cailloux sautoient contre ma besongne, l'esmail qui estoit desia liquifié & rédu en matiere glueuse, print leudit cailloux & se les attacha par toutes les parties de mes vaisseaux & medales, qui sans cela se fussent trouuez beaux. Ainsi connoissant que mon fourneau estoit assez chaud ie le laissay refroidir iusques au lendemain: lors ie fus si marri que ie ne te sçauois dire & non sans cause: car ma fournée me coustoit plus de six vingts escus. I'auois emprunté le bois & les estoifes, & si auois emprunté partie de ma nourriture en faisant ladicte besongne. I'auois tenu en esperance mes creditiers, qu'ils seroyent payez de l'argent qui prouiendrait des pieces de ladicte fournée, qui fut cause que plusieurs accoururent des le matin quand ie commençois a desenfourner. Dont par ce moyen furent redoublées mes tristesses: d'autant qu'en tirant ladicte besongne ie ne receuois que honte & confusion. Car toutes mes pieces estoient semées de petits morceaux de cailloux, qui estoient si bien attachez autour desdits vaisseaux, & liez avec l'esmail, que quand on passoit les mains par dessus, lesdits cailloux cou-
royent

pyent comme rasoirs, & combien que la besogne fust par ce moyen perdue toutefois aucuns en voulyent acheter a vil pris: mais parce que se eut esté vn descriement & rabaissement de mon honneur, ie mis en pieces entierement le total de laditte fournée & me couchay de melancholie, & non sans cause: car ie n'auois plus de moyen de subuenir a ma famille: ie n'auois en ma maison que reproches: en lieu de me consoler l'on me donnoit des maledictions: mes voisins qui auoyent entendu cest affaire disoyent que ie n'estois qu'un fol, & que i'eusse eu plus de huit franc de la besogne que i'auois rompue, & estoient toutes ces nouuelles iointes avec mes douleurs.

Quand i'eus demeuré quelque temps au lit, & que i'eus considéré en moy mesme qu'un homme qui seroit tombé en vn fossé, son deuoir seroit de tascher à se releuer, en cas pareil ie me mis à faire quelques peintures, & par plusieurs moyēs ie prins peine de recouurer vn peu d'argent, puis ie disois en moy mesme que toutes mes pertes & hazards estoient passées, & qu'il n'y auoit rien plus qui me peust empescher que ie ne fisse de bonnes pieces: & me prins (comme au parauant) à trauailler audit art. Mais en cuisant vne autre fournée il survint vn accident duquel ie ne me doutois pas: car la vehemence de la flambe du feu auoit porté quantité de cendres contre mes pieces, de sorte que par tous les endroits ou ladite cendre auoit touché

ché mes vaisseaux estoient rudes & mal polis : à cause que l'esmail estant liquifié s'estoit joint avec lesdites cendres : nonobstant toutes ces pertes ie demeuray en esperance de me remonter par le moyen dudit art : car ie fis faire grand nombre de lanternes de terre à certains potiers pour enfermer mes vaisseaux quand ie les mettois au four : afin que par le moyen desdites lanternes mes vaisseaux fussent garentis de la cendre. L'inuention se trouua bõne, & m'a serui iusq̃s au iourd'huy : Mais ayant obuie au hazard de la cendre il me suruint d'autre fautes & accidēs tels, que quand i'auois fait vne fournée, elle se trouuoit trop cuite, & aucune fois trop peu, & tout perdu. par ce moyē i'estois si nouueau que ie ne pouuois discerner du trop ou du peu, aucune fois ma besongne estoit cuite sur le deuāt & point cuite à la partie de derriere : l'autre apres que ie voulois obuier à tel accidēt ie faisois brusler le derriere & le deuant n'estoit point cuit : aucune fois il estoit cuit à dextre & bruslé à senestre : aucune fois mes esmaux, estoient mis trop clers, & autrefois trop espois : qui me causoit de grandes pertes : aucune fois que i'auois dedens le four diuerses couleurs d'esmaux, les vns estoient bruslez premier que les autres fussent fondus. bref i'ay ainsi bastelé l'espace de quinze ou seize ans, quand i'auois appris à me donner garde d'un danger, il m'en suruenoit vn autre, lequel ie n'eusse iamais pensé. Durant ces temps là ie fis plusieurs four-

fourneaux lesquels m'engendroyent de grandes pertes au parauant que i'eusse connoissance du moyen pour les eschauffer egallement: en fin ie trouuay moyen de faire quelques vaisseaux de diuers esmaux entremeslez en maniere de iaspe: cela m'à nourri quelques ans: mais en me nourrissant de ces choses ie cherchois tousiours à passer plus outre avecques frais & mises, comme tu sçais que ie fais encores à present. Quand i'eus inuenté le moyen de faire des pieces rustiques, ie fus en plus grande peine & en plus d'ennuy qu'au parauant. Car ayant fait vn certain nombre de bassins rustiques & les ayant fait cuire, mes esmaux se trouuoient les vns beaux & bien fonduz, autres mal fonduz, autres estoyét brulez, à cause qu'ils estoient composez de diuerses matieres qui estoient fusibles à diuers degrez, le verd des lezards estoit brullé premier que la couleur des serpens fut fondue, aussi la couleur des serpens, escreuices, tortues & cancrez, estoit fondue au parauant que le blanc eut receu aucune beauté. Toutes ces fautes m'ot causé vn tel labour & tristesse d'esprit, qu'au parauant que i'aye eu rendu mes esmaux fusibles à vn mesme degré de feu. l'ay cuidé entrer iusques à la porte du sepulchre: aussi en me trauaillant à tels affaires ie me suis trouué l'espace de plus de dix ans si fort escoulé en ma personne qu'il n'y auoit aucune forme n'y apparence de bosse aux bras n'y aux iambes: ains estoient mesdites iambes toutes d'vne ve-

né venue: de sorte que les liens de quoy i'attachois mes bas de chausses estoient soudain que ie cheminois sur les talons avec le residu de mes chausses, ie m'allois souuent pourmener dans la prairie de Xaintes, en considerant mes miseres & ennuys: Et sur toutes choses de ce qu'en ma maison mesme ie ne pouuois auoir nulle patiēce, n'y faire rien qui fut trouué bon. I'estois mesprisé, & mocqué de tous: toutesfois ie faisois tousiours quelques vaisseaux de couleurs diuerfes, qui me nourrissoient tellement quellement: Mais en ce faisant, la diuersité des terres desquelles ie cuidois m'auancer, me porta plus de dommage en peu de temps que tous les accidens du parauant. Car ayant fait plusieurs vaisseaux de diuerfes terres, les vnes estoient bruslées deuant que les autres fussent cuites: aucunes receuoient l'esmail & se trouuoient fort aptes pour cest affaire: les autres me deceuoient en toutes mes entreprinſes. Or par ce que mes esmaux ne venoyent bien en vne mesme chose, i'estois deceu par plusieurs fois: dont ie receuois tousiours ennuis & tristesse. Toutesfois l'esperance que i'auois, me faisoit proceder en mon affaire si virillemēt que plusieurs fois pour entretenir les personnes qui me venoyent voir ie faisois mes efforts de rire, combien que interieurement ie fusse bien triste.

Je poursuyui mon affaire de telle sorte que ie receuois beaucoup d'argent d'une partie de ma
beson-

besongne, qui se trouuoit bien: mais il me suruint vne autre affliction conuatenée avec les susdites, qui est que la chaleur, la gelée, les vents, pluyes & gouttieres, me gastoyent la plus grand part de mon euvre, au parauant qu'elle fut euite: tellement qu'il me fallut emprunter charpenterie, lattes, tuilles & cloux, pour m'accômoder. Or bien souuent n'ayant point dequoy bastir, i'estois contraint m'accômoder de liarres & autres verdures. Or ainsi que ma puissance s'augmentoie ie defaisois ce que i'auois fait, & le batillois vn peu mieux, qui faisoit qu'aucuns artisans, comme chauffetiers, cordonniers, sergens & notaires, & vn tas de vieillles, tous ceux cy sans auoir esgard que mon art ne se pouuoit exercer sans grand logis, disoyent que ie ne faisois que faire & desfaire, & me blasmoient de ce qui les deuoit inciter à pitie, attendu que i'estois contraint d'employer les choses necessaires à ma nourriture, pour eriger les commoditez requises à mon art: Et qui pis est le motif desdites mocqueries & persecutions sortoyent de ceux de ma maison, lesquels estoient si esloignez de raison, qu'ils vouloyent que ie fisse la besongne sans outis, chose plus que déraisonnable. Or d'autant plus que la chose estoit déraisonnable, de tant plus l'affliction m'estoit extreme. J'ay esté plusieurs années que n'ayant rien dequoy faire couvrir mes fourneaux, i'estois toutes les nuits à la mercy des pluyes & vents, sans auoir aucun se-

T

cours

cours aide ny consolation, sinon des chatshuants qui chantoient d'un costé & les chiens qui hurloyent de l'autre ; parfois il se leuoit des vents & tempestes qui souffloyent de telle sorte le dessus & le dessous de mes fourneaux, que i'estois contrainct quitter là tout, avec perte de mon labeur, & me suis trouué plusieurs fois qu'ayât tout quitte, n'ayant rien de sec sur moy, a cause des pluyes, qui estoient tombées, ie m'en allois coucher a la minuit ou au point du iour accoustré de telle sorte comme vn homme que l'on auroit trainé par tous les boubiers de la ville, & en m'en allât ainsi retirer, i'allois bricollant sans chandelle en tombant d'un costé & d'autre comme vn homme qui seroit yure de vin, rempli de grâdes tristesses: d'autant qu'apres auoir longuement trauaillé ie voyois mon labeur perdu. Or en me retirât ainsi souillé & trempé, ie trouuois en ma chambre vne seconde persécution pire que la premiere, qui me fait a present esmerueiller que ie ne suis consumé de tristesse.

Theorique.

Pourquoy me cherches tu vne si longue chanson? c'est plustost pour me destourner de mon intention, que non pas pour m'en approcher, tu me as bien fait cy dessus de beaux discours touchant les fautes qui suruiennent en l'art de terre, mais cela ne me sert que d'espouuamment: car des esmaux tu ne m'en as encores rien dit.

Practi-

Practique.

Les esmaux dequoy ie fais ma besongne, sont *Matieres des-*
 faits d'estaing, de plomb, de fer, d'acier, d'antimoi *quelles sont*
 ne, de saphre de cuiure, d'arene, de salicort, de cen- *fais les Es-*
 dre grauelée, de litarge, de pierre de perigord. Voi- *maux.*
 la les propres matieres desquelles ie fais mes es-
 maux.

Theorique.

Voire mais ainsi que tu dis tu ne m'apprens rien.
 Car j'ay entendu cy deuant par tes propos que tu
 as beaucoup perdu au parauant que d'auoir mis les
 esmaux en doze asseurée : parquoy tu sçais bien
 que si tu ne me donnes la doze, ie ne sçauois que
 faire de sçauoir les matieres.

Practique.

Les fautes que j'ay faites en mettant mes es-
 maux en doze, m'ont plus appris que non pas les
 choses qui se sont bien trouuées : parquoy ie suis
 d'aduis que tu travailles pour chercher ladicte do-
 ze, aussi bien que j'ay fait, autremēt tu aurois trop
 bon marché de la science, & peut estre que ce se-
 roit la cause de te la faire mespriser: car ie sçay bien
 qu'il ny a gens au monde qui facent bon marché
 des secrets & des arts, sinon ceux ausquels il ne
 coustent gueres : mais ceux qui les ont pratiquez
 a grands frais & labeurs ne les donnent ainsi lege-
 rement.

Theorique.

Tu me fais trouuer les choses merueilleuse-
 ment

ment bonnes: si c'estoit quelque grande science, de laquelle on eut grande necessité, tu l'a ferois bien trouuer bonne: veu que tu estimes si fort vn art mechanique, duquel on se peut passer aisémēt.

Practique.

Voila vn propos par lequel ie connois a present que tu es indigne d'entendre rien du secret dudit art: & puis que tu l'appelles art mechanique tu n'en sçauras plus rien par mon moyen. On sçait bien qu'audit art, il y a quelques parties mechaniques, comme de battre la terre: il y en a aucuns qui font des vaisseaux pour le seruice ordinaire des cuisines, sans tenir aucune mesures, ils se peuvent appeller mechaniques: mais quant au gouuernement du feu, il ne doit estre comparé a la mesure des mechaniques. Car il faut que tu sçaches que pour bien conduire vne fournée de besongne, mesmement quand elle est esmaillée, il faut gouuerner le feu par vne philosophie si songneuse qu'il n'y a si gentil esprit qui n'y soit bien trauaillé, & bien souuent deceu. Quand a la maniere de biē enfourner, il y est requis vne singuliere Geometrie.

Item tu sçais qu'on fait en plusieurs lieux des vaisseaux de terre qui sont conduits par vne telle geometrie qu'un grand vaisseau se soustiendra sur vn petit pied, mesme la terre estāt encores molle, appelles tu cela mechanique? Sçais tu pas bien que la mesure du compas ne se peut appeller mechanique?

niques pour estre trop communes, aussi par ce que *Les arts qui ne sont me-*
 les ouuriers d'iceux sont pauvres; toutefois les *chaniques.*
 arts auxquels sont requis compas, reigles, nom-
 bres, poids & mesures, ne doyuent estre appelez
 mechaniques. Et puis quainfi est que tu veux met-
 tre l'art de terre au rang des mechaniques, & que
 tu n'estimes gueres son vtilité, ie te veux a present
 faire entendre combien elle est plus grande que ie
 ne te sçauois dire. Consideres vn peu combien *Vtilité de*
 d'arts seroyent inutiles, voire entierement perdus, *l'art de terre.*
 sans l'art de terre. Il faudroit que les affineurs d'or
 & d'argent cessassent. Car ils ne sçauroyent rien
 faire sans fourneaux; ny vaisseaux de terre: d'au-
 tant qu'il ne se peut trouuer pierre ny autres ma-
 tieres qui puissent seruir a fondre les metaux, sinon
 les vaisseaux de terre.

Item il faudroit que les verriers cessassent: car *Metiers qui ne se peuuent*
 ils n'ont aucun moyen pour fondre les matieres *passer de l'art*
 de leurs verres sinon en vaisseaux de terre. Les or- *de terre.*
 feures, fondeurs, & toute fonderie de quelque
 forte & espee que ce soit, seroit aneantie & ne
 s'en trouuera aucune qui se puisse passer de terre.
 Regarde aussi les forges des marechaux & ferru-
 riers, & tu verras que toutes lesdittes forges sont
 faites de briques: car si elles estoient de pierres el-
 les seroyent soudain consommées. Regarde tous
 les fourneaux, tu trouueras qu'ils sont faits de ter-
 re, mesme ceux qui trauaillent de terre font tous
 leurs fourneaux de terre, comme tuiliers, brique-

tiers & potiers: bref il ne se trouue pierre, ny mineral, ny autre matiere qui puisse seruir a l'édificatiō d'un fourneau à verres, ou à chaux, ou autres susdits, qui puisse durer longuement. Tu vois aussi combien les vaisseaux communs de terre sont vtils à la republique, tu vois aussi combien l'vtilité de la terre est grande pour les couuertures des maisons: tu sçais bien qu'en beaucoup de pays ils ne sçauent que c'est d'ardoise, & n'ont autre couuertures que de tuilles: combien cuides tu que l'vtilité de la terre soit grande, pour conduire les ruisseaux des fontaines? on sçait bien que les eaux qui passent par les tuyaux de terre sont beaucoup meilleures & plus saines que celles qui sont conduites par canaux de plomb. combien cuides tu qu'il y a de villes qui sont edifiées de briques, d'autant qu'ils nont pas eu moyen de recouurer de la pierre? Combien cuides tu que noz ancestres ont estimé l'vtilité de l'art de terre? on sçait bien que les Aegyptiens & autres nations ont fait construire plusieurs bastiment somptueux, de l'art de terre, il y a eu plusieurs Empereurs & Rois, qui ont fait edifier de grandes Piramides de terre, afin de perpetuer leurs memoires, & aucuns d'eux ont ce fait craignants que leurs Piramides fussent ruinées par feu, si elles eussent esté de pierre. Or sçachans q le feu ne peut rien contre les bastimēs de terre cuite, ils les faisoient edifier de briques, resinoings les enfās d'israel, lesquels ont esté merucilleu-

ueilleusement opprimez en faisât les briques desdits bastimés. Si ie voulois mettre par escrit toutes les vtilitez de l'art de terre ie n'aurois iamais fait: parquoy ie te laisse a penser en toy mesme le surplus de son vtilité. Quâd a son estime, si elle est aujourd'huy mesprisée, ce n'a pas esté de tous tēps. Les historiēs nous certifiēt que quand l'art de terre fut inuenté, les vaisseaux de marbre, d'alebastre, cassidoine & de iaspe, furent mis en mespris: mesmes que plusieurs vaisseaux de terre ont esté consacrez pour le seruice des temples.



POUR TROUVER ET CONNOISTRE la terre nommée *Marne*, de laquelle l'on fume les champs infertiles, és pays & regions ou elle est connue: chose de grand poids & necessaire à tous ceux qui possèdent heritages.

Theorique.

IL me souuient auoir veu vn petit traité que tu fis imprimer durât les premiers troubles, auquel sont cōtenus plusieurs secrets naturels, & mesme de l'agriculture: toutes fois cōbien que tu ayes amplement parlé des fumiers, si est ce que tu n'as rien dit de la terre qui s'appelle

Marne: bien ſçay-ie que tu as promis par ton liure de regarder ſ'il ſ'en pouroit trouuer en Xaintonge & autres lieux ou ladite terre eſt encor inconnüe. Je me ſuis enquis pluſieurs fois ſi tu aurois cōpoſé quelque autre liure ou tu euſſes parlé de ladite terre : mais ie n'en ay rien trouué : parquoy ſi tu en as quelque intelligence ou connoiſſance d'icelle, ne me le cele point: ce ne ſeroit pas bien fait à toy d'enſeuclir vn ſecret vtile à la Republique.

Practique.

A la verité ie promis par mon liure que tu diſ, de chercher de la Marne au pays de Xaintôge, par ce que pour lors i'eſtois habitant audit pays & y penſois finir mes iours, & par ce que audit pays n'eſt aucune nouuelle de ladite Marne, & que i'en auois veu au pays d'Armaignac, i'eüſſe eſté bien aiſé de laiſſer quelque proufit ou faire quelque ſeruiſe au pays de mon habitation: & pour ces cauſes me ſuis efforcé d'auoir ample connoiſſance de ladite terre: toutesfois quand elle ſeroit autant conneüe ou commune aux autres pays comme elle eſt en la Brye & Champagne ie n'en daignerois parler: par ce que les laboureurs qui la mettent en euvre ne ſe ſoucient point d'entendre la cauſe pourquoy elle rend la terre fertile: & combien que la cauſe ne requiert point eſtre entendue de tous, ſi eſt ce que les medecins & tous phyſiciens, philoſophes & naturalistes, pouront beaucoup proufiter à la lecture des cauſes & raiſons que ie te diray

en

en continuant nostre propos.

Theorique.

Je te prie en premier lieu entendre de toy que c'est que Marne. *Practique.*

La Marne est communement vne terre blanche que l'on tire au dessouz de l'autre terre, & communement l'on fait les fosses pour la tirer en telle forme que l'on fait les puits à tirer les eaux, & au pays ou laditte terre est en vſage on la boute dens les champs steriles, en la forme & maniere que lon boute les fumiers, premierement par petites pillles, & puis il la faut dilater par les champs, cōme l'on fait les fumiers, & quand les terres steriles sont fumez de ladite terre c'est assez pour dix ou douze annees : aucuns disent qu'en diuerſes contrées il n'y faut plus rien mettre de trente années. aucunes desdites marnes se cōmencent a trouuer des l'entrée de la fosse, & pourſuyuent la profondeur vn nombre de toises de profond. En d'autre lieux & contrees il faut creuser plus de quatre ou cinq toises de profond au parauant que trouuer le commencement de la Marne. Voila ce que i'ay peu tirer de ceux qui vſent communement de la Marne. Toutesſois i'ay entendu de quelque perſonnage que la Marne ne proufite de guerres aux champs la premiere année qu' elle y est mise, ce que ie trouue fort eſtrange.

Theorique.

Pourquoy est ce que tu trouues eſtrange de ce qu'ils

qu'ils disent que la premiere année que la terre sera marnée elle ne produira rien, si tu auois considéré la cause qui peut actionner la vegetation des fruits tu ne trouuerois estrange vne telle raison: car il n'y à homme en ce monde qui me sçeut faire croire que la marne puisse aider à la generatiō, sinon pour cause de la chaleur qui est en elle: comme nous voyons que nulle chose ne peut vegeter en hyuer, & nulle semence ne germeroit iamais n'estoit la chaleur procedée d'en haut par la vertu du soleil: combien que le soleil cause la vegetation de toutes choses si est ce que quād il est trop chaut il desseiche l'humidité, & les vegetatifs ne peuvent prendre accroissement: le soleil donc est la vie & quand il est trop vehement est aussi la mort: en cas pareil la marne est cause de generation germinatiue ou vegetatiue des plantes, pour cause de la chaleur: mais quand elle est nouuellement tirée il faut croire que sa chaleur est si grande qu'elle brule les semences. Voila pourquoy la generation des semences qui seront iettez en la terre la premiere année ne peut croistre.

Practique.

A la verité ta raison est fort grande & fort aisée à faire croire à ceux qui n'ont gueres de sentiment des choses naturelles: mais en mon endroit vn tel argument ne trouuera iamais lieu.

Theorique.

Je t'en bailleray à present vn autre contre lequel tu ne

tu ne pouras ôpposer aucun argument legitime, & quand tu voudrois contredire, le moindre laboureur des Ardennes te rēdra confus. Il faut necessai-remēt que tu me confessēs que la pierre cuite de-dēs les fournaies ardantes, soit reduitte en pouf-siere par la vehemence du feu, & que l'humiditē desdites pierres s'estant exalée il n'y demeure plus que le terreſtre rempli d'une vertu ignee, & pour ces causes l'on l'appelle chaux: par ce qu'elle est chaude, voire si chaude qu'il est aduenu plusieurs fois que ayant apporté desdites pierres dens des maisons, sur de la paille, lesdittes maisons ont esté brulées par le mouuement de certaines goutties d'eaux qui sont cheutes en temps de pluye sur ladite chaux: & tout ainsi que les pierres de ladite chaux sont dissoutes par l'humiditē qui leur est présentée quand elles sont tirées du four, semblablement en cas pareil les pierres de marne estant tirees de la fosse se viennent a dissoudre & mettre en pouciere comme les pierres de chaux. l'ay encores vn bel argument & preuue suffisante pour conclure ce q' i'ay dit, qui est que d'autant que les terres circonuoisines des bois des Ardennes, sont froides à cause des neiges & froidures dudit pays, les laboureurs de certaines contrées ayant indigence de fiens se sont aduisez de fumer les terres de chaux, en cas pareil & forme que l'on à coustume de les engresser de fumiers: & par tel moyen ils ont rendu les terres fertilles, qui ne produy-
soyent

soyét rien au parauant. puis que la chaux cause vn tel bien par sa chaleur (comme ainsi soit que les laboureurs disent que la chaux eschauffe les terres, & fait germer les semences) puis-ie pas donc par là conclure que la marne ne peut de rien seruir aux champs sinon pour cause de sa chaleur?

Practique.

Les raisons qui sont bonnes, comme celle que tu dis serót tousiours receüe pour bones moyennât qu'il n'y en ait point de meilleure q̃ les tiènes: & cōbien que tes argumēts ayent grande apparence de verité, si est ce q̃ ie te vay bailler des raisons plus veritables que les tiennes, & premierement quant à ce que tu dis que la terre de marne se dissout a l'humidité cōme la chaux, a ce ie responds qu'ainsi sont toutes terres, quand elles sont seiches, & singulierement toutes terres argileuses: & quand a l'autre raison que tu pourois alleguer, que la marne est aussi blanche comme la chaux, a ce ie responds qu'il y a de la marne grise, noire, jaune, par lesquelles couleurs ie prouue l'argumēt obiectable.

Theorique.

Ie ne sçay quel obiect tu sçauois alleguer contre mon dire: car nous sçauons que la cause que le fumier aide a la vegetation des semences, est pour cause de sa chaleur, & si ainsi est du fumier, il est semblable a la marne & a la chaux.

Practique.

Tu veux donc dire & conclure que le fumier est

est chaut

Theorique.

Et me voudrois tu nier vne chose si euidente? ne sçauons nous pas que l'on fait consommer & reduire les lames de plomb en ceruse dedens les fumiers, a cause de la grande chaleur? ne sçait-on pas bien que plusieurs teintures de soye se font dedes les fumiers chaux? ne sçait on pas bien que plusieurs alchimistes se seruent de fumiers chaux, pour mettre couuer les œufs de leurs essence? il n'y a pas iusques aux pourceaux qui ne rendent tesmoignage de la chaleur des fumiers : car bien souuēt les fumiers leur seruent de poilles ou estuues pour s'eschauffer.

Practique.

Tout cela est fort mal entendu, & ne fait rien contre moy, nous sçauons bien que quand le foin & la paille sont humectez par les eaux, ils se putrifient & en se putrifiant la putrefaction cause vne grande chaleur es pailles & foins, iusques a ce que la dissolution de l'essence radicalle soit accomplie, & ce fait le fumier n'a plus de chaleur. nous sçauons aussi que les pierres de chaux cuites, engendrent vn feu, lequel feu dure en elle iusques a ce qu'elle se soit creuée & puluerisée, & apres la chaleur n'y est plus. nous sçauons aussi que l'eau bouillante est chaude tandis qu'elle est esmeüe ou touchée par le feu, mais apres estant reposée hors du feu elle est plus subiette a la gelée que non pas leau qui

qui n'aura point chauffé. Nous sçauons aussi que vne playe ou concussion, qui par accident auenu engendrera apostume à la partie offensée, sera plus chaude que de coustume, à cause de l'accident & de la putrefaction qui se fait, comme ie t'ay dit de la paille & foin, qui s'echauffe par accident de putrefactiō, & non que la chaleur y soit tousiours. nous sçauons aussi que deux cailloux ou autres matieres dures engendreront (quand elles seront frappees l'une contre l'autre) des buettes ou estincelles de feu: ce n'est pas pourtant à dire que les cailloux soyent chauds: mais c'est ce que ie di, que les accidens engendrent des chaleurs extraordinaires: parquoy faut conclure qu'il y à quelque cause autre qui fait germer les semences. quand i'ay contemplé de bien pres la terre appelée Marne, i'ay trouué que ce n'estoit autre chose que vne sorte de terre argileuse, & si ainsi est, c'est le contraire des raisons que tu as amenées: car nous tenons pour certain que la terre argileuse est froide & seiche, comme tu peux auoir entendu en parlant des metaux & mineraux, en te prouuant que en plusieurs terres argileuses se trouuent des marcasites, mesme du bois metalisé & petrifié. & si la terre de marne estoit chaude, la terre d'argille le seroit aussi, & tout ce que i'aurois escrit en parlât des terres, pierres & meraux, seroit faux. Faut commencer donc par ce bout & en fin conclure que la terre de marne est vne espeece d'argile, laquelle ay-

ant

ant demeuré plusieurs années à l'iniure du temps, elle se seroit refroidie ou gelée voire des la premiere gelée : & ores qu'elle auroit esté chaude en la matrice de la terre elle ne pouroit seruir à eschauffer la terre vne seule année. autant en di-je du fumier & de la chaux. Il est aisé à conclure puis que la terre est ameilleurée par la marne l'espace de dix ou trente ans, que cela n'est pas causé de chaleur qui soit en elle : car en tirant ladite marne en plusieurs lieux, il s'en trouue qui ne se peut dissoudre à l'iniure du temps, ny par les pluyes, iusques à ce que la gelée y ayant besongné, laquelle gelée trouuant les pierres de marne dures comme craye, les fera dissoudre & reduire en poussiere, comme ainsi soit que cela auienne souuent és pierres tendres, lesquelles pierres on appelle iolices, desquelles i'ay parlé cy dessus, & pour faire fin à toutes disputes, ie te dis que la marne estoit vne terre au parauant qu'estant marne, est terre argileuse & commencement de pierre de craye à esté premierement marne, & te di encores, que la craye qui est encores en la matrice de la terre deuiendra pierre blanche, & te dis encores autre chose qui te fachera plus de croire, qu'en quelq part qu'il y ait des pierres suiettes à calcination, elles ont esté marne au parauant qu'estre pierres : car autrement estans calcinees elles ne pouroyent meilleurer les châps steriles.

Theorique.

Je ne vis iamais homme plus opiniatre en ses
opini-

opinions que toy, cuides tu trouuer des hommes si fols qui veulent croire les propos que tu as mis en auant? tu en trouueras bon nombre qui s'en mocqueront, & t'estimerôt destitué de toute raison: de ma part ie me suis deliberé de ne rien croire de ce que tu dis si tu ne me dōnes preuues aisées & intelligibles, par lesquelles tu me face croire qu'il y à quelque cause qui ayde à la vegetatiō des semences, autre que la chaleur qui est en la chaux, Marne & fumiers. car comme ie t'ay dit, puis que la Marne ne proufite gueres aux chāps la premiere année, c'est signe cōme i'ay dit que la trop grād chaleur qui est en elle empesche son action.

Pratlique.

Tu t'abuses & n'entens pas ce que tu dis, car ce n'est pas vne chose ordinaire n'y en tous lieux que la marne fait mieux son deuoir la seconde année & autres suyuanes q̄ la premiere: mais en cest endroit il te faut noter vn point singulier & de grand pois, lequel tu peux auoir entendu par le propos subsequēt, qui est que la Marne se reduit en craye ou autre pierre par vne longue decoctiō, & quand vne marne commence à passer sa decoctiō, elle s'endurcit en telle sorte que les pluyes ne la peuvent disoudre au deuoir requis, ains demeure aux champs par petits morceaux sans se liquifier parmi la terre & aduient par ces causes, qu'elle ne peut donner saueur en la terre iusques à ce qu'elle soit disoute & liquifiée, & d'autant que cela ne se
peut

Peut faire si soudain de la premiere année, les gelées auront causé quelque téps apres la dissolution de ladite marne, qui est ia commencée à putrifier, & estant ainsi dissoute & liquifiée, elle aidera à la generation & germination des semences qui luy seront présentées. Voila vn point que tu dois tenir & garder comme chose certaine : cela est fort aisé à connoistre au pays de Valois, Brie & Champagne, auquel pays se trouue de ladite marne abondammét, & encores plus abondamment de la craye, qui autrefois à esté marne & s'est reduite en pierre de craye par sa longue decoction. tu peux auoir entendu vne partie de ces raisons en mon traité des pierres.

Theorique.

Et ie te demande, si ainsi est que tu dis que la terre de craye estoit premieremét marne, la craye pouroit donc seruir de marne moyennant qu'elle fut bien puluerisée. car s'il est ainsi que tu dis la mesme vertu qui estoit en la marne est encores en la craye.

Practique.

Tu as fort bien iuge, mais la craye estant lapifiée ne se pouroit dissoudre, & ce ne seroit pas assez de la mettre en poussiere, aussi qu'elle cousteroit trop à pulueriser, & pour vray si les gelées la pouuoient dissoudre elle seruiroit de marne : & pour le tesmoignage de ce que ie dis, ie te renuoiray à ce que j'ay dit cy dessus, que la pierre de chaux estant dissoute par le feu sert de marnier ou fu-

mer les terres. voudrois tu vn plus beau tesmoignage, il te faut encores passer, outre & regarder à la cause de la difference des couleurs, qui sont aux marnes. La cause des marnes blanches, procede de sa lōgue decoction, quand est des noires, il y peut auoir plusieurs causes, dont la principale est, qu'il n'y a pas long tēps que les matieres sont cōmentées à congeler, & telle marne sont de plus aisée dissolution: ils peuuent aussi auoir de quelque bois pourry ou mineralles qui peuuent auoir taint en noir les matieres. Quant est des iaunes, les mines de fer, de plomb, d'argent & d'antimoine, tous ces mineraux peuuent teindre les marnes en iaune: voila pourquoy il s'en trouue de couleurs diuerses.

Theorique.

Et puis que tu dis que la chaleur de la marne, des fumiers, & de la chaux, n'est pas la cause actionale des vegetations seminales, donne moy donc à entendre par quelle vertu la marne pourroit actionner ces terres infertilles.

Practique.

Quand ie t'ay dit qu'il ne falloit pas attribuer à la chaleur de la marne la vertu generatiue, ie n'ay pas voulu pour cela destituer totalement la marne de chaleur: mais i'ay voulu par là destruire la folle opinion de ceux qui veulent attribuer le total à la chaleur: ie dis le total interieurement & exterieurement. l'on sçait bien que le sel est chaud interieurement, & pour ces causes l'on dit qu'il aide
à la

a la generation genitale: & toute fois en temps de froidures tu trouueras le sel autant froid que de l'eau ou des pierres, il faut conclure donc, que sa chaleur ne peut actionner si elle n'est esmue par vne cõtre chaleur, sçauoir est en ce qui consiste le fait seminal, il faut donc philosopher plus loing & regarder a la cause essentielle, esmouuãte & operante en ce fait icy, & l'on trouuera quelque chose de caché que les hommes ne peuuent entendre.

Theorique.

Ie te prie si tu en as quelque connoissance ne me fais point languir, mais donne moy clairement a entendre ce que tu en penses.

Partique.

Si tu eusses amplement ouuert les oreilles quand tu lisois le subsequant de ce liure, tu eusses aisément entendu ce qui en est: car ie t'ay dit cy deuant qu'il y auoit vn element cinqiesme, lequel les philosophes n'ont iamais conneu, & ce cinqiesme element, est vne eau generatiue, claire ou candide, subtile, entremeslée parmy les autres eaux indistinguibles, laquelle eau estant apportée avec les eaux communes, elle s'endurcist & se congele avec elles les choses qui y sont entremeslées, & tout ainsi que les eaux cõmunes montent en haut par l'attraction du soleil, soit que ce soit par nuées, exalations ou vapeurs, si est-ce que l'eau seconde laquelle i'appelle element cinqiesme, est portée avec les autres: & quand les

eaux cōmunes viennent à descendre & decouler le long des valées soit par fleuves, riuieres ou sources, ou par pluyes, ie dis qu'en quelque sorte qu'elles descendent en quelque part qu'elle s'arrestent, il se forme quelque chose & singulierement par tel moyen les cailloux & pierres & carrieres sont formées, chose bien certaine comme tu peux auoir bien entēdu en lisant mon discours des pierres: or venons à present au principal, voyons comment cela se peut faire apres que tu auras bien entendu qu'il y a vne eau generatiue & l'autre exalatiue, & comme tu pouras aisément entendre que leau congelatiue est generatiue, laquelle i'appelle le cinqiesme element, que quand elle est remuée par l'eau connue en quelque receptacle, ou lieu de repos, elle estant en tel repos se viendra à congeler & fera quelque pierre selon la grosseur de la matiere qui y sera arrestée, & portera la forme de son giste, & apres qu'elle sera ainsi congelée l'eau commune quelquefois sera succé par la terre & descendra plus bas, ou bien sera exalée & s'en yra en vapeurs es nuées & laissera là sa compagne, parce qu'elle ne la pourra plus porter. Voila vne sentence qui te doit faire entendre qu'au parauant que la marne fut marne, c'estoit de la terre dedens laquelle les deux eaux sont entrées & ont reposé quelque temps, & estant en repos l'eau generatiue ayant trouué son repos s'est venue à congeler & la vaporatiue a passé outre, ou bien s'est exalée

comme

comme i'ay dit cy dessus , & la terre ou l'eau congelatiue s'est arrestée & à esté endurcie & conséquamment blanchie par l'effect de ladite eau congelatiue, qui a fait vng corps avec elle, & de la vient que quand la terre est reduitte en marne par l'action de l'eau generatiue, la terre qui l'ors est portée aux champs & qui s'appelle marne ce n'est pas cela qui rend la terre fructueuse, ains est l'eau congelatiue qui s'est arrestée parmy la terre : laquelle eau estant arrestée a cause comme i'ay dit, endurecit & blāchit la terre, & quand les semences sont iettées sus la terre conuertie en marne, elles ne prennent pas la substance de la terre pour aider a leurs vegetatiō, ains se repaissent de l'eau generatiue & congelatiue, que i'appelle le cinquiesme elemēt, & quant les semences par l'espace de plusieurs années ont attiré l'eau generatiue, la terre de marne est inutile comme le marcq de quelque decoction qui auroit esté faite, autant en est il du fumier & de la chaux.

Theorique.

Tu voudrois donc conclure que les semences vegetatiues succeroyent ce cinquiesme element que tu appelles eau generatiue, comme vn homme qui succeroit de l'eau ou du vin par le trou d'une bonde, & laisseroit la lie faire son marcq au fond du tonneau.

Practique.

Tu dis vray & n'en faut rien douter, mais faut

entrer en consideration plus subtile, car les semences vegetatiues ne pouroyent faire attraction de l'eau generatiue, sans qu'elle fut humectée par les eaux communes, & te faut noter que quand les terres sont humectées par les pluyes ou rosée, ou autrement que les vegetatifs prennent de l'eau commune avec la congelatiue, laquelle eau commune luy empesche la trop hative congelation, & de la vient que les froumets & autres semences se tiennent verds iusque à leur maturité, & quād ils sont meurs & que le pied laisse son succement & qu'il n'a plus que faire de nourriture, l'eau exalatiue s'éva & la generatiue demeure: & comme la decoction des plantes se parfait, la couleur aussi change, comme il fait semblablement és pierres & à toutes especes de mineraux, comme ie t'ay dit en mes autres traitez parlant des mineraux, que toute espeece de fruits changent de couleur en leur maturité, suyuant quoy ie t'ay tousiours dit en parlant de l'element cinquesime, que combien que c'est vne eau & parmy les autres eaux que c'est celuy qui soustient pailles & foins, & toutes especes d'arbres & plâtes, mesme les hommes & les bestes, & t'ay dit mesme que les os de l'homme & de la beste, sont endurcis & formez de c'este belle substance generatiue, & comme tu vois qu'au commencement la marne est vne terre, tendre & fluâte, & puis de là deuient en marne plus dures, & de marne en craye, & de craye en pierre, par la vertu de laquelle

quelle eau aussi les os de l'homme & de la beste (qui sont espece de pierre & cassent quand ils sont secs comme pierre) iceux di-ie sont en eau pareille que dessus. Premièrement fort tendres comme ie t'ay dit de la marne, & puis deuiennent durs comme pierre quand ils sont paruenz à leurs decoction & maturité, & tout ainsi que tu vois que les pierres ou cailloux qui sont generez & formez de ceste eau congelatiue, enduret le feu & ne se peuuent consommer au feu, ains se vitrifient, tu vois aussi que c'est element generatif duquel ie t'ay parlé ne peut estre consommé estant aux pailles & au foin, car si tu brule de la paille, du foin, ou du bois, toute l'eau cōmune s'en ira en fumée, mais ceste eau generatiue qui à soustenu, nourri & acreu le foin & la paille, demourera aux cendres & ne pourra estre consommée, ains se vitrifiera estant és fournaies ardātes, desquelles cendres l'on pourra faire du verre qui sera transparent & candide, comme l'eau generatiue estoit au parauant sa cōgelation, & si ainsi est des cendres des bois, des pierres qui pour le fait de ceste semence generatiue, souffre les effectz du feu, aussi tu vois semblablement qu'il ny à rien qui resiste plus au feu que les os de plusieurs bestes, comme tu as veu plusieurs fois que i'ay fait bruller des os de pieds de mouton, & quelque grande chaleur qu'il y eut és fournaies, il n'est possible de les consommer par feu, n'y semblablement la coquille des œufs qui te

doibt faire croire que Dieu à mis vn ordre en nature en telle sorte, que les os ont attiré & attirent ordinairement plus abondamment de ladite eau generatiue: que non pas les autres parties, & comme i'ay dit autre part, ne faut douter qu'il n'y en ait vne bonne partie en la prunelle des yeux, & parce qu'elle est humectée & accompagnée de l'eau exalatiue, cela empesche que ladite prunelle ne se petrifie, nous auons les miroirs & lunettes qui nous rendent tesmoingnage qu'il y à quelque affinité enuers les yeux, les lunettes & les miroirs, & ne faut croire que nulle chose peut receuoir pollicemēt n'y seruir de miroir ou lunettes, si n'estoit par la vertu admirable de ce cinquieme element, qui lient avec soy les autres matieres, & rēd dures, candides & polissables par les efforts que le souverain luy à ordonnées. Autre preuue, cuide tu que les poissons armez qui sont en la mer & és estans & riuieres douces, n'ayent quelque connoissance de l'eslement susdit? & comment pouroyent ils former leurs coquilles au milieu des eaux & que la coquille se vient à endurcir & desecher au milieu de l'ymidité s'il ne sçauoit choisir la matiere congelatiue au meilleur des eaux? tu sçais biē que ces grands poutres & busines ont leurs coquilles autant dures ou plus que pierre, & toutes fois la matiere estoit liquide & à nous inconnue au parauāt que le poisson eut formé sa maison. Il faut pour conclusion venir à ce point comme ie prouue au
traité

traité des metaux, que le cristal est formé de ladite eau generatiue au meillieu des eaux communes, que ladite seméce, ou eau generatiue n'est pas seulement pour seruir à la generatiō des pierres, mais aussi est substance & generation de toutes choses animées & vegetatiues, selon le cours humain, en ensuyuant l'ordre & vertu admirable que Dieu à commandé à nature. Tu as entendu ci deuant qu'il n'y à nulle espece de pierre qui ne soit candide en sa forme principale, & celles qui sont tenebreuses, ne le sont que par accident: par ce qu'il y à parmy la matiere, de la terre, du sable qui se cōgele & endurecit avec la matiere, & de là vient que la matiere qui au parauant estoit candide se trouue obscure, toutesfois il n'y à pierre si obscure que l'on ne rendit en fin transparente à force de feu, par ce que l'element principal duquel i'ay tant parlé rend les choses fixes & transparentes, comme il est transparent en son estre: cela ne se peut aiseinēt verifier, sinō par les practiques, & la theorique ne scauroit asseurement parler de ces choses. Je t'ay mis toutes ces preuues en auant afin si tu as des terres infertiles que tu mettes peine de trouuer de la marne en ton heritrge pour fumer les terres steriles, afin qu'elles rendēt abondammēt des fruits en leur saison, & en ce faisant tu seras vn bon pere de famille, & comme lumiere entre les paresseux, tu seruiras de bon exemple & les voisins mettront peine de suyure tes traces.

Theori-

Theorique.

Je te prie me faire ce bien de m'apprendre le moyen de connoistre la marne que tu dis: car si ie sçauoy le moyen de la connoistre ie ne faudroy de m'employer de toute mes forces, iusques à tât que ie çeuſſe s'il seroit possible, d'en pouuoir trouuer en mon heritage.

Prattique.

Je ne cuide pas que ceux qui premierement ont meilleuré les terres par la marne, qu'ils l'ayent fait par vne theorique imaginatiue: mais i'ay bié pêsé que ceux qui ont trouué premierement l'inuentiô, l'ont trouué sans la chercher, cômme plusieurs autres sciences se sont offertes d'elles meſmes, cômme tu peux penser que la moullerie peut auoir esté inuēté par les pas d'un homme qui marcha les pieds nuz sur vn sable fin, ou sur de la terre d'argile, en laquelle terre, ou sable l'on verra euidâment la forme touchée, rides, flaches, bosses & concauités de la forme de tout le pied: cela, di-ie est suffisant pour auoir premierement inuenté la moullerie & l'imprimerie, suyuant quoy, il est aisé à croire que quand la marne a esté premierement connue ç'a esté par le moyen de quelque fosse ou tranchée, comme ainsi soit qu'en iettant les vuidanges du profond des fosses au dessus du champ circonuoisin, l'on a trouué que le bled qui estoit semé audit champ, estoit plus gaillard & espoix à l'endroit ou les vuidanges des fossez auoyēt esté iettees, quoy voyant

voyant les propriétaires du champ peuuent auoir prins l'année suyuant de la terre dudit fossé & l'ayant espendue par toutes les parties du chāp, ils ont trouué q̄ ladite marne estoit autant bōne & meilleure q̄ fumier. La premiere inuentiō d'auoir trouué la marne, peut auoir aussi esté trouué en creusāt les puits pour chercher de l'eau, & en quelq̄ lieu est aduenū qu' ayant creusé vn puits bien profond l'on a ietté les vuidāges & espendu par toute la terre circōuoisine de la fosse dudit puits, & apres que le chāp a esté labouré & semé, ou l'on a trouué ce qu'ō ne cherchoit pas, qui est que les semēces jetées es parties du champ couuert des vidanges du puits, se sont trouuées espoisses, belles & gaillardes. Voila deux effets qui ont peu aduertir les premiers qui ont vsé de la marne, & t'ose dire & asseuerer que l'vn & l'autre sont veritables, & peuuent encores seruir comme d'inuention aux lieux ausquels la marne ne fut onques vsitée, & te dōneray vn argument inuincible, qui est que quelques fois la marne se treuve des le commencement ou, bien pres de la superficie de la terre, & descēdant tousiours en bas, tirant vers le centre, autre marne ne se peut trouuer que premierement l'on n'aye fait vne fosse de quinze ou vingt pieds; quelque fois plus de vingcinq, & ayant trouué le commencement de ladite marne, il la faut tirer comme si on tiroit l'eau d'vn puits avec grand labour, voila pourquoy ie t'ay dit & asseuré qu'ayant trouué la
marne

marne par cas fortuit en creusant les puits & fosses, que depuis l'invention estant trouuée l'on a cherché apres si auantés pays ou elle est vstée & conneue. Il faut donc conclure que la marne ne se peut apprendre a trouuer par theorique non plus que les eaux tachées sans source, & que tout ainsi que les terres argileuses se trouuent quelquesfois pres la superficie & quelquesfois les faut chercher profond, semblablement la terre de marne se trouue comme ie t'ay dit cy dessus. Si tu veux donc trouuer de la marne ie te conseilleray retenir l'exemple d'un bon pere de famille normand, lequel habitant à vne paroisse de normandie, qui prenoit grand peine a cultiuer ses terres, & ce neantmoins il estoit contraint toutes les années d'aller acheter du bled hors de la paroisse: car toute ladite paroisse estoit infertille, & ne se trouuoit nul qui cueillist du bled pour sa prouision, & quand il venoit vne cherte, & que les hommes de ladite paroisse alloient acheter du bled en la prochaine ville, les autres paroisses les maudissoient, disans qu'ils estoient cause d'encherir le bled. Il aduint que ce bon pere de famille que ie t'ay dit au commencement s'auança quelque iour de prendre son chapeau plein d'une terre blanche qu'il trouua dedens vne fosse, & la porta en quelque endroit d'un champ qu'il auoit semé, & marqua l'endroit ou il auoit mis ladite terre, & quand les semences furent accreües il trouua que le bled estoit espoix
vert

vert & gailliard sans comparaison plus qu'en nulle autre partie du champ : quoy voyant le bon homme fuma l'année suyuant tous ses champs de ladite terre, lesquels apportèrent des fruits abondamment, & apres que ses voisins & tous les habitans de ladite paroisse furēt aduertiz d'un tel fait, ils firent diligence de trouuer de ladite terre de marne, & en ayant fumé leurs champs ils recueillirent plus abondamment des fruits que nulle de autres paroisses. voila le moyen de chercher de la marne le plus asseuré que ie scaurois penser, & pour mieux te donner le moyen de la chercher & cōnoistre ie te veux amplement donner à connoistre, que la marne n'est autre chose qu'une terre reposée vn bien long temps, laquelle a esté tousiours humectée par les eaux qui ont esté retenues en icelle, tellemēt q toutes les choses petrifiables qui estoient en elles se sont reduites en terrefine: laquelle terre estant purifiée de toute ordure corruptible elle a retenu en elle l'une des deux eaux, scauoir est la congelatiue, & icelle eaux congelatiue ayant fait vn corps avec ladite terre, la terre s'est par ce moyen endurcie: non si fort que la pierre, combien que ce soit vn commencement de pierre: mais d'autant qu'elle a esté tirée de sa miniere au parauāt sa parfaite decoction, elle se dissout en la descente des pluyes & des gelées, apres qu'elle est tirée du lieu de sa formation: & d'autāt qu'elle est pierre imparfaite, elle laisse l'eau qui l'a
uoit

uoit congelée au lieu ou elle est dissoute & brisée, & l'eau qui la soustenoit est liquifiée dedens le champ & ramassée, succée & recueillie par les semences qui y sont iettées, comme ie t'ay dit cy dessus: mais d'autant que ce propos est de grand poix i'ay voulu repeter vne mesme chose avec exemple plus intelligible, qui est (pour mieux te le faire entendre) qu'un lart ou la chair d'un porc, ne perdra pas sa forme pour estre salée, & quand elle est dessalée elle demeure encore en sa forme, comme tu vois ordinairement, que dedens un pot il y pourra auoir plusieurs pieces de chairs fresches, parmi lesquelles & au dedens du pot il y aura vne piece de lard, laquelle donnera saueur à toutes les autres qui seront de chair fraische, aussi que tout le bouillon du pot sera fallé pour le sel qui estoit dedens le lard, toutesfois le lard demeurera en sa forme. Les distillateurs tireront de la canelle la saueur, la senteur & la vertu; sans oster la forme de la canelle: aussi tu peux connoistre par là, que tout ainsi comme le lard n'a pas fallé leau du pot par sa vertu, ains pour cause du sel ou il auoit posé, lequel sel a esté extrait du lard par la vertu de l'eau sans oster la forme du lard: aussi les semences tirent à soy la vertu falsitiue de la marne, qui est ceste eau generatiue, & quand toute la vertu falsitiue a esté attirée par les semences, la marne n'est rien plus qu'une terre infertile comme l'escorce de la canelle, apres que l'essence en a esté tirée. Je
tediray

te diray encores vn secret qui est que iamais le sel ne pouroit conseruer la chair de porc, n'y la cōuertir en lard, n'y consequemment les autres chairs, si premierement le sel n'estoit dissout, & si le sel ne faisoit que toucher a l'encontre sans se liquifier, il ne pouroit entrer au dedens n'y empescher la putrefaction. Voila pourquoy tu peux entendre que la marne qui est ià commencee à petrifier, si elle n'est premierement dissoute parmi le champ, les semences n'en pouroyent rien tirer, non plus que feroit vne chair d'un sel qui ne se pouroit dissoudre ou liquifier. Je m'efforce tant que ie puis de te faire entendre qu'il n'y a pierre, que si elle se pouuoit dissoudre à la cheutte des pluyes ou gelées qu'elle ne seruit de fumier aux champs: par ce que toutes pierres sont formees, soustenues & endurecies par le mesme element cinquieme, lequel acompaigne toutes choses depuis le commencement iusques a la fin, & faut que plusieurs choses ne craignent n'y le feu, n'y l'eau, n'y aucune iniure du temps, tesmoins les terres argilleuses lesquelles ont esté causees de son action, & demeurent dedens les eaux sans aucun dōmage, & estant formees en vaisseaux ou en briques, elles endurent le feu des fournaïses, & mesmes les fournaïses en sont construites.

Theorique.

Tu m'as dit ci dessus beaucoup de raisons, neãmoins ie ne suis pas satisfait touchant le moyen le plus

plus expedient pour trouuer promptement de ladite terre de marne.

Practique.

Je ne te puis donner moyen plus expedient que celuy que ie voudrois prendre pour moy : si i'en voulois trouuer en quelque prouince ou l'inuention ne fut encore connue, ie voudrois chercher toutes les terrieres desquelles les potiers, briquetiers & tuilliers, se seruent en leurs euures, & de chascune terriere i'en voudrois fumer vne portion de mon champ pour voir si la terre seroit ameilleurée, puis ie voudrois auoir vne tariere bien longue, laquelle tariere auroit au bout de derriere vne douille creuse, en laquelle ie planterois vn baston, auquel y auroit par l'autre bout vn mâche au trauers en forme de tarriere, & ce fait, i'irois par tous les fossez de mon heritage, ausquels ie planterois ma tariere iusques à la longueur de tout le mâche, & l'ayant tiré dehors du trou, ie regarderois dens la concauité, de quelle sorte de terre elle auroit apporté, & l'ayant nettoyée i'otterois le premier manche & en metteroies vn beaucoup plus long & remetteroies la tariere dedens le trou que i'aurois fait premierement, & percerois la terre plus profond, par le moyen du second manche, & par tel moyen ayant plusieurs manches de diuerses longueurs, l'ô pouroit sçauoir qu'elles sont les terres profondes, & non seulement voudroy-ie fouiller dedens les fossez de mes heritages, mais aussi par
toute

toute les parties de mes champs , iusques à ce que l'eusse apporté au bout de ma tariere quelque tesmoignage de ladite marne , & ayant trouué quelque apparence, lors ie voudrois faire en iceluy endroit vne fosse telle comme qui voudroit faire vn puits.

Theorique.

Voire mais s'il y auoit du rocq au desoubs de tes terres, commel'on voit en plusieurs contrées, que toutes les terres sont foncées de rochers?

Practique.

A la verité cela seroit facheux, toutesfois en plusieurs lieux les pierres sont fort tendres & singulierement quand elles sont encores en la terre: parquoy me semble que vne tariere torciere les perceroit aisément, & apres la torciere on pourroit mettre l'autre tariere, & par tel moyen, on pourroit trouuer des terres de marne, voire des eaux pour faire puits, laquelle bien souuent pourroit monter plus haut que le lieu ou la pointe de ta tariere les aura trouuées: & cela se pourra faire moyennant qu'elles viennent de plus haut que le fond du trou que tu auras fait.

Theorique.

Ie trouue fort estrange de ce que tu dis que si le rocq m'empesche de percer la terre, qu'il faut aussi percer le rocq, & si c'est du rocq que ay-ie à faire de le percer, veu que ie cherche de la marne?

X

Practi-

Practique.

Tu as mal entendu, car nous sçauons qu'en plusieurs lieux les terres sont faites par diuers bans; & en les fossoyant on trouue quelque fois vn ban de terre, vn autre de sable, vn autre de pierre, & vn autre de terre argilleuse: & cōmunement les terres sont ainsi faites par bans distinguez. Je ne te donneray qu'vn exempe pour te seruir de tout ce que ie t'en sçauois iamais dire regarde les minieres des terres argilleuses qui sont pres de Paris, entre le bourgade d'Auteuil & de Chaliot, & tu verras que pour trouuer la terre d'argile, il faut premierement oster vne grande espeueur de terre, vne autre espeueur de grauiers, & puis apres on trouue vne autre espeueur de rocq; & au dessouz dudit rocq; l'on trouue vne grande espeueur de terre d'argille; de laquelle l'on fait toute la tuille de Paris & lieux circonuoisins. ce n'est pas en ce lieu seullemēt qu'il cōuient prendre la terre d'argille au dessouz des rochers: mais en plusieurs autres lieux. Si tu as bien retenu le discours du traité des pierres, tu à peu entendre que la terre d'argille estant venue en sa perfection, elle à serui de receptacle pour retenir les eaux congelatiues, qui ont causé le rocq; qui est au dessus.

Theorique.

Nous parlons de trouuer la marne & tu me parles de la terre d'argile: il me semble que cela vient mal à propos.

Practique.

Tu

Tu l'entens fort mal, ie t'ay dit cy dessus que l'eau congelatiue n'a pas seulement operé en la terre pour la reduire en marne, ains à aussi operé en la terre d'argile & és pierres & bois, voire en toutes choses generatiues, voire iusques és choses animées: cuides tu que la semēce generatiue du genre humain & brutal, soit vne eau cōmune & exaltieue? Ie t'ose dire que tout ainsi cōme la semēce humaine apporte en soy les os, la chair, & toutes les parties distinctes de la forme humaine, aussi en la semence vegetatiue sont comprins les troncs, les branches, les feuilles, les fleurs, & les fruits: les vertus, les couleurs, les senteurs, & tout cela par vn ordre que l'admirable prouidence de Dieu à commandé, & ne faut que tu trouues estrange que ie t'allegue les exemples de la terre argileuse, pour te seruir en la marne: car depuis quelque temps i'ay passé par le pays de Valois & Champagne, ou i'ay veu plusieurs champs ornez de plusieurs piles de marne, arangees en la forme de pilots de fumier, & cōme il pleuuoit sur la-dite marne, qui estoit par mottes grandes & petites, i'apperceu qu'elles se venoyent à dissoudre à la cheutte des pluyes: lors ie prins vne de ces mottes, qui estoit ia liquifiées comme paste, & l'ayant petrie entre mes mains i'en fis vn nombre de trochisques, lesquelles ie fis cuire dedens vn grand feu, & estant cuittes, ie trouuay qu'elles s'estoyent endurcies en pareille forme que la terre d'argille:

lors ie conneuz que l'une & l'autre pouuoit faire vne mesme action, sinon en tous lieux, pour le moins en quelque contrée.

Theorique.

Voire mais les terres d'argile sont de diuerses couleurs & plus communement grises, & la marne est blanche:parquoy cela ne se peut accorder.

Prattique.

A la verité la marne est communement blanche es pays de Valois, Brye, & Champagne, toutesfois i'ay bon tesmoignage qu'au pays de Flandres & Allemagne, mesme en quelque partie de la France, il y en a de grise, noire & iaune, comme i'ay dit des le commencement: parquoy ie te conseille de ne t'amuser point à la couleur: car la marne grise ou noire, peut deuenir blanche en sa decoction;& tout ainsi qu'il y a de la marne blanche aussi il y a des terres argileuses blanches. Il me souuient auoir passé de Partenay allant à Bresuyre en Poitou, & de Bresuire vers Thouars, mais en toutes ces contrées, les terres argileuses sont fort blanches, & conséquemment les cailloux lesquels sont en grand nôbre audit pays:qui me fait croire q les terres argileuses desdits pays pouroyét aussi seruir de marne, & singulierement celle dequoy les drapiers foulent & desgressent les draps. mais voyés aussi que les creusets des orfebures qui sont apportez du pays d'Anjou, d'aupres de Troye, & plusieurs autres lieux, sont faits d'une terre fort
blan

blanche semblable à la marne. En la basse Bourgogne, il y à vn certain village ou l'on tire de la terre d'argile toute semblable à la marne, & cuide que ce ne soit autre chose: toutesfois elle endure le feu en telle sorte, que tous les verriers de la plus grande partie des Ardennes, se seruent des vaisseaux faits de ladite terre, & mesme les verriers d'Anuers qui besongnent de verre de cristallin, sont contrains en enuoyer querir: combié que l'on la vende bien chere, à cause qu'elle dure long temps és fournaies ardantes. L'ay veu creuser vn puits au pays des Ardennes qu'auant trouuer l'eau, il fallut creuser vne bien grande espaisseur de terre, & apres la terre, on trouua vn fond de rocq d'vne grande espaisseur, & apres le rocq se trouua d'vne terre d'argile autât blâche que craye, laquelle i'esprouuay, & la trouuay bonne à faire vaisseaux: toutesfois combien qu'elle n'ait esté approuué si est-ce que ie croy que c'est vne parfaite marne. Si mon estat se pouuoit exercer en peregrinant d'vne part & d'autre, ie pourois donner plusieurs aduertissemens de ces choses, qui seruiroyent beaucoup à la republique: toutesfois voila vn chemin ouuert: si tu és homme curieux de ton bien, tu pouras chercher par les moyes que ie t'ay dit, en cherchant tu trouueras les choses plus asseurées que ie ne te les sçauois dire: car on dit communement qu'il est facile d'adiouter à la chose inuentée, aussi la science se manifeste à ceux

qui les cherchent.

Theorique.

Et ne me suffira il pas de chercher la marne au manimēt des mains? attendu que la marne est vne terre grasse comme c'elle d'argille: & puis que la terre d'argille est connue au manimēt des mains, car il y a celuy que s'il manie de la terre d'argille destrempee, qu'il ne dit voila vne terre grasse & visqueuse: aussi les Latins disent, que terre d'argille veut dire terre grasse:

Practique.

Tu as fort mal retenu ce que i'en ay escrit au liure des terres: car ie t'ay dit que les Latins & les François abusent du terme, en appellant la terre d'argille terre grasse: car si elle estoit grasse il seroit impossible de la dissoudre par eau ny par gelée: car toutes gressès & viscosités oleagineuses resistent à leau, & ne peuuent auoir quelque affinité: ains au contraire, la terre d'argille & la terre de marne chassent toutes taches grasses, visqueuses & oleagineuses: & pour ces causes, les foulons les font seruir à degresser les draps.

Theorique.

Ie trouue en quelque endroit de tes propos vne cōtrarieté assez cōneüe: car tu m'as dit ci deuant, q̄ mesme les rochers estoient causés de la matiere mesme, qui aide à la generation des semences: & toutesfois i'ay veu des pays q̄ toutes les terres estoient incrustées de rochers & pierres, & les terres
qui

qui sont telles ont bien peu de terre sur le roc, & les semences qui y sont ietées, ne peuuent gueres proufiter, ains les bledz demeurent bas, ayant les espics bien petits, par ce que la plante ne peut rendre nourriture sur le rocq.

Practique.

N'as tu pas entendu vn propos que ie t'ay dit, que si le sel ne se venoit à dissoudre, les lards, poissons, & toute especes de chairs ne pouroyēt estre sallées, si le grain du sel demeueroit en son entier sās se dissoudre & diminuer ? Si le pays qui est ainsi pierreux est de telle natute que les pluyes qui tombent dessus ayent en elles vne si grande quantité d'eau congelatiue, qui tombant d'en haut, fait vne croutte en augmentant les rochers couverts d'vn peu de terre, cela ne fait rien cōtre mon propos: car ie t'ay dit que depuis que l'eau est congelée & reduitte en pierre, les semences n'en peuuent tirer aucune liqueur, si la pierre n'est premieremēt dissoute: comme ie t'ay dit que la chair ne pouroit rien prendre du sel, sinon en tant qu'il se dissout & diminue. Voila vne conclusion toute certaine.

Theorique.

Si est ce pourtant que i'ay veu plusieurs forests és parties montaigneuses, esquelles les arbres sont merueilleux en grandeur, combien que la sole d'iceux n'est que rocq, avec vn bien peu de terre par dessus la superficie des rochers, & les racines desdits arbres sont à trauers & parmi les rochers des

montaignes.

Practique.

Si tu eusses bien noté ce que ie t'ay dit entre tant de pierres, tu n'eusses mis vn tel argumēt en auant: car tu dois entendre que les racines des arbres ne scauroyent transpercer les rochers. Il te faut donc croire que les arbres auoyent prins racine au parauant que la terre ou il font, fût congelée, & comme les arbres ont prins en leur croissance abondammēt de l'eau generatiue, ils en ont distribue aussi bien aux feuilles & aux fruits comme aux branches & comme aux racines: & par ce que les feuilles & fruits tombēt par chacun an desouz des arbres, ils se viennent à putrifier, & en se putrifiant (comme font les herbes des forests) ils rendent en leur putrefaction l'eau cōmune & la generatiue parmy la terre, qui est causée parmi des feuilles & fruits: & quelque temps apres par la vertu du Soleil, l'eau comimune se vient à exaler, & la generatiue rend alors en pierre la terre qui a esté causée des feuilles, fruits, & autres plātes des forests: car autrement ce q̄ tu dis ne se pouroit faire: car si tu cōsideres la racine des arbres tu trouueras qu'il n'y a celuy qui n'aye autant de racine que de branches: car autrement, il ne pouroit endurer le combat qu'il endure par l'iniūre des vents. Et si tu voulois contempler la cause pourquoy les arbres ont les racines ainsi tortues, tu trouueras que la cause n'est autre sinon, que comme les hommes cher-

cherchent par les montaignes les chemins & sentiers plus aisez, aussi les racines en leur accroissement cherchèt les parties de la terre les plus aisées, plus tendres & moins pierreuses: & s'il y à quelque pierre au deuant de la racine, elle laissera la pierre en son chemin & se tournera à dextre, ou à senestre: d'autant qu'elle ne pouroit percer les pierres qui sont au chemin.

Theorique.

Et toutesfois les branches des arbres qui n'ont aucun empeschement en l'air, sont aussi tortues & fourcheües comme les racines: si est ce que l'aër n'est non plus dur en vn endroit qu'en l'autre. Il faut nécessairement quil y aye autre raison que celle que tudis.

Practique.

Quant aux racines, ie t'ay dit verité: mais quant aux branches il y a vne autre cause, qui est que les branches, poussans l'augmentation des gittes, vne chacune cherche la liberté de l'aër, & se dilatent en s'esloignant des autres gittes tant qu'ils peuuent, afin d'auoir l'aër à commandement, & par vne telle cause, les gittes fuyans le voisinage l'une de l'autre ne peuuent monter directement, ce que tu peux connoistre par les noyers, poiriers, & pommiers, & plusieurs autres especes d'arbres, qu'en leurs premiere croissence la tige montera directement en haut iusques a ce que la vertu radicale monte abondamment, qui luy cause se fourcher

cher, en pouſſant pluſieurs gittes, comme vne eau desbordée. Je conſidere ces raiſons en pluſieurs exemplaires, premierement en ce que j'ay veu les cheſnes, noyers, chaſtaigniers, & pluſieurs autres eſpeces d'arbres, plantez és lieux champêtres, entre leſquels ie n'en ay iamais trouué vn, qui montaſt directement en haut, comme ceux qui ſont és foreſts entourez d'autres arbres qui les empeschét a ſe dilater de part & d'autre. Je n'ay iamais auſſi trouué que les arbres des foreſts fuſſent fertiles habondamment, comme ceux des campagnes, ny auſſi que le fruit d'iceux fut ſauoureux en telle ſorte, que ceux qui ont l'aër & le ſoleil a commandement: dont il eſt aiſé a conclure que les arbres des foreſts qui ſont entourez d'autres arbres, ne pouuant iouïr du ſoleil & de l'aër, és parties dextre & ſenextre, ſont contrains monter en haut pour chercher l'aër & le ſoleil, lequel ils deſirent pour leur nourriture & accroiſſement: & comme ie cherchois la connoiſſance de ces cauſes ie paſſay quelquefois par vne foreſt qui contenoit trois lieües de largeur, & afin de rédre le chemin aiſé, l'on auoit coupé tout au trauers de la foreſt, les arbres d'une voye, contenant en largeur huit ou dix toiſes: en paſſant ladite foreſt, j'apperceue que tous les arbres qui eſtoient a dextre & a ſenextre de ladite voye, auoyent pouſſé grand nombre de branches deuers le coſté du chemin, & deuers la partie de la foreſt, il y en auoit fort peu qui

qui me donna certaine connoissance que le tronc de l'arbre prenoit son plaisir a pousser les branches vers le chemin; par ce que c'estoit la partie la plus aérée: i'apperçeu aussi que les arbres de la circôference de la forest se iettoyēt & courboyent ou s'enclinoient deuers le costé des terres, comme si les autres arbres leurs estoient ennemis: & a la verité bien souuent il y a plusieurs arbres fruitiers tant és iardins que autres lieux qui sont courbez, pour cause de l'ombre de leurs voisins, autres arbres desquels ils n'ayment estre accompagnez.

Theorique.

Par tes propos tu veux dire qu'apres que les feuilles, fruits & branches des arbres & plantes, sont pourries, elles se peuuent reduire en pierre.

Practique.

Je l'ay dit, & encores plus comme tu peux auoir entendu au discours des metaux, que non seulement les choses putrifiées se peuuent lapifier, ains se peuuent petrifier au parauant la putrefaction, comme tu as veu par les bois & coquilles, & t'ose dire encore qu'il n'y a nulle espece de terre qui ne se puisse naturellement petrifier par l'effait du cinqiesime elemēt duquel i'ay tant parlé cy dessus.

Theorique.

Et le tripollit, qu'est-ce? se peut il petrifier?

Practique.

Non seulement le tripollit, mais aussi l'ocre, le boliarmeni, & tous ces mineraux qui sont lapifiez
com-

comme la sanguine, l'orcane, & la pierre noire, tout cela ne sont que terres petrifiées, difficiatues & astringentes, comme vne espece de terre sigillée.

Theorique.

Et qu'appelles tu terre sigillée?

Practique.

Terre sigillée est autrement appelée terre lemnie, aucuns luy attribuent ce nom a cause du lieu ou elle est prinse: & te faut noter que la terre n'est autre chose qu'une espece de marne ou terre argileuse, laquelle se prent bas en terre, comme sont communement les terres argileuses, & les marnes: l'on dit que ladite terre est fort astringente, & que par son action elle preserve de poison & retient les flux de sang par sa vertu astringente: & pour ces causes les hommes du pays ou elle se prend vont par chacun an ouvrir la fosse, ou le trou par ou ils descendent pour la tirer, & en ayant tiré a leur discretion, ils ferment le trou iusques a l'autre année: & pour cause qu'ils ont tribut de ladite terre. Ils ouurent le trou avec grand pompe, accompagnéz de ceremonies. Le pays ou ladite terre se prend, est a present occupée par le Turc, qui cause qu'il en prend le proufit, & se vent ladite terre par trochisques marquées des armoiries du Turc. Voila pourquoy l'on l'appelle terre scellée, & me semble que ce seroit mieux dit terre cachetée, & parce qu'elle est appelée terre marquée ou cachetée, cela me fait croire qu'elle est molle quand

quand on la tire, comme cōmunement est la terre d'argile: car cōbien qu'elle soit assez dure & qu'on la porte souuent a grand mottes sur les espaules, si est ce qu'elle est humide, en telle sorte quelle se peut ayſément cacheter. Venons a present a la cause de son vtilité, d'oū est-ce que peut proceder vne telle vertu? Si tu as bien entendu le propos que j'ay dit sur les congelations, tu connoistras que la vertu de ladicte terre ne procede, sinon des eaux communes & congelatiues, qui ayans perçé a trauers des terres, iusques a ce qu'elles ont trouué quelque rocher pour s'arrester au lieu ou les eaux se sont arrestées, la terre subtile & fine qui là estoit a retenu la vertu de l'eau congelatiue, & là s'est fait vne association & ligature, sçauoir est la terre & l'eau ont fait vne decoction modérée, & cōmencement de petrificatiō, & en ce faisant ont laissé courir, descendre ou exaler l'eau commune, & n'est demeuré parmy la terre que l'eau congelatiue, qui a perdu en se congelant la couleur & apparence qu'elle auoit au parauāt, & a prins la meſme couleur de la terre ou elle s'est iointe, & par ce qu'elle n'est encores venue en sa parfaite decoctiō ou petrification, il est certain qu'estant prinſe par la bouche, la vertu de l'eau congelatiue qui est en elle se vient a dissoudre a la chaleur & humidité de l'estomac, & alors les matieres estant liquides, le corps fait son proufit de la matiere congelatiue, qui estoit en la terre, & la terre est enuoyée aux
excre-

excrements selon le cours ordinaire. Voila qui te doit faire croire que ceste eau congelatiue est de nature falsitiue, comme ie t'ay fait entendre cy dessus, que le venin des serpents est gueri par la vertu de la salie, a cause du sel. Je t'ay allegué cy dessus vne isle pleine de serpents, aspics & viperes, qui sont en vne isle appartenant au seigneur de Soubise. Je t'ay dit aussi que ceux qui sont mordez des chiens enragez sont gueris par l'eau de la mer, & mesme aucuns par le lard vieux, & cela ne se fait que par vne vertu falsitiue. Je t'ay assez donné a entendre (en parlant des sels) que tous sels ne sont pas mordicatifs, ou acres, afin de te faire entendre que ie ne veux pas dire par là, que la vertu falsitiue de la terre sallée soit d'un sel commun: ains ie veux seulement dire que son action n'est causée que par vne vertu falsitiue.

Theorique.

Je te prie me dire s'il seroit possible de trouuer en France quelque terre qui fist la mesme action que celle que tu dis: parce qu'en tous tes discours tu ne fais point distinction des matieres qui causent la congelation des pierres, marnes & terres argileuses, & d'autant que tu attribues a la terre sigilée sa vertu proceder de la mesme cause que les terres, pierres, & marnes de ce pays, sont congelées, pourquoy est ce qu'il ne se pourra trouuer en la France des terres qui feront mesme action, veu qu'elles sont causées d'un mesme subiet? comme
i'ay

i'ay dit. *Pratique.*

Le ne te puis alleguer raison contraire, sinon qu'és pays chauds, les fruits, ou pour le moins partie d'iceux, sont beaucoup meilleurs qu'és pays froids comme tu vois qu'és pays de France, depuis qu'on passe Paris, allant vers le Septentrion, on ne peut cueillir pompons, melons, oranges, figues, ny oliues, ny beaucoup d'autres especes de fruits, comme on fait és chaudes regions, & mesme les raisins ne peuuent venir en maturité, comme ils sont és parties meridionales de la France, Champagne, & Picardie. Tu sçais bien aussi que les espiceries, sucres, ne peuuent prendre accroissement au royaume de France, cōme elle sont és pays chauds. Tu sçais bien que la casse & toute gomme odoriferantes sont prises és regions chaudes, mesme la rubarbe & autres simples, seruans a la medecine. Il est assez aisé a croire que le soleil donne quelque vertu plus violente en certaines regions qu'en d'autres, & mesme on voit qu'une mesme region, vne mesme espece de plante operera merueilleusement plus qu'une autre, qui sera accreüe en mesme pays, Je t'ay baillé par exemple les vignes de la Foye-Moniaut, qui sont entre saint Iehan d'Angely & Nyort, lesquelles vignes apportent du vin qui n'est pas moins estimé qu'hippocras & bien pres de là, il y a autres vignes desquelles le vin ne vient iamais a parfaite maturité, lequel est
moins

moins estimé que celui des raisinettes sauvages, par là tu peux penser que les terres ne sont semblables en vertu, combien qu'elles se ressemblent en couleur & apparence, toutesfois ie ne veux par là conclure qu'il n'y puisse auoir en France de ladite terre lemnie, laquelle puisse faire la mesme action que la sigillée, & prendray argument sur ce que les vaisseaux premiers faits furent formez, comme aucuns disent en argis, & depuis tous les autres qui sont formez, on les appelle vaisseaux de terre d'argile, puis que l'on reconure de la terre en tous pays semblable a celle d'argis, aussi il n'est pas difficile de croire qu'il se puisse trouuer de la terre lemnie. Je prendray autre argument plus certain: puis qu'aux isles de Marennes, & en la foye Moniaut, se cueille du vin ayant douceur & bôté d'hippocras, & que sa bonté procedé d'une vertu salitiue que nous appellons tartare, & qu'és pays de Narbonne & Xaintonge, il se fait du sel commun, & combien que la vertu salitiue de la terre lemnie ne soit pas de sel cōmun, si est ce que tout ainsi que comme en quelque partie de la France, les raisins & quelques autres fruits apportent en soy vne douceur autant grande que les dattes, figues & autres fruits, qui viennent des regions chaudes, i'ay conclud qu'en quelque endroit se pouroit aussi trouuer de la terre lemnie, laquelle feroit la mesme action que celle que on prend en Turquie, de laquelle nous auons parlé. Je te di-

ray

ray encores vne exemple, tu vois que les anciens ont eu en grand estime le bol d'Armenie, a cause de son action astringente, & toutesfois depuis que l'usage en est en France, celuy mesme qui se prend au pays : & combien qu'il se trouue en plusieurs contrées de la France, si est ce qu'on luy baille le mesme non de celuy d'Armenie, comme tu vois que les Latins l'appellent bollus armenus, en François bolearmeny. nous en auons encore vne autre espece qui est plus desiccatif que le susdit, duquel les peintres font des crayons a pourtraire, qu'ils appellent pierres sanguines, elle est fort propre pour contrefaire les visages apres le naturel : elle est composée d'un grain fort subtil. Il y a autre espece de sanguine, qui est fort dure, a cause de sa dureté, on la peut tailler & pollir comme vne pierre de iaspe ou d'agate, combien qu'elle ne soit pas si dure : aucuns on fait tailler desdites pierres pour se seruir a brunir ou pollir l'or & autres choses, si tu consideres bien ladite pierre tu connoistras qu'il n'y a difference aucune des deux especes de sanguine, sinon que l'une est petrifiée a cause qu'elle a plus receu d'eau congelatiue qui l'a rendue plus pesante & plus dure, & l'autre qui est demeurée tendre, de laquelle on fait des crayons rouges, est demeurée altérée par ce que l'eau luy deffaut au parauant sa parfaite decoction, & par ce que le commencement de nostre propos a esté seulement de parler de la

marne, ie te dis à present qu'en plusieurs lieux la marne peut seruir a faire des crayōs blācs à pourtraire en blanc, tout ainsi que la sanguine pourtrait des trais rouges.

Theorique.

Ie trouue ici vne chose fort estrange, qui est de ce que tu contredit à tant de millions d'hommes, tant des passez que des viuants, en ce qu'ils disent tous, & le tiennēt pour chose certaine, que la marne & la terre d'argile est grasse, & que les terres sont ameilleurée pour la cause de la graisse, qui est en la marne: & toy comme opiniatre inuctere, les veus gaigner contre tous.

Practique.

Si tu auois bien consideré le propos que ie t'ay tenu ci dessus en parlant de l'or potable, du restaurēt d'or, des graisses & des eaux, tu eusse connu par là, que depuis que les hommes sont abruuez d'une opinion faulse, il est difficile de leurs arracher de la teste: mesmement à ceux qui se soucient bien peu de considerer les effects de nature. Te souuiens il pas que i'ay assemblé autre fois à Paris, des plus doctes medecins, chirurgiēs & autres naturalistes, lesquels m'ont tous accordé que les philosophes, phisyriens, passez & presens, auoyent abusé en escriuant du restaurent d'or, de l'or potable, des metaux, des eaux, & des pierres, & en plusieurs autres instances, desquelles tu sçais que i'ay fait lecture, & n'ay iamais trouué homme qui m'aye cōtredit:

toutes-

routes fois il se trouua vn alchimiste, lequel auoit bruit de se tormenter apres l'augmentation des metaux, pour de là venir à la mōnoye. Iceluy di-ie estoit fort mal content de ce que ie parlois de l'or potable, pource qu'il pretēdoit potager l'or pour donner teincture à l'argent: ce qui est impossible, sinon seulement sur la superficie pour en abuser: & comme tu sçais que de l'abondance du cœur la langue parle, iceluy passionné de mes propos, attendit que l'assemblée s'en fut allée, & puis me vint dire qu'il sçauoit faire de deux sortes d'or portables sa passio auoit causé, qu'il auoit mal entendu: car ie ne disois pas que l'or ne se peut rendre potable, car ie sçay plusieurs moyens de le potager, mais ie disois que quand il seroit potagé, iamais ne se cōuertirois en la nature humaine, pour luy seruir de restaurēt, par ce qu'il ne se peut digérer & pour reuenir à poursuyure les fauces opiniōs inueterée sur le fait des terres qu'ils appellēt grasse ie t'allegueray la mesme raison que l'ay dit en parlant des terres argileuses, qui est qu'esdites terres il y à deux eaux: l'vne est commune & exaltue ennemie du feu, l'autre est congelatiue, qui cause que la terre n'est q̄ poussiere, qui se tient en vne masse, qui s'edurcit au feu: ie demāderay à tous ces dictiōnaires si l'humeur radicale qui ioinēt les parties de la terre, estoit grasse, pouroit elle endurer le feu? ne sçait-on pas bien, que toute gresse espesse, oleagineuse brulent au feu, ne sçauons nous pas aussi

que les drapiers desgraissent leurs draps avec de la terre argileuse, ou de celle de marne, si elle estoit grasse commēt pouroit elle desgresser? Il y à quelques vns qui pour prouuer qu'elle estoit grasse, ont dit que plusieurs puits estoient fonsez de terre de marne, voulāt par là prouuer qu'elle est grasse: mais vne telle preuue n'est pas bonne, car nous sçauons que toute espeece de terres argileuses, tiēnent l'eau durant le temps qu'elles sont sousternées, mais estant tirée de leur fosse elle ne pouroit tenir l'eau, sinon durant le temps qu'elles seront molles comme paste: mais après que lesdites terres sont succées, elles se viennent à dissoudre soudain que l'on les mettera dedens l'eau, & si elle estoit grasse cōme on dit, iamais elle ne se pouroit dissoudre en l'eau, non plus que le suif, la cire, la poix-rasine & autres choses grasses. Il est bien certain, que si tu prend deux pieces de marne, ou de terre argileuse, & que tu ayes deux vaisseaux, que l'un soit plain d'huile & l'autre d'eau, & qu'en chacun vaisseau tu mette vne motte de marne, ou terre argileuse, que celle que tu mettras dedens l'huile, ne se dissoudra iamais, mais celle qu' tu mettras dedens l'eau, se crenera & se dissoudra comme vne pierre de chaux, car nous sçauons que les matieres grasses & oleagineuses sont repugnante à l'eau, & lesdites terres sont composée de matieres auueses, parquoy il ne peuuent se ioindre n'y entremeller: il faut donc que ceux qui appellēt les mar-

nes & terres argileuses grasses, qu'ils allent chercher autres raisons que celles qu'ils mettent en uât. S'ils appelloyēt lescdites terres pateuses, ils parleroyent beaucoup mieux & diroyent verité, car nous sçauôs que la farine & l'eau ônt telle affinité, q soudain qu'elles sont entremellées, elles se cōuertisēt en vn corps pateux. Il les faut donc appeller terres pateuses, & non point grasses ou visqueuses.

Theorique.

Je trouue estrange que tu dis, que non seulement les choses putrifiées se peuuent reduire en pierre, mais aussi aucune chose sans perdre leur forme, comment est il possible que l'eau que tu dis, puisse entrer dedens les corps solides, si premierement ne sont molifiées par putrefaction?

Practique.

Comment oses tu dire le contraire de ce que j'ay dit, veu qu'en te parlant de l'escence & forme des pierres. ie t'ay monstre plusieurs coquilles reduites en pierre, combien que les coquilles estoient au parauant autant solides que pouroit estre vn vaisseau de verre, ou de quelque matiere metalique.

Theorique.

Il faudroit donc qu'il n'y eut rien qui ne fut poreux, & si ainsi estoit les vaisseaux ne pouroyent cōtenir l'eau de quelque matiere que ce soit, & toutesfois l'on voit le contraire.

Practique.

Je ne doute point que toutes choses ne soyent

poreuses, mais ces choses qui sont faites des matieres plus condensées ont les pores si subtiles que les liqueurs ne peuuent passer a trauers. euidemment, sinon par quelque accident: comme tu as veu autrefois que quand ie voulois broyer mes couleurs en hyuer, ie faisois chauffer la molette & apres l'auoir posée sur le marbre toute chaude, icelle molette pour sa chaleur attiroit de l'eau dudit marbre, combien qu'iceluy marbre eut apparence d'estre bien sec: voila vn argument qui te doit faire croire que le marbre estoit poreux, à trauers desquels pores, la chaleur de la molette faisoit attraction de l'humidité. Autre exemple: tu sçais bien que les forgers d'armes & de taillans, quand ils veulent endurcir les armes & taillans, ils les font chauffer tant qu'ils soyent rouges, & puis les mettent froidir dens l'eau, l'ors le trenchant des ferremēts & armures, deuiennēt beaucoup plus dures: Je te demande si le fer ou l'acier, estant ainsi trempé, ne prenoit quelque substance iusques au centre, & par toutes les parties s'ils se pouroyent endurcir par l'action de l'eau? on sçait bien que non: car si le trenchant, ou le harnois ne s'endurcisoit que sur la superficie, cela ne seruiroit de rien. Il faut donc conclure que les armures estans chaudes, sont imbibées, & font attraction de quelques eau, autre que l'exalatiue laquelle subuient & se fortifie, & pour se monstrer, te faire mieux entendre
que

que les armures ne sont pas fortifiées par les eaux exalatiues? Il faut que tu entendes que pour tremper lesdites armures, aucuns ont plusieurs secrets, aucuns metteront du sel dedens l'eau ou ils veulent tremper leurs armures, aucuns metteront des vinaigres, autres mettrôt des pierres de chaux, autres mettront du verre subtilement broyé, & ne fant que tu doutes que si le verre broyé ne pouuoit seruir a l'endurcissement du fer, ou acier, ie ne dis pas qu'il y puisse seruir estant en verre, mais estant bien broyé, le sel dudit verre se liquifie parmy l'eau cômune, & alors les armures qui y sont trempées font leur proufit dudit sel liquifié, duquel ils font attraction pour se fortifier & non pas de l'eau commune, car elle ne se peut fixer du temps du feu Roy de Nauarre, il partit de Geneue deux orfeures qui porterent en la court du sudit Roy, vne masse & vn coutelas, au labour desquels ils auoyent employé l'espace de deux annés pour orner & enrichir ou tailler lesdites pieces : & parçe qu'elles estoient merueilleuses & de haut pris, ils n'auoyent rien espargné a ce que ladite masse & coutelas fussent forgez de bonnes estoifes : & en cas pareil trempées en certaines eaux : qui causerent vne dureté audites armes : ie ne scay si elles furent attrempées par le magnifique Maigret, lequel auoit bruit qu'en cherchant la generation de l'or, ou pierre philosophale, il auoit trouué vne eau qui causoit vne merueilleuse dureté aux ar-

mures, ignorant donc celuy qui auoit fait la trempe, ie suyuray mon propos qui est que le coutelas dont ie parle estoit si bien attrempé que l'on en coupoit les chenets ou landiers de fer, comme lon eut fait du bois sans que le coutelas en receut aucun dommage. voila des preuues qui te doyuent assez donner a entendre les propos que ie t'ay dit sur le fait de la marne, que comme les semences ne sont totalement nourries par l'effait des eaux communes, aussi ne sont les metaux. Je te donneray encores vn bel exemple pour la confirmation de ce que i'ay dit, de ce qui cause la bonté de la marne, elle cause aussi la cōgelation des pierres, il y a certaines forges de fer aux Ardēnes au village de Daigny & Giuōne, autres forges au village de Haraucourt lesquelles ne sont distant pour le plus que deux lieuës les vnes des autres, ce neātmoins és forges de Haraucourt ils mettent de la terre blanche qu'ils prēnent assez bas en terre, laquelle ils mettent parmy la mine de fer pour aider a la fonte d'icelle mine, & ceux la de Dagny & Giuonne, prennent pour la mesme cause de la pierre de laquelle lon se sert a faire de la chaux, qu'ils appellēt pierre de castille, laquelle ils cassent pour aider a la fonte de leurs mines cōme i'ay dit. Voistu pas par la vne preuue euidente, puis que les sels des arbres aident a faire fondre toute chose qu'il y a vne vertu salitruue és pierres, & consequemment és terres qui ne sont encores lapifiées comme

me celle de laquelle l'on se sert a Hiracourt, puis qu'elle fait la mesme action que font les pierres de Dagny & Giuonne.

Theorique.

Il semble que tu te contredis, en ce que tu dis quelquesfois que les pierres sont congelées par la vertu du sel, & puis apres tu dis que c'est vne eau.

Practique.

Il me semble que tu as vne cernelle bien dure, car il me souuient t'auoir dit au precedent qu'on n'a point accoustumé d'appeller l'eau de la mer sel, combien qu'elle soit sallée: mais bien on l'appelle eau iusques a ce qu'elle soit cōgelée & depuis on l'appelle sel, on n'appelle pas aussi l'eau glacée au parauant qu'elle soit gelée, mais estant gelée on l'appelle glace: on n'appelle point le lait fromage au parauant sa congelation, semblablement ie ne puis appeller les choses susdites en autre terme qu'ē la forme, ou qu'elles sont alors que i'ē ay parlé depuis auoir escrit au precedent. Je trouue tesmoignage certain contre ceux qui disent que la marne ne prouffite gueres aux champs la premiere année, il est certain que si fait, autant bien que la suyuant, moyēnant qu'elle soit mise aux chāps au paranant que l'hyuer aye commencé, parce que la marne ne peut de rien seruir, si elle n'est premierement dissoute par les gelées. I'ay esté aussi aduertty par les habitans de Champagne, de Brie & Picardie, qu'en certains lieux, la marne n'est autre chose

chose que craye & d'autant qu'en plusieurs contrées desdits pays, il y a faute de pierre, & sont contrains quelquesfois de faire des murailles de craye: quand ils trouuent quelque fosse ou elle sera bien condencée & reduite en craye, cela ne se peut faire en toutes marnieres, par ce qu'aucunes ne se peuuent tirer que par petites pieces & mesme il y en a qui sont encores liquides & bourbeuses. Et comme j'ay dit au precedent, ne sont toutes blanches, ains y en a de diuerses couleurs. As tu pas considéré les semences qui estant mises dedés vne phiole, pleine d'eau elles viennent & se promeuuent dedés ladite eau, combien que la phiole soit bien selée? & toutesfois nous tenons pour certain que toutes choses animées ne pouroyent viure sans aër, il faut donc que l'eau & la phiole soyent tous deux poreux, car autrement ces bestes encloses dedens, ne pouroyent viure. Autant en dis-je des poissons de la mer, & des riuieres que si l'eau n'auoit quelq pore, les poissons ne pouroyent viure. As tu pas considéré que quand le temps est humide, & qu'il aduient quelquesfois a plouuoir, ou neiger contre les vitres, qu'elles seroient mouillées a trauers, par le dedens es costez de la chambre: cuides tu que le soleil fut passé a trauers des vitres, si elles n'estoyent poreuses. Il est certain que non aussi le feu ne pouroit percer a trauers des pots & chaudières des metaux, s'il ny auoit quelques pores, tu vois aussi que combien que la coquille des œufs soit bien

bien condencees, si est-ce qu'estants mises sur la braise il pleurent certaines petites gouttes d'eau a trauers de la coquille, procedante du dedens de l'œuf.



COPPIE DES ESCRITS, QVI

sont mis au desouz des choses merueilleuses, que l'auteur de ce liure à preparé, & mis par ordre en son cabinet, pour prouuer toutes les choses contenues en ce liure: par ce qu'aucuns ne voudroyent croire, afin d'asseurer ceux qui voudront prendre la peine de les venir voir en son cabinet, & les ayant veu, s'en iront certains de toutes choses escrites en ce liure.



OV T ainsi que toutes especes de metaux, & autres matieres fusibles, prenans les formes des creux, ou moules, la ou ils sont mis, ou iettez, mesmes estans iettez en terres prennent la forme du lieu ou la matiere sera iettée ou versée, semblablement les matieres de toutes especes de pierres, prennent la forme du lieu ou la matiere aura esté congelée. Et comme les formes metaliques, ne sont connues iusques à ce qu'elles soyent dehors du moule, auquel la matiere aura esté congelée, autāt en est il des matieres lapidai-

res,

res, lesquelles en leur premier essence, sont liquides, fluides, & aqueuses: & afin d'obuier aux calomnies qui pouroyent estre faites par ignorâce, ou par malice, n'ayant veu autre chose que mes escript, & plattes figures: Pour ces causes dis-ie, ay mis en ce lieu, en euidence vn grand nombre de pierres par lesquelles tu pouras aisément connoistre estre veritables, les raisons & preuues que i'ay mises au traité des pierres. Et si tu n'es du tout aliené de sens, tu le confesseras apres auoir eu la demonstration des pierres naturelles: lesquelles i'ay figuré en mon liure, parce que tous ceux qui verront le liure, n'auront pas le moyen de voir ces choses naturelles: mais ceux qui les verront en leurs formes naturelles, seront contrains confesser, qu'il est impossible qu'elles eussent prins les formes qu'elles ont, sans que la matiere eut esté liquide & fluide.

Si tu veux bien entendre ce que dessus, entre au dedens des carrieres, auxquelles l'on aura tiré quantité de pierres, ou autres mineraux. Si lesdites carrieres sont encores demeurez voutees, tu trouueras en la pluspart d'icelles certaines mesches pendantes, & formées par les eau, qui descendent journellement à trauers des terres, sus les voutes desdits rochers. Et les eaux qui auront coulé en la partie dextre ou senestre, contre les mineraux desdits rochers, te donneront clairement à entendre les preuues que verras ci apres. Par ce que tu con-

noistras

noistras que les eaux, qui se sont congelees depuis que les pierres ont esté tirees desdits rochers, ne sont semblables de couleur, n'y de forme, n'y de durté, à celles de la principale carrière.

Aussi, en contemplant ce que dessus, tu connoistras qu'il y a vn nombre infini de pierres, qui ont deux essences, & autres qui ont esté formées par additions, le tout par matieres liquides, comme tu connoistras aisément par les preuues, que ie t'ay mises icy par rangs.

LES pierres qui sont congelees en l'aër, ne peuvent tenir autre forme que celles que tu vois, lesquelles sont formées, partie d'icelles comme glaces pendues és goutieres.

Et par ce que i'ay dit, que toutes pierres sont diaphanes & transparentes, ou cristallines en leur essence premiere: il te faut donques entendre, que celles que tu vois icy sont tenebreuses, pour ce que les eaux communes iointes avec l'eau congelatiue, ont amené de la terre, ou sable avec elles, lequel sable ou terre estant congelée avec la matiere cristalline, la rend tenebreuse, mesmes la fait estre de sa couleur. soit sable ou terre; comme tu peux voir euidentement par ces figures, en considerant les formes d'icelles.

Tu peux aussi iuger par icelles formes rudes & mal plaisantes, que ce neantmoins elles ont esté formées de matieres fluantes, en telle sorte, que tu peux aisément iuger lequel bout estoit en haut ou
en

en bas, comme si c'estoit vne matiere metalique.

Tu peux aussi connoistre par les autres pierres suyuanes, qu'elles ont esté formées le plat en bas, & quelles ont esté faites à diuerses fois, & par additions congelatiues, & non par croissance comme aucuns disent: les additiōs assés sont connues audites pierres.

Tu vois aussi que les pierres de platre, de talque & d'ardoise, s'esleuent, & se desassemblent par fuillelets en la forme d'un liure: & ce d'autant que les matieres ont tombé à diuerses fois, à trauers des terres, parquoy les congelations estants faites à diuerses fois, ne se peuuent si bien lier comme si la matiere auoit esté cōgelee tout a vn coup: aussi come tu vois, il y a quelque fois de la terre, ou sable qui se trouuent entre deux congelations.

Par ces pierres tu peux aisément connoistre qu'elles ont esté formées a plusieurs fois & diuerses congelations adioutees, par les matieres distillantes.

Toutes ces especes que tu vois estre remplies de cailloux & diuerses especes de coquilles, ont esté formées dens terre en quelque lieu couuert d'eau, & sont les pierres de double essence: Car les coquilles & cailloux qui sont au dedens d'icelles, estoient formez au parauant la masse & leur formation, pour ces causes, est plus poissante & plus dure que non pas la masse. Et quelque tēps apres les eaux exalatiues s'en sont fuyes y ayāt delaissee l'eau

L'eau congelatiue. Icele à lapifié & petrifié les vases auxquelles estoient les coquilles ou cailloux. Et d'autant que la terre estoit desia alteree pour l'absence des eaux exalatiues, la masse principale se trouue plus tendre & plus legere pour cause du nombre des pores qui sont en ladite masse.

Et ne faut que tu penses q nature ait formé lesdites coquilles sans subiet: Ains te faut croire que elles ont esté formées par des poissons animez comme les autres natures brutales, & ne dois nullement croire que ces choses ayent esté faites du temps du deluge: car combien qu'il s'en trouue sur les montaignes steriles d'eau. si est-ce que quand leurs coquilles prindrent leurs formes, il y auoit pour l'ors de l'eau en laquelle y auoit plusieurs choses animées, lesquelles ont esté retenues, & se sont trouuées encloses quād le bournier s'est reduit en pierre: tu l'entendras mieux en poursuyuant la lecture des escreteaux subsequens.

Tu vois icy vn grand nombre de bois reduit en pierre, lequel s'est petrifié dedēs l'eau comme les coquilles & ledit bois a esté petrifié en mesme temps que la masse de la pierre, en laquelle ledit bois est attaché, & le tout n'a point esté fait hors de l'eau, & ne le peut estre.

Tu vois aussi certaines pieces de bois qui ont esté petrifiées dens l'eau congelatiue, de laquelle toutes choses sont commencées, & sans laquelle nulle chose ne peut dire ie suis. Voila pourquoy
ie l'ay

ie l'ay appellé element cinquieme, combien qu'il deult estre appellé premier.

Pour te rendre certain que toutes choses sont poreuses, comme i'ay mis en mon liure, considere ce grand nombre de poisons armez de coquilles, lesquelles i'ay mis deuant tes yeux, qui sont apres- sent tous reduits en pierre; & ce par la vertu de l'eau congelatiue, qui a penetré tout au trauers desdites coquilles en les changeant de nature, en autre sans leur oster rien de leur forme.

Et a cause que plusieurs sont abreueez d'une opinion fauce, disant que les coquilles reduites en pierres ont esté apportées au tēps du deluge, par toute la terre, voire iusques au sommet des montaignes, i'ay respōdu & reprouué vne telle opiniō par vne article cy dessus, & afin de mieux verifiser les escrits de mon liure, i'ay mis deuāt tes yeux de toutes les especes de coquilles petrifiées, qui ont esté trouuées, & tirées entre cent milliōs d'autres, qui se trouuēt iournellemēt es lieux montueux, & au milieu des rochers des Ardennes: lesquels rochers plains de poisons armez de coquilles, n'ont pas esté faits, ny generez depuis que la mōtaine a esté faite, ains se faut croire qu'au parauāt que la mōtaine fut de pierres, que ce lieu là, ou se trouuent lesdits poisons, estoient pour lors eaux ou estangs, ou autres receptacles d'eau, ou lesdits poisons habitoient, & prenoient nourriture. Voila pourquoy tu peux aisément connoistre que i'ay dit

dit verité, quand i'ay dit qu'il y auoit és terres dou-
ces aussi bien trois especes d'eaux, comme dans
la mer: car autrement les mesmes poissons qui vi-
uent en la mer, & multiplient par habitations l'un
avec l'autre, ils ont semblablement fait és mon-
taignes, ou les armures desdits poissons se trou-
uent toutes semblables a celles de la mer.

Et pour confirmation de ce que dessus. Regar-
de toutes ces especes de poissons que i'ay mis de-
uant tes yeux, tu en verras vn nombre desquels
la semence en est perdue, & mesmes, nous ne sca-
uons à present cōment il les faut nōmer: mais ce-
la ne peut empescher qu'il ne soit notoire à tous,
que la forme diceux ne nous donne claire cōnois-
sance qu'ils ont esté autre fois animés, & ces for-
mes ne se peuuent faire nullement, si elles ne sont
formees par choses animees.

Il te doit suffire par les articles subse quente, que
les preuues sont toutes notoires, que toutes pier-
res sont en premieres essence de matieres liquides
fluides & cristallines. Semblablement les matieres
metaliques sont aussi fluides, aqueuses & cristal-
lines. Et tout ainsi que les pierres tenebreuses le
sont pour cause des melanges des terres & sables
entremellez parmi la matierre essencielle, sem-
blablement les metaux ne peuuent aucunement
apparoître diaphanes, ou cristalins: ains sont im-
purs pour cause des matieres entremellees avec
l'essence pure: lesquelles matieres entremeslees

rendent le metal impur, aigre & friable : ce qui ne pouroit estre, s'il ny auoit vne opposition des terres ou sable, ou autre interpositions : & mesmes le souphre est ennemi des metaux apres leur congelation. Parquoy il faut qu'il soit mis hors par les affineurs, aux rang des matieres excrementales.

Et pour bien t'inciter à preparer tes oreilles pour ouir & tes yeux pour regarder, i'ay mis icy certaines pierres & mineraux de toutes especes de metaux, pour te faire entendre vn point singulier & de grãd poix, qui est tel que par ces pierres metaliques mise deuant tes yeux, tu pouras aisément connoistre que tout autant d'alchimistes qu'il y a & qu'il y a eu par ci deuant, se sont trompé en ce qu'ils ont voulu edifier par le destructeur: d'autãt qu'ils ont voulu faire par feu, ce qui se fait par eau: & par chaut ce qui se fait par froid: qui m'a causé mettre ces preuues euidentés deuant tes yeux.

Notte bien ce petit argument bien prouué par la chose mesme & regarde bien en toutes minieres metaliques, tu trouueras sur la superficie du metal vn nombre infini de pointes taillees par faces naturellement, comme si elles auoyent esté taillees par artifice: dont la plus part d'icelles pointes sont formées des matieres cristallines, ou pour mieulx dire, de cristal qui m'a causé connoistre directement & m'asseurer que iamais il ne se forma aucunes pointes naturellement hors de l'eau: mais

pour

pour choses certaines toutes matieres qui sont congelees dedens les eaux, se trouuent sur la superficie superieure en forme triangulaire, quadrangulaire, ou pentagonne. Je dis formées par vne nature merueilleuse & comme il est donné aux vegetatiues de tenir vne ordre certain, cōme tu vois que les rosiers & groisiliers se forment des espines piquantes pour leur defence: aussi les matieres metaliques & lapidaires, se forment comme vn harnois, ou corps de cuirasse sur la superficie, en façon de pierres pointues: comme il est donné à plusieurs poissons de se former plusieurs escailles, ainsi que tu vois aux escreuices & plusieurs autres genres de poissons.

Regarde donc si ie suis menteur, voit-tu pas plusieurs pieces de mines d'or & d'argent qui te monstrent euidentement qu'elles ont esté formées dans l'eau? entre les autres, n'en vois tu pas vne qui est la premiere couche estre de pierre, qui te montre euidentement que la pierre à esté premierement congelée? & apres tu vois vne autre couche de mine d'argent. Et au troisieme degré, il y en à vne couche de cristal formée par pointes de diamant & puis que ie te dis, que ses formes pointues taillees à faces, ne se peuuēt former hors de l'eau, tu me confesseras donques, que la mine d'argēt qui est en la partie inferieure du cristal, est aussi congelee au dedens de l'eau comme tu connoistras en continuant la montre de ces choses.

Tu vois aussi par ces autres pierres metaliques, certaines pointes comme celles cy dessus nommees: Et toutesfois en icelles il y a plusieurs especes de metaux: comme or, argent, plomb, & cuyure, lesquelles choses sont aussi impures, à cause des terres sulphurees & autres escrements qui causent rendre les metaux aigres & freables. Et quand lesdits escrements sont discipez & separez par l'action du feu, lors lesdits metaux sont traitables, & maleables: comme on void par les metaux monnoyez.

Voici à presēt vn article qui te doit faire arrester, à contempler & croire tout ce que dessus. Regarde l'ardoise que i'ay mis cy deuant tes yeux, laquelle est remplie de marcasites, formée en façon d'un dé carré. Il est certain que l'ardoise a esté congelée dedens l'eau, & qu'au parauant sa congelation, la matiere metalique qui estoit inconnue au dedens de l'eau, s'est separée de ladite eau: comme l'huile qui n'a nulle affinité avec l'eau: & la matiere desdits marcasites qui sont formés de matieres metaliques, en se congelant & se diuisant d'avec l'eau se sont formées par faces penthagones & ont prins leur couleur en leur congelation. Et faut necessairement que lesdites marcasites ayent esté formez & congelez au parauant la formation de l'ardoise.

Vois-tu pas ces pierres Cristallines que i'ay mises icy, pour attestation de la plus rare & difficile demon-

demonstration qui soit en mon liure? D'autant
 combien que lesdites pierres soyent autant clai-
 res, & cristallines que l'eau pure, si est ce qu'au
 dedens d'icelles il y a de la matiere metalique, la-
 quelle ne se peut aucunement connoistre dans la
 masse, sinon que la matiere metalique soit mani-
 festee par l'examen du feu bien chaud, comme tu
 vois par vne piece de la mesme matiere qui est
 deuenue en couleur d'argent apres son examen
 fusible. Et par là tu te dois tenir assuré & croire
 fermement, que les metaux sont entremislez, &
 incônus parmi les eaux iusques à leur congelation.

Notte doncques que les matieres metaliques
 sont inconnues parmi la terre, & parmi les eaux, &
 sont tellement liquides, & subtiles qu'elles pene-
 trent à trauers des corps, ou matieres corporelles,
 comme fait le soleil à trauers des vitres; car autre-
 ment les eaux metaliques ne pouroyent reduire
 aucune forme en metal, si la forme n'estoit pre-
 mierement dissipée. Nous voyons toutesfois que
 plusieurs coquilles de poissons, sont metaliques &
 changees de substance, pour auoir croupi entre les
 matieres metaliques, comme tu vois aussi presen-
 temēt plusieurs pieces de bois, qui se sont reduites
 en metal pour auoir croupi parmi les eaux au-
 quelles il y auoit des eaux metaliques.

Tu vois euidēment que toutes ces formes
 de coquilles reduites en pierres, ont esté autre-
 fois poissons viuants & par ce que de toutes ces
 espe-

especes la memoire & vsage en est perdue, ce ne-
antmoins par les autres especes qui sont en vsage,
sont aussi reduites en pierres, nous pouuons aisément
connoistre que nature ne fait rien de telles choses
sans subiet comme i'ay dit cy dessus. Et pour ces
causes i'ay mis vn parquet à part & du genre que
tu voy estre formé en façon de lignes spirale, i'en
ay veu vn qui auoit seize poulces de diametre.

I'ay mis ceste pierre deuant tes yeux pour te faire
entendre, que tout ce que i'ay dit des tremble-
ments de terre contient verité: car tu vois en ceste
pierre les effects de l'aër & de l'eau esmeus par le
feu: car combien que la pierre soit grande, ce ne-
antmoins elle est formée de bien peu de matiere:
par ce que les trois elements l'ont enflée & rendue
spongeuse en telle sorte que tu vois, que si la ma-
tiere estoit reserrée comme elle estoit au parauant
qu'elle fut mise au feu, elle seroit cent fois plus
petite qu'elle n'est à present: mais par ce qu'elle e-
stoit liquide & bouillante, lors que le feu a esté cau-
se de la tormenter, elle s'est soudain congelée, &
l'aër qui la tenoit enflée par le mouuement du feu,
a demeuré dedés: iusques à present. Et voila pour-
quoy ladite pierre est si legiere qu'elle nage sur les
eaux, comme toutes autres choses legeres.

Comme ie t'ay dit que les metaux estoient in-
continus dens les eaux, semblablement sont ils en
la terre, au parauant leur congelation: & pour ces
causes, ie t'ay mis deuant les yeux ceste grande
piece

piece de terre cuite, laquelle estoit formee en la façon d'un grand vase: mais quand elle à esté touchée par le feu, elle s'est liquifiée, & ployé & entierement perdu sa forme, en telle sorte que si elle eut esté forgée toute chaude, elle se fut estendue sans se casser, cōme font les choses maleables. Ne te faut il pas bien croire par là, qu'il y à quelque matiere metalique inconnue parmi la terre, de laquelle on fait ces vaisseaux? car autrement elle eut plustot cassé, que ployé.

Vois tu bien ces formes de poissons nommez auaillons: ils ont esté trouvez en vn champ joignant les forests des Ardenes: & la partie de la terre ou ils ont esté trouvez, est fort creuse sur la superficie: qui m'a fait croire comme dessus, que les eaux s'arrestoyent là anciennement plus qu'en nulle autre partie du champ, & lesdits poissons y estoient generez & augmentez & y viuoient comme s'ils eussent esté en la mer. En la mer Oceanee limitrophe de Xaintonge, se trouue grande quantité desdits poissons. Et cōme i'ay dit cy dessus, l'eau dudit champ s'est exalée & tarie, & les vases & poissons se sont reduits en pierre, desquelles s'en trouue vn nombre infini.

Et en vn autre champ, i'ay trouué vn nōbre infini de poissons que nous appellons sourçons, desquels les Michelets en enrichissent leurs bonnets ou chappeaux en venants de saint Michiel. Et la cause pourquoy les coquilles ne sont blanches,

comme les autres, est par ce qu'il y à de la mine de fer au dedens, & parmi la terre ou lesdits poissons estoient habitans.

Vois-tu pas icy des fruits reduits en pierre, par les mesmes causes que i'ay deduites cy dessus?

Toutes les pierres que tu vois en cest endroit, sont agates, ou cassidoines, qui ont esté autrefois terre d'argille, cōme tu verras au parquet suyuant.

Considere vn peu ces mottes de terre lesquelles ont la figure d'agate, ou Cassidoine & tu connoistras qu'elles estoient preparees à se reduire en pierre & ne restoit plus que la decoction par laquelle les pierres viennent en perfection.

Regarde vn peu, voici deux pierres, lesquelles ont retenuz la forme des herbes sur lesquelles la matiere est tombee au parauant qu'elles fussent congelees.

Il y à des poissons & autres animaux qui ont des pierres en la teste lesquelles sont formees de matieres liquides comme les autres.

Par ces pierres cornues qui sont creuses dedens, ie prouue qu'elles ont esté plaines d'eau exalatiue, durant le temps de leur formation.

Ces pierres que tu vois ainsi plaines de trous sont formees des vases de la mer, auxquelles y auoit plusieurs poissons nōmez daïles : iceux sont longs comme manches de couteaux, armez de deux coquilles: & quand la vase se reduit en pierre, lesdits poissons sont morts dedens, & la pierre est demeuree

demeurée perçee.

Et pour te monſtrer que toutes choſes formées dans l'eau, ſont par faces & autrement non. Regarde ici la coperoſe ou vitriol, le ſalpetre & toutes autres eſpeces de ſels, qui ſont couuertes d'eau en ſe congelant.



EXTRAIT DES SENTENCES

PRINCIPALES CONTENUES

au present liure, le nombre mis à la fin signifie la page. celles qui n'en ont point sont pour la pluspart recueillie generalement de tout le discours, sans estre rapporté à certain lieu.



OMBIEN que tous les philosophes ayent conclud, qu'il n'y à que quatre elements fient ce qu'il y en a vn cinquiesme, sans lequel nulle chose ne pouroit dire ie suis. pag. 125.

126. 127. 128.

Iamais homme n'à entédu les effects des eaux, n'y du feu. 12.

Ceux qui disent que les eaux viennent de la mer, & y retournent s'abusent 34. 35.

Toutes fontaines & fleuves, qui sont formées d'eau douce, ne sont causées que de l'eau des pluies. 34. & 47.

Les fonteniers modernes se trompent iournellement, n'entendant point les effects des eaux encloses par tuyaux fousterreins. Les antiques pour ces causes, ont inuenté les aqueducs. 12.

& 15.

Tou-

Toutes pōpes & machines, pour esleuer les eaux
ne peuuent durer pour cause de la violence 2.

Sans la violece de l'eau esbranlee par le feu, il n'y
pourroit auoir aucun tremblement de terre.

page

23.

Il y a deux eaux, l'vne exalatiue & l'autre congelatiue & germinatiue.

126.

Comme l'eau seminale de toutes choses animees
est differente de l'vrine, aussi l'eau exalatiue est
differente à l'eau congelatiue.

Toutes choses humaines sont commencees par
matieres aqueuses: mesme les matieres des semences dures ne peuuent generer de rechef
que premierement ne soyent liquifiees: car autrement elles ne pouroyent succer n'y faire
atraction de ceste matiere congelatiue, laquelle i'appelle element cinquiesme.

Comme toutes especes de plantes, voire toutes
choses animees sont en leur premiere essence
de matieres liquides, semblablement toutes
especes de pierres, metaux & mineraux sont
formees de matieres liquides, en leurs premiere
essence.

104.

Par l'action de l'eau congelatiue les corps de l'homme & de toutes bestes & de toutes plantes se
peuuent reduire en pierre.

203. 204.

L'on peut faire des fontaines en tous lieux.

52.

53. 54. 55.

En la terre argileuse sont deux eaux, l'vne congelatiue

latiue

latiue & l'autre exalatiue.

291.

La guerison des eaux des bains, est incertaine. 28.

Les eaux qui sont propres pour les taintures n'ont leur action causee que d'une falsitude que les eaux ont prise en passant par les terres.

Les effects des eaux qui sont propres pour endurcir & attremper les ferrements, ne procedent que d'une matiere falsitiue, qui est esdites eaux.

Les fontaines artificielles sont meilleures que les naturelles.

57.58.59.

Il n'y a aucune eau mauuaise de foy. La cause de la mauuaitie de celles qui le sont, procede de la terre du lieu ou elles passent

18.

Les eaux des pluyes sont meilleures & plus asseurees que celles des sources.

58.59.

Si la terre n'estoit foncee de pierres, ou de quelque terre argilleuse, on ne trouueroit iamais source pour faire fontaine ou puits

48.49.

Les figures du cœur du bois qui sont estimees en menuiserie & les figures qui sont es marbres, iaspes, porphires, agates, calidoines & toutes autres especes de pierres, ne sont causees que par accident procedât de la descente ou esgout des eaux congelatiues.

Le polissement des pierres dures & compactes, red tesmoignage qu'elles sont formees de l'eau inconnue: Et comme l'eau represente les Tours Chasteaux, ou autres bastiments assis au pres de la riuiera, aussi font les pierres polyes.

Les

Les metaux polis font le semblable par la vertu de ce cinqiesme susdit.

L'espouuantable masquaret, qui se fait en la riuie-
re de Dordongne, n'est causé que d'un aër en-
clos, compressé par les eaux de la Garonne &
de la mer, qui entre en la Gironde. 74.

Si les fleuves & fontaines des montaignes proce-
doient de la mer comme lon dit, il faudroit ne-
cessairement que les eaux se partissent de la
mer en quelque endroit ou elle fut plus haute
que toutes les montaignes & qu'il y eut un
canal bien clos, contenant depuis la haute mer
suscite, iusques au sommet des montaignes,
que si le canal ne prenoit qu'au bord de la mer,
l'eau ne monteroit iamais plus haut que le ri-
uagede la mer: & si le canal qui ameneroit l'eau
des fleuves au haut des montaignes se venoit à
creuer, il est certain que tout le monde seroit
submergé. 40. 41.

Si l'eau congelatiue n'estoit portée par la com-
mune, elle ne pouroit actionner non plus.

Si toute l'eau de la terre estoit en nature conge-
latiue, bien-tost la terre se reduiroit en pierre.

Si en l'homme n'y auoit autre eau que la com-
mune, ou celle de l'vrine, il ne pouroit iamais
engendrer pierre en son corps.

Plusieurs eaux engendrent la pierre à ceux qui
en boient, à cause que parmi la commune,
il y a quantité de l'eau congelatiue.

Côme

Côme l'eau claire est propre pour receuoir toutes couleurs. Semblablement les terres blanches les peuuent aussi receuoir.

En la mer il y à trois especes d'eaux, la commune, la salée & la vegetatiue, ou congelatiue.

La verité est contraire & se. mocque de la lourdisse de plusieurs qui soustiennent que les glaces se forment au fond de la riuiera de Seine.

156.

Entre tous les esprits visibles, il n'en est pas vn plus certain que l'eau commune, qui est vn témoignage que tous mineraux exalatifs, sont composez de matieres aqueuses, & pour ces causes ils sont sublimatoires.

Combien que la terre & la mer produisent iournellement nouuelles creatures, & diuerses plantes, metaux & mineraux, si est-ce que des la creation du monde, Dieu mit en la terre toutes les semences qui y sont & seront à iamais: d'autant qu'il est parfait, il n'à rien laissé d'imparfait.

90. 103.

Comme toutes senteurs couleurs & vertus sont inconnues en la terre: aussi toutes matieres lapifiques & metaliques sont confuses & inconnues parmi les eaux & la terre, & ce iusques à ce qu'elles soyēt reduites en quelque forme par vne congelation inconnue.

108. 121. 124.

Tous ceux qui cherchent à generer les metaux par feu veulent edifier par le destructeur.

93.

Com-

Comme en toutes les matieres feminales de toutes choses animees, on ne scauroit distinguer les os & le poil d'auec la chair, semblablement nul homme ne scauroit connoistre les matieres metaliques au parauant leur formation ou congelation. 121.122.

Si quelqu'un pouuoit distinguer les couleurs, saveurs, vertus, puis que les plantes scauent attirer & desbrouiller de la terre, ie dirois qu'il seroit possible à vn tel hōme faire de l'or & de l'argent. 120.135.

Les metaux n'ont aucune couleur ains sont comme eau au parauant leur congelation & decoction. 91.105.

Iamais homme n'a conneu, n'y souphre, n'y vis-argent, au parauant qu'il eut commencement de generation, non plus que on ne scauroit voir les couleurs & senteurs extraites de la terre par les plantes aromatiques, au parauant que lesdites plantes en eussent fait attraction. 114.121.137.

Si les matieres metaliques n'estoyent fluides & liquides, il seroit impossible qu'elles peussent actionner les pierres monstreuses, que i'ay mis en mon cabinet. 125.126.130.

Par l'action des matieres metaliques estants encores fluides les corps de l'hōme & de la beste, & poissons, & de toutes especes d'arbres & plantes, se peuuent reduire en metal. 131.203.

L'or

L'or se peut potager en diuerſes ſortes , mais non
pas pour ſeruir de reſtaurant. 138.

Potage l'or en quelque ſorte que tu voudras que
ſi l'eſtomach du malade , à qui tu le donnes eſt
auſſi chaut qu'vne fournaiſe ardante, la chaleur
de l'eſtomach en lieu de departir le potage d'or
és membres nutritifs , il le rendra à vn lingot:
car autrement l'or ne pouroit eſtre fixe. 143.

Les metaux ſe peuuent augmenter par art , mais
non pas legitimement. 95.96.97.98.99.

Antimoine eſt vn metal imparfait , qui cauſe vn
vomiffement par les deux parties de l'homme,
a cauſe de la chaleur naturelle de l'eſtomach qui
le fait exaler : laquelle exalation veneneuſe eſ-
meut tous les eſprits vitaux. 145.146.

Par pluſieurs eſpeces de marcaſites, ie prouue tous
metaux eſtre generez de matieres liquides. 110.

111.112.122.131.

Ceux qui ont eſcript que les metaux croiſſent aux
minieres comme les arbres, n'ont rien entendu
& ont parlé contre verité.

Ceux qui diſent & ont eſcript que les eſprits inui-
ſibles tuent les hommes dedens les minieres,
ont erré.

Autant qu'il y a , & qu'il y a eu d'alchimistes au
monde, ſe ſont abusez en ce qu'ils ont penſé re-
tenir les eſprits eſmeus par le feu és vaiſſeaux
clos & fermez. 132.

Quand vn vaiſſeau de terre, ou quelque metal que
ce ſoit

ce soit seroit aussi espoix qu'une montaigne, & qu'il y ait quelque matiere spirituelle, ou exalatiue au dedens dudit vaisseau, il faut necessairement que ledit vaisseau creue s'il est touché par le feu, sçauoir est si ledit vaisseau n'a quelque trou pour seruir de fuite à la matiere spirituelle ou exalatiue, qui sera au dedens. 133.

Il seroit plus aysé à vn Alchimiste de faire tourner en son premier estre, vn œuf pillé, broyé, ou vne charaigne, ou nois puluerisée, que non pas pouuoir generer les metaux. 102.

Côme l'huile dedens l'eau se separe par petits rondeaux: côme aussi fait le suif & toutes especes de gresses. Aussi les matieres lapidaires & metaliques, se sçauent separer des eaux communes.

109. 119. 126. 134.

Comme l'aër tient lieu & occupe place, semblablement fait le feu dedens les metaux fondus, & pour ces causes le fer fondu & autres metaux rapetissent en se congelant.

Tout ainsi que Dieu a commandé à la superficie de la terre de se trauailler à produire & germer les choses necessaires pour l'homme & pour la beste, il est certain que l'interieur & matrice de la terre en fait le semblable, en produisant plusieurs especes de pierres, metaux & autres mineraux necessaires. 90.

Ceux qui lisent que les pierres estoient créées des le commencement du monde errent, ne l'entendant

A

dant

- dant pas 195.
 Et ceux qui disent que les pierre croissent, errent
 semblablement. 195.
 Ceux qui pensent que les pierres soyent en leurs
 dureté des la premiere formation, ne l'enten-
 dent pas. 245. 246.
 Ceux qui disent que les terres & pierres ont prins
 leur couleur des leur essence ne l'entendent pas.
 Comme les fruits de toutes especes changent de
 couleur en leurs maturité, semblablement les
 pierres, metaux & autres minéraux, mesme les
 terres argileuses changent de couleur en leur
 decoction 122.
 La matiere de toutes pierres tant des communes
 que des rares & precieuses est cristaline & dia-
 phane. 199.
 Toutes pierres coulourées ou tenebreuses ne sont
 tenebreuses ny coulourées que par accident sur-
 uenu a la matiere diaphane au parauant la con-
 gelation desdites pierres. 253.
 Toutes terres argiles sont commencement de
 pierres. 301.
 Il ny a pierre en ce monde, ny aucune chose ani-
 mée, si elle pouuoit estre dissoute, qui ne peut
 seruir de fumier ou de marne pour rendre les
 terres fructueuses.
 Ceux qui ont escript que les coquilles qui se trou-
 uent és pierres sont du temps du deluge ont
 lourdement failly. 211. 212.
 Com-

Comme les os de l'homme luy causent la forme.

Les pierres causent aussi la forme des montaignes 47.197.

De tant plus que les pierres sont dures, alizes, ou compactes, de tant plus elles reçoivent beau polissement

S'il n'y auoit des pierres il ne seroit nulle montaigne. 47.

Aucunes pierres & rochers sont creux a cause d'vn aër enclos a la venue des matieres lapidaires qui ont esté congelées au dessuz & portée par l'aër enclos.

Aucunes autres pierres & rochers sont creux par l'apposition des terres qui ont empesché que la matiere distillante ne se peut condencer: duquel genre de pierres, les pierres des moulins qui se prennent a la Ferté souz Iouarre, en rendent tesmoignage.

La craye & la marne sont pierres imperfectes, auxquelles l'eau congelatiue a defaillly au parauant leur parfaite congelation. 308.309.311.

Le semblable en est il de toutes pierres tendres & pour cause de leurs imperfections elles se calcinent ne pouuant resister au feu 247.

Toutes pierres dures le sont par deux effets necessaires: L'vn qu'elles ayent de l'eau a souhait durant leur congelation & formation: L'autre, qu'elles ne soyent ostées de leur place iusques a la perfection de la congelation. 246.

Si le plastre autrement appellé gyp & l'alebastre estoient laissez en terre ils deuendroyent pierres dures, moyennant que le fons de leur situation peut contenir les eaux, & autrement non.

Si la matiere principale de toutes pierres n'estoit d'une eau candide & transparente il ne seroit iamais diamant, cristall, emeraudes, rubits ny grenats, ny aucunes pierres diaphanes.

Toutes pierres cornues ne le sont que par accidēt, & se forment en la terre, selon le lieu & forme ou la matiere liquide se vient arrester & cōgeler.

228.

Toutes pierres sont formées de matieres fluantes & liquides

199.

Toutes pierres ou metaux formez a faces ou a pointes sont congelez dedans les eaux.

111.112. 200.267.

Le nombre de diuerfes especes de sels est infiny.

115.163.

Il n'est rien en quoy il n'y ait du sel.

163.164.

Ceux qui disent que le sel commun est ennemy des semences errent.

170.171.172.

Le sel cause la saueur en toutes les especes de fruits & de plantes.

165.168.194.

Le sel qui est en toutes plantes, metaux & mineraux cause la vertu qui est en iceux.

164.168.194.

Le sel blanchit toutes choses.

165.168.194.

Il donne ton a toutes choses.

168.194.

. Rend

- Rend transparent toutes choses. 169.
- Cause l'action és miroiers & lunettes. 194. 312.
- Il cause l'amitié & vertu generatiue. 168. 194.
- Il cause la voix & l'incorruption. 168.
- Il fait attraction des teintures. 177.
- Il oste de l'un pour bailler a l'autre. 177.
- Et cōme il dōne ton aux metaux, aussi fait il és chā-
sons ou cātiques faites par les humains, mesme
resioit les humains & les bestes. 169. 194.
- Sans sel il est impossible de faire verre. 168. 194.
- Le sel commun est vn contrevenin
- Sans le sel nulle chose ne pouroit prendre police-
ment.
- Sans le sel nul ferrement n'auroit force de couper
ny mesme s'endurcir. 168. 177. 194.
- Il est impossible que la langue trouue saueur en
nulle chose si premierement elle n'est dissoute
& face attraction de quelque partie du sel qui
est en la chose qu'elle atouche. 147. 148.
- En l'escorce du bois est contenu presque tout le
sel de l'arbre 166.
- S'il n'y auoit du sel en l'escorce de bois elle ne pou-
roit conroyer le cuir, ny netoyer les draps & se-
roit inutile a la buée. 166.
- S'il n'y auoit du sel aux pailles & foins, les fumiers
ne pouroyēt aucunemēt ameilleurer la terre. 169.
- Si n'estoit le sel des epiceries les corps embamez
se putrifiroient. 167. 194.
- Sans l'effet du sel nulle chose ne sentiroit. 164.

La terre sigilée n'a aucune vertu contre la poizon
sinon a cause de l'action du sel ou eau congela-
tiue.

331.

Les cendres de toutes especes de bois, arbres &
arbusstes sont bonnes a faire verres pour cause
du sel qui est esdits bois par les foin & pailles

168.

S'il n'y auoit du sel aux pierres elles estât calcinées
ne pouroyent seruir aux couroyeurs pour em-
pescher la putrefaction des cuirs.

Les coquilles des poisons de la mer ne sont fort
bonnes a faire chaux, & est attestation de la
salcitude qui est en elle.

Le sel des raisins detruit le cuiure, le rendant en
vert de gris.

Il y a en toutes choses humaines vn commence-
ment de forme soustenue par le cinquisme ele-
ment & autrement toutes choses naturelles de-
meureroient combustées ensemble sans au-
cune forme.

128.

Le nombre de diuerses especes de terre argileuse
est indicible.

156.

Les effaits desdites terres sont merueilleux, voire
indicibles.

257. 258. 259.

Toutes terres peuuent deuenir argilles.

Ceux qui disent que la terre argileuse est grasse &
visqueuse ne l'entendent pas.

254. 255.

La mesme matiere qui cause argiler toutes terres
& cela mesme qui cause que la terre de marne

fait

fait produire & vegeter les fruits és terres steriles.

Par les moyens mis en celiure on pourra trouuer de la terre de marne en toutes prouinces.

Toutes choses quelques compactes, ou alises qu'elles foyent, sont poreuses.

La momie des modernes n'est que charogne. 167.

Le plôbusti des modernes n'est fait au deboir.

Les architectes & sculpteurs ne prennent occasion de se glorifier sinon en ce qu'ils sçauent imiter les inuentiôs des payens & veulent estre honorez comme inuenteurs.

Les euures plus vaines des humains sont les plus estimées.

De chose que la langue ne peut faire attraction de saueur, le corps n'en sçauoit prendre nourriture. 147.

Comme le corps est subiect à corruption il veut estre nourri de choses corruptibles 146. 147.

S'il ny auoit du cinqiesme susdit en la prunelle de l'œil les lunettes ne pouroyēt ayder à la veüe. 312.

Tout ainsi que Dieu a ordonné qu'en chacune semence il y à toutes matieres requises pour la generation des nouuelles auenir, comme dens la semence de l'œuf est comprins le blâc, le jaune & la coquille & és noyers les noix, la robbe d'icelle la coquille, l'arbre, feuilles & branches: lesquelles matieres inconnues se font apparoir en leur maturité: semblablement la chair, les

os le sang & toutes les parties de l'homme sont contenues & encloses en vne, & comme Dieu à ordonné de séparer les matieres de pierres en dures, semblablement la matiere des os de l'homme & de la beste sont endurcies & aussi en partie de la matiere lapidaire: ce que l'on peut veoir par les coquilles des œufs & par les os de pieds de moutō & plusieurs autres bestes, desquelles les os résistent mieux au feu que nulle pierre que l'on puisse trouuer.

Le mitridat des anciens n'estoit composé que de quatre simples. 153.

Trois cents tant de simples que les modernes mettent à leur mitridat ne sçauoyent s'accorder: Comme toutes les couleurs d'un peintre broyé ensemble n'en sçauoyēt faire vne belle.

150.

Côme aussi vn bouquet de toutes fleurs ne sçauroit sentir si bon qu'une seule rose. 150.

Plusieurs viandes broyes ensemble ne sçauoyent estre si sauoureuses que'un chapon seul. 150.

Sans l'action de l'humidité nulle chose ne se pourroit corrompre ne putrifier. 178.

Dans les sepulcres bien sellez, les corps se tiennēt à tousiours en la forme qu'ils y ont estez mis: à cause de l'aër qui est enclos avec eux.

Tous arbres & autre choses vegetatiues monteroyent directement en haut en leurs croissement si ce n'estoit les accidēs que j'ay mis en ce liure.

liure.

330.331.

Comme les fleuves & ruisseaux sont tortus à cause des mōtaignes, aussi les racines de tous arbres & plantes ne sont boiteuses que a cause de la position des pierres ou des terres qui sont plus dures à percer a vn endroit que non pas en l'autre. 328.329.330.331.

La terre de marne est ennemie des plantes qui ne sont semées par les laboureurs & ne les veut permettre vegeter parmi les bleds semez.

Le soulfre la gême la poix-rafine & le bitumen ne sont autre chose que huiles congelees.

En plusieurs contrees & pays des terres douces lointaines de la mer, mesme au plus hauts lieux des Ardennes, il y a mesme semence qui est en la mer pour l'essence de toutes espèces de poissons, comme ie certifie & le prouue par les coquilles lapifices qui sont par millions audit pays des Ardennes & en plusieurs autres contrees, que l'on pourra veoir en ce liure.

Les vents ne sont causez que par vne compression d'aër.

Il y a bien peu de choses en ce mōde qui ne se puissent par art rendre transparentes.

La marne est vn fumier naturel & diuin, ennemi de toutes plâtes qui viennēt d'elles mesme & generatiue de toutes semences qui ont esté mises par les laboureurs.

EXPLI-



EXPLICATION DES MOTS
PLVS DIFFICILES.



ACCRIMONIE, s'entend les choses mordicatives, qui picquēt la langue: cōme aucunes especes de sels, comme la couperose, ou vitriol.

Additions, sont les matieres adioustées és pierres & metaux, congelées & attachées à diueres fois à la premiere masse.

Aigres, sont choses qui se cassent aisément avec vn marteau.

Alizes, sont les choses ferrées, comme le caillou, & le pain broyé, auquel n'à esté donné lieu de se leuer, & toutes choses qui sont si bien condécées qu'il n'y a aucuns pores apparents.

Alterées, sont les pierres imparfaites, comme la craye, le plastre, & toutes pierres legeres, auxquelles l'eau à deffailly au parauant leur parfaite decoction.

Amalgame, est appelé par les Alchimistes l'or, quand il est dissout, & entremellé avec le vif-argent.

Antimoine, est vn metal imparfait, commencement de plomb & d'argent.

Appositions, sont les matieres terrestres entremellées, lesquelles se mettent entre-deux congel-

gelations des pierres & meraux , & rendent en cest endroit, la masse plus tendre & impure.

Aqueducts, sont les conduits d'eau, pour lesquels les antiques faisoient plusieurs arcades , pour conduire les eaux.

Attraction , s'entend d'attirer la taincture ou la vertu de quelque chose , comme l'eau bouillante attire la couleur du breuil, & l'alun attire la salue de l'homme.

Bitumen , est vne espee de poix , de laquelle on gresse les nauites pour resister à la pourriture: & cōbien qu'aucuns en vsent de certaine mixtion, cōme de iefine , grasse & poix-rasine , si est-ce qu'il s'en trouue de naturel en diuerses cōtrées.

Calciner, se dit de toutes choses, qui se rendent en chaux ou en poussiere par l'action du feu.

Circonference, est la ligne qui est à l'entour d'une figure ronde ou quarree, & de toute figure.

Concasser, se dit des choses pillées grossiement.

Concatenees , se dit des choses liées , enchainees l'une à l'autre.

Congeler, se dit de toutes choses qui s'endurcissent apres la fonte : comme les eaux s'endurcissent au froit.

Decoction , s'entend des metaux paruenus à leur perfection : comme aussi les pierres quand elles sont endurecies en perfection : comme les coquilles des noix.

Diaphane , s'entend de toutes choses claires , au

tra-

trauers desquelles on void les choses qui se presentent deuant les yeux.

Dilater, se dit des choses qui s'espendent d'un costé & d'autre: comme les riuieres debordées, les arbres & plantes, cōme on voit les citrouilles & concombres.

Dissoudre, se dit des choses qui perdent leurs formes: comme la glace & les neiges, quand elles sentent la douceur de temps.

Esmail, est vne pierre artificelle composée de plusieurs matieres.

Esmailer, se dit des choses qui sont peintes d'esmail liquifié ou fondu sur la besongne.

Spirale, est vne ligne faite par voute environnant en forme de la coquille d'une limace.

Esprits, ou matieres spirituelles, s'entendent l'argent vif, & routes choses qui s'esleuent en haut à la chaleur: Comme l'eau d'un linge mouillé.

Euaporer, se dit des choses liquides, que lon fait monter en haut par l'action du feu.

Fixes, sont choses qui endurent le feu iusques à la fonte: comme fait le verre, l'or, l'argent, & autre metal.

Fossiles, sont les matieres minerales pour lesquelles recouurer faut creuser la terre.

Frangible, se dit des matieres aigres & cassables.

Fusibles, sont les choses qui se liquifient ou se fondent, à la chaleur du feu: comme le plomb, l'estain, & autres metaux.

Imbi-

Imbiber, se dit de choses qui pour leur alteration
succent quelques matieres liquides.

Incliner, nous appellons inclination quand les
vaisseaux sont pendants d'un costé, pour tirer la
liqueur de quelque chose, pour laisser le marc
au fond du vaisseau.

Lamines, sont petites tablettes de plomb ou au-
tre metal qui ont esté forées pour calciner, ou
employer à autres ouurages.

Lapifier ou petrifier, se dit des choses qui en pre-
miere essence estoient terre, ou eau, ou bois, qui
se sont reduites en pierre.

Liquides, se dit de toutes choses qui sont claires
comme eau, ou comme le verre dedans la four-
naise.

L'ocre jaune, est vne semence & commencement
de fer, & en fin se rend en fer, quand il est suffi-
samment abreuvé & nourri par les eaux, aussi
tu vois que le fer rouillé retourne en couleur
d'ocre.

Luter, les distillateurs & ceux qui font l'eau forte
appellent lut, la terre de laquelle ils reuestent &
couurent leur vaisseaux de verre, afin qu'il resi-
stet au feu, ce quantrement ne pouroyent faire.

Maleables sont les choses qui endurent le marteau
sans aucune fraction; comme fait l'or, & l'ar-
gent, & autres metaux dontables.

Marcafites, sont metaux imparfaits. Les matieres
d'iceux se forment quelque fois en façon qua-
rée

rée cōme vn dé, quand elles sont congelées & formees dedans les eaux.

Marne, est vn fumier naturel, qui se prend en mine & quelquefois bien bas en terre, comme les carrieres de pierres & metaux.

Mordicatives, sont appellees les choses qui picquent la langue, quasi iusques à l'inciser.

Obliques, sont lignes tortues.

Oleagineuses, sont choses qui tiennent la nature de l'huile, & s'accordent avec icelle : comme fait la cire, soulfre & poix-rasine & plusieurs autres choses.

Peintures & teintures, sont differentes: par ce que les teinctures sont toutes diaphanes, n'ayant aucun corps: & donnent couleur à l'intérieur comme à l'extérieur: ce que les peintures ne peuvent faire, à cause qu'elles ont vn corps.

Pentagones, sont figures à cinq coings, Hexagones qui en ont six, Heptagones qui en ont sept, & ainsi des autres.

Petrifier, se dit des choses qui ont esté formees en bois, ou en coquilles, ou autres vegetatifs, en premiere essence, & de puis se sont reduites en pierres.

Pyramides, sont les figures pointues par enhaut, à limitation ou semblance du feu, sur lequel on à prins le mot de Pyramide.

Quadrangle, est vne forme quaree, & s'appelle quadrangle à cause des quatre coings.

Salfi-

Salitiue ou falsitiues, sont les choses qui picquent la langue, comme le sel, l'alun & les pierres calcinées.

Saphre, est vne terre qui se prent és mines d'or, laquelle est terre fixe autât comme l'or mesme, & d'icelle on fait vne couleur d'azur, en esmail.

Sel commun, est celuy que nous mangeons ordinairement, lequel on distingue des autres: par ce qu'il y en à de plusieurs especes.

Souffleuses, sont les choses qui ne veulent recevoir les fontes des metaux, comme terre, sable poreux, qui retiennent l'aër enclos, lequel empêche que les metaux ne prennent nettement la forme des choses qui sont mises dedens.

Sousterreines, sont les choses qui sont souz terre, comme les canaux, par lesquels on fait venir les fontaines.

Sublimer, se dit des choses qui s'esleuent & s'en vont en haut en fumée, quand elles sont touchées par le feu.

Sulphurées, sont toutes matieres tenant du souphre: comme sont les metaux & toutes especes de marcaffites.

Superficiés, s'entendent les choses qui enuironnēt à l'entour quelque masse ronde, ou quarrée, ou d'autre forme, comme qui auroit doré quelque piece d'argent, & que la dorure ne fust que par le dessus.

Tenebreuses, sont les pierres ausquelles l'on ne peut

peut rien voir au trauers, comme on fait au cristal & au verre.

Terrestres, sont les matieres qui ne se peuuent ex-aler, ou sublimer par l'action du feu.

Triangle, est vne figure à trois coings.


Trochisques, sont figures rondes comme pilules & puis faittes plattes par vne compression faite sur la partie superieure.

Varenne, est vne terre communement de couleur rousse (qui tient quelque peu de la nature argileuse) de laquelle on fait des moules pour toutes especes de fontes, & pour bastir les fourneaux & pour luter les vaisseaux de verre.

Visqueux vaut autant a dire comme gluant.

Vitrifier se dit des choses qui prennent polissement & lustre de verre, quand elles sont asprement chauffées dedens les fornaises.

F I N.






9
t, co.

3th A





EAU
X
ET
FONTEIN

